

ANG SIMBAHAN NI JESUKRISTO SA MGA SANTOS SA ULAHING MGA ADLAW • NOBYEMBRE 2018

Liahona

Mga Pakigpulong sa Kinatibuk-ang Komperensya

Jesukristo: Sentro sa
Atong Kinabuhi ug ang
Pangalan sa Simbahan

Bag-o nga Kurikulum ug
Eskedyul sa Dominggo
nga Magbalanse sa
Pagtuon sa Ebanghelyo
sa Panimalay ug sa
Simbahan

12 ka Bag-ong Templo
ang Gipahibalo





“Karong gabii ako kamong awhagon, uban sa tanang panghinaut sa akong kasingkasing, sa pag-ampo aron makasabut sa inyong espiritwal nga mga gasa—sa pag-ugmad, paggamit, ug pagpalapad kanila, gani sa mas labaw pa sukad. Inyong mausab ang kalibutan samtang inyo kining gibuhat. . . .

“Akong minahal nga mga sister, nagkinahanglan kami kaninyo! Kami ‘nagkinahanglan sa inyong kalig-on, sa inyong pagkakabig, sa inyong konbiksyon, sa inyong abilidad sa pagpangulo, sa inyong kaalam, ug sa inyong mga tingog.’ Kami dili makapundok sa Israel kon wala kamo.

“Gihigugma ko kamo ug nagpasalamat kaninyo ug karon mopanalangin kaninyo sa abilidad sa pagbiya sa kalibutanong mga butang samtang kamo motabang niining importante ug dinaliang buhat. Kon magkahiusa mabuhat nato ang tanang gikinahanglang ipabuhat sa atong Langitnong Amahan aron sa pag-andam sa kalibutan alang sa Ikaduhang Pag-anhi sa Iyang Pinalangga nga Anak.”

Coming Full Circle,
ni Jenedy Paige

Mga Sulod Nobyembre 2018

Volume 21 • Numero 11

Sesyon sa Sabado sa Buntag

- 6 **Pasiuna nga Pakigpulong**
Presidente Russell M. Nelson
- 8 **Lig-on ug Malungtarong Pagkakabig ngadto sa Langitnong Amahan ug kang Ginoong Jesukristo**
Elder Quentin L. Cook
- 12 **Ihangad ang Imong Ulo ug Pagmaya**
M. Joseph Brough
- 15 **Nagpahimutang sa Tukuranan sa usa ka Mahinungdanon nga Buhat**
Elder Steven R. Bangerter
- 18 **Ayaw Kabalaka**
Elder Ronald A. Rasband
- 21 **Paghiusa diha kang Kristo sa Tanang mga Butang**
Elder David A. Bednar
- 25 **Kamatuoran ug ang Plano**
Presidente Dallin H. Oaks

Sesyon sa Sabado sa Hapon

- 28 **Ang Pagpaluyo sa mga Opisyaes sa Simbahan**
Presidente Henry B. Eyring
- 30 **Lig-on ug Makanunayon diha sa Hugot nga Pagtuo kang Kristo**
Elder D. Todd Christofferson
- 34 **Dali, Paminaw sa Tingog sa usa ka Propeta**
Bishop Dean M. Davies
- 37 **Usa ra Diha kang Kristo**
Elder Ulisses Soares
- 40 **Ang Atong Campfire sa Hugot nga Pagtuo**
Elder Gerrit W. Gong
- 43 **Tanan Kinahanglan Gayud Modala diha Kanila sa Ngalan nga Gihatag sa Amahan**
Elder Paul B. Pieper
- 46 **Motuo, Mohigugma, Mobuhat**
Elder Dieter F. Uchtdorf

Kinatibuk-ang Sesyon sa mga Babaye

- 50 **Alang Kaniya**
Joy D. Jones
- 52 **Balaan nga Pagkawala Matagbaw**
Michelle D. Craig
- 55 **Ang Kalipay sa Dili Hinakog nga Pagserbisyo**
Cristina B. Franco
- 58 **Kababayan-an ug Pagkat-on sa Ebanghelyo diha sa Panimalay**
Presidente Henry B. Eyring
- 61 **Mga Ginikanan ug mga Bata**
Presidente Dallin H. Oaks

- 68 **Ang Partisipasyon sa mga Sister sa Pagpundok sa Israel**
Presidente Russell M. Nelson

Sesyon sa Dominggo sa Buntag

- 71 **Ang Panan-awon sa Katubsananan sa mga Patay**
Presidente M. Russell Ballard
- 74 **Pagkahimong usa ka Magbalantay**
Bonnie H. Cordon
- 77 **Ang Pangalagad sa Pagpasig-uli (Reconciliation)**
Elder Jeffrey R. Holland
- 80 **Ang Papel sa Basahon ni Mormon diha sa Pagkakabig**
Elder Shayne M. Bowen
- 83 **Nasamdan**
Elder Neil L. Andersen
- 87 **Ang Sakto nga Ngalan sa Simbahan**
Presidente Russell M. Nelson

Sesyon sa Dominggo sa Hapon

- 90 **Sulayi, Sulayi, Sulayi**
Presidente Henry B. Eyring
- 93 **Ang Amahan**
Brian K. Ashton
- 97 **Pagdala ngari Kanato sa Ngalan ni Jesukristo**
Elder Robert C. Gay
- 101 **Buot Ka Bang Maayo?**
Elder Matthew L. Carpenter
- 104 **Magpili Kamo Niining Adlaw**
Elder Dale G. Renlund
- 107 **Karon ang Panahon**
Elder Jack N. Gerard
- 110 **Pagbantay sa mga Kalag**
Elder Gary E. Stevenson
- 113 **Ang Mahimong Labing Dalaygon nga mga Santos sa Ulahing mga Adlaw**
Presidente Russell M. Nelson
- 64 **Mga General Authority ug Kinatibuk-ang mga Opisyaes sa Ang Simbahan ni Jesukristo sa mga Santos sa Ulahing mga Adlaw**
- 115 **Indeks sa mga Istorya sa Komperensya**
- 116 **Mga Balita sa Simbahan**
- 121 **Dali, Sunod Kanako—Alang sa Elders Quorum ug Relief Society**



Ang Ika-188 nga Semiannual nga Kinatibuk-ang Komperensya

Sabado sa Buntag, Oktubre 6, 2018, Kinatibuk-ang Sesyon

Conducting: Presidente Henry B. Eyring
Pangbukas nga pag-ampo: Elder Craig A. Cardon
Panapos nga pag-ampo: Elder Adilson de Paula Parrella
Ang musika gidalit sa Tabernacle Choir sa Temple Square; Mack Wilberg ug Ryan Murphy, mga direktor; Brian Mathias ug Richard Elliott, mga organista: “Guide Us, O Thou Great Jehovah,” *Hymns*, nu. 83; “The Morning Breaks,” *Hymns*, nu. 1, arr. Wilberg; “If I Listen with My Heart,” DeFord, arr. Murphy; “High on the Mountain Top,” *Hymns*, nu. 5; “Sundon Ko ang Plano sa Dios,” *Songbook sa mga Bata*, 86, arr. Hofheins; “Come, Come, Ye Saints,” *Hymns*, nu. 30, arr. Wilberg.

Sabado sa Hapon, Oktubre 6, 2018, Kinatibuk-ang Sesyon

Conducting: Presidente Dallin H. Oaks
Pangbukas nga pag-ampo: Sharon L. Eubank
Panapos nga pag-ampo: Elder Joni L. Koch
Ang musika gidalit sa gitipon nga choir gikan sa Provo Missionary Training Center; Ryan Eggett ug Elmo Keck, mga direktor; Linda Margetts ug Bonnie Goodliffe, mga organista: “Hark, All Ye Nations!” *Hymns*, nu. 264, arr. Schank; medley: “Magmaisugon Ko,” *Songbook sa mga Bata*, 85, ug “Ang Simbahan ni Jesukristo,” *Songbook sa mga Bata*, 48, arr. Warby; “Gitawag sa Pagserbisyo,” *Songbook sa mga Bata*, nu. 94–95; “Hope of Israel,” *Hymns*, nu. 259, arr. Schank.

Sabado sa Gabii, Oktubre 6, 2018, Kinatibuk-ang Sesyon sa mga Babaye

Conducting: Jean B. Bingham
Pangbukas nga pag-ampo: Memnet Lopez
Panapos nga pag-ampo: Jennefer Free
Ang musika gidalit sa usa ka young women choir gikan sa mga stake sa Pleasant Grove, Utah; Tracy Warby, direktor; Bonnie Goodliffe, organista: “Duol, Kamo mga Anak sa Ginoo,” *Mga Himno ug mga Awit sa mga Bata*, nu. 4, arr. Warby; “This Is the Christ,” Faust, Pinborough, ug Moody; “Karon Kita Maglipay,” *Mga Himno ug mga Awit sa mga Bata*, nu. 32; “Among Dad-on sa Kalibutan ang Iyang Kamatuoran,” *Songbook sa mga Bata*, 92–93, arr. Warby.

Dominggo sa Buntag, Oktubre 7, 2018, Kinatibuk-ang Sesyon

Conducting: Presidente Henry B. Eyring
Pangbukas nga pag-ampo: Elder Allan F. Packer
Panapos nga pag-ampo: Elder Donald L. Hallstrom
Ang musika gidalit sa Tabernacle Choir; Mack Wilberg, direktor; Richard Elliott ug Andrew Unsworth, mga organista: “Rejoice, the Lord Is King!” *Hymns*, nu. 66; “Manunubos sa Israel,” *Mga Himno ug mga Awit sa mga Bata*, no. 5, arr. Wilberg; “Choose the Right,” *Hymns*, nu. 239, arr. Wilberg; “Salamat, O Dios sa Propeta,” *Mga Himno ug mga Awit sa mga Bata*, nu. 36; “His Voice as the Sound,” American folk hymn, Walker, arr. Wilberg; “It Is Well with My Soul,” Spafford ug Bliss, arr. Wilberg.

Dominggo sa Hapon, Oktubre 7, 2018, Kinatibuk-ang Sesyon

Conducting: Presidente Dallin H. Oaks
Pangbukas nga pag-ampo: Elder Gary B. Sabin
Panapos nga pag-ampo: Elder Michael John U. Teh
Ang musika gidalit sa Tabernacle Choir; Mack Wilberg ug Ryan Murphy, mga direktor; Andrew Unsworth ug Brian Mathias, mga

organista: “In Hymns of Praise,” *Hymns*, nu. 75, arr. Murphy; “I Believe in Christ,” *Hymns*, nu. 134, arr. Wilberg; “Glory to God on High,” *Hymns*, nu. 67; “Our Prayer to Thee,” Nelson ug Parry, arr. Wilberg.

Ang mga Pakigpulong sa Komperensya nga Anaa

Sa pag-access sa mga pakigpulong sa kinatibuk-ang komperensya diha sa Internet sa daghang mga pinulongan, bisitaha ang conference.lds.org ug pagpili og pinulongan. Ang mga pakigpulong anaa usab sa Gospel Library mobile app. Ang impormasyon sa kinatibuk-ang komperensya sa format nga ma-access sa mga miyembro nga may kakulangan, anaa sa disability.lds.org.

Anaa sa Hapin

Atubangan: *Kahayag sa Kalibutan* (2015), ni Walter Rane, dili mahimong pakopyahan. Luyo: Litrato pinaagi ni Cody Bell.

Litrato sa Komperensya

Ang mga litrato diha sa Siyudad sa Salt Lake gilitratuhan ni Cody Bell, Janae Bingham, Mason Coberly, Weston Colton, Brian Nicholson, Leslie Nilsson, Matt Reier, ug Christina Smith.



NOBYEMBRE 2018 VOL. 21 NU. 11
LIAHONA 14853 853

Internasyonal nga magasin sa Ang Simbahan ni Jesukristo sa mga Santos sa Ulahing mga Adlaw nga gimprinta sa Cebuano

Ang Unang Kapangulohan: Russell M. Nelson,
Dallin H. Oaks, Henry B. Eyring

Korum sa Napulog Duha ka mga Apostoles:

M. Russell Ballard, Jeffrey R. Holland, Dieter F. Uchtdorf,
David A. Bednar, Quentin L. Cook, D. Todd Christofferson,
Neil L. Andersen, Ronald A. Rasband, Gary E. Stevenson,
Dale G. Renlund, Gerrit W. Gong, Ulisses Soares

Editor: Randy D. Funk

Mga Advisor: Brian K. Ashton, Randall K. Bennett, Becky Craven, Sharon Eubank, Cristina B. Franco, Donald L. Hallstrom, Larry S. Kacher, Erich W. Kopischke, Lynn G. Robbins

Tigdumalang Direktor: Richard I. Heaton

Direktor sa mga Magasin sa Simbahan: Allan R. Loyborg

Business Manager: Garff Cannon

Tigdumalang Editor: Adam C. Olson

Luyo-luyo so Tigdumalang Editor: Ryan Carr

Assistant sa Publikasyon: Francisca Olson

Team sa Pagsulat ug Pag-edit: Maryssa Dennis, David Dickson, David A. Edwards, Matthew D. Flittin, Lori Fuller, Garrett H. Garff, Jon Ryan Jensen, Charlotte Larcabal, Michael R. Morris, Eric B. Murdock, Sally Johnson Odekirk, Joshua J. Perkey, Jan Pinborough, Richard M. Romney, Mindy Selu, Chakell Wardleigh, Marissa Widdison

Tigdumalang Direktor sa Art: J. Scott Knudsen

Direktor sa Art: Tadd R. Peterson

Team sa Pagdesinyo: Jeanette Andrews, Fay P. Andrus, Mandie Bentley, C. Kimball Bott, Thomas Child, David Green, Colleen Hincley, Eric P. Johnsen, Susan Lofgren, Scott M. Mooy, Emily Chieko Remington, Mark W. Robison, Brad Teare, K. Nicole Walkenhorst

Coordinador sa Intellectual Property: Collette Nebeker Aune

Tigdumala sa Produksyon: Jane Ann Peters

Team sa Produksyon: Ira Glen Adair, Julie Burdett, Thomas G. Cronin, Bryan W. Gygi, Ginny J. Nilson, Marissa M. Smith

Prepress: Joshua Dennis, Ammon Harris

Direktor sa Pag-impronta: Steven T. Lewis

Direktor sa Pagpang-apud-apod: Troy K. Barker

Paghubad: Shahlo Alinsug

Ipadala ang subskripsyon, mga pangutana, ug mga taho ngadto sa Dateline Philippines sa Liahona, The Church of Jesus Christ of Latter-day Saints, Temple Drive, Greenmeadows Subdivision, Quezon City 1110, Metro Manila, Philippines o sa P. O. Box 1505, Ortigas Center, Emerald Avenue, Pasig 1600, Metro Manila, Philippines. Numero sa telepono 635-9183. Presyo sa subskripsyon sa Pilipinas, P48 matag tuig, P4.00 matag gula, gawas sa mga espesyal nga isyu.

Sa pag-subscribe ug pag-renew sa magasin, bisitahi ang <http://store.lds.org>. Paliug ayaw kalimti sa pagbutang sa imong ward/branch isip address aya ipadala ang imong subskripsyon.

Kon dunay mga pangutana mahitungod sa subskripsyon paliug tawag sa Church's Global Service Center (GSC) sa 1800-8-680-3950 alang sa mga subscriber sa PLDT ug Smart o 1800-1-441-0687 alang sa mga subscriber sa Globe.

Isumiter ang mga manuskrito ug mga pangutana online sa liahona.lds.org; kon ipadala ngadto sa Liahona, Room 2420, 50 East North Temple Street, Salt Lake City, UT 84150-0024, USA; o i-e-mail sa: liahona@ldschurch.org

Liahona (usa ka termino sa Basahon ni Mormon nga nagpasabut nga "kompas o direktor") gimantala sa Albanian, Armenian, Bislama, Bulgarian, Cambodian, Cebuano, Chinese, Chinese (simplified), Croatian, Czech, Danish, Dutch, English, Estonian, Fijian, Finnish, French, German, Greek, Hungarian, Icelandic, Indonesian, Italian, Japanese, Kiribati, Korean, Latvian, Lithuanian, Malagasy, Marshallese, Mongolian, Norwegian, Polish, Portuguese, Romanian, Russian, Samoan, Slovenian, Spanish, Swahili, Swedish, Tagalog, Tahitian, Thai, Tongan, Ukrainian, Urdu, ug Vietnamese. (Ang kasagad magkalahi sa pinulongan.)

© 2018 sa Intellectual Reserve, Inc. Tanang mga katungod gigahin. Gigamit sa Ang Simbahan ni Jesukristo sa mga Santos sa Ulahing mga Adlaw nga may pagtugot. Gi-impronta sa Tinipong Bansa sa Amerika. Gi-impronta sa Pilipinas.

Copyright nga impormasyon: Gawas kon sa laing paagi gipasabut, ang mga indibidwal mahimong mokopya sa materyal gikan sa Liahona alang sa ilang personal, dili pangkomersyo nga paggamit (lakip sa mga calling sa Simbahan). Kini nga katungod mahimong kuhaon pag-usab sa bisan unsang panahon. Ang biswal nga material dili mahimong kopyahan kon kini adunay mga pagdili diha sa linya sa kredito sa maong artwork. Ang copyright nga mga pangutana kinahanglan ipadala ngadto sa Intellectual Property Office, 50 E. North Temple St., FL 13, Salt Lake City, UT 84150, USA; email: cor-intellectualproperty@ldschurch.org.

For Readers in the United States and Canada:

November 2018 Vol. 21 No. 11. LIAHONA (USPS 311-480) Cebuano (ISSN 1096-5114) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send all UAA to CFS (see DNMM 507.1.5.2).

NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.



Indeks sa Mamumulong

Andersen, Neil L., 83
Ashton, Brian K., 93
Ballard, M. Russell, 71
Bangerter, Steven R., 15
Bednar, David A., 21
Bowen, Shayne M., 80
Brough, M. Joseph, 12
Carpenter, Matthew L., 101
Christofferson, D. Todd, 30
Cook, Quentin L., 8
Cordon, Bonnie H., 74
Craig, Michelle D., 52
Davies, Dean M., 34
Eyring, Henry B., 28, 58, 90
Franco, Cristina B., 55
Gay, Robert C., 97
Gerard, Jack N., 107
Gong, Gerrit W., 40
Holland, Jeffrey R., 77
Jones, Joy D., 50
Nelson, Russell M., 6, 68, 87, 113
Oaks, Dallin H., 25, 61
Pieper, Paul B., 43
Rasband, Ronald A., 18
Renlund, Dale G., 104
Soares, Ulisses, 37
Stevenson, Gary E., 110
Uchtdorf, Dieter F., 46

Indeks sa Hilisgutan

Balay ni Israel, 68
Basahon ni Mormon, 34, 68, 80
Buhat sa templo, 68, 113
Bunyang, 43
Diosnong kinaiya, 68
Ehemplo, 113
Espiritu Santo, 18, 43, 80, 93
Family home evening, 8
Grasya, 40, 52, 97
Gugma, 18, 37, 40, 46, 50, 55, 58, 61, 74, 77, 90, 93, 97, 110
Gugmang Putli, 55, 58, 90
Hingpit nga kalipay, 12, 40, 46
Hugot nga pagtuo, 6, 15, 18, 21, 25, 30, 40, 52, 83, 90, 104, 113
Ilgapahulay, 8
Indibidwal nga bili, 74, 97
Jesukristo, 6, 8, 12, 15, 18, 21, 25, 30, 34, 37, 40, 43, 46, 50, 52, 55, 58, 71, 74, 77, 80, 83, 87, 90, 93, 97, 101, 104, 107, 110, 113
Joseph Smith, 34, 52, 80, 107
Kabatan-onan, 74
Kabubut-on, 25, 104
Kahadlok, 18, 101
Kahingpitan, 40
Kalibutan sa espiritu, 71
Kalinaw, 18, 77, 83
Kalisdanan, 12, 18, 30, 46, 55, 71, 83, 101
Kamatayan, 71
Kamatuoran, 25, 107
Kinabuhi sa wala pa dinhi sa yuta, 93
Kurikulum, 6, 8, 113
Langitnong Amahan, 25, 40, 93, 104
Media, 68
Mga Bata, 15, 25, 61
Ngalan sa Simbahan, 87, 113
Pag-aghat, mga, 52
Pag-ampo, 58
Pag-fellowship, 37

Paghinulsol, 25, 101, 104
Pagkaayo, 46, 83, 97, 101
Pagkabanhaw, 71, 93
Pagkadisipulo, 12, 43, 46, 52
Pagkaginikanan, 15, 61
Pagkainahan, 58, 61, 68
Pagkakabig, 8, 21, 30, 37, 80
Pagkamabination, 61
Pagkamamugnaon, 40
Pagkat-on, 58, 113
Paglahutay, 30, 83
Paglaum, 46, 90
Pagpaaktibo, 110
Pagpadayag, 18, 34, 80
Pagpahiuli, 87
Pagpamatuod, 80
Pagpangukod, 83
Pagpanghukom, 97
Pagpasaylo, 12, 77
Pagpasig-uli, 77
Pagpundok sa Israel, 21, 68, 74, 80
Pagsulay, mga, 83, 90
Pagsunod sa propeta, 34
Pagtudlo, 15, 58, 68
Pagtuon sa kasulatan, 8, 37, 58
Pakigsaad, mga, 30, 43, 80, 107
Pamilya, 6, 8, 15, 25, 58, 61, 113
Panaghigala, 37, 74
Pangalagad, 37, 40, 46, 50, 68, 74, 77, 97, 110
Panglantaw, 68, 107
Panimalay, 6, 8, 15, 18, 21, 58, 113
Plano sa kaluwasan, 25, 61, 71, 93, 104
Prayoridad, mga, 107
Propeta, mga, 18, 34
Relief Society, 68
Retensyon sa kinabig, 37
Sakrament, 8, 43, 90
Sakripisyo, 55
Serbisyo, 37, 40, 50, 52, 55, 74, 97
Teknolohiya, 61
Templo, mga, 18, 34, 113
Tradisyon, mga, 15



Mga importanting panghitabo sa Ika-188 nga Semiannual nga Kinatibuk-ang Komperensya

Sa makausa pa, dagko nga mga kausaban ang gipahibalo sa kinatibuk-ang komperensya. Samtang ang mga pahibalo lahi niining higayuna, ang mga katuyoan luyo niini nagpabilin nga mao ra giha-pon: Ang propeta sa Dios mibati sa kadinalian sa pag-andam kanato alang sa Ikaduhang Pag-anhi sa Ginoo ug nagdapit kanato sa paglig-on sa atong pagtuo sa Langitnong Amahan ug sa Iyang Anak, si Jesukristo.

Ania ang pipila lang ka importanting mga pagdapit ug mga saad nga gihatagan og gibug-aton ni Presidente Russell M. Nelson panahon sa komperensya.

Himoon ang Panimalay nga Mas Balaan

Sa iyang pangbukas nga pakig-pulong, si Presidente Nelson miduso sa panginahanglan sa paghimo og mga kausaban sa atong kinabuhi nga mohimo sa atong mga panimalay nga sentro sa pagkat-on sa ebanghelyo. “Panahon na alang sa *nakasentro sa panimalay nga Simbahan*, gisuportahan sa unsa ang gipangbuhat sulod sa

atong branch, ward, ug stake nga mga gambalay [building].”

- Basaha ang gisugyot nga mga kausaban diha sa panimalay ug ang mga kausaban sa simbahan nga nagsuporta niini (tan-awa sa pahina 8).
- Pangita og dugang nga impormasyon diha sa “Ang mga Kausaban Makatabang sa Pagbalanse sa Instruksyon sa Ebanghelyo diha sa Panimalay ug sa Simbahan” (pahina 117).

“Pagbiya sa Kalibutanong mga Butang”

Gidapit ni Presidente Nelson ang mga sister sa kinatibuk-ang sesyon sa mga babaye sa pag-apil sa “*labing dakong* kawsa . . . sa yuta karon.” Misaad siya, “Kon magkahiusa mabuhat nato ang tanang gikinahanglang ipabuhat sa atong Langitnong Amahan aron sa pag-andam sa kalibutan alang sa Ikaduhang Pag-anhi [ni Jesukristo].”

- Basaha ang upat ka pagdapit ni Presidente Nelson ngadto sa mga sister (tan-awa sa pahina 68).

“Pagpahiuli sa Saktong Ngalan sa Simbahan sa Ginoo”

Si Presidente Nelson mitawag sa mga miyembro sa pagtawag sa Simbahan sa Manluluwas pinaagi sa ngalan nga gihatag sa Manluluwas niini. “Mosaad ko kaninyo nga kon kita mobuhat sa atong labing maayo sa pagpahiuli sa saktong ngalan sa Simbahan sa Ginoo, Siya kansang Simbahan mao kini mobu-bu sa Iyang gahum ug mga panalangin diha sa mga ulo sa mga Santos sa Ulahing mga Adlaw, sa mga paagi nga wala nato makita sukad.”

- Basaha ang instruksyon ni Presidente Nelson mahitungod sa ngalan sa Simbahan (tan-awa sa pahina 87).

“Moadto sa Iyang Balaan nga Balay”

Gitapos ni Presidente Nelson ang komperensya uban sa pagpahibalo sa 12 ka bag-ong templo ug usa ka pagdapit nga “regular nga . . . moadto sa Iyang balaan nga balay.” Miingon siya, “Ako mosaad kaninyo nga ang Ginoo mohatag og mga milagro nga Siya nasayud nga inyong gikinahanglan samtang kamo naghimo og mga sakripisyo sa pagserbisyo ug pagsimba diha sa Iyang mga templo.”

- Tan-awa kon asa ipahimutang ang gipahibalo nga mga templo (tan-awa sa mga pahina 113, 116).





Ni Presidente Russell M. Nelson


Pasiuna nga Pakigpulong

Panahon na alang sa nakasentro sa panimalay nga Simbahan, gisuportahan sa unsa ang gipangbuhat sulod sa atong branch, ward, ug stake nga mga gambalay [building].

Akong minahal nga mga kaigso-onan, naghinam-hinam kami nga makauban kamo og balik niining Oktubre nga kinatibuk-ang komperensya sa Simbahan. Among ipadangat ang among kinasingkasing nga paghangup sa matag usa kaninyo. Mapasalamaton kaayo kami sa inyong pagpaluyo nga mga pag-ampo. Among nabati ang ilang epekto. Salamat!

Mapasalamaton kami alang sa inyong dakong mga paningkamot sa pagsunod sa tambag nga gihatag sa kinatibuk-ang komperensya unom ka bulan na ang milabay. Ang mga

kapangulohan sa stake sa tibuok kalibutan nagtinguha og pagpadayag nga gikinahanglan aron sa pag-organisar og usab sa mga korum sa mga elder [elders quorums]. Ang mga lalaki niadto nga mga korum uban sa atong mapahinunguron nga mga sister sa Relief Society makugihon nga nagtrabaho aron sa pagpangalagad sa atong mga igsoong lalaki ug mga babaye sa mas taas, mas balaan nga paagi. Nadasig kami sa inyong kaayo ug talagsaong mga paningkamot sa pagdala sa gugma sa Manluluwas ngadto sa inyong mga pamilya, mga silingan, ug mga higala



ug aron sa pagpangalagad kanila sama sa Iyang buhaton.

Sukad sa komperensya niadtong Abril, si Sister Nelson ug ako nakighimamat sa mga miyembro sa upat ka kontinente ug sa mga isla sa kadagatan. Gikan sa Jerusalem hangtud sa Harare, gikan sa Winnipeg hangtud sa Bangkok, among nasinati ang inyong talagsaong hugot nga pagtuo ug ang kalig-on sa inyong mga pagpamatuod.

Malipayon kaayo kami sa gidaghanon sa atong mga kabatan-onan nga misalmut sa grupo sa kabatan-onan sa Ginoo aron sa pagtabang sa pagpundok sa nagkatibulaag nga Israel.¹ Nagpasalamat kami kaninyo! Ug samtang kamo nagpadayon sa pagsunod sa akong mga pagdapit nga gitanyag sa atong kinatibuk-ang debosyonal sa mga kabatan-onan, kamo nagpakita og sumbanan aron sundon namong tanan.





Ug kadako sa kalainan nga gibuhathininyong mga kabatan-onan!

Sa bag-ohay'ng katuigan, kami diha sa tigdumalang konseho sa Simbahan naningkamot nga matubag ang usa ka importanting pangutana: unsaon nato pagdala sa ebanghelyo sa iyang yano nga kalunsay ug ang mga ordinansa uban sa ilang mahangturong epekto, ngadto sa *tanang* mga anak sa Dios?

Isip mga Santos sa Ulahing mga Adlaw, naandan na nato nga maghunahuna sa “simba” isip usa ka butang nga mahitabo sa atong mga meetinghouse, nga gisuportahan sa unsa ang gipangbuhathat sa panimalay. Kinahanglan kita og kausaban niini nga sundanan. Panahon na alang sa *nakasentro sa panimalay nga Simbahan*, gisuportahan sa unsa ang gipangbuhathat sulod sa atong branch, ward, ug stake nga mga gambalay [building].

Samtang ang Simbahan magpadayon sa pagdako sa tibuok kalibutan, daghang mga miyembro ang nagpuyo diin wala kitay mga chapel—ug tingali wala gihapon sa dugay pa nga panahon. Nakahinumdom ko og usa ka pamilya kinsa, tungod niana nga mga sitwasyon, gikinahanglan nga mag-abut sa ilang panimalay. Akong gipangutana ang inahan kon giganahan ba siya nga mosimba sa iyang kaugalingon nga panimalay. Siya mitubag, “Ganahan ko niini! Ang akong bana migamit na og arang-arang nga pinulongan sa among panimalay karon, nasayud nga siya mopanalangin sa sakrament dinhi matag Dominggo.”

Ang dugay na nga katuyoan sa Simbahan mao ang pagtabang sa tanang mga miyembro nga molambo ang ilang hugot nga pagtuo sa atong Ginooong Jesukristo ug sa Iyang Pag-ula,

sa pagtabang kanila sa pagbuhathat ug pagtuman sa ilang mga pakigsaad uban sa Dios, ug aron sa paglig-on ug pagbugkos [seal] sa ilang mga pamilya. Niining makalibug nga kalibutan karon, dili kini sayon. Ang kaaway paspas kaayong mipalapad sa iyang pag-atake sa hugot nga pagtuo ug ngari kanato ug sa atong mga pamilya. Aron makasugakod sa espirituhanon nga paagi, nanginahanglan kita og pangalkontra nga mga estratehiya ug mga plano sa pagpangandam. Tungod niini, gusto namong mohimo og kausaban sa organisasyon nga mas mopalig-on pa sa atong mga miyembro ug sa ilang mga pamilya.

Sa daghang mga katuigan, ang mga lider sa Simbahan nagsige og trabaho alang sa usa ka integrated nga kurikulum aron sa paglig-on sa mga pamilya ug mga indibidwal pinaagi sa usa ka

nakasentro sa panimalay ug gisuportahan sa Simbahan nga plano sa pagkat-on sa doktrina, paglig-on sa pagtuo, ug pag-ugmad og mas maayo nga personal nga pagsimba. Ang atong mga paningkamot niining bag-ohay lang nga mga katuigan sa pagbalaan sa Igpapahulay—sa paghimo niini nga usa ka kahimut-an ug usa ka personal nga timaan ngadto sa Dios sa atong gugma alang Kaniya—matabangan niini nga mga kausaban nga amo karong ipaila.

Karong buntaga among ipahibalo ang usa ka bag-ong balanse ug koneksyon tali sa pagtudlo sa ebanghelyo diha sa panimalay ug sa Simbahan. Matag usa kanato responsable alang sa atong indibidwal nga espiritwal nga paglambo. Ug ang mga kasulatan mipasabut nga ang mga ginikanan ang adunay nag-unang responsibilidad sa pagtudlo sa doktrina ngadto sa ilang mga anak.² Responsibilidad sa Simbahan ang pag-abag sa matag miyembro sa balaanong gipahimutang nga tumong sa pagpalambo sa iyang kahibalo sa ebanghelyo.

Si Elder Quentin L. Cook mopsabut karon niining importante nga mga kausaban. Ang tanang sakop sa Konseho sa Unang Kapangulohan ug Korum sa Napulog Duha ka mga Apostoles nagkahiusa sa pagpaluyo niini nga mensahe. Mapasalamaton kaming moila sa inspirasyon gikan sa Ginoo nga miimpluwensya sa paglambo sa mga plano ug mga pamaagi nga i-presentar ni Elder Cook.

Akong minahal nga mga kaigso-onan, ako nasayud nga ang Dios buhi! Si Jesus mao ang Kristo! Kini mao ang Iyang Simbahan nga Iyang gidumala pinaagi sa pagpanagna ug pagpadayag ngadto sa Iyang mapainubsanong mga sulugoon. Mopamatuod ko sa pangalan ni Jesukristo, amen. ■

MUBO NGA MGA SULAT

1. Tan-awa ang Russell M. Nelson ug Wendy W. Nelson, “Paglaum sa Israel” (tibuok kalibutan nga debosyonal sa kabatan-onan, Hunyo 3, 2018), HopeofIsrael.lds.org.
2. Tan-awa sa Doktrina ug mga Pakigsaad 93:40; Moises 6:58–62.



Ni Elder Quentin L. Cook

Sa Korum sa Napulog Duha ka mga Apostoles

Lig-on ug Malungtarong Pagkakabig ngadto sa Langitnong Amahan ug kang Ginoong Jesukristo

Ang atong katuyoan mao ang pagbalanse sa mga kasinatian diha sa Simbahan ug sa panimalay sa paagi nga makapalambo gayud sa pagtuo ug espiritwalidad ug makapalig-on sa pagkakabig.

Sama sa nindot ug maayong pagkasulti bag-ohay lang ni Presidente Russell M. Nelson, ang mga lider sa Simbahan nagtrabaho sa dugayng panahon “sa *nakasentro sa panimalay ug gisuportahan sa Simbahan* nga plano sa pagkat-on sa doktrina, paglig-on sa pagtuo, ug pag-ugmad og mas maayo nga personal nga pagsimba.” Gipahibalo dayon ni Presidente Nelson ang usa ka kausaban aron makab-ot ang “bag-ong balanse tali sa pagtudlo sa ebanghelyo diha sa panimalay ug sa Simbahan.”¹

Aron matuman kining mga katuyoan—nga gihulagway ug ubos sa direksyon ni Presidente Russell M. Nelson ug subay sa desisyon sa Konseho sa Unang Kapangulohan ug Korum sa Napulog Duha ka mga Apostoles—ang iskedyul sa miting sa Dominggo usbon sa mosunod nga mga paagi, sugod sa Enero 2019.

Iskedyul sa Miting sa Dominggo

Ang mga miting sa Simbahan sa Dominggo maglangkob og 60 minutos nga sakrament miting kada Dominggo, nakapunting sa Manluluwas, sa ordinansa sa sakrament, ug espiritwal nga mga mensahe. Human sa panahon sa pag-adto sa mga klase, ang mga miyembro sa Simbahan motambong og 50 minutos nga klase nga magpuli-puli kada Dominggo:

- Ang Sunday School ipahigayon sa una ug ikatulong mga Dominggo sa bulan.
- Ang mga miting sa mga korum sa Priesthood, Relief Society, ug Young Women ipahigayon sa ikaduha ug ikaupat nga mga Dominggo.
- Ang mga miting sa ikalimang Dominggo pagahimoon ubos sa direksyon sa bishop.

Ang Primary ipahigayon kada semana atol niining parehong higayon nga 50 minutos ug maglakip sa panahon sa pagkanta ug mga klase.

Kalabut sa iskedyul sa miting sa Dominggo, ang senior nga mga lider sa Simbahan nahibalo sulod sa daghang katuigan nga alang sa pipila sa atong minahal nga mga miyembro, ang tulo ka oras nga iskedyul sa Dominggo mahimong lisud. Tinuod gayud kini alang sa mga ginikanan nga dunay gagmayng mga anak, mga bata sa Primary, mga miyembro nga tigulang na, bagong mga kinabig, ug uban pa.²

Pero dunay mas labaw pa niining kausaban kay sa pagpamubo lang sa iskedyul sa meetinghouse sa Dominggo. Si Presidente Nelson miila uban sa pasalamat kon unsa na kadako ang nakab-ot isip resulta sa inyong kamatinud-anon sa miaging mga pagdapit. Siya ug ang tibuok kapangulohan sa Simbahan nagtinguha sa paghatag og dugang kalipay sa ebanghelyo—ngadto sa mga ginikanan, mga anak, kabatan-onan, mga single, mga tigulang, bag-ong mga kinabig, ug kad-tong mga tawo nga gitudloan sa mga misyonaryo—pinaagi sa nakasentro sa panimalay, gisuportahan sa Simbahan, nga balanse nga paningkamot. Ang mga katuyoan ug mga panalangin nga may kalabutan niining kausaban ug uban pang bag-ong mga kausaban naglakip sa mosunod:

- Paglig-on sa pagkakabig ngadto sa Langitnong Amahan ug kang Ginoong Jesukristo ug paglig-on sa pagtuo diha Kanila.
- Paglig-on sa mga indibidwal ug mga pamilya pinaagi sa nakasentro sa panimalay, gisuportahan sa Simbahan nga kurikulum nga makatampo sa malipayong pagsunod sa ebanghelyo.
- Pagtahud sa adlaw nga Igpapahulay, uban ang pagpunting sa ordinansa sa sakrament.
- Pagtabang sa tanang anak sa Langitnong Amahan sa duha ka bahin sa tabil pinaagi sa misyonaryo nga buhat ug pagdawat sa mga ordinansa ug mga pakigsaad ug mga panalangin sa templo.



Nakasentro sa Panimalay, Gisuportahan sa Simbahan nga Pagkat-on sa Ebanghelyo

Kining iskedyul sa Dominggo motugot og dugang nga panahon alang sa home evening ug pagtuon sa ebanghelyo diha sa panimalay sa Dominggo o sa laing panahon sigun sa pilion sa mga indibidwal ug mga pamilya. Ang gabii sa kalihokan sa pamilya mahimong mapahigayon sa Lunes o sa laing higayon. Alang niini nga rason, ang mga lider kinahanglang magpadayon sa pagpabilin sa mga gabii sa Lunes nga walay mga miting ug mga kalihokan sa Simbahan. Hinoon, ang panahon nga igahin sa home evening, pagtuon sa ebanghelyo, ug mga kalihokan alang sa mga indibidwal ug mga pamilya mahimong maiskedyul sumala sa ilang tagsa-tagsa ka mga kahimtang.

Ang pagtuon sa ebanghelyo sa pamilya ug indibidwal diha sa panimalay mapalambo pa gayud pinaagi sa usa ka gitakdo nga kurikulum ug bag-ong *Dali, Sunod Kanako* nga kapanguhaan alang sa mga indibidwal ug mga pamilya nga gipahiangay sa unsay gitudlo diha sa Sunday School ug sa Primary.³ Sa Enero, ang mga klase sa Simbahan sa Sunday School alang sa kabatan-onan ug mga hamtong ug sa Primary magtuon sa Bag-ong Tugon. Ang bag-ong tun-anan sa panimalay nga *Dali, Sunod Kanako* nga kapanguhaan alang sa mga indibidwal ug mga pamilya—naglangkob usab sa Bag-ong Tugon—gituyo aron makatabang sa mga miyembro nga makakat-on sa ebanghelyo diha sa panimalay. Mipasa-but kini: “Kini nga kapanguhaan alang

sa matag indibidwal ug pamilya sa Simbahan. Gihimo kini aron matabangan [kita nga mas] makat-on sa ebanghelyo—[ato] man nga kaugalingon o uban sa [atong] pamilya. . . . Ang mga outline niining [bag-ong] kapanguhaan giorganisar sumala sa sinemana nga . . . iskedyul.”⁴

Ang bag-ong mga leksyon sa Primary nga *Dali, Sunod Kanako* nga gitudlo diha sa simbahan magsunod sa samang sinemana nga iskedyul. Ang mga klase sa Sunday School alang sa mga hamtong ug kabatan-onan sa una ug ikatulong mga Dominggo ipahiangay aron makasuporta kini sa bag-ong *Dali, Sunod Kanako* nga kapanguhaan sa panimalay. Sa ikaduha ug ikaupat nga mga Dominggo, ang mga hamtong sa Priesthood ug sa Relief Society magpadayon sa pagtuon sa mga pagtulun-an sa mga lider sa Simbahan, nga maghatag og gibug-aton sa kasamtangang mga mensahe sa modernong mga propeta.⁵ Ang young women ug Aaronic Priesthood young men magtuon sa mga hilisgutan sa ebanghelyo niana nga mga Dominggo.

Ang bag-ong kapanguhaan nga tun-anan sa panimalay naghatag og “Mga Ideya alang sa Pamilya nga Pagtuon sa Kasulatan ug Family Home Evening.”⁶ Ang mga outline alang sa kada semana naglangkob og makatabang nga mga ideya sa pagtuon ug mga kalihokan alang sa mga indibidwal ug mga pamilya. Ang *Dali, Sunod Kanako* nga kapanguhaan alang sa mga indibidwal ug mga pamilya adunay daghang hulagway nga makatabang usab sa pagpalambo sa



pagkat-on sa indibidwal ug sa pamilya, ilabi na sa mga bata.⁷ Kining bag-ong kapanguhaan ihatag sa matag panimalay inig-Disyembre niining tuiga.

Si Presidente Nelson, gikan sa iyang inisyal nga pakigpulong ngadto sa mga miyembro sa Simbahan niadtong Enero, miawhag kanato nga mangan-dam alang sa Ikaduhang Pag-anhi ni Jesukristo pinaagi sa paglakaw diha sa dalan sa pakigsaad.⁸

Ang mga kahintang sa kalibutan mas nagkinahanglan og lig-on nga pagkaka-big sa indibidwal ug makapalig-on nga pagtuo ngadto sa Langitnong Amahan ug ni Jesukristo ug sa Iyang Pag-ula. Ang Ginoo miandam kanato, pagtulun-an human sa usa ka pagtulun-an, alang sa mga panahon nga malisud nga ato karong giatubang. Sa bag-ohay nga katuigan, gigiyahan kita sa Ginoo sa pagtubag sa dunay kalabutan nga nag-unang mga problema, nga naglakip sa:

- Pagtahud sa adlaw nga Igpapahulay ug sa sagradong ordinansa sa sakrament nga gihatagan na usab og gibug-aton sulod sa miaging tulo ka tuig.
- Ubos sa direksyon sa bishop, ang gipalig-on nga mga korum sa mga elder ug mga Relief Society nagpunting sa katuyoan ug sa balaanong gipili sa Simbahan nga mga responsibilidad⁹ ug sa pagtabang sa mga

miyembro nga mohimo ug motuman sa sagradong mga pakigsaad.

- Ang pagpangalagad sa mas halangdon ug mas balaan nga paagi malipayong gihangup.
- Sa pagpunting sa nag-unang mga tumong sa sinugdanan, ang mga pakigsaad sa templo ug pagserbisyo sa family history nahimong dunay katuyoan nga bahin sa dalan sa pakigsaad.

Ang kausaban nga gipahibalo karong buntag lain na usab nga ehemplo sa giya alang sa mga hagit sa atong panahon.

Ang tradisyunal nga kurikulum sa Simbahan naghatag og gibug-aton sa kasinatian sa Simbahan sa Dominggo. Nasayud kita nga kon kita dunay mas maayo nga pagtudlo ug mas andam nga mga sakop sa klase sa espirital nga paagi, kita dunay mas maayong kasinatian sa Simbahan sa Dominggo. Bulahan kita nga kasagaran ang Espiritu nagpalambo ug nagpalig-on sa pagkakabig diha sa kahintang sa Simbahan.

Ang bag-ong nakasentro sa panimalay ug gisuportahan sa Simbahan nga kurikulum kinahanglan nga moimpluwensya sa mas gamhanang paagi sa pamilya nga relihiyusong pagsunod ug pamatasan ug personal nga relihiyusong pagsunod ug pamatasan. Nasayud kita sa espirital nga epekto ug sa lig-on ug malungtarong pagkakabig nga makabot diha sa kahintang sa panimalay. Mga katuigan na ang milabay, usa ka pagtuon ang naestablisar nga alang sa mga batan-ong lalaki ug babaye ang impluwensya sa Espiritu Santo kasagaran nag-uban sa indibidwal nga pagtuon sa kasulatan ug pag-ampo diha sa panimalay. Ang atong katuyoan mao ang pagbalanse sa mga kasinatian diha sa Simbahan ug sa panimalay sa paagi nga makapalambo gayud sa pagtuo ug espiritalidad ug makapalig-on sa pagkakabig ngadto sa Langitnong Amahan ug kang Ginoong Jesukristo.

Diha sa nakasentro sa panimalay, gisuportahan sa Simbahan nga bahin niini nga kausaban, dunay flexibility alang sa matag indibidwal ug pamilya sa pagtino sa mainampuong paagi kon

unsaon ug kanus-a kini maimplementar. Pananglitan, samtang makapanalangin kini og dako sa tanang pamilya, base sa lokal nga mga panginahanglan, tukma gayud kini alang sa mga young single adult, mga single adult, mga single parent, mga part-member family, bag-ong mga miyembro,¹⁰ ug uban pa nga magpundok gawas sa normal nga mga tulumanon sa pagsimba sa Dominggo aron malingaw sa pakig-uban sa usag usa nga angay sa ebanghelyo ug malig-on pinaagi sa dungan nga pagtuon sa nakasentro sa panimalay, gisuportahan sa Simbahan nga kapanguhaan. Makabot kini sa dili pormal nga paagi niadtong kinsa nagtinguha niini.

Sa daghang bahin sa kalibutan, ang mga tawo mopili nga magpabilin sa meetinghouse human sa normal nga iskedyl sa Dominggo aron malingaw sa sosyal nga mga relasyon. Walay butang niining gipahibalo nga kausaban nga mobalda niining talagsaon ug magantihon nga buluhaton sa bisan unsang paagi.

Aron matabangan ang mga miyembro nga maandam alang sa Igpapahulay, ang ubang mga ward nagpadala na og informative email, text, o mensahe sa social media sa tunga-tunga sa semana. Tungod niini nga kausaban, kuganon namong girekomendar kining matang sa komunikasyon. Kining mga pagdapit mopahinumdom sa mga miyembro bahin sa iskedyl sa miting sa Dominggo alang nianang semanaha, lakip na ang umaabut nga hilisgutan nga leksyon sa klase, ug mosuporta sa padayon nga panag-istoryahanay bahin sa ebanghelyo diha sa panimalay. Agig dugang, ang mga miting sa Dominggo alang sa mga hamtong mohatag usab og impormasyon sa pagkonektar sa simbahan ug pagtuon diha sa panimalay kada semana.

Ang sakrament miting ug ang panahon sa klase nagkinahanglan og mainampuong konsiderasyon sa pagsiguro nga ang espirital nga mga prayoridad mahatagan og gibug-aton labaw pa sa mga buluhatong administratiba. Pananglitan, ang mga pagpahibalo kasagaran mahimong buhaton diha sa

pagdapit sa tunga-tunga sa semana o sa giimprinta nga programa. Samtang ang sakrament miting kinahanglang dunay pangbukas ug panapos nga pag-ampo, ang ikaduhang miting kinahanglan lamang nga dunay panapos nga pag-ampo.¹¹

Sama sa nahisgutan sa sayo pa, ang bag-ong iskedyul sa Dominggo dili magsugod hangtud sa Enero 2019. Dunay pipila ka rason alang niini. Ang duha nga labing importante mao ang, una, aron dunay panahon nga maapud-apod ang *Dali, Sunod Kanako* nga kapanguhaan alang sa mga indibidwal ug mga pamilya ug, ikaduha, aron dunay panahon ang mga stake president ug mga bishop sa paghan-ay sa mga iskedyul sa miting, nga dunay tumong nga mas daghang ward nga makasimba sa mas sayo nianang adlaw.

Samtang nagtinguha og pagpadayag ang mga lider, ang giya nga nadawat sa miaging pipila ka tuig mao ang paglig-on sa sakrament miting, tauron ang adlaw nga Igpapahulay, ug awhagon ug tabangan ang mga ginikanan ug mga indibidwal sa paghimo sa ilang mga panimalay nga usa ka tinubdan sa espirituwal nga kalig-on ug napalambo nga pagtuo—usa ka dapit sa kalipay ug kamaya.

Talagsaong mga Panalangin

Unsa man ang buot ipasabut niining mga kausaban alang sa mga miyembro sa Ang Simbahan ni Jesukristo sa mga Santos sa Ulahing mga Adlaw? Mapasaligon kami nga ang mga miyembro mapanalanginan sa talagsaong mga paagi. Ang Dominggo mahimong usa ka adlaw sa pagkat-on ug pagtudlo sa ebanghelyo diha sa simbahan ug sa panimalay. Samtang ang mga indibidwal ug mga pamilya miapil sa mga family council, family history, pagpangalagad [ministering], pagserbisyo, personal nga pagsimba, ug malipayong panahon sa pamilya, ang adlaw nga Igpapahulay sa tinuod lang mamahimong usa ka kahimut-an.

Usa ka pamilya gikan sa Brazil mga sakop sa stake diin gisulayan ang bag-ong kapanguhaan sa panimalay nga *Dali, Sunod Kanako*. Ang amahan, si Fernando, nga usa ka returned

missionary, kinsa uban sa iyang asawa, nga si Nancy, mga ginikanan sa upat ka gagmayng mga anak, mireport: “Sa dihang ang programa nga *Dali, Sunod Kanako* gipaila sa among stake, naghinam-hinam gyud ko, ug naghunahuna ko ‘ang paagi sa among pagtuon sa mga kasulatan diha sa panimalay mausab.’ Nahitabo gayud kini sa akong panimalay, ug isip lider sa Simbahan nakita nako nga nahitabo kini sa ubang mga panimalay. . . . Nakatabang gayud kini kanamo nga mahisgutan og maayo ang mga kasulatan sa among panimalay. Ang akong asawa ug ako dunay mas lawom nga panabut mahitungod sa gitun-an nga hilisgutan. . . . Nakatabang kini namo . . . nakadugang sa among kahibalo sa ebanghelyo ug nakapalambo sa among pagtuo ug pagpamatuod. . . . Mopamatuod ko . . . nga nasayud ko nga dinasig kadto sa Ginoo aron ang padayon ug epektibong pagtuon sa mga baruganan ug mga doktrina nga anaa sa mga kasulatan magdala og dugang nga pagtuo, pagpamatuod, ug kahayag sa mga pamilya . . . sa nagkaanam kadautan nga kalibutan.”¹²

Sa gisulayan og una nga mga stake sa tibuok kalibutan, dunay maayo kaayo nga reaksyon sa bag-ong *Dali, Sunod Kanako* nga kapanguhaan sa panimalay. Daghan ang mireport nga miuswag sila gikan sa pagbasa sa mga kasulatan ngadto sa aktwal nga pagtuon sa mga kasulatan. Komon usab nga gibati nga ang kasinatian nakapalambo sa pagtuo ug dunay talagsaong epekto sa ward.¹³

Lig-on ug Malungtarong Pagkakabig

Ang tumong niining mga kausaban mao ang pagbaton og lig-on ug malungtarong pagkakabig sa mga hamtong ug sa bag-ong henerasyon. Ang unang pahina sa kapanguhaan alang sa indibidwal ug pamilya nagpasabut: “Ang katuyoan sa tanang pagkat-on ug pagtudlo sa ebanghelyo mao ang pagpalig-on sa atong pagkakabig ug pagtabang nato nga mas mahisama ni Jesukristo. . . . Nagpasabut kini sa pagsalig diha ni Kristo sa pag-usab sa atong mga kasingkasing.”¹⁴ Abagan kini pinaagi sa pagkab-ot “lapas pa kini

sa klasrum ngadto sa kasingkasing sa indibidwal ug sa panimalay. Nagkinahanglan kini og kanunay, inadlaw nga paningkamot sa pagsabut ug pagsunod sa ebanghelyo. Ang tinuod nga pagkakabig nagkinahanglan sa impluwensya sa Espiritu Santo.”¹⁵

Ang labing importante nga tumong ug katapusang panalangin sa lig-on ug malungtarong pagkakabig mao ang takus nga pagdawat sa mga pakigsaad ug mga ordinansa sa dalan sa pakigsaad.¹⁶

Misalig kami kaninyo nga magtinambagay ug magtinguha og pagpadayag alang sa pag-implementar niining mga kausaban—samtang dili motan-aw lapas sa tumong o mosulay sa pagdiktat kon unsay angayang buhaton sa mga indibidwal o mga pamilya. Dugang nga impormasyon ang ipaambit sa umaabut nga komunikasyon, lakip na sa usa ka sulat ug pasukip gikan sa Unang Kapangulohan.

Mopamatuod ko kaninyo nga sa mga deliberasyon sa Konseho sa Unang Kapangulohan ug sa Korum sa Napulog Duha ka mga Apostoles didto sa templo, ug human nangamuyo sa Ginoo ang atong minahal nga propeta alang sa pagpadayag sa pagpadayon niining mga kausaban, usa ka gamhanang kumpirmasyon ang nadawat sa tanan. Si Russell M. Nelson mao ang atong buhi nga Presidente ug propeta. Ang mga pahibalo nga gihimo karon moresulta sa talagsaong mga panalangin alang niadtong madasingong mohangup sa mga kausaban ug magtinguha sa giya sa Espiritu Santo. Mas mahiduol kita sa atong Langitnong Amahan ug sa atong Ginoo ug Manlu-luwas, si Jesukristo, kang kinsa usa ako ka sigurado nga saksi. Sa pangalan ni Jesukristo, amen. ■

MUBO NGA MGA SULAT

1. Russell M. Nelson, “Pasiuna nga Pakigpulong,” *Liahona*, Nov. 2018, 8.
2. Nahibalo usab kita nga, sa kinatibuk-an sa katilingban, ang kadaghanan sa mga panghitabo alang sa impormasyon, edukasyon, ug gani sa kalingawan gipamub-an na gayud.
3. Kining kurikulum maanaa sa parehong digital ug inimprinta.
4. *Dali, Sunod Kanako—Alang sa mga Indibidwal ug mga Pamilya* (2019), vi.

5. Tan-awa sa “Dali, Sunod Kanako—Para sa Elders Quorum ug Relief Society,” *Liahona*, Mayo 2018, 140. Imbis nga sa ikaduha ug ikatulong mga Dominggo, ang mga mensahe sa kinatibuk-ang komperensya pagahisgutan sa ikaduha ug ikaupat nga mga Dominggo.
6. Tan-awa sa *Dali, Sunod Kanako—Alang sa mga Indibidwal ug mga Pamilya*, 4. Ang mga indibidwal ug mga pamilya motino kon unsa nga bahin sa pagtuon sa ebanghelyo sa panimalay, home evening, ug mga kalihokan sa pamilya ang family home evening (nga gitawag na sa daghan og *home evening*). Kay ang mga indibidwal ug mga pamilya man ang mohimo niining pagtino, ang *home evening* ug *family home evening* gigamit nga magkapuli-puli diha sa gipahibalo nga mga kausaban.
7. Tan-awa sa *Dali, Sunod Kanako—Alang sa mga Indibidwal ug mga Pamilya*, 29.
8. Tan-awa sa Russell M. Nelson, “Samtang Dungan Kita nga Magpadayon sa Unahan,” *Liahona*, Abr. 2018, 7.
9. Tan-awa sa *Handbook 2: Administering the Church* (2010), 2.2. Ang balaang gitudlo nga mga responsibilidad “naglakip sa pagtabang sa mga miyembro sa pagsunod sa ebanghelyo ni Jesukristo, pagpundok sa Israel pinaagi sa misyonaryo nga buhat, pag-amuma sa mga kabus ug timawa, ug paghimo sa kaluwasan sa patay pinaagi sa pagtukod og mga templo ug paghimo sa gitugyan nga mga ordinansa.” Tan-awa usab sa Doktrina ug mga Pakigsaad 110, nga naglangkob sa istorya bahin sa pagpahiuli sa mahinungdanong mga yawe.
10. Hatagi gayud og piho nga pagtagad kadtong mga bata kansang mga ginikanan dili mga miyembro sa simbahan o dili kanunayng mosimba. Ang mga single ug ang uban mahimo usab nga maghimamat uban sa usa ka pamilya kon makaayo kana sa tanang nalambigit.
11. Ang pangbukas nga tulumanon dili na kabahin sa ikaduhang miting.
12. Pamilya ni Fernando ug Nancy de Carvalho, Brazil.
13. Ang mga indibidwal ug mga pamilya nga gisulayan og una, kasagaran, mas kanunayng nagtuon sa ebanghelyo ug dunay mas makahuluganon nga pagtuon sa kasulatan ug mga panaghisgot sa ebanghelyo diha sa panimalay. Mireport sila nga dunay daghang dili pormal nga mga panaghisgot sa ebanghelyo uban sa pamilya ug mga sakop sa ward ug nakadayeg sa pagtuon sa parehong mga scripture block sama sa ilang mga pamilya. Tinuod usab kini ilabi na sa kabatan-onan.
14. *Dali, Sunod Kanako—Alang sa mga Indibidwal ug mga Pamilya*, v; tan-awa usab sa 2 Mga Taga-Corinto 5:17.
15. *Dali, Sunod Kanako—Alang sa mga Indibidwal ug mga Pamilya*, v.
16. Tan-awa sa Russell M. Nelson, “Samtang Dungan Kita nga Magpadayon sa Unahan,” 7.



Ni M. Joseph Brough

Ikaduhang Magtatambag sa Kinatibuk-ang
Kapangulohan sa Young Men

Ihangad ang Imong Ulo ug Pagmaya

Samtang makasinati kita og lisud nga mga butang sa pamaagi sa Ginoo, atong mahangad ang atong ulo ug magmaya.

Niadtong 1981, ang akong papa, duha ka suod nga higala, ug ako nanuroy didto sa Alaska.

Miabut mi sa usa ka layo nga lanaw ug nangatkat og nindot nga tungason nga dapit. Aron makuhaan ang gibug-aton nga personal namong pas-anon, gisulod namo og mga karton ang among mga suplay, giputos kini og foam, gibutangan og dagkong kinoloran nga banderita, ug gilabay kini agi sa bintana sa among gamay nga eroplano ngadto sa among tuyo nga destinasyon.

Sa pag-abut, among gipangita og maayo, pero sa among kasagmuyo,

wala namo makit-i ang mga karton. Sa katapusan nakit-an namo ang usa. Naglangkob kini og gamayng gas stove, trapal, pipila ka kendi, ug duha ka pakete sa Hamburger Helper—pero walay hamburger. Wala mi paagi nga makakontak sa gawas, ug ang naka-iskedyul nga kuhaon mi usa pa ka semana human niana.

Nakakat-on ko og duha ka bililhong leksyon gikan niining kasinatian: Una, ayaw ilabay sa bintana ang inyong pagkaon. Ikaduha, usahay kinahanglan kitang makasinati og lisud nga mga butang.



Kasagaran, ang una natong reaksiyon sa lisud nga mga butang mao ang “Nganong ako man?” Ang pagpangutana og ngano, hinoon, dili gayud makatangtang sa lisud nga butang. Gikinahanglan sa Ginoo nga mabuntog nato ang mga hagit, ug Iyang gipasabut “nga kining tanan nga mga butang makahatag [kanato] og kasinatian, ug alang sa [atong] kaayohan.”¹

Usahay hangyuon kita sa Ginoo sa pagbuhat og lisud nga butang, ug usahay ang atong mga hagit namugna tungod sa paggamit sa atong kaugalingong kabubut-on o sa uban. Nasinati ni Nephi kining duha ka sitwasyon. Sa dihang gidapit ni Lehi ang iyang mga anak nga mobalik aron kuhaon ang mga palid gikan ni Laban, miingon siya, “Tan-awa ang imong igsoon nga mga lalaki nagbagulbol, nag-ingon nga kini usa ka malisud nga butang nga ako mipabuhay kanila; apan tan-awa ako wala magsugo niini ngadto kanila, apan kini sugo sa Ginoo.”² Sa laing okasyon, ang mga igsoon ni Nephi migamit sa ilang kabubut-on sa paglimitar sa iyaha: “Sila midapat sa ilang mga kamot kanako, kay tan-awa, sila nasuko sa hilabihan, ug migapos kanako sa pisi, kay sila nagtinguha sa paghunos sa akong kinabuhi.”³

Si Joseph Smith nagsagubang og lisud nga butang sa Liberty Jail. Walay makitang kahupayan ug desperado na, si Joseph mituaw, “O Dios, hain ba ikaw?”⁴ Walay duda pipila kanato ang mibati og susama sa gibati ni Joseph.

Ang tanan makasinati og lisud nga mga butang: kamatayon sa usa ka minahal sa kinabuhi, diborsyo, badlungon nga anak, sakit, mga pagsulay sa pagtuo, nawad-an og trabaho, o bisan unsa nga kalisud.

Nausab gyud ko sa dihang nakadungog niining mga pulong ni Elder Neal A. Maxwell sa Korum sa Napulog Duha, nga gipamulong panahon sa iyang panglimbasug sa leukemia. Miingon siya, “Namalandong ko og maayo ug kining 13 ka pulong sa panudlo ug pasalig misantup sa akong hunahuna: ‘Gihatagan ka nako og leukemia aron tinuod nimo nga matudloan ang akong katawhan.’” Mipadayon siya

sa pagpahayag kon sa unsang paagi nga kining kasinatian nakapanalangin kaniya og “panglantaw mahitungod sa mahinungdanong mga kamatuoran sa kahangturan. . . . Kining panabut bahin sa kahangturan makatabang kanato sa pagpadayon sa pag-uswag, nga mahimong lisud kaayo.”⁵

Aron matabangan kita sa pagpadayon ug paglampus batok sa atong lisud nga mga adlaw uban nianang panabut bahin sa kahangturan, mosugyot ko og duha ka butang. Kinahanglan gayud kita nga makasinati og lisud nga mga butang, una, pinaagi sa pagpasaylo sa uban ug, ikaduha, pinaagi sa pagtugyan sa atong kaugalingon ngadto sa Langitnong Amahan.

Ang pagpasaylo niadtong maoy hinungdan sa atong lisud nga butang ug ang pagpakig-uli sa “[atong] kaugalingon ngadto sa kabubut-on sa Dios”⁶ mahimong lisud. Pinakasakit kon ang hinungdan sa lisud nga butang usa ka sakop sa pamilya, suod nga higala, o bisan ang atong kaugalingon.

Isip batan-ong bishop, nakakat-on ko bahin sa pagpasaylo sa dihang ang akong stake president, si Bruce M. Cook, mipaambit sa mosunod nga istorya. Siya mipasabut:

“Panahon sa ulahing bahin sa mga 1970, pipila ka kauban ug ako nagtukod og negosyo. Bisin kon wala kami gihimong ilegal, ang pipila ka sayop nga desisyon, inubanan sa mahagitong panahon sa ekonomiya, miresulta sa among pagkapakyas.

“Ang ubang mga namuhunan mipasaka og kaso aron mabalik ang nawala kanila. Nahitabo nga ang ilang abogado usa ka counselor sa bishopric sa akong pamilya. Lisud kaayo ang pagpaluyo sa tawo nga daw nagtinguha sa pagdaut kanako. Dunay naumol nako nga tinuod nga kaligutgot ngadto kaniya ug gikonsiderar siya nga akong kaaway. Human sa lima ka tuig nga legal nga pakigbatok, nawala kanamo ang tanan namong gipanag-iya, lakip na ang among panimalay.

“Niadtong 2002, ang akong asawa ug ako nahibalo nga ang stake presidency diin ko nagerbisyo isip counselor organisahon pag-usab. Samtang

nagbiyahe mi sa usa ka mubo nga bakasyon sa wala pa ang pag-release, gipangutana ko niya kinsay akong pilion isip akong mga counselor kon tawagon ko isip bag-ong stake president. Dili ko gustong hisgutan ang mahitungod niini, pero namugos siya. Sa katapusan, usa ka ngalan ang misantup sa akong hunahuna. Gihiisgutan dayon niya ang ngalan sa abogado nga among gikonsiderar nga mao ang sentro sa among kalisdanan 20 ka tuig ang milabay. Samtang nagsulti siya, ang Espiritu mipamatuod nga siya ang laing counselor. Makapasaylo ba ko sa tawo?

“Sa dihang gipadangat ni Elder David E. Sorensen ngari nako ang tawag nga moserbisyo isip stake president, gihatagan ko niya og usa ka oras sa pagpili og mga counselor. Pinaagi sa mga luha, akong gipasabut nga gihatag na sa Ginoo kana nga pagpadayag. Samtang gisulti nako ang ngalan sa tawo nga akong gikonsiderar nga akong kaaway, ang kasuko, kaligutgot, ug kasilag nga akong gihambin nawala. Nianang gutloa, akong nakat-unan ang kalinaw nga moabut tungod sa pagpasaylo pinaagi sa Pag-ula ni Kristo.”

Sa laing mga pulong, ang akong stake president “sa walay lipud-lipod mipasaylo” kaniya, sama kang Nephi sa karaan.⁷ Nakaila ko kang Presidente Cook ug sa iyang counselor isip duha ka matarung nga mga lider sa priesthood kinsa nahigugma sa usag usa. Determinado kong mahisama kanila.

Mga katuigan kaniadto, panahon sa among kalisud didto sa Alaska, dali nakong nakat-unan nga ang pagbasol sa among kahimtang ngadto sa uban—ang piloto nga milabay sa pagkaon dihang nagkangitngit na—dili usa ka solusyon. Hinoon, samtang among nasinati ang pisikal nga kaluya, kakulang sa pagkaon, sakit, ug pagkatulog diha sa yuta atol sa dakong unos nga trapal ra ang mipandong namo, akong nakat-unan nga “sa Dios walay butang nga dili mahimo.”⁸

Mga batan-on, ang Dios nagkinahanglan og lisud nga mga butang diha kaninyo. Usa ka 14 anyos nga batan-ong babaye ang miapil sa basketball. Damgo niya nga magdula og high school basketball sama sa iyang

magulang nga babaye. Nahibaloan dayon niya nga ang iyang mga ginikanan gitawag nga mangulo sa usa ka misyon sa Guatemala.

Sa pag-abut, iyang nadiskubrihan nga duha sa iyang mga klase kay Spanish, usa ka pinulongan nga wala pa niya malitok. Walay bisan usa ka sports team sa mga babaye sa iyang eskwelahan. Nagpuyo siya sa ika-14 nga andana sa usa ka gambalay [building] nga grabe og seguridad. Sa pagdugang niining tanan, dili siya makagawas nga mag-inusara tungod sa mga rason kalabut sa seguridad.

Ang iyang mga ginikanan naminaw sa iyang hilak hangtud makatulog kada gabii sulod sa mga bulan. Nakapasakit kini sa ilang mga kasingkasing! Sa katapusan nakahukom sila nga papaulion siya sa ila ngadto sa iyang apohang babaye aron mag-high school.

Sa dihang misulod ang akong asawa sa kwarto sa among anak aron sultihan siya sa among desisyon, nakita niya ang among anak nga nagluhod sa pag-ampo nga abli ang Basahon ni Mormon diha sa higdaanan. Ang Espiritu mahunghong sa akong asawa, “OK ra siya,” ug ang akong asawa hilum nga mibiya sa kwarto.

Wala na gyud mi makadungog niya og usab nga mihilak hangtud makatulog. Uban sa determinasyon ug sa tabang sa Ginoo, iyang giatubang kad-tong tulo ka tuig nga maisugon.

Atol sa pagtapos sa among misyon, akong gipangutana ang among anak kon moserbisyo ba siya og full-time nga misyon. Ang iyang tubag mao ang “Dili, Pa, nakaserbisyo na ko.”

Ok ra ko niana! Pero mga unom ka bulan human niana, ang Espiritu mipukaw kanako sa gabii uban niini nga hunahuna: “Akong gitawag ang imong anak nga moserbisyo og misyon.”

Ang akong reaksyon mao ang “Langitnong Amahan, daghan na kaayo siyag nahatag.” Dali kong gikorihian sa Espiritu ug nakasabut nga ang iyang misyonaryo nga pagserbisyo gikinahanglan sa Ginoo.

Wala madugay akong gidala og paniudto ang akong anak. Sa atbang sa lamesa, miingon ko, “Ganzie, kahibalo ka ba nganong nia kita dinhi?”



Miingon siya, “Oo, Pa. Nasayud ka nga kinahanglan kong moserbisyo og misyon. Dili ko gusto nga moadto, pero moadto ko.”

Tungod kay gihatag niya ang iyang kabubut-on ngadto sa Langitnong Amahan, siya miserbisyo Kaniya sa tibuok niyang kasingkasing, gahum, hunahuna, ug kusog. Iyang gitudloan ang iyang amahan kon unsaon pagbuhat og lisud nga butang.

Sa tibuok kalibutan nga debosyonal ni Presidente Russell M. Nelson alang sa kabatan-onan, mihangyo siya og pipila ka lisud nga mga butang sa kabatan-onan. Si Presidente Nelson miingon: “Ang akong ikalima nga pagdapit mao nga magpalahi kamo; pagpalahi sa kalibutan. . . . Ang Ginoo nagkinahanglan ninyo nga makita, madungog, molihok, ug magsinina nga sama sa usa ka tinuod nga disipulo ni Jesukristo.”⁹ Mahimong lisud kana nga butang, pero nasayud ko nga inyo kining mabuhat—uban sa hingpit nga kalipay.

Hinumdumi nga “ang mga tawo naingon, nga unta sila makabaton og hingpit nga kalipay.”¹⁰ Sa tanan nga nasinati ni Lehi, nakakita gihapon siya og hingpit nga kalipay. Kahinumdom ba mo sa dihang si Alma “ingon nga nabug-atan sa kasubo”¹¹ tungod sa katawhan sa Ammonihah? Giingnan siya sa anghel, “Bulahan ikaw, Alma; busa, ihangad ang imong ulo ug pagmaya, . . . kay ikaw matinud-anon

sa paghupot sa mga sugo sa Dios.”¹² Nakakat-on si Alma og mahinungdanong kamatuoran: mahimo kitang magmaya kanunay kon nagsunod kita sa mga sugo. Hinumdumi nga panahon sa mga gubat ug mga hagit nga nasinati ni Kapitan Moroni, “wala pay labaw nga malipayon nga panahon taliwala sa mga katawhan ni Nephi.”¹³ Kita makahimo ug kinahanglang mangita og hingpit nga kalipay kon makasinati kita og lisud nga mga butang.

Nakasinati ang Manluluwas og lisud nga mga butang: “Ang kalibutan . . . mohukom kaniya nga usa ka butang nga walay bili; busa sila mohampak kaniya, ug siya mag-antus niini; ug sila mobunal kaniya ug siya mag-antus niini. Oo, sila moluwa kaniya, ug siya mag-antus niini, tungod sa iyang mahigugmaon nga pagbati ug sa iyang pagkamainantuson ngadto sa mga katawhan.”¹⁴

Tungod nianang mahigugmaon nga pagbati, giantus ni Jesukristo ang Pag-ula. Isip resulta, miingon Siya sa matag usa kanato, “Dinhi sa kalibutan aduna kamoy kagulan-anan: apan sumalig kamo; gidaug ko na ang kalibutan.”¹⁵ Tungod ni Kristo, mabuntog usab nato ang kalibutan.

Samtang makasinati kita og lisud nga mga butang sa pamaagi sa Ginoo, atong mahangad ang atong ulo ug magmaya. Niining sagradong oportunidad nga mopamatuod sa kalibutan, ako mamahayag nga ang atong Manluluwas buhi ug naggiya sa Iyang Simbahan. Sa pangalan ni Jesukristo, amen. ■

MUBO NGA MGA SULAT

1. Doktrina ug mga Pakigsaad 122:7.
2. 1 Nephi 3:5.
3. 1 Nephi 7:16.
4. Doktrina ug mga Pakigsaad 121:1.
5. Neal A. Maxwell, “Revelation,” *First Worldwide Leadership Training Meeting*, Ene. 11, 2003, 6.
6. 2 Nephi 10:24.
7. 1 Nephi 7:21.
8. Lucas 1:37.
9. Russell M. Nelson, “Paglaum sa Israel” (tibuok kalibutan nga debosyonal sa kabatan-onan, Hunyo 3, 2018), HopeofIsrael.Lds.org.
10. 2 Nephi 2:25.
11. Alma 8:14.
12. Alma 8:15.
13. Alma 50:23.
14. 1 Nephi 19:9.
15. Juan 16:33.



Ni Elder Steven R. Bangerter
Sa Seventy

Nagpahimutang sa Tukuranan sa usa ka Mahinungdanon nga Buhat

Ang mga leksyon nga gitudlo pinaagi sa mga tradisyon nga atong giestablisar sa atong mga panimalay, bisan gagmay ug yano, nag-anam ka importante sa kalibutan karon.

Sip mga ginikanan sa Zion, aduna kitay sagradong katungdanan sa pagtabang sa atong mga anak nga makaangkon og kusog nga tinguha ug pasalig sa kalipay, kahayag, ug mga kamatuoran sa ebanghelyo ni Jesu-kristo. Samtang magpadako sa atong mga anak, moestablisar kita og mga tradisyon sulod sa atong panimalay ug mohimo kita og mga sumbanan sa komunikasyon ug kinaiya diha sa atong mga relasyon sa pamilya. Sa pagbuhat niini, ang mga tradisyon nga atong giestablisar kinahanglang mosilsil og lig-on, dili mapalingpaling nga mga kinaiya sa kamaayo diha sa atong mga anak nga mohatag kanila og kalig-on sa pag-atubang sa mga hagit sa kinabuhi.

Sulod sa daghang katuigan ang among pamilya nalingaw sa tinuig nga tradisyon nga magkamping ibabaw sa Kabukiran sa Uintah sa amihanang

silangang Utah. Mobiyahe kami og 20 ka milya (32 km) agi sa batoon nga dalan aron moabut sa matahum nga berde nga walog, nga dunay tag-as

kaayo nga mga pangpang sa kilid ug miagi niini ang suba nga puno sa bugnaw, tin-aw nga tubig. Matag tuig, nanghinaut nga matudlo og balik ang bili sa doktrina sa ebanghelyo ug mga binuhatan sulod sa kasingkasing sa among mga anak ug among mga apo, si Susan ug ako mohangyo sa matag usa sa among unom ka anak ug sa ilang mga pamilya sa pag-andam og mubo nga mensahe kalabut sa usa ka hilisgutan nga gibati nila nga importanting elemento sa pundasyon sa panimalay nga nakasentro kang Kristo. Magpundok dayon kami sa hilit nga dapit alang sa debosyonal sa pamilya, ug ang matag usa mopresentar sa ilang mensahe.

Niining tuiga ang among mga apo misulat sa hilisgutan sa ilang mensahe diha sa mga bato ug dayon, sa tinagsa, milubong niini tupad sa usag usa, nga nagrepresentar sa siguradong tukuranan diin maestablisar ang usa ka malipayon nga kinabuhi. Nalakip diha sa ilang unom ka mga mensahe mao ang dili mausab, mahangturong kamatuoran nga si Jesukristo mao ang bato sa pamag-ang niana nga pundasyon.

Sa mga pulong ni Isaias, “Busa mao kini ang giingon sa Ginoong Dios, Ania karon, gibutang ko didto sa Sion alang sa usa ka patukoranan ang usa ka bato, ang usa ka sinulayan nga bato, ang usa ka bililhon nga bato-sa-pamag-ang sa patukoranan nga malig-on.”¹ Si Jesukristo mao kanang bililhong bato sa



Mga mensahe nga nagrepresentar sa pundasyon sa usa ka malipayon nga kinabuhi, diin si Jesukristo mao ang bato sa pamag-ang niana nga pundasyon.



pamag-ang sa pundasyon sa Zion. Siya kadtong mipadayag ngadto ni Propeta Joseph Smith: “Busa, ayaw pagluya diha sa maayo nga buhat, kay kamo nagpahimutang sa tukuranan sa usa ka mahinungdanon nga buhat. Ug gikan sa gagmay nga mga butang magagikan ang mga dagko.”²

Ang mga leksyon nga gitudlo pinaagi sa mga tradisyon nga atong gies-tablisar sa atong mga panimalay, bisan gagmay ug yano, nag-anam ka importante sa kalibutan karon. Unsa man ang gagmay ug yano nga mga butang nga, kon maestablisar, mopahigayon og mahinungdanong buhat sa kinabuhi sa atong mga anak?

Si Presidente Russell M. Nelson bag-o lang nga namulong sa usa ka dako nga kongregasyon duol sa Toronto, Canada, ug sa emosyonal nga paagi mipahinumdom sa mga ginikanan sa atong sagradong mga responsibilidad sa pagtudlo sa atong mga anak. Lakip sa importanting mga responsibilidad nga giila, si Presidente Nelson mihatag og gibug-aton sa atong mga katungdanan isip mga ginikanan sa pagtudlo sa atong mga anak nga makasabut nganong moambit kita sa sakrament, ang kamahinungdanon nga matawo diha sa pakigsaad, ug ang kaimportante sa pagpangandam ug pagdawat og patriyarkal nga panalangingin, ug miawhag siya sa mga ginikanan nga pangulohan ang dungan nga pagbasa sa mga kasulatan isip pamilya.³ Pinaagi niini nga mga paningkamot, ang atong minahal nga propeta miawhag kanato sa paghimo sa atong

mga panimalay nga “mga santuwaryo sa hugot nga pagtuo.”⁴

Sa Basahon ni Mormon, girekord ni Enos ang dakong pasalamat nga iyang gibati sa ehemplo sa iyang amahan, kinsa “mitudlo [kaniya] sa iyang pinulongan, ug usab diha sa pagmatuto ug sa pagpahimatngon sa Ginoo.” Uban sa grabeng emosyon, nakatuaw si Enos, “Ug bulahan ang ngalan sa akong Dios tungod niini.”⁵

Akong gimahal ang gagmay ug yano nga mga tradisyon nga among gisunod sa among panimalay sulod sa 35 ka tuig sa among kaminyoon. Daghan sa among tradisyon gagmay apan makahuluganon. Sama pananglit:

- Sa mga gabii nga wala ko sa balay, nakahibalo na ko nga ubos sa direksyon ni Susan, ang among kinamagulangang anak nga lalaki moangkon sa responsibilidad nga mangulo sa pamilya sa pagtuon sa kasulatan ug sa pag-ampo sa pamilya.⁶
- Laing tradisyon—dili gayud kami mobiya sa among panimalay o motapos sa among pag-istoryahanay sa telepono nga dili mosulti og, “Gihigugma ko ikaw.”
- Ang among kinabuhi napanalanginan pinaagi sa regular nga paggahin og panahon nga matagamtam ang personal nga mga interbyu uban sa matag usa sa among mga anak. Atol sa usa ka interbyu nangutana ko sa among anak kalabut sa iyang mga tinguha ug pagpangandam nga moserbisyo og misyon.

Human sa pipila ka diskusyon, dihay mahunahunaong panahon sa kahilum; dayon mipaduol siya ug mahunahunaong mipahayag, “Pa, nahinumdom ka sa dihang gamay pa ko ug gisugdan nato sa pagpahigayon og mga interbyu sa amahan?” Miingon ko, “Oo.” “Nan,” miingon siya, “misaad ko nimo kaniadto nga moserbisyo ko og misyon, ug ikaw ug si Mama misaad nako nga moserbisyo mo og misyon kon matigulang na mo.” Dayon dihay laing mubo nga paghunong. “Duna ba kamoy problema nga makapugong ninyo sa pagserbisyo—tungod kay tingali makatabang ko?”

Ang makanunayon, maayong mga tradisyon sa pamilya nga naglakip sa pag-ampo, pagbasa sa kasulatan, family home evening, ug pagtambong sa mga miting sa Simbahan, bisan og daw gagmay ug yano, makamugna og kultura sa gugma, pagtahud, panaghiusa, ug seguridad. Diha sa espiritu nga nagubanan niini nga mga paningkamot, ang atong mga anak mapanalipdan gikan sa nagdilaab nga mga pana sa kaaway nga usa ka dakong bahin sa kalibutanong kultura sa atong panahon.

Gipahinumduman kita sa maalamong tambag ni Helaman ngadto sa iyang mga anak: “Hinumdumi nga kini diha sa lig-on nga sukaranan sa atong Manunubos kinsa mao si Kristo, ang Anak sa Dios, nga kamo kinahanglan gayud motukod sa inyong tukuranan; nga sa panahon nga ang yawa mopa-dala sa iyang mapintas nga mga hangin, oo, ang iyang mga panâ diha sa alimpu-los, oo, sa diha nga ang tanan niya nga ulan nga yelo ug ang iyang mapintas nga unos mohampak diha kaninyo, kini walay gahum ibabaw kaninyo sa pagbitad kaninyo ngadto sa bung-aw sa pagkauyamot ug walay katapusan nga pagkaalaot, tungod sa lig-on nga sukaranan diin kamo natukod nga mao ang tinuod nga tukuranan, usa ka tukuranan diin kon ang mga tawo magtukod dili sila mapukan.”⁷

Mga katuigan ang milabay, samtang nagserbisyo ko isip batan-ong bishop, usa ka edaran nga lalaki mihangyo nga

makigkita kanako. Gihulagway niya ang iyang pagbiya sa Simbahan ug sa matarung nga mga tradisyon sa iyang mga ginikanan sa dihang batan-on pa siya. Detalyado niyang gihulagway ang kasakit nga iyang nasinati sa iyang kinabuhi samtang kawang nga nangita og mahangturong kalipay taliwala sa temporaryong kalipay nga gitanyag sa kalibutan. Karon, sa ulahing katuigan sa iyang kinabuhi, iyang nasinati ang malumo, kanunay nga naghunghong nga mga pag-aghat sa Espiritu sa Dios nga naggiya kaniya pabalik sa mga leksyon, binuhatan, mga pag-bati, ug espiritwal nga kasiguroan sa iyang kabatan-on. Mipahayag siya og pasalamat alang sa mga tradisyon sa iyang mga ginikanan, ug sa moderno nga mga pulong, iyang gipalanog ang pamahayag ni Enos: “Bulahan ang ngalan sa akong Dios tungod niini.”

Sa akong kasinatian, ang pagbalik ngadto sa ebanghelyo niining pinanggang tawo susama sa mga kasinatian sa kadaghanan ug kasagarang nahitabo usab sa mga anak sa Dios kinsa mibiya sa makadiyot, apan mobalik gihapon sa mga pagtulun-an ug mga binuhatan sa ilang kabatan-on. Niini nga mga higayon, atong masaksihan ang kaalam sa tigsulat sa proverbio, kinsa miawhag sa mga ginikanan, “Bansaya ang bata diha sa dalan nga iyang pagalaktan: ug bisan kon siya matigulang na, siya dili mobiya gikan niana.”⁸

Ang matag ginikanan mag-atubang og mga panahon sa kasagmuyo ug ug lain-laing mga ang-ang sa determinasyon ug kalig-on samtang nagpadako sa mga anak. Hinoon, kon ang mga ginikanan mopakita og pagtuo pinaagi sa pagtudlo sa mga anak sa matinuoron, mahigugmaong paagi ug mobuhat sa tanan nilang mahimo sa pagtabang kanila niana nga panahon, makadawat sila og mas dakong paglaum nga ang mga liso nga gitisok mogamut diha sa mga kasingkasing ug mga hunahuna sa ilang mga anak.

Nasabtan og maayo ni Moises ang sukaranang panginahanglan sa kanunay nga pagtudlo. Mitambag siya, “Igatudlo mo [kini nga mga pulong] sa dakong kakugi sa imong mga anak,



ug magasulti ka mahitungod niini sa magalingkod ikaw sa imong balay, ug sa magalakaw ikaw sa dalan, ug sa imong paghigda, ug sa imong pagbangon.”⁹

Moluhod kita tupad sa atong mga anak panahon sa pag-ampo sa pamilya, moamuma kita kanila pinaagi sa atong mga paningkamot sa paghimo og makahuluganong pagbasa sa pamilya sa kasulatan, mapailubon, mapinangaon kitang moatiman kanila samtang moapil kita sa family home evening, ug maghunahuna kita kanila samtang mag-ampo ngadto sa langit. O, nangan-doy kitag maayo nga ang mga liso nga atong gipugas mogamut diha sa mga kasingkasing ug mga hunahuna sa atong mga anak.

Nagtuo ko nga dili kaayo importanting mabalaka kon ang atong mga anak “nakakuha” ba sa atong gipangtudlo, sama sa pagpaningkamot nga mobasa sa kasulatan o mag-family home evening o motambong sa Mutual ug ubang mga miting sa Simbahan. Dili kaayo importante nga mabalaka kon niadto nga mga higayon nakasabut ba sila sa kaimportante niadto nga mga kaliho-kan ug mas importante nga mabalaka kon kita, isip mga ginikanan, mipakita ba og igong pagtuo nga mosunod sa tambag sa Ginoo nga makugihong mosunod, motudlo, moawhag, ug

mopahimutang og mga ekspektasyon nga gidasig sa ebanghelyo ni Jesukristo. Paningkamot kini nga gidasig sa atong pagtuo—atong pagtuo nga usa ka adlaw ang mga liso nga gitisok diha sa ilang kabatan-on mogamot ug mosugod sa paggitib ug pagtubo.

Ang mga butang nga atong gihisgut, mga butang nga atong gisangyaw ug gitudlo motino sa mga butang nga mahitabo taliwala kanato. Samtang moestablisar kita og nindot nga mga tradisyon nga nagtudlo sa doktrina ni Kristo, ang Espiritu Santo mopamatuod sa katinuod sa atong mensahe ug mopalambo sa mga liso sa ebanghelyo nga gitanom diha sa mga kasingkasing sa atong mga anak pinaagi sa atong mga paningkamot niana nga panahon. Mopamatuod ko sa pangalan ni Jesukristo, amen. ■

MUBO NGA MGA SULAT

1. Isaías 28:16.
2. Doktrina ug mga Pakigsaad 64:33.
3. Tan-awa ang Facebook page ni Neil L. Andersen, gi-post sa Ago. 19, 2018, [facebook.com/lds.neil.l.andersen](https://www.facebook.com/lds.neil.l.andersen).
4. Sa Sarah Jane Weaver, “President Nelson Urges ‘Teach the Children,’” *Church News*, Sept. 23, 2018, 11.
5. Enos 1:1.
6. Tan-awa sa Dallin H. Oaks, “Katungod sa Priesthood diha sa Pamilya ug sa Simbahan,” *Liahona*, Nob. 2005, 24–27.
7. Halaman 5:12.
8. Mga Proverbio 22:6.
9. Deuteronomio 6:7.



Ni Elder Ronald A. Rasband

Sa Korum sa Napulog Duha ka mga Apostoles

Ayaw Kabalaka

Moawhag ko, mga kaigsoonan. Oo, nagpuyo kita sa malisud nga panahon, apan kon kita magpabilin sa dalan sa pakigsaad, dili kita kinahanglan nga mabalaka.

Akong idugang ang akong pagsak-si ngadto sa mga mensahe nila ni Presidente Russell M. Nelson ug Elder Quentin Cook nga gihatag pipila ka gutlo lang ang nakalabay sa panag-uyon ug panaghiusa sa Konseho sa Unang Kapangulohan ug sa Korum sa Napulog Duha ka mga Apostoles. Nasayud ko nga kining mga pagpahibalo nga pagpadayag mao ang hunahuna ug ang kabubut-on sa Ginoo ug mopanalangin ug mopalig-on sa mga indibidwal, mga pamilya ug sa Ang Simbahan ni Jesukristo sa mga Santos sa Ulahing mga Adlaw alang sa mga henerasyon nga moabut.

Pipila ka tuig ang milabay, usa sa among mga anak nga babaye nga bag-ong naminyo ug ang iyang bana nangutana ni Sister Rasband ug nako og usa ka importante, makaimpluwensya sa kinabuhi nga pangutana: “Luwas ug maalamon pa ba gihapon nga magkaanak dinhi niining dautan ug makahahadlok nga kalibutan nga atong gipuy-an?”

Karon, kana usa ka importante nga pangutana alang sa mama ug papa nga hunahunaon uban sa ilang minahal nga mga anak nga naminyo. Madungog namo ang kahadlok sa ilang mga tingog ug mibati sa kahadlok sa ilang

mga kasingkasing. Ang among tubag kanila walay duha-duha nga “Oo, mas labaw pa sa OK,” samtang among gipakigbahin ang sukaranan nga mga pagtulun-an sa ebanghelyo ug ang among kinasingkasing nga mga impresyon ug mga kasinatian sa kinabuhi.

Ang kahadlok dili bag-o. Ang mga tinun-an ni Jesukristo, nga gikan sa Dagat sa Galilea, nahadlok sa “unos, ug ang mga balud” sa kangitngit sa kagabhi-on.¹ Isip Iyang mga disipulo karon, kita usab adunay mga kahadlok. Ang atong mga single adult mahadlok nga mohimo og mga pasalig sama sa pagminyo. Ang bag-ong mga minyo, sama sa among mga anak, mahadlok nga magkaanak ngadto sa nagkadautan nga kalibutan. Ang mga misyonaryo adunay gikahadlok-an nga daghang mga butang, ilabi na sa pagduol og dili mga kaila. Ang mga biyuda mahadlok nga magpadayon nga mag-inusara. Ang mga tin-edyer mahadlok nga dili dawaton; ang mga estudyante sa grade school mahadlok sa ilang unang adlaw sa eskwelahan; ang mga estudyante sa unibersidad mahadlok nga mokuha og test. Mahadlok kita sa kapakyasan, pagsalikway, kasagmuyo, ug sa wala mahibaloi. Mahadlok kita sa mga bagyo, mga linog, ug mga sunog nga moguba sa yuta ug sa atong

kinabuhi. Mahadlok kita nga dili mapilian, ug sa laing bahin mahadlok kita nga mapilian. Mahadlok kita nga dili kaayo maayo; mahadlok kita nga dili panalanginan sa Ginoo. Mahadlok kita og kausaban, ug ang atong mga kahadlok modako ngadto sa kalisang. Naapil ba nako ang tanan?

Sukad sa karaang panahon, ang kahadlok mipakunhod sa panglantaw sa mga anak sa Dios. Ganahan kaayo ko sa istorya ni Eliseo sa 2 Mga Hari. Ang hari sa Siria mipadala og dakong panon nga “nangadto sa gabii, ug gilibutan ang siyudad.”² Ang ilang tumong mao ang pagdakop ug pagpatay ni propeta Eliseo. Atong mabasa:

“Ug sa paghibangon og sayo [sulugoon sa Dios], ug sa nakagula, ania karon, ang usa ka panon lakip ang mga kabayo ug mga carro. Ug ang iyang alagad miingon kaniya, Ah, agalon ko! Unsaon nato paghimo?”³

Mao kadto ang kahadlok nga gisulti.

“Ug si [Eliseo] mitubag, Ayaw kahadlok: kay sila nga ania uban kanato labing daghan kay kanila nga anaa kanila.”⁴

Apan wala siya mohunong didto.

“Si Eliseo nag-ampo, ug miingon, Ginoo, ako nagaampo kanimi, bukha ang iyang mga mata, aron siya makakita. Ug gibuka sa Ginoo ang mga mata niadtong batan-ong lalaki, ug siya nakakita: ug, ania karon, ang bukid napuno sa mga kabayo ug mga carro nga kalayo nanaglibut kang Eliseo.”⁵

Kita mahimong aduna o walay carro sa kalayo nga gipadala aron sa pagkuha sa atong mga kahadlok ug pagbuntog sa atong mga demonyo, apan ang leksyon klaro. Ang Ginoo nag-uban kanato, naghunahuna kanato ug nanalangin kanato sa mga paagi nga Siya lamang ang makabuhat. Ang pag-ampo makatawag sa kalig-on ug sa pagpadayag nga atong gikinahanglan aron sa pagsentro sa atong mga hunahuna diha kang Jesukristo ug sa Iyang maulaong sakripisyo. Ang Ginoo nasayud nga adunay mga higayon nga kita mobati og kahadlok. Nakasulay na ako niana ug kamo usab, mao nga ang mga kasulatan adunay daghang tambag sa Ginoo:

“Busa, paglipay, ug ayaw kahadlok.”⁶

“Paghunahuna ngari kanako sa matag hunahuna; ayaw pagduha-duha, ayaw kahadlok.”⁷

“Ayaw kahadlok, gagmay nga panon.”⁸ Ganahan ko sa kalumo sa “gamay nga panon.” Niini nga Simbahan tingali kita dili ingon niana kadaghan nga importanting maka-impluwensya sa kalibutan, apan kon atong ablihan ang atong espirituhanong mga mata, “sila nga ania uban kanato, labing daghan kay kanila nga anaa kanila.”⁹ Ang atong mahigugmaong Magbalantay, nga si Jesukristo, nagpa-dayon, “Tuguti nga ang yuta ug impyerno maghiusa sa pagbatok kaninyo, kay kon kamo gitukod diha sa akong lig-on nga sukaranan, sila dili makabuntog.”¹⁰

Sa unsa nga paagi nga ang kahadlok mawala? Alang sa batan-ong lalaki, siya nagbarug tupad ni Eliseo, nga usa ka propeta sa Dios. Kita aduna nianang sama nga saad. Kon kita maminaw ni Presidente Russell M. Nelson, kon kita mopatalinghug sa iyang tambag, kita nagbarug uban sa propeta sa Dios. Hinumdumi ang mga pulong ni Joseph Smith: “Ug karon, human sa daghan nga mga pagpamatuod nga gihatag mahitungod kaniya, kini mao ang pagpamatuod, ang katapusan sa tanan, nga kami naghatag kaniya: Nga siya buhi!”¹¹ Si Jesukristo buhi. Ang atong gugma alang Kaniya ug sa Iyang ebanghelyo makapawala sa kahadlok.

Ang atong tinguha nga “makabaton kanunay sa iyang Espiritu”¹² uban kanato mopadaplin sa kahadlok alang sa mas mahangturong panglantaw sa atong mortal nga kinabuhi. Mipasidaan si Presidente Nelson, “Apan sa umaa-but nga mga adlaw, dili na posible ang espirituhanong pagsugakod kon wala ang giya, direksyon, ug makahupay nga impluwensya sa Espiritu Santo.”¹³

Ang Ginoo miingon, kabahin sa mga kastigo nga moabut sa yuta ug makapatig-a sa mga kasingkasing sa kadaghanan, “Ang akong mga tinun-an magbarug sa balaan nga mga dapit, ug dili mabalhin.”¹⁴

Ug dayon kining balaan nga tambag: “Ayaw kabalaka, kay, kon kining



tanan nga mga butang mahinabo, kamo masayud nga ang mga saad nga nabuhat nganha kaninyo matuman.”¹⁵

Barug sa balaan nga mga dapit—ayaw kabalaka—ug ang mga saad matuman. Tan-awon nato ang matag usa niini kalabut sa atong mga kahadlok.

Una, barug diha sa balaan nga mga dapit. Kon kita magbarug sa balaan nga mga dapit—sa atong matarung nga mga panimalay, sa gipahinungod nga mga balay-tigumanan [chapels], sa atong gipahinungod nga mga templo—mabati nato ang Espiritu sa Ginoo nga nag-uban kanato. Makita nato ang mga tubag sa mga pangutana nga nakahasol kanato o sa kalinaw sa yano nga pagbaliwala kanila. Kana mao ang Espiritu nga naglihok. Kining sagrado nga mga dapit sa gingharian sa Dios sa yuta nagtawag sa atong balaang pagtahud, sa atong pagtahud sa uban, sa atong labing maayo nga mga kaugalingon sa pagtuman sa ebanghelyo, ug sa atong mga paglaum sa pagbaliwala sa atong mga kahadlok ug magtinguha sa makaayo nga

gahum ni Jesukristo pinaagi sa Iyang Pag-ula.

Walay dapit ang kahadlok dinhi niining balaang mga dapit sa Dios o sa mga kasingkasing sa Iyang mga anak. Ngano? Tungod sa gugma. Ang Dios nahigugma kanato—kanunay—ug kita nahigugma Kaniya. Ang atong gugma sa Dios makigbatok sa tanang kahadlok, ug ang Iyang gugma anaa sa balaang mga dapit. Hunahunaa kini. Kon kita walay siguro sa atong mga pasalig ngadto sa Ginoo, kon kita mosimang gikan sa Iyang dalan paingon sa kinabuhing dayon, kon kita mokwestyon o magduha-duha sa atong pagkaimportante sa Iyang balaan nga plano, kon kita motugot sa kahadlok nga moabli sa pultahan sa iyang tanang mga kauban—ang pagkawala sa paglaum, kasuko, kahigawad, kasagmuyo—ang Espiritu mobiya kanato, ug kita wala ubani sa Ginoo. Kon kamo nasayud kon unsa kini mahisama, kahibalo mo nga kini dili maayong dapit nga adtoan. Sa pagtandi, kon kita magbarug sa balaan nga mga dapit, mabati nato ang gugma sa Dios, ug “ang hingpit



nga gugma mosalikway sa tanan nga kahadlok.”¹⁶

Ang sunod nga saad mao ang “Ayaw kabalaka.”¹⁷ Bisan unsa pa kadautan ug kaguliyang sa kalibutan, gisaaran kita sa atong inadlaw nga pagkamatind-anon kang Jesukristo sa “kalinaw sa Dios, nga lapaw sa tanang pagpanabut.”¹⁸ Ug kon si Kristo moabut sa tanang gahum ug himaya, ang dautan, rebelyon, ug ang inhustisya matapos.

Dugay na, si Apostol Pablo nanagna sa atong panahon, nag-ingon ngadto sa batan-ong Timoteo:

“Apan sabta kini, unya sa kaulahi-ang mga adlaw managpangabut ang mga panahon nga malisud.

“Kay ang mga tawo unya magama-higugmaon man sa ilang kaugalingon, mga hinapi, tigpagawal, hambugiro, tampalasan, masukihon sa mga ginikanan, walay igabalus, dili diosnon, . . .

“ . . . nga nagahigugma sa kalipayan inay sa Dios.”¹⁹

Hinumdumi, “sila nga ania uban kanato” sa duha ka bahin sa tabil, kadtong nahigugma sa Ginoo uban sa ilang tibuok kasingkasing, gahum, hunahuna, ug kusog, “mas labing daghan kay kanila nga anaa kanila.”²⁰ Kon kita aktibong mosalig sa Ginoo ug sa Iyang mga pamaagi, kon kita anaa apil sa Iyang buhat, dili kita mahadlok sa dagan sa kalibutan o mabalaka niini. Mohangyo ako kaninyo sa pagsalikway

sa kalibutanon nga mga impluwensya ug mga pagpamugos ug tinguhaa ang pagkaespirituhanon sa inyong inadlaw nga kinabuhi. Higugma unsay gihigugma sa Ginoo—nga naglakip sa Iyang mga sugo, sa Iyang balaan nga mga balay, sa atong sagrado nga mga pakigsaad uban Kaniya, ang sakrament sa matag adlaw nga Igpapahulay, sa atong pagpakigsulti pinaagi sa pag-ampo—ug kamo dili mabalaka.

Ang katapusang punto: salig sa Ginoo ug sa Iyang mga saad. Nasayud ko nga ang Iyang tanang mga saad matuman. Nasayud ako niini sama sa akong lig-ong pagbarug dinhi sa inyong atubangan niining sagrado nga miting.

Ang Ginoo mipadayag: “Kay sila mga maalamon ug nakadawat sa kamatuoran, ug nakadawat sa Balaan nga Espiritu Santo alang sa ilang paggiya, ug wala malimbongi—sa pagkatinuod Ako moingon nganha kaninyo, sila dili pagaputlon ug ilabay ngadto sa kalayo, apan molahutay niana nga adlaw.”²¹

Mao nga kita kinahanglan nga dili mabalaka sa kasamok karon, niadtong anaa sa dako ug lapad nga gambalay, niadtong kinsa nagbiay-biay sa matinuoron nga paningkamot ug mahalaron nga pag-alagad ngadto ni Ginoong Jesukristo. Ang pagkamalaumon, kaisug, bisan gugma nga putli nagagikan sa kasingkasing nga wala mabug-ati sa mga kabalaka o kasamok. Si Presidente

Nelson, kinsa “malaumon sa umaabut,” mipahinumdom nato, “Kon gusto kitang makaangkon og paglaum nga makaayag sa daghang mga opinyon ug sa mga pilosopiya sa katawhan nga nag-atake sa kamatuoran, kinahanglan makakat-on kita sa pagdawat og pagpadayag.”²²

Aron makadawat og personal nga pagpadayag, kinahanglan nga atong iprayoridad ang pagsunod sa ebanghelyo ug sa pag-awhag sa pagkamatind-anon ug pagkaespirituhanon sa uban ingon man usab sa atong kaugalingon.

Si Spencer W. Kimball mao ang usa sa mga propeta sa akong kabatan-on. Niining miaging pipila ka tuig, human matawag isip usa ka Apostol, akong nakita sa iyang mensahe sa kinatibukang komperensya niadtong Oktubre 1943. Nabug-atan siya sa iyang tawag; nasayud ko unsa ang mobati niana. Si Elder Kimball miingon: “Nagsige ko og hunahuna ug nag-ampo, ug nagpuasa ug nag-ampo. Dihang nagkalahi nga mga hunahuna nga misulod sa akong alimpatakan—ingon og mga tingog nga nag-ingon: ‘Dili ka makahimo niana nga buhat. Dili ka takus. Wala kay abilidad’—ug sa kanunay sa katapusan miabut ang nagmadaugon nga hunahuna: ‘Kinahanglan himoon nimo ang buhat nga gihatag—kinahanglan nga imong himoon ang imong kaugalingon nga makahimo, takus, ug kwalipikado.’ Ug ang gubat nagpadayon.”²³

Akong gibati gikan nianang putli og kasingkasing nga pagpamatuod niini nga Apostol kinsa mahimong ika-12 nga Presidente niining gamhanan nga Simbahan. Nakahibalo siya nga kinahanglan nga iyang isalikway ang iyang mga kabalaka “sa paghimo sa buhat nga gihatag kaniya” ug nga siya kinahanglang mosalig sa Ginoo alang sa kusog aron sa paghimo sa iyang kaugalingon nga “makahimo, takus ug kwalipikado.” Mao usab kita. Ang mga gubat magpadayon, apan atubangon nato kini uban sa Espiritu sa Ginoo. Kita “dili makabalaka” tungod kay kon kita magbarug uban sa Ginoo ug magbarug alang sa Iyang mga baruganan ug sa Iyang mahangturong plano, nagbarug kita sa balaan nga dapit.

Karon, unsa man ang mahitungod nianang anak nga babaye ug umagad nga lalaki kinsa nangutana sa kina-singkasing ug mausisahon, gibase sa kabalaka nga pangutana daghang mga tuig na ang milabay? Seryoso nilang gihunahuna ang among panag-istorya, nag-ampo sila ug nagpuasa ug miabut sa ilang kaugalingong mga desisyon. Kalipay alang nila ug kanamo, nga mga apohan, sila gipanalanginan og pito ka matahum nga mga anak samtang sila nagpadayon pinaagi sa hugot nga pagtuo ug gugma.

Moawhag ko, mga kaigsoonan. Oo, nagpuyo kita sa malisud nga panahon, apan kon kita magpabilin sa dalan sa pakigsaad, dili kita kinahanglan nga mabalaka. Mopanalangin ko kaninyo nga samtang inyo kining buhaton, dili kamo mabalaka sa mga panahon diin kita nagpuyo o sa mga kabalaka nga moabut sa inyong dalan. Mopanalangin ko kaninyo nga mopili nga mobarug sa balaan nga mga dapit ug dili mabalhin. Mopanalangin ko ninyo nga motuo sa mga saad ni Jesukristo, nga Siya buhi, ug nga Siya nagtan-aw kanato, nag-atiman nato ug nagbarug tupad nato. Sa pangalan sa atong Ginoo ug Manluluwas, nga si Jesukristo, amen. ■

MUBO NGA MGA SULAT

1. Marcos 4:37.
2. 2 Mga Hari 6:14.
3. 2 Mga Hari 6:15.
4. 2 Mga Hari 6:16.
5. 2 Mga Hari 6:17.
6. Doktrina ug mga Pakigsaad 68:6.
7. Doktrina ug mga Pakigsaad 6:36.
8. Doktrina ug mga Pakigsaad 6:34.
9. 2 Mga Hari 6:16.
10. Doktrina ug mga Pakigsaad 6:34.
11. Doktrina ug mga Pakigsaad 76:22.
12. Doktrina ug mga Pakigsaad 20:77.
13. Russell M. Nelson, "Pagpadayag alang sa Simbahan, Pagpadayag alang sa Atong mga Kinabuhi," *Liahona*, Mayo 2018, 96.
14. Doktrina ug mga Pakigsaad 45:32.
15. Doktrina ug mga Pakigsaad 45:35.
16. Moroni 8:16.
17. Doktrina ug mga Pakigsaad 45:35.
18. Mga Taga-Filipos 4:7.
19. 2 Timoteo 3:1–2, 4.
20. 2 Mga Hari 6:16.
21. Doktrina ug mga Pakigsaad 45:57.
22. Russell M. Nelson, "Pagpadayag alang sa Simbahan, Pagpadayag alang sa Atong mga Kinabuhi," 96.
23. Spencer W. Kimball, sa Conference Report, Okt. 1943, 16–17.



Ni Elder David A. Bednar

Sa Korum sa Napulog Duha ka mga Apostoles

Paghiusa diha kang Kristo sa Tanang mga Butang


Ang gahum sa ebanghelyo sa Manluluwas sa pag-usab ug pagpanalangin kanato nagagikan sa pag-ila ug paggamit sa pagkakonektado sa doktrina, mga baruganan, ug mga buluhaton niini.

Ang pisi usa ka mahinungdanong himan nga pamilyar kitang tanan. Ang mga pisi gihimo gikan sa mga lanot sa mga hinablon, tanom, alambre, o ubang mga materyal nga ang matag usa gihiusa sa paglubid. Makapaikag, ang mga butang nga medyo ordinaryo ra kaayo mahimong hiusahon sa paglubid ug mahimong talagsaon ang kalig-on. Sa ingon, ang epektibong pagkonektar ug paghiusa sa ordinaryo nga mga materyal makamugna og talagsaon nga himan.

Sama nga ang usa ka pisi makaangkon sa kalig-on niini gikan sa daghang gilubid nga indibidwal nga mga lanot, ang ebanghelyo ni Jesukristo naghatag sa labing dakong panglantaw sa kamatuoran ug nagtanyag sa labing bililhon nga mga panalangin samtang mopatalinghug kita sa tambag ni Pablo nga “paghiusa diha kang Kristo sa tanan nga mga butang, mga butang diha sa langit, ug mga butang dinhi sa yuta; pinaagi kaniya.”¹ Sa importanting paagi, kining importanting paghiusa sa

kamatuoran nakasentro ug nakatutok diha ni Ginoong Jesukristo tungod kay Siya mao “ang dalan, ug ang kamatuoran, ug ang kinabuhi.”²

Mag-ampo ko nga ang Espiritu Santo molamdag sa matag usa kanato samtang atong ikonsiderar kon sa unsang





paagi ang baruganan sa *paghiusa diha kang Kristo sa tanang mga butang* magamit sa praktikal nga mga paagi sa pagkat-on ug pagsunod sa Iyang gipahiuli nga ebanghelyo sa atong inadlaw nga kinabuhi.

Usa ka Panahon sa mga Pagpadayag

Nagpuyo kita sa usa ka talagsaon ug puno sa pagpadayag nga panahon sa gipahiuli nga Simbahan ni Jesukristo. Ang makasaysayanon nga mga kausaban nga gipahibalo karon adunay usa lamang ka malukpanong katuyoan: ang paglig-on sa pagtuo diha sa Langitnong Amahan ug sa Iyang plano ug sa Iyang Anak, si Jesukristo, ug sa Iyang Pag-ula. Ang iskedyul sa miting sa Domingo wala lamang pamub-i. Hinoon, nadugangan na karon ang atong mga oportunidad ug mga responsibilidad isip mga indibidwal ug mga pamilya sa paggamit sa atong panahon nga mapalambo ang Igpapahulay isip kahimutan diha sa panimalay ug sa simbahan.

Niadtong Abril, ang estruktura sa organisasyon sa mga korum sa priesthood wala lamang giusab. Hinoon, ang gibug-aton ug kalig-on gihatag ngadto sa mas taas ug mas balaan nga paagi sa pagpangalagad ngadto sa atong mga kaigsoonan.

Sama nga ang gilubid nga mga lanot sa pisi makamugna og kusgan ug lig-on

nga himan, ang tanan niining konektadong mga aksyon usa ka bahin sa hini-usang paningkamot aron mas mahan-ay ang pagtutok, kapanguhaan, ug buhat sa gipahiuli nga Simbahan sa Manluluwas uban sa mahinungdanon niining misyon: ang pagtabang sa Dios sa Iyang buhat sa pagpahinabo sa kaluwasan ug kahimayaan sa Iyang mga anak. Palihug ayaw tutoki og maayo ang pisikal nga pagpahinabo sa unsay gipahibalo. Dili nato tugutan ang mga detalye sa pamaagi nga makasalipod sa importanting espiritwal nga mga rason nga gihimo kini nga mga kausaban karon.

Atong tinguha nga ang pagtuo diha sa plano sa Amahan ug sa matubsanong misyon sa Manluluwas molambo sa yuta ug nga ang walay katapusang pakigsaad sa Dios maestablisar.³ Ang atong bugtong nga mga tumong mao ang pagtabang sa padayon nga pagkakabig ngadto sa Ginoo ug mas hingpit nga mohigugma ug mas epektibong moserbisyo sa atong kaigsoonan.

Paggrupo ug Pagbulag

Usahay isip mga miyembro sa Simbahan atong grupohon, bulagon, ug gamiton ang ebanghelyo sa atong kinabuhi pinaagi sa paghimo og tag-as nga mga checklist sa indibidwal nga mga hilisgutan nga tun-an ug mga buluhaton nga tumanon. Apan ang ingon nga

paagi posibleng makapugong sa atong panabut ug panglantaw. Kinahanglan kitang magmatngon tungod kay ang pagtutok sa detalye sa mga checklist imbis sa katuyoan niini makapugong kanato sa pagpaduol sa Ginoo.

Ang katuyoan ug pagkaputli, ang kamaya ug kalipay, ug ang padayon nga pagkakabig ug proteksyon nga gikan sa “pagtugyan sa [atong] mga kasingkasing ngadto sa Dios”⁴ ug “[pagdawat] sa iyang hitsura diha sa [atong] mga panagway”⁵ dili makuha pinaagi lang sa paghimo ug pagmarka sa tanang espiritwal nga mga butang nga angay natong buhaton. Hinoon, ang gahum sa ebanghelyo sa Manluluwas sa pag-usab ug pagpanalangin kanato nagagikan sa pag-ila ug paggamit sa pagkakonektado sa doktrina, mga baruganan, ug mga buluhaton niini. Pinaagi lamang sa atong *paghiusa diha kang Kristo sa tanang mga butang*, uban sa lig-on nga pagtutok Kaniya, nga ang mga kamatuoran sa ebanghelyo magtambayayong sa pagtugot kanato nga mahimong unsay gitinguha sa Dios nga kita mamahimo⁶ ug maisugong molahutay hangtud sa katapusan.⁷

Pagkat-on ug Pagkonektar sa mga Kamatuoran sa Ebanghelyo

Ang ebanghelyo ni Jesukristo usa ka talagsaong hablon sa kamatuoran nga “nausa”⁸ ug gilala og dungan. Samtang magkat-on kita ug mokonektar sa gipadayag nga mga kamatuoran sa ebanghelyo, mapanalanginan kitang modawat og bililhong panglantaw ug dugang nga espiritwal nga kapasidad pinaagi sa mga mata nga makakita sa impluwensya sa Ginoo sa atong kinabuhi ug mga dalunggan nga makadungog sa Iyang tingog.⁹ Ug ang baruganan sa *paghiusa—gani diha Kaniya*—makatabang kanato sa pag-usab sa tradisyonal nga mga checklist ngadto sa nahiusa, natingub, ug hingpit nga kinatibuk-an. Mohatag ko og ehemplo sa doktrina ug sa Simbahan sa unsay akong gisugyot.

Ehemplo 1. Ang ikaupat nga artikulo sa hugot nga pagtuo maoy usa sa labing maayong pagpasabut sa paghiusa diha kang Kristo sa tanang mga

butang: “Kami nagtuo nga ang unang mga baruganan ug mga ordinansa sa Ebanghelyo mao ang: una, Hugot nga pagtuo diha ni Ginoong Jesukristo; ikaduha, Paghinulsol; ikatulo, Bunyag pinaagi sa pagpaunlod alang sa kapasayloan sa mga sala; ikaupat, Pagpandong sa mga kamot alang sa mga gasa sa Espiritu Santo.”¹⁰

Ang tinuod nga pagtuo nakatutok diha ug nganha ni Ginoong Jesukristo—diha Kaniya isip ang balaan ug Bugtong nga Anak sa Amahan ug nganha Kaniya ug sa matubsanong misyon nga Iyang gituman. “Kay siya nakatuman sa tibuok katuyoan sa balaod, ug siya nag-angkon sa tanan niadto nga adunay hugot nga pagtuo diha kaniya; ug sila kinsa adunay hugot nga pagtuo diha kaniya mounong ngadto sa matag maayo nga butang; busa siya naglaban sa kaayohan sa mga katawhan.”¹¹ Ang pagpakita og pagtuo diha ni Kristo mao ang *pagsalig* Kaniya isip atong Manluluwas, diha sa Iyang ngalan, ug sa Iyang mga saad.

Ang una ug natural nga sangputanan sa pagsalig sa Manluluwas mao ang paghinulsol ug pagpalayo sa dautan. Samtang mopakita kita og pagtuo diha ug nganha sa Ginoo, natural kitang mopadulong, moduol, ug mosalig Kaniya. Sa ingon, ang paghinulsol mao ang *pagsalig* ug *pag-agad* diha sa Manunubos nga mobuhat alang kanato sa unsay dili nato mabuhay sa atong kaugalingon. Ang matag usa kanato kinahanglang “[*mosalig*] sa hingpit diha sa mga maayo nga buhat kaniya kinsa gamhanan sa pagluwas”¹² tungod kay “pinaagi sa mga maayo nga buhat, kalooy, ug grasya sa Balaang Mesiyas”¹³ lamang nga kita mahimong bag-ong mga binuhat diha kang Kristo¹⁴ ug sa katapusan mobalik ug mopuyo diha sa presensya sa Dios.

Ang ordinansa sa bunyag pinaagi sa pagpaunlod alang sa kapasayloan sa mga sala nagkinahanglan kanato nga *mosalig* Kaniya, *mag-agad* diha Kaniya, ug *mosunod* Kaniya. Miproklamar si Nephi, “Ako nasayud nga kamo *mosunod sa Anak*, uban ang hingpit nga katuyoan sa kasingkasing, sa walay pagpakaaron-ingnon ug walay

pagpanglimbong sa atubangan sa Dios, apan uban sa tinuod nga katuyoan, maghinulsol sa inyong mga sala, magsaksi ngadto sa Amahan nga kamo andam sa pagdala diha kaninyo sa ngalan ni Kristo, pinaagi sa bunyag—oo, pinaagi sa *pagsunod sa inyong Ginoo* ug sa *inyong Manluluwas* ngadto sa tubig, sumala sa iyang pulong, tan-awa, unya kamo makadawat sa Espiritu Santo; oo, unya mosunod ang bunyag sa kalayo ug sa Espiritu Santo.”¹⁵

Ang ordinansa sa pagpandong sa mga kamot alang sa gasa sa Espiritu Santo nagkinahanglan kanato nga *mosalig* Kaniya, *mag-agad* diha Kaniya, *mosunod* Kaniya, ug *mopadayon sa unahan* diha Kaniya uban sa tabang sa Iyang Balaang Espiritu. Sama sa gideklarar ni Nephi, “Ug karon . . . ako nasayud pinaagi niini nga gawas kon ang usa ka tawo molahutay hangtud sa katapusan, sa pagsunod sa panig-ingnan sa Anak sa buhi nga Dios, siya dili maluwas.”¹⁶

Ang ikaupat nga artikulo sa hugot nga pagtuo wala lamang moila sa mahinungdanong mga baruganan ug

mga ordinansa sa gipahiuli nga ebanghelyo. Hinoon, kining dinasig nga pamahayag sa gituohan mihiusa diha kang Kristo sa tanang mga butang: *pagsalig* diha ug nganha Kaniya, *pag-agad* diha Kaniya, *pagsunod* Kaniya, ug *pagpadayon sa unahan* uban Kaniya—gani diha Kaniya.

Ehemplo 2. Karon gusto nakong ihulagway kon sa unsang paagi ang tanang mga programa ug inisyatibo sa Simbahan gihiusa diha kang Kristo. Daghang dugang nga mga paghulagway ang mahimog gipakita; mogamit ko og pipila lang ka pinili.

Niadtong 1978, si Presidente Spencer W. Kimball mitudlo sa mga miyembro sa Simbahan sa pagpalig-on sa Zion sa tibuok kalibutan. Mitambag siya sa mga Santos nga magpabilin sa ilang yutang natawhan ug moestablisar og lig-ong mga stake pinaagi sa pagpundok sa pamilya sa Dios ug sa pagtudlo kanila sa mga pamaagi sa Ginoo. Gipasabut pa niya nga dugang nga mga templo ang tukuron ug misaad og mga panalangin sa mga Santos bisan asa sila nagpuyo sa kalibutan.¹⁷

Samtang misaka ang gidaghanon sa mga stake, ang panginahanglan nagkakusog alang sa mga panimalay sa mga miyembro nga “mahimong [mga dapit] diin ang mga sakop sa pamilya [ganahan] nga maanaa, diin [makahimo] sila sa pagpalambo sa ilang mga kinabuhi ug makakaplag og gugma sa usag usa, suporta, pagdayeg, ug pag-awhag.”¹⁸ Agig sangputanan, niadtong 1980, ang mga miting sa Dominggo gihiusa ngadto sa tulo ka oras nga hut-ong aron “mahatagan pag-usab og gibug-aton ang personal ug pamilya nga responsibilidad sa pagkat-on, pagsunod, ug pagtudlo sa ebanghelyo.”¹⁹ Kini nga paghatag og gibug-aton sa pamilya ug panimalay gimatud-an pag-usab diha sa “Ang Pamilya: Usa Ka Pamahayag ngadto sa Kalibutan,” nga gipaila ni Presidente Gordon B. Hinckley niadtong 1995.²⁰

Niadtong Abril 1998, gipahibalo ni Presidente Hinckley ang pagtukod sa daghan pang mas gagmay nga mga templo, sa ingon gidala ang sagradong mga ordinansa sa balay sa Ginoo ngadto sa mga indibidwal ug mga pamilya





nga Santos sa Ulahing mga Adlaw sa tibuok kalibutan.²¹ Ug kining gipauswag nga mga oportunidad sa espirituwal nga pagtubo ug paglambo gihimong mas epektibo pinaagi sa konektado nga pag-uswag sa temporal nga self-reliance pinaagi sa pagpaila sa Perpetual Education Fund niadtong 2001.²²

Panahon sa iyang administrasyon, si Presidente Thomas S. Monson balik-balik nga miawhag sa mga Santos “sa pagluwas” ug mihatag og gibug-aton sa pag-atiman sa mga kabus ug timawa isip usa sa balaanong gitudlo nga mga responsibilidad sa Simbahan. Mipadayon sa paghatag og gibug-aton sa temporal nga pagpangandam, ang inisyatibo sa Self-Reliance Services giimplementar niadtong 2012.

Sulod sa pipila ka tuig, ang mahinungdanong mga baruganan mahitungod sa paghimo sa adlaw nga Igpapahulay nga kahimut-an diha sa panimalay ug sa simbahan gipasabut og maayo ug gisuportahan,²³ sa ingon nag-andam kanato sa kausaban sa iskedyul sa miting sa Dominggo nga gipahibalo niining sesyon sa kinatibuk-ang komperensya.

Ug unom ka bulan ang milabay, ang mga korum sa Melchizedek Priesthood gilig-on ug mas epektibong gipahiangay sa mga auxiliary aron makab-ot ang mas taas ug mas balaan nga paagi sa pagpangalagad.

Nagtuo ko nga ang pagkasunod ug tayming niini nga mga aksyon sulod sa daghang dekada makatabang kanato nga makakita og usa ka hiniusa ug komprehensibo nga buhat ug dili lamang

nagsunod nga independente ug managlahi nga mga inisyatibo. “Ang Dios mipadayag og sumbanan sa espirituhanong kalamboan sa mga indibidwal ug mga pamilya pinaagi sa mga ordinansa, pagtudlo, mga programa, ug mga kalihokan nga **nakasentro sa panimalay ug gisuportahan sa Simbahan**. Ang mga organisasyon ug mga programa sa Simbahan anaa aron sa pagpanalangin sa mga indibidwal ug mga pamilya ug dili aron maanaa lang kini.”²⁴

Mag-ampo ko nga makaamgo kita sa buhat sa Ginoo isip usa ka mahinungdanong tibuok kalibutan nga buhat nga nahimong mas nakasentro sa panimalay ug gisuportahan sa Simbahan. Ako nasayud ug mopamatuod nga ang Ginoo mipadayag ug “mopadayag pa og daghan nga dagko ug mahinungdanon nga mga butang kalabut sa Gingharian sa Dios.”²⁵

Saad ug Pagpamatuod

Akong gisugdan ang akong mensahe pinaagi sa pagpaklaro sa kalig-on nga namugna samtang ang indibidwal nga mga lanot sa materyal gihiusa sa paglubid aron mahimong pisi. Sa samang paagi, mosaad ko nga ang dugang nga panglantaw, katuyoan, ug gahum mahimong klaro diha sa atong pagkat-on ug pagsunod sa gipahiuli nga ebanghelyo ni Jesukristo samtang maningkamot kita sa paghiusa diha kang Kristo sa tanang mga butang—gani diha Kaniya.

Ang tanang mga oportunidad ug mga panalangin nga dunay mahangtulong sangputanan nagagikan,

nahimong posible ug adunay katuyoan tungod ni, ug molahutay pinaagi ni Ginoong Jesukristo. Sama sa gipamatuod ni Alma: “Walay lain nga paagi o mga pamaagi diin ang tawo maluwas, diha lamang ug pinaagi ni Kristo. Tan-awa, siya mao ang kinabuhi ug ang kahayag sa kalibutan.”²⁶

Malipayon akong modeklarar sa akong saksi sa kabalaan ug buhing reyalidad sa Mahangtulong Amahan ug sa Iyang Pinalanggang Anak, si Jesukristo. Diha sa atong Manluluwas makakaplag kita og kalipay. Ug diha Kaniya makakaplag kita og kasiguroan sa “kalinaw niini nga kalibutan, ug kinabuhi nga dayon diha sa kalibutan nga umaabut.”²⁷ Niini ako mopamatuod sa sagradong pangalan ni Ginoong Jesukristo, amen. ■

MUBO NGA MGA SULAT

1. Mga Taga-Efeso 1:10.
2. Juan 14:6.
3. Tan-awa sa Doktrina ug mga Pakigsaad 1:21–22.
4. Helaman 3:35.
5. Alma 5:14.
6. Tan-awa sa Mateo 5:48; 3 Nephi 12:48.
7. Tan-awa sa Doktrina ug mga Pakigsaad 121:29.
8. Mga Taga-Efeso 2:21.
9. Tan-awa sa Doktrina ug mga Pakigsaad 136:32.
10. Mga Artikulo sa Hugot nga Pagtuo 1:4.
11. Moroni 7:28.
12. 2 Nephi 31:19.
13. 2 Nephi 2:8.
14. Tan-awa sa 2 Mga Taga-Corinto 5:17.
15. 2 Nephi 31:13; emphasis gidugang.
16. 2 Nephi 31:16.
17. Tan-awa ang Spencer W. Kimball, “The Fruit of Our Welfare Services Labors,” *Ensign*, Nob. 1978, 76.
18. Mga instruksyon alang sa mga kapangulohan sa stake ug mga bishopric, sa “Church Consolidates Meeting Schedules,” *Ensign*, Mar. 1980, 73.
19. Mga instruksyon, sa “Church Consolidates Meeting Schedules,” 73.
20. Tan-awa sa “Ang Pamilya: Usa ka Pamahayag ngadto sa Kalibutan,” *Liahona*, Mayo 2017, 145.
21. Tan-awa sa Gordon B. Hinckley, “New Temples to Provide ‘Crowning Blessings’ of the Gospel,” *Ensign*, Mayo 1998, 87–88.
22. Tan-awa sa Gordon B. Hinckley, “The Perpetual Education Fund,” *Liahona*, Hulyo 2001, 60–62, 67.
23. Tan-awa sa Russell M. Nelson, “Ang Igpapahulay usa ka Kahimut-an,” *Liahona*, Mayo 2015, 129–32.
24. *Handbook 2: Administering the Church* (2010), 1.4; emphasis gidugang.
25. Mga Artikulo sa Hugot nga Pagtuo 1:9.
26. Alma 38:9.
27. Doktrina ug mga Pakigsaad 59:23.



Ni Presidente Dallin H. Oaks
Unang Magtatambag sa Unang Kapangulohan

Kamatuoran ug ang Plano

Kon mangita kita sa kamatuoran mahitungod sa relihiyon, gamiton gayud nato ang mga espiritwal nga paagi niana nga pagsiksik.

Ang modernong pagpadayag mipasabut sa kamatuoran isip “ang kahibalo sa mga butang ingon nga sila mao karon, ug ingon nga sila mao sa kaniadto, ug ingon nga sila mao sa umaabut” (Doktrina ug mga Pakigsaad 93:24). Kana ang hingpit nga kahulugan sa plano sa kaluwasan ug sa “Ang Pamilya: usa ka Pamahayag sa Kalibutan.”

Nagpuyo kita sa panahon sa gipalapad ug gisabwag og maayo nga impormasyon. Apan dili tanan niini nga impormasyon tinuod. Kinahanglang magmatngon kita samtang mangita kita sa kamatuoran ug magpili og mga tinubdan niana nga pagsiksik. Dili gayud nato hunahunaon ang sekyular nga kabantug o awtoridad isip haum nga mga tinubdan sa kamatuoran. Kinahanglang magmatngon kita mahitungod sa pagsalig sa impormasyon o tambag nga gitanyag sa mga tigpasiugdang mga artista, iladong mga atleta, o wala hiilhing mga tinubdan gikan sa internet. Ang kabatid sa usa ka butang dili gayud isipon nga kabatid sa kamatuoran sa ubang mga aspeto.

Kinahanglang magmatngon usab kita mahitungod sa katuyoan sa tawo

nga naghatag sa impormasyon. Mao nga mipasidaan kanato ang mga kasulatan batok sa pangilad sa mga pari (tan-awa sa 2 Nephi 26:29). Kon wala hiilhi ang mga tinubdan, kaduhaduhan usab ang impormasyon.

Ang personal natong mga desisyon kinahanglang ibase sa impormasyon gikan sa mga tinubdan nga haum diha sa gihisgutan ug dili sa hinakog nga mga katuyoan.

I.

Kon mangita kita sa kamatuoran mahitungod sa relihiyon, kinahanglang natong gamiton ang espiritwal nga mga paagi niana nga pagsiksik: pag-ampo, saksi sa Espiritu Santo, ug pagtuon sa mga kasulatan ug sa mga pulong sa mga propeta. Kanunay kong magsubo kon dunay moreport nga may tawong nawad-an og relihiyusong pagtuongod sa sekyular nga mga pagtulunan. Kadtong nakasinati na og espiritwal nga panan-awon posibling mag-antus sa tinuyo nga espiritwal nga pagkabuta. Sama sa giingon ni Presidente Henry B. Eyring, “Ang ilang problema wala mag-agad unsay ilang nasabtan; kon dili unsay dili nila masabtan.”¹

Ang pamaagi sa siyensya motul-tol kanato ngadto sa gitawag nato og siyentipikanhong kamatuoran. Apan “ang siyentipikanhong kamatuoran” dili maoy kinatibuk-ang tuyo sa kinabuhi. Kadtong dili magkat-on “pinaagi sa pagtuon ug usab pinaagi sa hugot nga pagtuo” (Doktrina ug mga Pakigsaad 88:118) nag-limit sa ilang panabut sa kamatuoran ngadto sa pwede nilang mapamatud-an sa siyentipikanhong pamaagi. Nagbutang kini og artipisyal nga mga kinutuban sa ilang pagtinguha sa kamatuoran.

Miingon si Presidente James E. Faust: “Kadtong [nabunyagan] mipamiligro sa ilang mahangturong kalag pinaagi sa walay pag-amping nga



pagtinguha lamang og sekyular nga tinubdan sa pagkat-on. Mituo kita nga Ang Simbahan ni Jesukristo sa mga Santos sa Ulahing mga Adlaw adunay kahingpitan sa ebanghelyo ni Kristo, diin ang ebanghelyo maoy lintung-nay sa kamatuoran ug mahangturong pagdan-ag.”²

Makakaplag kita og tinuod ug mola-hutay nga kalipay pinaagi sa pagkahibalo ug paglihok sa kamatuoran kon kinsa kita, sa kahulugan sa mortal nga kinabuhi, ug kon asa kita human kita mamatay. Kadto nga mga kamatuoran dili makat-unan pinaagi sa siyensya o mga sekyular nga pamaagi.

II.

Hisgutan nako karon ang mga kamatuoran sa gipahiuli nga ebanghelyo nga maoy sukaranan sa doktrina sa Ang Simbahan ni Jesukristo sa mga Santos sa Ulahing mga Adlaw. Palihug pag-amping sa pagkonsiderar niini nga mga kamatuoran. Mopasabut kini og daghan bahin sa atong doktrina ug mga buhat, tingali lakip sa pipila nga wala pa masabti.

Adunay Dios, nga mapinanggaong Amahan sa mga espiritu sa tanan nga nabuhi o mabuhi.

Ang pagkalalaki o pagkababaye mahangturon. Sa wala pa kita matawo dinhi sa yuta, tanan kita nabuhi isip lalaki ug babaye nga mga esiritu sa presensya sa Dios.

Bag-o lang natong nadungog ang Tabernacle Choir sa Temple Square nga mikanta sa “Sundon Ko ang Plano sa Dios.”³ Mao kana ang plano nga gitukod sa Dios aron ang tanan Niyang espiritu nga anak molambo sa mahangturon nga paagi. Kana nga plano mahinungdanon sa matag usa kanato.

Ubos niana nga plano, gimugna sa Dios kini nga yuta isip dapit diin ang pinalangga Niyang espiritu nga mga anak matawo sa mortalidad aron makadawat og pisikal nga lawas ug makaangkon sa oportunidad alang sa mahangturong paglambo pinaagi sa paghimo og matarung nga mga pagpili.

Aron mahimong makahuluganon, gikinahanglan ang mortal nga pagpili tali sa nagtigi nga pwersa sa maayo ug

sa dautan. Kinahanglan dunay oposisyon, ug mao nga, ang usa ka kaaway, kinsa gipalayas tungod sa pagsupak ug gitugutan nga motintal sa mga anak sa Dios nga mosupak sa plano sa Dios.

Ang katuyoan sa plano sa Dios mao ang paghatag sa Iyang mga anak og oportunidad sa pagpili og kinabuhing dayon. Makab-ot lamang kini pinaagi sa mortal nga kasinatian ug, human sa kamatayon, pinaagi sa paglambo human sa kamatayon didto sa kalibutan sa espiritu.

Sa pagpadayon sa mortal nga kinabuhi, tanan kita mahugawan sa sala kon mosanong kita sa mga pagtintal sa kaaway, ug sa katapusan kita mamatay. Gidawat nato kana nga mga hagit uban sa pagsalig sa kasiguroan sa plano nga ang Dios atong Amahan mohatag og usa ka Manluluwas, Iyang Bugtong Anak, nga moluwas kanato pinaagi sa yunibersal nga pagkabanhaw aron mabuhi nga may lawas human sa kamatayon. Mohatag usab ang Manluluwas og usa ka pag-ula nga ibayad sa kantidad sa tanan aron malimpyohan gikan sa sala subay sa mga kondisyon nga Iyang gihan-ay. Kadto nga kondisyon naglakip og patuo kang Kristo, paghinulol, bunyag, gasa sa Espiritu Santo, ug ubang ordinansa nga ipahigayon sa awtoridad sa priesthood.

Ang mahinungdanong plano sa Dios sa kalipay maghatag og perpektong balanse tali sa mahangturong hustisya ug kalooy nga atong maangkon pinaagi sa Pag-ula ni Jesukristo. Makapausab usab kini kanato ngadto sa bag-ong mga nilalang diha kang Kristo.

Usa ka mahigugmaong Dios motabang sa matag usa kanato. Nasayud kita niana pinaagi sa Iyang gugma ug tungod sa Pag-ula sa Iyang Bugtong Anak, ang “*tanang* katawhan maluwat, pinaagi sa pagsunod sa mga balaod ug mga ordinansa sa [Iyang] Ebanghelyo” (Mga Artikulo sa Hugot nga Pagtuo 1:3).

Ang Simbahan ni Jesukristo sa mga Santos sa Ulahing mga Adlaw sa tinuod nailhan nga usa ka Simbahan nga nag-sentro sa pamilya. Apan ang wala kaayo masabti mao nga ang atong pagsentro sa pamilya nakatutok labaw pa kay sa

mortal nga mga relasyon. Ang mahangturong mga relasyon mahinungdanon usab sa atong teyolohiya. “Ang pamilya gi-orden sa Dios.”⁴ Ubos sa talagsaong plano sa atong mahigugmaong Tiglalang, ang misyon sa Iyang gipahiuli nga Simbahan mao ang pagtabang sa mga anak sa Dios nga makab-ot ang langitnong panalangin sa kahimayaan sa celestial nga gingharian, nga makab-ot lamang pinaagi sa mahangturong kaminyoon tali sa usa ka lalaki ug usa ka babaye (tan-awa sa Doktrina ug mga Pakigsaad 131:1–3). Kami mopamatuod sa mga pagtulun-an sa Ginoo nga “ang pagkalalaki ug pagkababaye [gender] usa ka mahinungdanon nga kinaiya sa tagsa-tagsa sa kinabuhi sa wala pa dinhi sa yuta, sa pagkamortal, ug sa walay katapusan nga pag-ila ug katuyoan” ug ang “kaminyoon tali sa lalaki ug babaye mahinungdanon ngadto sa Iyang walay katapusan nga laraw.”⁵

Sa katapusan, hilabihan ang gugma sa Dios nga, gawas sa pipila kinsa tuyo gayud nga nahimong mga anak sa kapildihan, giandam Niya ang padulngan sa himaya alang sa tanan Niyang mga anak. Ang “tanang Niyang mga anak” naglakip sa tanan nga patay na. Kita mobuhat sa mga ordinansa alang kanila pinaagi sa pag-proxy diha sa atong mga templo. Ang katuyoan sa Simbahan ni Jesukristo mao ang pagkahimong takus sa Iyang mga anak alang sa kinatas-an nga ang-ang sa himaya, nga mao ang kahimayaan o mahangturong kinabuhi. Alang niadtong dili magtinguha o dili takus niana, naghatag ang Dios og lain, bisan og mas ubos nga mga gingharian sa himaya.

Bisan kinsa nga nakasabut niining mahangturong mga kamatuoran makasabut ngano nga kitang mga miyembro sa Ang Simbahan ni Jesukristo sa mga Santos sa Ulahing mga Adlaw maghunahuna ug mobuhat sama sa atong gipangbuhat.

III.

Akong hisgutan karon ang pipila ka mga paggamit niining mahangturong mga kamatuoran, nga masabtan lamang pinaagi sa pagsabut sa plano sa Dios.

Una, mitahud kita sa tinagsa nga kabubut-on. Ang kadaghanan nahibalo sa dako kaayong mga paningkamot sa gipahiuli nga Simbahan sa pagpasiugda og relihiyusong kagawasan sa Estados Unidos ug sa tibuok kalibutan. Kini nga mga paningkamot wala lang magpasiugda og kaugalingon natong mga interes apan, sumala sa Iyang plano, nagtinguha sa pagtabang sa tanang anak sa Dios nga makatagamtam sa kagawasan sa pagpili.

Ikaduha, mga misyonaryo kita nga katawhan. Usahay pangutan-on ta nganong magpadala kita og daghan kaayong misyonaryo sa daghang kanasuran, gani ngadto sa Kristiyanong mga katawhan. Nakadawat kami og samang pangutana nganong nanghatag kita og daghang minilyon ka dolyar sa humanitarian nga tabang sa mga tawo nga dili mga miyembro sa atong Simbahan ug nganong wala man nato kini isumpay sa atong mga misyonaryong paningkamot. Gihimo nato kini tungod kay atong giila ang tanang mortal isip mga anak sa Dios—atong mga igsoon—ug gusto kitang mopaambit sa atong espirital ug temporal nga kaabunda ngadto sa tanan.

Ikatulo, ang kinabuhi sagrado para kanato. Ang atong pasalg sa plano sa Dios nagkinahanglan nga mosupak kita sa aborsyon ug sa kinalooy nga pagpatay.

Ikaupat, ang uban naglibug mahitungod sa nagkalain-laing mga gibuhay sa Simbahan mahitungod sa kaminyoon ug sa mga anak. Ang atong kahibalo mahitungod sa gipadayag sa Dios nga plano sa kaluwasan nagkinahanglan nga mosukwahi kita sa kasamtangang sosyal ug legal nga mga pamugos sa pag-usab sa tradisyonal nga kaminyoon ug paghimo og mga kausaban nga makapalibug o pag-usab sa sekso [kinatawo] o pag-usab sa mga kalainan tali sa lalaki ug sa babaye. Nasayud kita nga ang mga relasyon, mga ilhanan, ug ang mga pweding himoon sa mga lalaki ug mga babaye mahinungdanon sa pagpahaman sa talagsaong plano sa Dios.

Ikalima, kita usab dunay talagsaon nga panglantaw sa mga anak. Gilantaw nato ang pagpanganak ug pag-amuma



sa mga bata isip kabahin sa plano sa Dios ug sa makalipay ug sagradong katungdanan niadtong gihatagan og gahum sa pag-apil niini. Sa atong panan-aw, ang pinakabahandi sa yuta ug sa langit mao ang atong mga anak ug atong kaliwatan. Mao nga, kinahanglang itudlo ug ipakiglantugi gyud nato ang mga baruganan ug buhat nga magsangkap sa pinakamaayong mga kahimtang alang sa kalamboan ug kalipay sa mga anak—sa tanang anak.

Sa *katapusan*, kita pinalanggang mga anak sa Langitnong Amahan, kinsa mitudlo kanato nga ang pagkalalaki ug pagkababaye, kaminyoon tali sa lalaki ug babaye, ug ang pagpanganak ug pag-amuma sa mga anak tanan mahinungdanon sa Iyang talagsaong plano sa kalipay. Ang atong gibarugan niini nga mga sukaranan sa kasagaran makamugna og oposisyon sa Simbahan. Gikonsiderar nato kana nga dili kapungnan. Ang oposisyon kabahin sa plano, ug ang pinakamakaluya nga pagsupak ni Satanas (ang kaaway) itumong ngadto sa unsa man ang pinakaimportanting plano sa Dios. Tinguha Niya ang pagguba sa buhat sa Dios. Ang pinakauna niyang pamaagi mao ang pagpawalay bili sa Manluluwas ug sa Iyang balaang awtoridad, sa pagwagtang sa mga epekto sa Pag-ula ni Jesukristo, sa dili pagpahinulsol, sa pagkontra sa pagpadayag, ug sa pagsukwahi sa indibidwal nga pagkamay-tulubagon. Tinguha usab niya ang paglibug sa gender [pagkalalaki o pagkababaye], sa

pagguba sa kaminyoon, ug sa pagdili sa pagpapanganak—ilabi na sa mga ginikanan nga nagpadako og mga anak sa kamatuoran.

IV.

Ang buhat sa Ginoo nagpadayon bisan sa nahan-ay ug padayong oposisyon nga nag-atubang kanato samtang maningkamot kita sa pagsunod sa mga pagtulun-an sa Ang Simbahan ni Jesukristo sa mga Santos sa Ulahing mga Adlaw. Alang niadtong masayop tungod sa oposisyon, motanyag ko niining mga sugyot.

Hinumdumi ang baruganan sa paghinulsol nga gihimong posible pinaagi sa dili hitupngan nga gahum sa Pag-ula ni Jesukristo. Sama sa giawhag ni Elder Neal A. Maxwell, ayaw pagpahisama niadtong “gusto nga mousab sa Simbahan kay sa mag-usab sa ilang kaugalingon.”⁶

Sama sa giawhag ni Elder Jeffrey R. Holland:

“Panggunit og hugot sa unsay inyo nang nahibaloan ug barug nga malig-on hangtud moabut ang dugang nga kahibalo. . . .

“ . . . Niini nga Simbahan, ang atong nahibaloan mas molabaw kanunay sa unsay wala nato mahibalo.”⁷

Gamita ang pagtuo kang Ginoong Jesukristo, nga mao ang unang baruganan sa ebanghelyo.

Sa katapusan, pangayo og tabang. Gihigugma kamo sa atong mga lider sa Simbahan ug nagtinguha og espirital

nga giya sa pagtabang kaninyo. Naghatag kita og daghang kapanguhaan sama sa inyong makita sa LDS.org, ug sa ubang mga suporta alang sa pagtuon sa ebanghelyo diha sa panimalay. Aduna usab kitay mga tigpangalagad nga brother ug mga sister nga gitawag sa paghatag og mapinanggaong tabang.

Ang atong mapinanggaong Langit-nong Amahan gusto nga malipay ang Iyang mga anak nga mao ang katuyoan sa atong pagkalalang. Kana nga mahimayaong destinasyon mao ang kinabuhing dayon, nga atong maangkon pinaagi sa pagpadayon sa unahan subay sa kanunayng gilitok sa atong propeta, si Presidente Russel M. Nelson nga, “ang dalan sa pakigsaad.” Mao kini ang iyang gisulti sa una niyang mensahe isip Presidente sa Simbahan: “[Padayon] diha sa dalan sa pakigsaad. Ang inyong pasalog nga mosunod sa Manluluwas pinaagi sa paghimo og mga pakigsaad uban Kaniya ug dayon sa pagtuman niadto nga mga pakigsaad moabli sa pultahan ngadto sa tanang espirituhanong mga panalangin ug pribilehiyo nga mahimong maanaa sa mga lalaki, babaye, ug mga anak bisan asa.”⁸

Sa ligdong nga paagi mopamatuod ko nga ang mga butang nga akong gisulti tinuod, ug gihimo kining posible pinaagi sa mga pagtulunan ug sa Pag-ula ni Jesukristo, kinsa naghimo niining tanan nga posible ubos sa talagsaong plano sa Dios, atong Mahangturong Amahan. Sa pangalan ni Jesukristo, amen. ■

MUBO NGA MGA SULAT

1. Henry B. Eyring, *To Draw Closer to God: A Collection of Discourses* (1997), 143.
2. James E. Faust, “The Abundant Life,” *Ensign*, Nob. 1985, 9.
3. “Sundon Ko ang Plano sa Dios” *Songbook sa mga Bata*, 86–87.
4. “Ang Pamilya: Usa ka Pamahayag ngadto sa Kalibutan,” *Liahona*, Mayo 2017, 145.
5. “Ang Pamilya: Usa ka Pamahayag ngadto sa Kalibutan,” 145.
6. Neal A. Maxwell, *If Thou Endure It Well* (1996), 101.
7. Jeffrey R. Holland, “Nagatuo Ako,” *Liahona*, Mayo 2013, 94; emphasis sa orihinal.
8. Russell M. Nelson, “Samtang Dungan Kita nga Magpadayon sa Unahan,” *Liahona*, Abr. 2018, 7.



Sesyon sa Sabado sa Hapon | Oktubre 6, 2018

Gipresentar ni Presidente Henry B. Eyring
Ikaduhang Magtatambag sa Unang Kapangulohan

Ang Pagpaluyo sa mga Opisyal sa Simbahan

Mga kaigsoonan, ako na karong ipresentar kaninyo ang mga General Authority, mga Area Seventy, ug mga General Auxiliary

Presidency sa Simbahan alang sa inyong pagpaluyo nga boto.

Gisugyot nga atong paluyohan si Russell Marion Nelson isip propeta,



manalagna, ug tigpadayag ug Presidente sa Ang Simbahan ni Jesukristo sa mga Santos sa Ulahing mga Adlaw; Dallin Harris Oaks isip Unang Magtatambag sa Unang Kapangulohan; ug Henry Bennion Eyring isip Ikaduhang Magtatambag sa Unang Kapangulohan.

Kadtong uyon mahimong mopakita niini.

Kadtong supak, kon aduna, mahimong mopakita niini.

Gisugyot nga atong paluyohan si Dallin H Oaks isip Presidente sa Korum sa Napulog Duha ka mga Apostoles ug si Melvin Russell Ballard isip Akting nga Presidente sa Korum sa Napulog Duha ka mga Apostoles.

Kadtong uyon, palihug ipakita kini.

Bisan kinsa nga supak mahimong mopakita niini.

Gisugyot nga atong paluyohan ang mosunod isip mga sakop sa Korum sa Napulog Duha ka mga Apostoles: M. Russell Ballard, Jeffrey R. Holland, Dieter F. Uchtdorf, David A. Bednar,

Quentin L. Cook, D. Todd Christoferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit W. Gong, ug si Ulisses Soares.

Kadtong uyon palihug ipakita kini. Si bisan kinsa nga mosupak mahimong mopakita sa ingon.

Gisugyot nga atong paluyohan ang mga magtatambag sa Unang Kapangulohan ug ang Napulog Duha ka mga Apostoles isip mga propeta, manalagna, ug mga tigpadayag.

Ang tanang uyon, palihug ipakita kini.

Ang dili uyon, kon aduna, sa samang paagi.

Gisugyot nga atong paluyohan si Brook P. Hales, kinsa natawag sa pagserbisyo isip usa ka General Authority Seventy.

Kadtong uyon palihug ipakita kini.

Kadtong supak, kon aduna, mahimong mopakita niini.

Gisugyot nga atong i-release

inubanan sa pagpasalamat sa ilang mahalaron nga pagserbisyo sila si Elder Mervyn B. Arnold, Craig A. Cardon, Larry J. Echo Hawk, C. Scott Grow, Allan F. Packer, Gregory A. Schwitzer, ug Claudio D. Zivic isip mga General Authority Seventy ug ihatag kanila ang pagka-emeritus.

Kadtong buot nga moapil kanamo sa pagpasalamat niining mga Kaigso-onan sa ilang dalayegon kaayo nga serbisyo, palihug ipakita kini.

Gisugyot nga atong i-release ang mosunod isip Area Seventies: B. Sergio Antunes, Alan C. Batt, R. Randall Bluth, Hans T. Boom, Fernando E. Calderón, H. Marcelo Cardus, Paul R. Coward, Marion B. De Antuñano, Robert A. Dryden, Daniel F. Dunnigan, Jeffrey D. Erikson, Mervyn C. Giddey, João Roberto Grahl, Richard K. Hansen, Todd B. Hansen, Michael R. Jensen, Daniel W. Jones, Steven O. Laing, Axel H. Leimer, Tasara Makasi, Alvin F. Meredith III, Adonay S. Obando, Katsuyuki Otahara, Fred A. Parker, José C. Pineda, Gary S. Price, Miguel A. Reyes, Alfredo L. Salas, Netzahualcoyotl Salinas, Michael L. Southward, G. Lawrence Spackman, William H. Stoddard, Stephen E. Thompson, David J. Thomson, George J. Tobias, Jacques A. Van Reenen, Raul Edgardo A. Vicencio, Keith P. Walker, ug Daniel Yirenya-Tawiah.

Kadtong kinsa moapil kanamo sa pagpadayag og pasalamat sa ilang maayo kaayo nga pagserbisyo, palihug ipakita kini.

Gisugyot nga atong paluyohan ang ubang mga General Authority, mga Area Seventy, ug mga General Auxiliary Presidency ingon nga naglangkob karon.

Ang tanang uyon, palihug ipakita kini.

Ang dili uyon, kon aduna, sa samang paagi.

Gidapit namo kadtong misupak sa bisan hain sa gisugyot sa pagkontak sa ilang mga presidente sa stake.

Mga kaigsoonan, mapasalamaton kami sa inyong padayon nga hugot nga pagtuo ug mga pag-ampo alang sa mga lider sa Simbahan. ■





Ni Elder D. Todd Christofferson

Sa Korum sa Napulog Duha ka mga Apostoles

Lig-on ug Makanunayon diha sa Hugot nga Pagtuo kang Kristo

Aron magpabilin nga lig-on ug makanunayon diha sa hugot nga pagtuo kang Kristo kinahanglan nga ang ebanghelyo ni Jesukristo modulot sa kasingkasing ug kalag sa tawo.

Sa kasaysayan sa Daang Tugon, mabasa nato ang sunod-sunod nga mga panahon sa dihang ang mga anak ni Israel mitahud sa ilang pakig-saad ni Jehova ug misimba Kaniya ug sa ubang mga panahon sa dihang ilang gibaliwala ang pakigsaad ug misimba og mga dios-dios o ni Baalim.¹

Ang paghari ni Achab mao ang usa sa mga panahon sa apostasiya sa aminahanang gingharian sa Israel. Si propeta Elijah sa usa ka okasyon misulti ni Haring Achab sa pagpundok sa mga tawo sa Israel ingon man usab sa mga propeta o mga pari ni Baal sa Bukid sa Carmelo. Sa dihang ang mga tawo nagpundok na, si Elijah miingon ngadto kanila, “Hangtud kanus-a ba nga magakiangkiang kamo sa taliwala sa duha ka daplin? [o sa laing pagkasulti, “Kanus-a man kamo mohukom?”] kong ang Ginoo Dios man, sumunod kamo kaniya; apan kong si Baal man sumunod kamo kaniya. Ug ang katawhan wala motubag kaniya bisan usa ka pulong.”² Mao nga si Elijah misugo

nga siya ug ang mga propeta ni Baal moihaw og gamay nga laking baka ug ibutang kini ibabaw sa kahoy sa ilang tagsa-tagsa ka altar apan “walay kalayo sa ilalum.”³ Dayon, “Managtawag kamo sa ngalan sa inyong dios, ug ako magatawag sa ngalan sa Ginoo: ug ang Dios nga magatubag pinaagi sa kalayo, siya mao ang Dios. Ug ang katawhan nga tanan mingtubag, ug miingon: Maayo kanang pagkasulti.”⁴

Mahinumduman ninyo nga ang mga pari ni Baal nanawag sa ilang dios nga wala diha sulod sa daghang mga oras sa pagpadala og kalayo, apan “walay tingog, wala bisan kinsa nga mitubag.”⁵ Sa dihang turno na ni Elijah, iyang giayo ang naguba nga altar sa Ginoo, mibutang sa kahoy ug sa halad ibabaw niini, ug dayon misugo nga buboan kini og tubig, dili kausa apan tulo ka higayon. Walay duha-duha nga dili siya ni bisan kinsa nga laing gahum sa tawo ang makapasiga niini.

“Ug nahitabo sa panahon na sa paghalad sa kagabhiong halad, nga

si Elijah ang manalagna, miduol, ug miingon, Oh Ginoo, ang Dios ni Abraham, ni Isaac, ug ni Israel, himoa nga mahibaloan niining adlaw nga ikaw ang Dios dinhi sa Israel, ug ako imong alagad, ug gibuhat ko kining tanang mga butanga sa imong pulong. . . .

“Ug ang kalayo sa Ginoo nahulog, ug misunog sa halad nga sinunog, ug sa kahoy, ug sa mga bato, ug sa abug, ug gitilap ang tubig nga dinha sa kanal.

“Ug sa pagkakita sa katawhang tanan niana, giduko ang ilang mga nawong: ug sila nanag-ingon: Ang Ginoo siya mao ang Dios; ang Ginoo mao siya ang Dios.”⁶

Karon si Elijah moingon:

- Bisan ang Dios, ang atong Langit-nong Amahan, anaa, o wala Siya, apan kon Siya anaa, simbaha Siya.
- Bisan si Jesukristo mao ang Anak sa Dios, ang nabanhaw nga Manunubos sa katawhan, o Siya dili, apan kon Siya mao, sunda Siya.
- Bisan ang Basahon ni Mormon mao ang pulong sa Dios, o dili, apan kon kini mao, dayon “paduol sa Dios pinaagi sa [pagtuon ug] pagsunod sa iyang mga lagda.”⁷
- Bisan si Joseph Smith nakakita ug nakigsulti uban sa Amahan ug sa Anak nianang adlaw sa tingpamulak niadtong 1820, o wala, apan kon tinuod, nan sunda ang mapanagnang nga manto, lakip sa mga yawe sa pagbugkos nga ako, si Elijah, mihatag ngadto kaniya.



Sa labing bag-o nga kinatibuk-ang komperensya si Presidente Russell M. Nelson mipahayag: “Dili na kamo kinahanglan maghunahuna kon unsa ang kamatuoran [tan-awa sa Moroni 10:5]. Dili na kamo maghunahuna kinsa ang inyong luwas nga masaligan. Pinaagi sa personal nga pagpadayag, makadawat kamo sa inyong kaugalingon nga pagsaksi nga ang Basahon ni Mormon mao ang pulong sa Dios, nga si Propeta Joseph Smith usa ka propeta, ug nga kini ang Simbahan sa Ginoo. Bisan kon unsa man ang isulti o buhaton sa uban, walay bisan kinsa ang makapawala sa pagsaksi nga midala ngadto sa inyong kasingkasing ug hunahuna kon unsa ang kamatuoran.”⁸

Sa dihang si Santiago misaad nga ang Dios “nagpanghatag ngadto sa tanang mga tawo sa madagayaon gayud” kinsa nagtinguha sa Iyang kaalam,⁹ siya mipasidaan:

“Hinoon kinahanglan nga mangayo siya uban sa pagtuo, sa walay pagduha-duha. Kay siya nga nagaduha-duha, sama sa balud sa dagat nga ginahandus ug ginakusokuso sa hangin.

“Ayaw ipadahum sa maong tawo nga siya adunay madawat gikan sa Ginoo.

“Siya nga maoy tawong tagurhag panghunahuna nga mabalhinon sa tanan niyang mga paagi.”¹⁰

Ang atong Manluluwas, sa laing bahin, mao ang perpekto nga ehemplo sa pagkalig-on. Miingon siya, “Wala ako pasagdi nga mag-inusara, kay sa *kanunay* ginabuhat ko man ang makapahimuot kaniya.”¹¹ Ikonsiderar kini nga mga paghulagway gikan sa mga kasulatan sa mga lalaki ug sa mga babaye kinsa, sama sa Manluluwas, lig-on ug makanunayon:

Sila “nakabig ngadto sa tinuod nga hugot nga pagtuo; ug sila dili gayud mobiya niini, kay sila mga malig-on, ug makanunayon, ug dili matarug, andam uban sa tanan nga kakugi sa paghupot sa mga sugo sa Ginoo.”¹²

“Ang ilang mga hunahuna mga lig-on, ug sila mibutang sa ilang pagsalig diha sa Dios sa kanunay.”¹³

“Ug tan-awa, kamo nasayud sa inyong mga kaugalingon, kay kamo



nakasaksi niini, nga kutob kanila nga gidala ngadto sa kasayuran sa kamatuoran . . . nga lig-on ug makanunayon sa hugot nga pagtuo, ug sa butang diin sila nahimo nga gawasnon.”¹⁴

“Ug milahutay sila sa pagpaminaw sa pagtulun-an gikan sa mga apostoles, ug milahutay sila sa pagpakig-ambitay uban kanila sa pagpikaspikas sa tinapay, ug sa mga pag-ampo.”¹⁵

Sa pagpatunhay sa kalig-on ug pagkamakanunayon sa pagtuo kang Kristo magkinahanglan nga ang ebanghelyo ni Jesukristo modulot sa kasingkasing ug kalag sa usa ka tawo, nagpasabut nga ang ebanghelyo mahimong dili lamang usa sa daghang mga impluwensya sa kinabuhi sa tawo apan ang makahuluganong pagtutok sa iyang kinabuhi ug kinaiya. Ang Ginoo miingon:

“Hatagan ko usab kamo sa usa ka bag-o nga kasingkasing, ug ang usa ka bag-ong espiritu igabutang ko sa sulod ninyo: kuhaon ko ang batoon nga kasingkasing gikan sa inyong unod.

“Ug igabutang ko ang akong Espiritu sa sulod ninyo, ug palakton ko kamo sa akong kabalaoran, ug kamo magabantay sa akong mga tulumanon, ug magatuman kanila.

“Ug . . . kamo mahimong akong katawhan, ug ako mahimo nga inyong Dios.”¹⁶

Mao kini ang pakigsaad nga atong gihimo pinaagi sa atong bunyag ug mga ordinansa sa templo. Apan ang uban wala pa makadawat sa hingpit sa ebanghelyo ni Jesukristo nganha sa ilang mga kinabuhi. Bisan og, sama sa gisulti ni Pablo, sila “gilubong uban ni [Kristo] pinaagi sa bunyag,” nawala gihapon gikan nila ang bahin nga “maingon nga si Kristo gibanhaw gikan sa mga patay . . . , kita usab . . . managgawi diha sa [usa] kabag-o sa kinabuhi.”¹⁷ Ang ebanghelyo wala pa mohatag og kahulugan niini. Wala pa sila masentro diha kang Kristo. Sila mapilion mahitungod sa mga doktrina ug mga sugo nga ilang sundon ug asa ug kanus-a sila moalagad sa Simbahan. Pinaagi sa pagtandi, ang pagtuman sa ilang mga pakigsaad nga walay pagkasayop nga kadtong “kinsa pinili sumala sa pakigsaad”¹⁸ makalikay nga mailad ug magpabilin nga lig-on diha sa pagtuo ni Kristo.

Kadaghanan nato makakita sa atong kaugalingon niining duha ka nagkalahi nga sitwasyon tali sa nadasig nga moapil sa mga tulumanon sa ebanghelyo tungod sa sosyal nga mga konsiderasyon apan mapakaaron-ingnon sa pagbuhat sa mga butang nga may kalabutan sa ebanghelyo ug sa laing bahin ang hingpit nga paglambo sa Kristohanon nga pasalig ngadto sa kabubut-on



sa Dios. Niining duha ka nagkalahi nga sitwasyon, ang maayong balita sa ebanghelyo ni Jesukristo mosulod sa atong kasingkasing ug moangkon sa atong kalag. Tingali dili kini mahitabo diha-diha, apan kita kinahanglan nga nagpaingon nianang bulahan nga kahimtang.

Mahagiton kini apan importante nga magpabilin nga lig-on ug makanunayon kon makita nato ang atong kaugalingon nga gihashasan “diha sa hudno sa kasakit,”¹⁹ butang nga moabut dayon o ulahi kanatong tanan dinhi sa pagka-mortal. Kon walay Dios, kining malisud nga mga kasinatian makahimo og ingon sa walay paglaum, ug gani kanunay nga kasuko. Uban sa Dios, ang kahupayan mopuli sa kasakit, kalinaw mopuli sa kasamok, ug paglaum mopuli sa kasubo. Ang magpabilin nga lig-on diha sa hugot nga pagtuo kang Kristo makahatag sa Iyang makapatunhay nga grasya, ug suporta.²⁰ Iyang himoon ang pagsulay ngadto sa panalangin ug, sa mga pulong ni Isaias, “paghatag . . . purongpurong nga bulak nga puli sa abo.”²¹

Akong hisgutan ang tulo ka ehemplo diin ako adunay personal nga kahibalo:

Adunay usa ka babaye kinsa nag-antus sa usa ka makapaluya nga dugay na nga balatian nga nagpadayon bisan pa nga kini gitambalan, sa panalangin sa priesthood, ug pagpuasa ug mga pag-ampo. Bisin pa niana, ang iyang hugot nga pagtuo sa gahum sa

pag-ampo ug sa katinuod sa gugma sa Dios alang kaniya wala mawala. Nagpadayon siya kada adlaw (ug usahay kada oras) nga nagserbisyo kon tawagon diha sa Simbahan ug, uban sa iyang bana, nag-atiman sa bag-ong pamilya, nagpahiyom kutob sa iyang mahimo. Ang iyang kalooy alang sa uban importante kaayo kaniya nga nakalig-on sa iyang kaugalingong pag-antus, ug sa kasagaran iyang gikalimtan ang iyang problema pinaagi sa pagpangalagad ngadto sa uban. Nagpadayon siya nga makanunayon, ug ang mga tawo mobati nga malipayon uban kaniya.

Usa ka tawo nga nagdako sa Simbahan, nag-alagad isip usa ka full-time nga misyonaryo, ug naminyo sa usa ka matahum nga babaye natingala sa dihang ang pipila sa iyang mga igsoon nagsugod sa pagsulti og dili maayo bahin sa Simbahan ug ni Propeta Joseph Smith. Paglabay sa panahon mibiya sila sa Simbahan ug naningkamot sa pagdani kaniya nga mosunod. Ingon nga maoy mahitabo kanunay sa maong mga sitwasyon, sila miataki kaniya gamit ang mga artikulo, mga podcast [rekording] ug mga video nga hinimo sa mga kaaway, kadaghanan kanila mga nangasuko nga kanhi mga miyembro sa Simbahan. Ang iyang mga igsoon mitamay sa iyang tinuhoan, nagsulti kaniya nga siya inosente ug nasaag. Wala siyay mga tubag sa ilang tanang mga pamahayag, ang iyang hugot nga pagtuo nagsugod sa

pagkahuyang ubos sa walay hunong nga oposisyon. Naghunahuna siya kon mohunong ba siya sa pagsimba. Nakigsulti siya sa iyang asawa. Nakigsulti siya sa mga tawo nga iyang gisaligan. Nag-ampo siya. Samtang siya namalandong niining malisud nga emosyonal nga kahimtang, nakahinumdom siya sa mga okasyon sa dihang siya mibati sa Espiritu Santo ug nakadawat og pagsaksi sa kamatuoran pinaagi sa Espiritu. Naka-hukom siya, “Kon ako magmatinuoron sa akong kaugalingon, kinahanglan nga akong dawaton nga ang Espiritu mitandog kanako makadaghan ug ang pagpamatuod sa Espiritu tinuod.” Nabag-o pag-usab ang iyang pagbati sa kalipay ug kalinaw nga iyang gi-ambitan uban sa iyang asawa ug mga anak.

Ang usa ka bana ug asawa kinsa makanunayon ug malipayong misunod sa tambag sa Kaigsoonan sa ilang mga kinabuhi nagmasulub-on tungod sa kalisud nga ilang nasinati sa pagbaton og mga anak. Nakagasto sila og daghang kwarta sa pagpakonsulta sa hanas nga medikal nga mga propesyunal ug, paglabay sa panahon, gipanalanginan sila og usa ka anak nga lalaki. Hinoon, subo kaayo, human sa mga usa ka tuig lamang, ang bata nabiktima sa usa ka aksidente nga walay usa nga matudlo nga maoy sad-an apan nga siya nahimong semicomatose, nga dunay dakong kadaot sa utok. Nakadawat siya sa labing maayong pag-atiman, apan ang mga doktor dili makatagna sa iyang mahimong kondisyon sa umaabut. Ang bata nga gipaningkamutan ug giampo pag-ayo nga matawo sa kalibutan mora og gikuha ra usab, ug wala masayud kon siya mabalik pa ba kanila. Nakigbisog sila karon sa pag-atiman sa kritikal nga mga panginahanglan sa ilang anak samtang naghimo sa ilang ubang mga responsibilidad. Niining grabe nga malisud nga higayon, sila miduol ngadto sa Ginoo. Nagsalig sila sa “kalan-on matag adlaw” nga ilang nadawat gikan Kaniya. Gitabangan sila sa maloloy-ong mga higala ug pamilya ug nalig-on sa mga panalangin sa priesthood. Nagkasuod sila pag-ayo sa usag usa, ang ilang panag-uban tingali mas milig-on ug mas kompleto kay sa lain pang paagi.

Niadtong Hulyo 23, 1837, ang Ginoo mihatag og pagpadayag ngadto sa kanhi Presidente sa Korum sa Napulog Duha, nga si Thomas B. Marsh. Kini naglangkob sa mosunod:

“Ug pag-ampo alang sa imong mga kaigsoonan ang Napulog Duha. Pahimatnguni sila pag-ayo alang ug tungod sa akong ngalan, ug himoa sila nga mapahimatngunan sa ilang tanan nga mga sala, ug pagmatinud-anon diha sa akong atubangan ngadto sa akong ngalan.

“Ug human sa ilang mga pag-antus, ug daghan nga mga kalisdanan, tan-awa Ako, ang Ginoo, mangita kanila, ug kon sila dili magpatig-a sa ilang mga kasingkasing, ug dili mopatikig sa ilang mga liog batok kanako, sila makabig, ug Ako moalim kanila.”²²

Nagtuo ko sa mga baruganan nga gipadayag niini nga mga bersikulo nga magamit natong tanan. Ang mga tintasyon ug mga kalisdanan nga atong nasinati, dugang sa bisan unsang pag-sulay nga nakita sa Ginoo nga angay ipahamtang, makagiya ngadto sa atong hingpit nga pagkakabig ug pagka-sayo. Apan kini mahitabo, ug mahimo lang kon, kita dili magpatig-a sa atong mga kasingkasing o magpatikig sa atong mga liog batok Kaniya. Kon kita magpabilin nga lig-on ug makanunayon, bisan unsa pay mahitabo, makabot nato ang pagkakabig nga maoy tumong sa Manluluwas sa dihang Siya miingon ngadto ni Pedro, “Sa mahibalik na ikaw kanako, lig-una ang imong mga igsoon,”²³ usa ka pagkakabig nga kompleto kaayo nga dili kini mabakwi. Ang gisaad nga pagkaayo mao ang pagkalimpyo ug pagkabalaan sa atong nasamdan sa sala nga kalag, maghimo nato nga usa ka balaan.

Nakahinumdom ko sa tambag sa among inahan: “Kan-a ang inyong mga utan; makaayo kini kaninyo.” Ang atong mga inahan sakto, ug sa konteksto sa pagkamakanunayon sa hugot nga pagtuo, ang “pagkaon sa imong mga utan” mao ang pag-ampo kanunay, mao ang pagbusog sa mga kasulatan kada adlaw, mao ang pag-alagad ug pagsimba sa Simbahan, mao nga takus nga moambit sa sakrament



matag semana, mao ang paghigugma sa inyong silingan, ug mao ang pagpas-an sa inyong krus sa pagsunod sa Dios kada adlaw.²⁴

Hinumdumi kanunay ang saad sa maayong mga butang nga moabut, karon ug sa human dinhi, alang niadtong kinsa lig-on ug makanunayon sa hugot nga pagtuo kang Kristo. Hinumdumi ang “kinabuhi nga dayon, ug ang hingpit nga kalipay sa mga santos.”²⁵ “O tanan kamo nga mga putli og kasingkasing, ipataas ang inyong mga ulo ug dawata ang makapahimuot nga pulong sa Dios, ug pagbusog sa iyang gugma; kay kamo makahimo, kon ang inyong mga hunahuna malig-on, sa kahangturan.”²⁶ Sa ngalan ni Jesukristo, amen. ■

MUBO NGA MGA SULAT

1. Tan-awa sa Giya ngadto sa mga Kasulatan, “Baal.”
2. 1 Mga Hari 18:21.
3. 1 Mga Hari 18:23.
4. 1 Mga Hari 18:24.
5. 1 Mga Hari 18:29.
6. 1 Mga Hari 18:36, 38–39.
7. Pasiuna sa Basahon ni Mormon.
8. Russell M. Nelson, “Pagpadayag alang sa Simbahan, Pagpadayag alang sa Atong mga Kinabuhi,” *Liahona*, Mayo 2018, 95–96.
9. Tan-awa sa Santiago 1:5.
10. Santiago 1:6–8.
11. Juan 8:29.
12. 3 Nephi 6:14; tan-awa usab sa Alma 27:27.
13. Alma 57:27.
14. Helaman 15:7–8.
15. Mga Buhat 2:42.
16. Ezequiel 36:26–28; tan-awa usab sa

2 Mga Taga-Corinto 3:3.

17. Mga Taga-Roma 6:4.

18. Tan-awa sa Joseph Smith—Mateo 1:22–23; tan-awa usab sa Mateo 24:24–25.

19. 1 Nephi 20:10; tan-awa usab sa Isaias 48:10.

20. Sama sa gisulti sa Ginoo ngadto sa 22 anyos nga si Joseph Smith human mawala ang bahin sa hubad sa Basahon ni Mormon: “Ikaw wala unta mahadlok sa tawo labaw pa kay sa Dios. . . . Siya unta mitunol sa iyang buktion ug mitabang kanimo batok sa tanan nga nagdilaab nga mga pana sa kaaway; ug siya unta nag-uban kanimo sa matag panahon sa kasamok” (Doktrina ug mga Pakigsaad 3:7–8). Mipamatuod si Alma human sa iyang pagkakabig, “Ug ako gibuligan ubos sa mga pagsulay ug mga kasamok sa matag matang, oo ug diha sa tanan nga matang sa mga kasakit; oo, ang Dios miluwas kanako gikan sa bilanggoan, ug gikan sa mga gapos, ug gikan sa kamatayon; oo, ug ako mibutang sa akong pagsalig diha kaniya, ug siya sa gihapon moluwas kanako. Ug ako nasayud nga siya mobayaw kanako sa katapusan nga adlaw, aron mopuyo uban kaniya diha sa himaya” (Alma 36:27–28).

21. Isaias 61:3.

22. Doktrina ug mga Pakigsaad 112:12–13.

23. Lucas 22:32.

24. Tan-awa sa Lucas 9:23. Si Presidente Russell M. Nelson mipahinumdom nato, “Walay lain nga makabukas sa kalangitan sama sa kombinasyon sa nagtubo nga kaputli, hingpit nga kamasulundon, sinserong nangita, inadlaw nga pagbasa sa mga pulong ni Kristo diha sa Basahon ni Mormon [tan-awa sa 2 Nephi 32:3], ug regular nga panahon nga ipasalig alang sa buhat templo ug family history” (“Pagpadayag alang sa Simbahan, Pagpadayag alang sa Atong mga Kinabuhi,” 96).

25. Enos 1:3.

26. Jacob 3:2.



Ni Bishop Dean M. Davies

Unang Magtatambag sa Presiding Bishopric

Dali, Paminaw sa Tingog sa usa ka Propeta

Sa atong pagpalig-on sa atong kinabuhi sa pagbansay sa pagpaminaw ug pagpatalinghug sa tingog sa buhi nga mga propeta, atong anihon ang gisaad nga mahanturong mga panalangin.

Sa paghisgot sa Presidente sa Ang Simbahan ni Jesukristo sa mga Santos sa Ulahing mga Adlaw, ang Ginoo mipahayag:

“Ug usab, ang katungdanan sa Presidente sa buhatan sa Halangdon nga Pagkapari mao ang pagdumala ibabaw sa tibuok simbahan, ug aron mahisama ngadto ni Moises—

“... Oo, aron mahimo nga usa ka manalagna, usa ka tigpadayag, usa ka maghuhubad, ug usa ka propeta, *makaangkon sa tanan nga mga gasa sa Dios diin siya mihatag diha sa pangulo sa simbahan*” (Doktrina ug mga Pakigsaad 107:91-92).

Napanalanginan ko nga mosaksi sa pipila sa gasa sa Dios diha sa Iyang mga propeta. Mahimo bang mopakigbahin ko og usa sa maong sagrado nga kasinatian uban kaninyo? Sa wala pa ako sa akong calling karon, mitabang ko sa pagpangita ug pagrekomend sa umaabut nga dapit alang sa templo. Human sa Septyembre 11, 2001, ang pagtabok sa mga utlanan sa U.S. gikontrolar na pag-ayo. Isip resulta, moabut og duha ngadto sa tulo ka oras alang sa kadaghanan nga miyembro sa

Simbahan sa pagtabok gikan Vancouver, Canada, samtang mopaingon sa Seattle Washington Temple. Si Presidente Gordon B. Hinckley, Presidente sa Simbahan nianang higayuna misugyot nga ang pagtukod og templo sa Vancouver makapanalangin sa mga miyembro sa Simbahan. Ang pagpangita og dapit gitugutan, ug human



namo masusi ang daghang gipanag-iya nga luna sa Simbahan, ang ubang mga dapit sa Vancouver nga wala panagiyaha sa Simbahan gisusi usab.

Usa ka maanindot nga dapit nga gigahin alang sa relihiyon tupad sa Trans-Canadian Highway ang nakit-an. Ang yuta sayon kaayo dumdumon, puno sa matahum nga mga kahoy nga Canadian nga aguho, ug nindot kaayo ang nahimutangan nga makita sa libo-an nga molabay nga mga motorista.

Among gipresentar ang dapit uban sa mga litrato ug mga mapa sa binulan nga miting sa Temple Sites Committee. Si Presidente Hinckley mitugot nga among ibutang ubos sa kontrata ug kompletuhon ang gikinahanglan nga mga pagtuon. Niadtong Disyembre nianang tuiga, gi-report namo pagbalik ngadto sa komitiba nga ang mga pagtuon nakompleto na, ug kami mangayo og pagtugot sa pagpadayon sa pagpalit. Human madungog ang among report, si Presidente Hinckley miingon nga, “Gibati nako nga kinahanglan ko motan-aw niini nga dapit.”

Sa ulahing bahin nianang bulana, duha ka adlaw human sa Pasko, mibiya mi padulong sa Vancouver uban ni Presidente Hinckley; Presidente Thomas S. Monson; ug Bill Williams, usa ka arkitekto sa templo. Gisugat mi ni Paul Christensen, ang lokal nga presidente sa stake, kinsa midala namo ngadto sa dapit. Medyo basa ug dag-um nianang adlaw, apan si Presidente Hinckley mikanaog sa sakyanan ug nagsugod sa paglakaw sa tibuok dapit.

Human makagahin og panahon sa dapit, nangutana ko ni Presidente Hinckley kon gusto ba siya nga motan-aw sa pipila sa ubang mga dapit nga gikonsiderar. Miingon siya, nga gusto siya niana. Kahibalo ka, pinaagi sa pagtan-aw sa ubang mga dapit, naka-himo kami og mga pagtandi sa mga hiyas niini.

Mituyok mi sa palibut sa Vancouver nagtan-aw sa ubang mga yuta, sa katapusan mibalik gihapon sa orihinal nga dapit. Si Presidente Hinckley miingon, “Nindot kini nga dapit.” Dayon nangutana siya, “Makaadto ba kita sa gipanag-iya sa Simbahan nga

meetinghouse nga ikaupat nga bahin sa milya [0.4 km] ang gilay-on?”

“Pwede kaayo, President,” tubag namo.

Nanakay mig balik sa sakyanan ug midrayb ngadto sa duol nga meeting-house. Sa among, pag-abut sa chapel, si Presidente Hinckley miingon, “Liko dinhi sa wala.” Miliko mi ug misubay sa dalan sumala sa gisugo. Ang dalan nagsugod na sa pagtangas.

Sa pag-abut gayud sa sakyanan sa kinatas-an nga bahin, si Presidente Hinckley miingon, “Hunonga ang sakyanan, hununga ang sakyanan.” Dayon mitudlo siya ngadto sa tuo sa usa ka luna sa yuta ug miingon, “Kini kahang yutaa? Anhi dinhi mobarug ang templo. Anhi dinhi ang gusto sa Ginoo ang templo. Makuha ba ninyo kini? Makuha ba ninyo kini?”

Wala namo matan-aw kining yutaa. Layo na kaayo kini sa dakong dalan, ug wala kini malista sa igbabaligya. Sa dihang mitubag mi nga wala kami makahibalo, si Presidente Hinckley mitudlo ngadto sa yuta ug miingon pag-usab, “Anhi dinhi mobarug ang templo.” Nagpabilin mi og pipila ka gutlo ug dayon mibiya padulong sa airport aron mopauli.

Pagkasunod adlaw, si Brother Williams ug ako gitawag ngadto sa opisina ni Presidente Hinckley. Nagdrowing siya sa tanan sa piraso sa papel: sa mga dalan, sa chapel, liko sa wala dinhi, gibutang og X nga timaan ang luna alang sa templo. Nangutana siya unsa nay among nahibaloan. Giingnan namo siya nga wala unta siya mopili og lisud nga yuta. Gipanag-iyu kini sa tulo ka indibidwal: ang usa gikan sa Canada, ang usa gikan sa India, ug ang usa gikan sa China! Ug kini wala maapil sa gigahin alang sa relihiyon.

“Nan, buhata ang inyong labing maayo,” miingon siya.

Dayon nahitabo ang mga milagro. Sulod sa pipila ka bulan gipanag-iyu na nato ang yuta, ug dayon ang siyudad sa Langley, British Columbia, mihatag sa pagtugot sa pagtukod sa templo.

Sa paghunahuna niini nga kasinatian, ako nahimong mapaubsanon sa pagkamgo nga samtang si Brother Williams



ug ako adunay pormal nga edukasyon ug mga tuig nga kasinatian sa real estate ug disenyo sa templo, si Presidente Hinckley walay pormal nga pagbansay; apan siya adunay butang nga mas labaw pa—ang gasa sa mapanagnaon nga pagkamanalagna. Siya nakakita asa mobarug ang templo sa Dios.

Sa dihang ang Ginoo misugo sa unang mga Santos niini nga dispensasyon sa pagtukod og templo, Siya mipahayag:

“Apan himoa ang usa ka balay nga matukod ngadto sa akong ngalan sumala sa sumbanan diin Ako mipakita ngadto kanila.

“Ug kon ang akong mga katawhan motukod niini nga dili subay sa sumbanan diin Ako mipakita . . . , Ako dili modawat niini diha sa ilang mga kamot” (Doktrina ug mga Pakigsaad 115:14–15).

Sama sa unang mga Santos, mao usab kini kanato karon: ang Ginoo mipadayag ug nagpadayon sa pagpadayag ngadto sa Presidente sa Simbahan sa mga sundanan diin ang gingharian sa Dios pagagiyahan sa atong panahon. Ug, sa personal nga bahin, siya mohatag og giya kon unsaon nato sa pagdumala ang atong kinabuhi, nga aron sa ingon ang atong kinaiya mahimong madawat usab sa Ginoo.

Niadtong Abril 2013 namulong ko mahitungod sa pagpangandam sa kada

pundasyon sa templo aron sa pagsiguro nga kini makabarug sa mga unos ug mga kalamidad nga masinati niini. Apan ang pundasyon mao lamang ang sinugdanan. Ang usa ka templo naglangkob og daghang bloke sa gambalay, nga gipahaum sumala sa mga sundanan nga gidesenyo na daan. Kon ang atong kinabuhi mahimong mga templo nga gipaningkamutan sa matag usa nato nga tukuron sumala sa gitudlo sa Ginoo (tan-awa sa 1 Mga Taga-Corinto 3:16–17), makapangutana kita sa atong kaugalingon, “Unsa nga mga bloke sa gambalay ang atong mapahimutang aron sa paghimo sa atong kinabuhi nga matahum, harianon, ug makabarug sa mga unos sa kalibutan?”

Makita nato ang tubag niini nga pangutana diha sa Basahon ni Mormon. Kabahin sa Basahon ni Mormon, si Propeta Joseph Smith miingon, “Ako misulti sa mga kaigsoonan nga ang Basahon ni Mormon mao ang labing tukma sa bisan hain nga basahon dinhi sa yuta, ug ang sukaranan sa atong tinuohan, ug ang tawo labi nga maduol sa Dios pinaagi sa pagsunod sa iyang mga lagda, kay sa bisan hain nga basahon” (pasiuna ngadto sa Basahon ni Mormon). Sa pasiuna sa Basahon ni Mormon, gitudloan kita nga “kadtong kinsa makaangkon og balaan nga saksi gikan sa Espiritu Santo [nga ang Basahon ni Mormon



mao ang pulong sa Dios] masayud usab pinaagi sa sama nga gahum nga si Jesukristo mao ang Manluluwas sa kalibutan, nga si Joseph Smith mao ang Iyang tigpadayag ug [propeta sa Pagpahiuli], ug nga Ang Simbahan ni Jesukristo sa mga Santos sa Ulahing mga Adlaw mao ang gingharian sa Ginoo nga sa makausa naestablisar dinhi sa yuta.”

Kini mao ang pipila sa importante nga mga bloke sa gambalay sa atong indibidwal nga pagtuo ug pagpamatuod:

1. Si Jesukristo mao ang Manunubos sa kalibutan.
2. Ang Basahon ni Mormon mao ang pulong sa Dios.
3. Ang Simbahan ni Jesukristo sa mga Santos sa Ulahing mga Adlaw mao ang gingharian sa Dios dinhi sa kalibutan.
4. Si Joseph Smith mao ang propeta, ug kita adunay buhi nga mga propeta sa kalibutan karon.

Sa nangaging bulan, naminaw ko sa matag pakigpulong sa kinatibuk-ang komperensya nga gihatag ni Presidente Nelson sukad una siyang gitawag isip usa ka Apostol. Kining akong gibuhay nakapausab sa akong kinabuhi. Samtang nagtuon ug namalandong ko sa 34 ka tuig nga nakolekta nga kaalam ni Presidente Nelson, klaro ug makanunayon nga mga tema ang makita sa iyang mga pagtulun-an. Ang matag usa niini nga mga tema may kalabutan niadtong mga bloke

sa gambalay nga bag-o lang gihisgutan o mao ang laing importante nga bloke sa gambalay alang sa atong personal nga mga templo. Kini naglakip sa hugot nga pagtuo diha ni Ginoong Jesukristo; paghinulsol; bunyag alang sa mga kapasayloan sa mga sala; gasa sa Espiritu Santo; katubsanan sa mga patay ug buhat sa templo; pagbalaan sa Igpapahulay nga adlaw; pagsugod sa tahas nga may klarong panglantaw og direksyon nga mabuhay kini; pagpabilin diha sa dalan sa pakigsaad. Si Presidente Nelson nakapamulong niining tanan uban sa gugma ug debosyon.

Ang bato sa pamag-ang ug ang bloke sa gambalay sa Simbahan ug alang sa atong kinabuhi mao si Jesukristo. Kini ang Iyang Simbahan. Si Presidente Nelson mao ang Iyang propeta. Ang mga pagtulun-an ni Presidente Nelson nagsaksi ug nagpadayag alang sa atong kaayohan sa kinabuhi ug kinaiya ni Jesukristo. Namulong siya nga mahigugmaon ug nasayud sa kinaiyahan sa Manluluwas ug sa Iyang misyon. Siya usab nakahatag kanunay ug mainiton nga pagpamatuod sa balaang tawag sa buhi nga mga propeta—ang mga Presidente sa Simbahan—diin ubos siya nga nag-alagad.

Karon, pribilehiyo nato ang pagpaluyo *kaniya* isip ang buhi nga propeta sa Ginoo dinhi sa yuta. Naandan nato ang pagpaluyo sa mga lider sa Simbahan pinaagi sa balaan nga sundanan sa pagpataas sa atong mga kamot ngadto sa eskwala aron sa pagpakita sa atong pagdawat ug

pagsuporta. Bag-o lang gyud natong gibuhay pipila ka gutlo ang milabay. Apan ang tinuod nga pagpaluyo lapas pa kay sa pisikal nga timailhan. Sumala sa mabasa sa D&P 107:22, ang Unang Kapangulohan kinahanglan nga “gituboy pinaagi sa pagsalig, hugot nga pagtuo, ug pag-ampo sa simbahan.” Hingpit ug tinud-anay kitang mopaluyo sa buhi nga propeta kon kita makapalambo sa sundanan sa pagsalig sa iyang mga pulong, pagbaton og hugot nga pagtuo sa pagsunod niini, ug dayong pag-ampo alang sa padayon nga panalangin sa Ginoo diha kaniya.

Kon ako maghunahuna ni Presidente Russell M. Nelson, ako mahupay sa mga pulong sa Manluluwas sa dihang Siya miingon, “Ug kon ang akong mga katawhan mopatalinghug ngadto sa akong tingog, ug ngadto sa tingog sa akong mga sulugoon kinsa Ako mitudlo sa pagpangulo sa akong mga katawhan tan-awa, sa pagkatinuod Ako moingon nganha kaninyo, sila dili papahawaon sa ilang dapit” (Doktrina ug mga Pakigsaad 124:45).

Ang pagpaminaw ug pagpatalinghug sa buhi nga mga propeta adunay talagsaon, gani makapausab nga mga epekto sa atong kinabuhi. Kita malig-on. Kita mas sigurado ug makasalig diha sa Ginoo. Kita makadungog sa pulong sa Ginoo. Kita mobati sa gugma sa Dios. Kita masayud unsaon sa pagdumala sa atong kinabuhi uban sa katuyoan.

Gihigugma ug mopaluyo ko ni Presidente Russell M. Nelson ug sa uban kinsa gitawag nga mga propeta, mga manalagna, ug mga tigpadayag. Mopamatuod ko nga siya adunay mga gasa nga gihatag sa Ginoo sa iyang ulo, ug mosaksi ko nga samtang atong lig-unon ang atong kinabuhi sa pagpraktis sa pagpaminaw ug pagpatalinghug sa tingog sa buhi nga mga propeta, ang atong kinabuhi matukod sumala sa balaan nga sundaan sa Ginoo alang kanato, ug kita moani sa mahangtulong mga panalangin. Ang imbitasyon gihatag ngadto sa tanan. Dali, paminaw sa tingog sa usa ka propeta; oo duol ngadto ni Kristo ug pagpakabuhi. Sa pangalan ni Jesukristo, amen. ■



Ni Elder Ulisses Soares

Sa Korum sa Napulog Duha ka mga Apostoles

Usa ra Diha kang Kristo

Minahal kong mga kauban sa buhat sa Ginoo, nagtuo kong makahimo kita og mas maayo ug mohimo gayud kita og mas maayo nga paghangop sa bag-ong mga higala diha sa Simbahan.

Maayong hapon, minahal kong mga kaigsoonan. Sa lumad nakong pinulongang Portuguese, “Boa tarde!” Akong gibati ang kabulahan nga magkapundok niining talagsaong kinatibuk-ang komperensya sa Ang Simbahan ni Jesukristo sa mga Santos sa Ulahing mga Adlaw ubos sa direksyon sa atong pinalanggang propeta, si Presidente Russell M. Nelson. Nalipay ko sa talagsaong oportunidad sa matag usa kanato nga makapaminaw sa tingog sa Ginoo pinaagi sa Iyang mga sulugoon sa yuta niining ulahing mga adlaw diin kita nagpuyo.

Ang akong nasud sa Brazil buhong sa kinaiyanhong mga kapanguhaan. Usa niini ang sikat nga Suba sa Amazon, usa sa kinadak-an ug kinatasang mga suba sa kalibutan. Naporma kini pinaagi sa duha ka managlahing suba, ang Solimões ug Negro. Ang nakanindot, dungan kining nag-agos sulod sa pipila ka milyas sa wala pa kini mag-abut, gikan sa mga suba sa managlahing tinubdan, mga kakusgon, mga temperatura, ug mga komposisyon sa kemikal. Human sa pipila ka milya, nag-abut ra ang katubigan, nahimong suba nga lahi ra kay sa matag tubig nga nagporma niini. Pinaagi lang sa pagkahiusa niini, ang Suba sa Amazon


kusgan kaayo nga sa pag-abut niini sa Atlantic Ocean, motulod kini sa parat nga tubig nga ang lab-as nga tubig matagamtaman pa gihapon hangtud sa daghang milyas diha sa kadagatan.

Sa samang paagi diin ang mga Suba sa Solimões ug Negro dungan nga miagos aron mahimo nga dakong Suba sa Amazon, ang mga anak sa Dios mangadto sa gipahiuli nga Simbahan ni Jesukristo gikan sa managlahing sosyal nga kagikanaan, mga tradisyon, ug kultura, nga nagporma niining talagsaong komunidad sa mga Santos

ni Kristo. Sa katapusan, samtang kita mag-awhag, magsuportahay ug maghigugmaay sa matag usa, mahugpong kita aron moporma og kusganon nga pwersa alang sa kaayohan sa kalibutan. Isip mga sumusunod ni Kristo, nga nagkahiusa sa pag-agos niining suba sa kaayohan, makasangkap kita og “lab-as nga tubig” sa ebanghelyo ngadto sa uhaw nga kalibutan.

Ang Ginoo midasig sa Iyang mga propeta sa pagtudlo unsaon nato sa pagsuportahay ug paghigugmaay aron mahiusa kita sa pagtuo ug katuyoan sa pagsunod kang Jesukristo. Si Pablo, nga Apostol sa Daang Tugon, mitudlo nga kadtong “gibautismohan ngadto kang Kristo gikasul-uban og Kristo . . . : kay kamong tanan *usa ra diha kang Kristo Jesus*.”¹

Dihang misaad kita atol sa bunyag sa pagsunod sa Manluluwas, misaksi kita atubangan sa Amahan nga kita andam nga modala ngari kanato sa ngalan ni Kristo.² Kon maningkamot kita sa pag-angkon sa Iyang mga balaan nga hiyas sa atong kinabuhi, malahi kita kay sa kaniadto, pinaagi sa Pag-ula ni Kristo nga Ginoo, ug ang atong gugma alang sa tanang katawhan natural lang nga molambo.³ Mobati kita og sinserong kabalaka alang sa kaayohan ug kalipay sa tanan. Makita nato nga managsoon kita, isip mga anak sa Dios nga may balaanong kagikan, mga hiyas, ug potensyal. Magtinguha kita sa pag-alima sa usag usa



Sama sa kusgan nga Suba sa Amazon, nga motulod sa parat nga tubig sa pag-abut niini sa Atlantic Ocean, ang mga sumusunod ni Jesukristo makasangkap sa “lab-as nga tubig” sa ebanghelyo ngadto sa giuhaw nga kalibutan.

ug magtambayayong sa usag usa nga alantuson.⁴

Mao kini ang gihulagway ni Pablo nga gugmang putli.⁵ Si Mormon, propeta sa Basahon ni Mormon, mihulagway niini isip “tiunay nga gugma ni Kristo,”⁶ nga pinakamahimayaon, pinakahalangdon, ug kinalig-unang matang sa gugma. Ang atong propeta karon, si Presidente Russell M. Nelson, bag-o lang mihulagway og timaan niining tiunay nga gugma ni Kristo isip pagpangalagad, nga mas nakatutok ug mas balaang paagi sa paghigugma ug pag-amuma sa ubang tawo sama sa gihimo sa Manluluwas.⁷

Atong ikonsiderar kini nga baruganan sa paghigugma ug pag-amuma, sama sa gibuhat sa Manluluwas, diha sa konteksto sa pag-awhag, pagtabang, ug pagsuporta sa bag-ong mga kinabig ug sa mga bag-o lang naikag sa pagtambong sa atong mga serbisyo sa Simbahan.

Dihang mitalikod sa kalibutan kining bag-ong mga higala ug mihangop sa ebanghelyo ni Jesukristo, mipasakop sa Iyang Simbahan, nahimo sila nga Iyang mga disipulo, natawo pag-usab pinaagi Kaniya.⁸ Gibiyaan nila ang kalibutan nga sinati na kaayo nila ug gipili ang pagsunod kang Jesukristo, sa tibuok nilang kasingkasing, sa pagkahimong bag-o nga “suba” sama sa kusgan nga Suba sa Amazon—suba nga usa ka lig-ong pwersa sa kaayo ug pagkamatarung nga nag-agos padulong sa presensya sa Dios. Gihulagway kini ni Apostol Pedro isip “kaliwatan nga pinili, harianong sacerdote [priesthood], nasud nga balaan, katawhan nga iyang kaugalingon.”⁹ Samtang kining bag-ong mga higala mitipon niining bag-o ug dili pamilyar nga suba, posibling bation nila ang gamayng kalibug sa sinugdanan. Makita niining bag-ong mga higala nga misagol sila sa suba nga may managlahing tinubdan, mga temperatura, ug mga komposisyong kemikal—suba nga may kaugalingong mga tradisyon, kultura, ug bokabularyo. Kining bag-ong kinabuhi diha kang Kristo posibling lisud para nila. Hunahunaa sa makadiyut kon unsa kahay ilang gibati nga makadungog sa unang higayon sa mga



pulong nga “FHE,” “BYC,” “Dominggo sa puasa,” “bunyag sa mga patay,” “triple combination,” ug uban pa.

Dali rang makita nganong mobati sila nga dili kini ang tukmang dapit kanila. Sa maong mga sitwasyon, makapangutana sila, “May luna ba ko dinhi? Angay ba ko dinhi sa Ang Simbahan ni Jesukristo sa mga Santos sa Ulahing mga Adlaw? Gikinahanglan ba ko sa Simbahan? Makakita ba ko’g bag-ong mga higala nga andam motabang ug mosuporta kanako?”

Minahal kong mga higala, nianang mga gutloa, kita nga anaa sa lahi nga kahintang sa taas nga panaw sa pagkadisipulo kinahanglang motunol sa mainiton natong pag-abi-abi sa bag-o natong mga higala, sabton sila, ug tabangan, higugmaon, ug ilakip sila sa atong kinabuhi. Kining tanan nga bag-o natong mga higala mga bililhong anak sa Dios.¹⁰ Dili nato itugot nga mawad-an bisan usa kanila kay, sama sa Suba sa Amazon nga nag-agad lang sa mga tumatampo niini, kita nagkinahanglan kanila sama sa ilang pagkinahanglan kanato, aron mahimong kusgan nga pwersa alang sa kaayohan dinhi sa kalibutan.

Ang bag-o natong mga higala nagdala og hinatag sa Dios nga mga talento, kahinam, ug kaayohan. Ang ilang kahinam sa ebanghelyo makatakud, nga kini nagtabang nga ang kaugalingon natong mga pagpamatuod malagsik. Nagdala usab sila og lab-as

nga panglantaw sa atong panabut sa kinabuhi ug sa ebanghelyo.

Dugay na kitang gitudloan unsaon nato nga kita makatabang sa atong bag-ong mga higala nga mobati nga gihangop ug gihigugma sa Simbahan ni Jesukristo. Tulo ka butang ang ilang gikinahanglan aron magpabilin silang lig-on ug matinud-anon sa tibuok nilang kinabuhi:

Una, nagkinahanglan sila og mga igsoon sa Simbahan nga mobati gayud kanila, tinuod ug mounong nga mga higala nga ilang kaadtoan kanunay, kakuyugan, ug tubag sa ilang mga pangutana. Isip mga miyembro, maginabtik kita ug mangita og bag-ong mga nawong kon motambong og mga kalihokan ug mga miting sa Simbahan, bisan unsay atong mga responsibilidad, buluhaton, o mga problema. Makahimo kita’g yanong mga butang sa pagtabang nga kining bag-ong mga higala mobati nga gihangop sa Simbahan, sama sa mainitong pagtimbaya, tinuorayng pagpahiyom kanila, pagtupad ug pagkanta ug pagsimba, pagpaila kanila sa ubang miyembro, ug uban pa. Kon atong ablihan ang atong kasingkasing ngadto sa bag-o natong mga higala sa pipila niining mga paagi, naglihok kita sa diwa sa pagpangalagad. Kon mangalagad kita kanila sama sa gihimo sa Manluluwas, dili nila bation nga daw “mga estranghero sulod sa Simbahan.” Bation nila nga haum sila diha ug makipaghigalaay, ug labaw pa, bation nila ang gugma sa Manluluwas pinaagi sa tinuoray natong pag-amuma.

Ikaduha, ang bag-ong mga higala nagkinahanglan og buluhaton [assignment]—oportunidad sa pagserbisyo sa uban. Ang serbisyo usa sa kinamaayuhang aspeto sa Ang Simbahan ni Jesukristo sa mga Santos sa Ulahing mga Adlaw. Proseso kini diin mas molig-on ang atong pagtuo. Ang matag bag-ong higala takus niana nga oportunidad. Samtang ang bishop ug ang ward council may direktang responsibilidad sa paghatag og mga buluhaton human dayon sa ilang bunyag, walay nagpugong nato, isip mga miyembro, sa pagdapit sa bag-o natong mga higala nga motabang nato nga moserbisyo sa

uban sa dili pormal o sa mga proyekto sa pagserbisyo.

Ikatulo, ang bag-ong mga higala kinahanglang “maamumahan pinaagi sa maayo nga pulong sa Dios.”¹¹ Matabangan nato sila sa paghigugma ug sa pagsinati sa mga kasulatan samtang magbasa ug maghisgot kita sa mga pagtulun-an uban nila, maghatag og konteksto sa mga sugilanon ug pagpasabut sa lisud nga mga pulong. Matudloan sab nato sila unsaon sa pagkadawat og personal nga giya pinaagi sa regular nga pagtuon sa kasulatan. Agig dugang, makatabang kita sa bag-o natong mga higala diha sa ilang mga panimalay ug usahay dapiton sila ngadto sa atoa gawas sa atong regular nga naiskedyul nga mga miting sa Simbahan ug mga kalihokan, pagtabang nga mahugpong sila ngadto sa kusgan nga suba sa komunidad sa mga Santos.

Nahibalo sa mga kausaban ug mga hagit nga giatubang sa bag-o natong mga higala sa pagkahisakop sa pamilya sa Dios, isip atong mga kaigsoonan, pwede natong ipaambit giunsa nato sa pagbuntog ang susamang mga hagit sa atong kinabuhi. Makatabang kini sa pagkahibalo nga wala diay sila maginusara ug nga ang Dios mopanalangin nila samtang gamiton nila ang pagtuo sa Iyang mga gipangsaad.¹²

Dihang nagsagol ang mga Suba sa Solimões Negro, ang Suba sa Amazon nahimong kusgan ug lig-on. Sa samang paagi, kon kita ug ang atong bag-ong mga higala maghugpong, ang gipahiuli nga Simbahan ni Jesukristo mas magkalig-on ug magmakanunayon. Ang pinalangga nakong si Rosana, ug ako mapasalamat kaayo sa tanang mitabang kanamo sa pagpakighugpong niining bag-ong suba daghang tuig nang milabay, dihang gihangop namo ang ebanghelyo ni Jesukristo sa among nasud sa Brazil. Sulod sa mga katuigan, kining talagsaong mga tawo tinuoray nga nangalagad kanamo ug mitabang nga kami padayong mag-agos diha sa pagkamatarung. Mapasalamat kaayo kami kanila.

Ang mga propeta sa Kasadpang Bahin nasayud kaayo unsaon nga ang bag-ong mga higala magkahugpong sa

pagkamatinud-anon dinhi sa bag-ong suba sa kaayohan padulong sa kinabuhing dayon. Pananglitan, kay nakakita sa atong panahon ug nasayud nga mag-atubang kita og susamang mga hagit,¹³ gilakip ni Moroni ang pipila ka importanting lakang sa iyang mga gisulat sa Basahon ni Mormon:

“Ug human sila madawat ngadto sa bunyag, ug nabag-o ug nahugasan pinaagi sa gahum sa Espiritu Santo, sila giihap uban sa mga katawhan sa simbahan ni Kristo; ug ang ilang mga ngalan gikuha, nga sila mahinumduman ug maamumahan pinaagi sa maayo nga pulong sa Dios, aron pag-agak kanila sa matarung nga agianan, pag-agak kanila sa kanunay nga mabinantayon ngadto sa pag-ampo, mosalig lamang diha sa mga maayo nga buhat ni Kristo, kinsa mao ang tigpasiugda ug ang tighingpit sa ilang hugot nga pagtuo.

“Ug ang simbahan nagtigum kanunay, sa pagpuasa ug sa pag-ampo, ug sa pagpakigsulti sa usag usa mahitungod sa kaayohan sa ilang mga kalag.”¹⁴

Minahal kong mga kauban sa buhat sa Ginoo, nagtuo kong makahimo kita og mas maayo ug mohimo gayud kita og mas maayo nga paghangop sa bag-ong mga higala diha sa Simbahan. Dapiton ko kamo sa paghunahuna unsay atong mahimo aron mas mahangupon kita, madawaton, ug matinabangon kanila, sugod gayud sa sunod Dominggo. Matnguni nga dili babag ang inyong mga buluhaton sa Simbahan ang paghangop sa bag-ong mga higala diha sa mga miting sa Simbahan ug mga kalihokan. Kay, kini sila bililhong mga kalag sa mga mata sa Dios ug mas importante pa kay sa mga programa ug mga kalihokan. Kon mangalagad kita sa bag-o natong mga higala sa kinasingkasing puno sa tiunay nga gugma sama sa gihimo sa Manluluwas, mosaad ko ninyo, sa Iyang ngalan, nga Siya moabag sa atong mga paningkamot. Kon molihok kita isip matinud-anong mga tigpangalagad, sama sa gibuhay sa Manluluwas, madawat sa bag-o natong mga higala ang tabang sa pagpabiling lig-on, mapahinunguron, ug matinud-anon hangtud sa katapusan. Makighugpong sila kanato samtang mahimo kitang

lig-ong mga tawo sa Dios ug motabang nga makadala kita og lab-as nga tubig ngadto sa kalibutan nga uhaw sa mga panalangin sa ebanghelyo ni Jesukristo. Kini nga mga anak sa Dios mobati nga sila “dili na mga langyaw ug mga dumuloong apan mga Santos sa panimalay sa Dios.”¹⁵ Mosaad ko kaninyo nga mamatikdan nila ang presensya sa Manluluwas, nga si Jesukristo, sa Iyang kaugalingon nga Simbahan. Padayon silang mag-agos uban kanato isip usa ka suba ngadto sa tinubdan sa tanang kaayo hangtud hangupon sila sa abling mga kamot sa atong Ginoo, nga si Jesukristo, ug madungog nila ang Amahan nga moingon “Kamo *makabaton* og kinabuhi nga dayon.”¹⁶

Dapiton ko kamo sa pagtinguha og tabang sa Ginoo sa paghigugma sa uban sama sa Iyang paghigugma kaninyo. Sundon nato ang tambag nga gihatag ni Mormon, “Busa, akong hinigugma nga mga kaigsoonan, pag-ampo ngadto sa Amahan uban sa tibuok kusog sa kasingkasing, nga kamo unta mapuno niini nga gugma, diin siya mitugyan diha sa tanan kinsa tinuod nga mga sumusunod sa iyang Anak, nga si Jesukristo.”¹⁷ Niining mga kamatuoran, ako mosaksi ug mobuhay sa ngalan ni Jesukristo, amen. ■

MUBO NGA MGA SULAT

1. Mga Taga-Galacia 3:27–28; emphasis gidugang.
2. Tan-awa sa Doktrina ug mga Pakigsaad 20:37.
3. Tan-awa sa Mosiah 3:19.
4. Tan-awa sa Mosiah 18:8.
5. Tan-awa sa 1 Mga Taga-Corinto 13.
6. Moroni 7:47.
7. Tan-awa sa Russell M. Nelson, “Pagpangalagad uban sa Gahum ug Katungod sa Dios,” *Liahona*, Mayo 2018, 68–75.
8. Tan-awa sa Mosiah 27:25.
9. 1 Pedro 2:9.
10. Tan-awa sa Doktrina ug mga Pakigsaad 18:10.
11. Moroni 6:4; tan-awa usab ang “Unsaon Nako Pagtrabaho uban sa mga Lider sa Stake ug Ward?” *Isangyaw ang Akong Ebanghelyo: Usa ka Giya sa Misyonaryo nga Pangalagad*, rev. ed. (2018), lds.org/manual/missionary.
12. Tan-awa sa 1 Nephi 7:12.
13. Tan-awa sa Mormon 8:35.
14. Moroni 6:4–5.
15. Mga Taga-Efeso 2:19.
16. 2 Nephi 31:20; emphasis gidugang.
17. Moroni 7:48.



Ni Elder Gerrit W. Gong

Sa Korum sa Napulog Duha ka mga Apostoles

Ang Atong Campfire sa Hugot nga Pagtuo

Alang niadtong kinsa nangita, tuguti, ug paningkamuti nga makab-ot kini, ang sinugdanan sa hugot nga pagtuo, usahay sa hinay-hinay, moabut o mobalik.

Minahal nga mga kaigsoonan, dili ba maanindot kaayo ang pada-yong makadawat og pagpada-yag gikan sa langit pinaagi ni Presidente Russell M. Nelson ug sa atong mga lider sa Simbahan nga nag-awhag kanato sa pagpakabuhi sa bag-o ug mas balaan nga mga pamaagi,¹ sa panimalay ug sa simbahan, uban sa tibuok natong kasingkasing, hunahuna, ug kusog?

Adunay ka na bay kahigayunan nga nakabuhay og usa ka butang diin

mibati ka nga dili andam o dili takus apan napanalanginan ka tungod sa pagpaningkamot?

Ako mibati. Aniyay usa ka ehemplo.

Pipila ka tuig ang milabay, si Elder Richard G. Scott, usa ka sakop sa Korum sa Napulog Duha ka mga Apostoles, mabination nga midapit, “Gerrit, gusto ka bang mag-watercolor uban kanako?”

Si Elder Scott miingon nga ang pagpinta nakatabang kaniya nga

makamatikud ug makamugna. Siya misulat: “Sulayi nga mahimong mamugnaon, bisan kon ang resulta dili kaayo nindot. . . . Ang pagkamamugnaon makapaugmad sa diwa sa pagkamapasalamat alang sa kinabuhi ug alang sa unsay gihatag sa Ginoo kanato. . . . Kon ikaw maalamong mopili, dili na kini manginahanglan og taas nga panahon.”²


Si Presidente Henry B. Eyring mihulagway sa iyang artistikanhong mga hunahuna nga naawhag sa “usa ka pagbati og gugma,” lakip na “ang gugma sa Tiglalang kinsa naglaum nga ang Iyang mga anak mahimong mahisama Kaniya—magmugna ug magtukod.”³ Ang mamugnaon nga mga buhat ni Presidente Eyring naghatag og “talagsaong, espiritwal nga panglantaw sa pagpamatuod ug hugot nga pagtuo.”⁴

Ang mga artwork ni Presidente Boyd K. Packer naghulagway sa sukanang mensahe sa ebanghelyo: “Ang Dios mao ang Tiglalang sa mga langit ug sa yuta ug tanan nga mga butang nga anaa niini, nga ang tibuok kinaiyahan mipamatuod nianang balaa-nong pagdumala sa paglalang, ug nga adunay hingpit nga panag-uyon tali sa kinaiyahan, siyensya, ug sa ebanghelyo ni Jesukristo.”⁵

Si Alma mipamatuod, “Ang tanan nga mga butang nagpakita nga adunay Dios.”⁶ Ang atong Primary nga mga bata mokanta, “Sa higayon nga akong madungog huni sa kalanggaman, o nindot nga kabulakan, . . . Kaanindot niining kalibutan gibuhay sa akong Amahan.”⁷ Ang manunulat nga si Victor Hugo mipasabut sa “milagroso nga relasyon tali sa mga linalang ug mga butang; niining dako kaayo nga kalibutan, gikan sa adlaw ngadto sa gagmayng mananap nga nagtaput sa mga tanom (aphid). . . . Ang matag langgam nga naglupad adunay kutay sa pagka-Dios sa ilang mga kuko. . . . Ang nebula usa ka puntod [anthill] sa mga bituon.”⁸

Ug kini magdala nato og balik sa pagdapit ni Elder Scott.

“Elder Scott,” mitubag ko, “Gusto kong mahimong mas makamatikud ug makamugna. Mahinamon kong



Campfire sa Pagsalop sa Adlaw, ni Elder Richard G. Scott

maghunahuna sa Langitnong Amahan nga nagpinta sa baluron nga mga pang-nod ug sa tanang kolor sa kalangitan ug katubigan. Apan”—dinhi nagduha-duha ko—“Elder Scott,” ako miingon, “wala akoy kahanas sa pag-watercolor. Naguol ko nga basin makapahigawad nimo ang pagsulay ug pagtudlo kanako.”

Si Elder Scott mipahiyom ug nakigsabut nga magkita mi. Nianang nasabutan nga adlaw, nag-andam siya og papel, mga pintal, ug mga brush. Midrowing siya og pipila ka mga outline ug mitabang sa pagbasa sa papel alang kanako.

Among gigamit isip modelo ang iyang nindot nga watercolor nga giulohan og *Campfire sa Pagsalop sa Adlaw*. Samtang kami nagpinta, nag-istorya mi mahitungod sa hugot nga pagtuo—sa unsang paagi nga samtang among giatubang ang kahayag ug kamainiton sa usa ka campfire, wala namo gihunahuna ang kangitngit ug walay kasigurohan—sa unsang paagi nga sa usahay taas, mingaw nga mga gabii, ang atong campfire sa hugot pagtuo makahatag og paglaum ug kasigurohan. Ug ang bag-ong adlaw moabut gayud. Ang atong campfire sa hugot nga pagtuo—atong mga panumduman, mga kasinatian, ug panulundon sa hugot nga pagtuo sa kaayo sa Dios ug sa malumo nga mga kalooy sa atong kinabuhi—nakapalig-on kanato sa tibuok natong kalisdanan.

Ang akong pagpamatuod mao—alang niadtong kinsa nangita, tuguti, ug paningkamuti nga makab-ot kini—ang sinugdanan sa hugot nga pagtuo, usahay sa hinay-hinay, moabut o mobalik. Ang kahayag moabut kon kita nagtinguha ug nangita niini, kon kita mapailubon ug matinumanon sa mga sugo sa Dios, kon kita bukas sa mga grasya, pagpakaayo, ug mga pakigsaad sa Dios.

Sa dihang nagsugod na mi sa pagpinta, si Elder Scott midasig, “Gerrit, bisan sa usa ka leksyon makapinta ka og usa ka butang nga imong tago-an ug hinumduman.” Sakto si Elder Scott. Akong gibahandi ang watercolor sa among campfire sa hugot nga pagtuo nga gitabangan og pinta ni Elder Scott. Ang akong artistikanhong abilidad nagpabiling limitado, apan ang

handumanan sa among campfire sa hugot nga pagtuo makapadasig kanato sa lima ka paagi.

Una, ang atong campfire sa pagtuo makapadasig kanato sa pagpangita og kalipay diha sa maayo nga kalihokan.

Andunay kalipay diha sa paghunahuna, pagkat-on, pagbuhat og mga mahinungdanon nga bag-ong mga butang. Kini tinuod ilabi na samtang atong gipaladman ang atong pagtuo ug pagsalig sa Langitnong Amahan ug sa Iyang Anak, si Jesukristo. Dili kita makahigugma sa atong kaugalingon og igo aron makaluwas kanato. Apan ang Langitnong Amahan labaw pang nahigugma kanato ug nakaila kanato labaw pa kay sa atong paghigugma o pagkaila sa atong kaugalingon. Makasalig kita sa Ginoo ug ayaw pagsalig sa atong kaugalingong salabutan.⁹

Nakasulay ka ba nga ikaw rang usa ang wala dapita sa birthday party sa usa ka tawo?

Nakasulay ka ba nga katapusang napili, o wala mapili, sa dihang nagpili og mga kagrupo?

Nakapangandam ka ba alang sa usa ka pasulit sa eskwelahan, usa ka interbyu sa panarbaho, usa ka oportunidad nga imo gayong ganahan—ug gibati nimo nga napakyas ka?

Nakaampo ka na ba alang sa usa ka relasyon nga, sa bisan unsang rason, wala gayud mosalir?

Nakasinati ka na ba og nagbalik-balik nga sakit, giabandonar sa kapikas, nag-antus alang sa pamilya?

Ang atong Manluluwas nasayud sa atong mga kahintang. Samtang atong gigamit ang hinatag sa Dios nga kabubut-on ug gigamit ang tanang abilidad diha sa pagpaubos ug hugot nga pagtuo, ang atong Manluluwas, si Jesukristo, makatabang kanato sa pagatubang sa mga hagit ug mga kalipay sa kinabuhi. Ang hugot nga pagtuo naglangkob sa tinguha ug sa pagpili nga motuo. Ang hugot nga pagtuo nagagikan usab sa pagtuman sa mga sugo sa Dios, gihatag aron sa pagpanalangin kanato, samtang magsunod kita sa Iyang dalan sa pakigsaad.

Kon kita mibati, o gibati, og walay kasigurohan, nag-inusara, napakyas,

nasuko, nadismaya, nahigawad, o nahilayo gikan sa Dios ug sa Iyang gipahiuli nga Simbahan, nagkinahanglan tingali og mas dako nga paningkamot ug pagtuo ang pagsulod og balik sa Iyang dalan sa pakigsaad. Apan dili kini kabayran! Palihug ngari, o balik ngari, ni Ginoong Jesukristo! Ang gugma sa Dios mas lig-on kay sa mga higot sa kamatayon—temporal o espiritwal.¹⁰ Ang Pag-ula sa atong Manluluwas hangtud sa kahangturan ug walay kinutuban. Ang matag usa kanato adunay mga pagduha-duha ug mapandol. Tingali kita, sa usa ka higayon, mahisalaag. Ang Dios mahigugmaong mipasalig kanato, bisan hain man kita o unsa ang atong nabuhay, makabalik gihapon kita Kaniya. Siya naghulat nga andam aron sa paggakos kanato.¹¹

Ikaduha, ang atong campfire sa pagtuo makaawhag kanato sa pagpangalagad sa bag-o, mas maayo, ug mas balaan nga dinasig sa Espiritu nga mga pamaagi.

Kana nga pagpangalagad magdala sa mga milagro ug sa mga panalangin sa pagkalakip diha sa pakigsaad—diin atong mabati ang gugma sa Dios ug tinguha sa pagpangalagad sa uban sulod niana nga diwa.

Dili pa lang dugay, si Sister Gong ug ako nakaila og usa ka amahan ug pamilya nga napanalanginan pinaagi sa matinud-anon nga priesthood brother kinsa miadto sa ilang bishop ug mihangyo nga siya (ang priesthood brother) mahimong home teaching kompanyon sa amahan. Ang amahan dili aktibo ug dili interesado sa home teaching. Apan samtang ang kasingkasing sa amahan nausab, siya ug kining mahigugmaong priesthood brother nagsugod sa pagbisita sa gitahas “kanila” nga mga pamilya. Human sa samang pagbisita, ang iyang asawa—siya mismo kaniadto wala magsimbahan—nangutana sa iyang bana kon kumusta ang pagbisita. Ang amahan miangkon, “mura og aduna koy gibati”—dayon siya miadto sa kusina aron magkuha og beer.¹²

Apan usa ka kasinatian nasundan pa og daghan: mahigugmaon nga mga kasinatian, pagpangalagad, pagkausab

sa mga kasingkasing, klase alang sa preparasyon sa pagsulod sa templo, pagsimba, pagbugkos [seal] isip usa ka pamilya diha sa balaan nga templo. Hunahunaa unsa ka mapasalamaton ang mga anak ug mga apo ngadto sa ilang amahan ug inahan ug ngadto sa tigpangalagad nga brother kinsa miabut isip usa ka higala ug kompanyon sa ilang amahan sa pagpangalagad ug paghigugma sa uban.

Ikatulo nga campfire sa hugot nga pagtuo mag-awhag og: mamugnaon nga kalipay sa ebanghelyo ug ang mga panalangin moabut kon kita magtinguha sa paghigugma sa Ginoo ug sa uban sa tibuok natong mga kasingksaing ug mga kalag.

Ang mga kasulatan nag-awhag kanato nga atong ihalad ang tanan natong mga paningkamot sa altar sa gugma ug serbisyo. Diha sa Daang Tugon, ang Deuteronomio miaghat kanato nga “higugmaa ang Ginoo nga imong Dios” sa tibuok natong kasingkasing, kalag, ug kusog.¹³ Si Josue miawhag, “Higugmaa ang Ginoo nga imong Dios, . . . paglakaw sa tanan niyang mga dalan, . . . pagbantay sa iyang mga sugo, . . . pagpakig-ipon kaniya, ug, . . . pag-alagad kaniya sa bug-os ninyong kasingkasing ug sa bug-os ninyong kalag.”¹⁴

Diha sa Bag-ong Tugon, ang atong Manluluwas mipahayag sa duha ka nag-una nga mga sugo: “Higugmaa ang Ginoo nga imong Dios sa tibuok mong kasingkasing, ug sa tibuok kalag, ug sa tibuok mong kusog, . . . ug ang imong silingan sama sa imong kaugalingon.”¹⁵

Diha sa Basahon ni Mormon: Lain nga Tugon ni Jesukristo, Si Haring Benjamin naghago “uban ang tanan nga gahum sa iyang lawas ug sa galamhan sa tibuok niya nga kalag” ug nagpatunhay sa kalinaw diha sa yuta.¹⁶ Diha sa Doktrina ug mga Pakigsaad, sama sa nahibaloan sa tanang mga misyonaryo, ang Ginoo nag-awhag kanato sa pag-alagad Kaniya sa tibuok natong “kasingkasing, gahum, hunahuna ug kusog.”¹⁷ Sa dihang ang mga Santos misulod sa Distrito sa Jackson, ang Ginoo misugo kanila sa pagbalaan sa Adlawng Igpapahulay pinaagi sa paghigugma “sa Ginoo

nga inyong Dios uban sa inyong tibuok nga kasingkasing, uban sa inyong tibuok nga gahum, hunahuna, ug kusog; ug sa ngalan ni Jesukristo kamo moalagad kaniya.”¹⁸

Maglipay kita sa pagdapit nga ihalad ang atong tibuok kalag sa pagtinguha og mas maayo ug mas balaan nga mga pamaagi sa paghigugma sa Dios ug niadtong anaa sa atong palibut ug sa paglig-on sa atong hugot nga pagtuo sa Langitnong Amahan ug ni Jesukristo diha sa atong mga kasingkasing ug sa atong mga panimalay ug sa simbahan.

Ikaupat, ang atong campfire sa hugot nga pagtuo mag-awhag kanato sa pag-establisar og regular nga mga sumbanan sa matarung nga pagpuyo nga makapalig-on sa hugot nga pagtuo ug espirituwalidad.

Kining balaan nga mga kinaiya, matarung nga mga pamatasan, o mainampunon nga mga kalihokan mahimong maglakip sa pag-ampo; pagtuon sa kasulatan; pagpuasa; paghinumdum sa Manluluwas ug mga pakigsaad pinaagi sa ordinansa sa sakrament; pagpakigbahin sa mga panalangin sa ebanghelyo pinaagi sa misyonaryo, templo ug family history, ug ubang mga serbisyo; paghupot og espirituhanon nga personal nga journal; ug uban pa.

Sa higayon nga ang matarung nga mga sundanan ug espirituhanon nga mga pangandoy magdungan, karon ug ang kahangturan mag-uban. Ang espirituhanon nga kahayag ug kinabuhi moabut kon ang regular nga relihiyusong pagtahud makapaduol kanato ngadto sa atong Langitnong Amahan ug sa atong Manluluwas, si Jesukristo. Kon atong gihigugma ang espiritu ug ang sulat sa balaod, ang mga butang nga hangtud sa kahangturan modagayday sa atong mga kalag sama sa yamog nga gikan sa langit.¹⁹ Uban sa pagkamasulondon matag adlaw ug ang makapabaskog nga buhi nga tubig, makakita kita sa mga tubag, pagtuo, ug kalig-on sa pag-atubang sa mga hagit matag-adlaw ug mga oportunidad uban sa pagpailub sa ebanghelyo, panglantaw, ug hingpit nga kalipay.

Ikalima, sa dihang maghupot kita sa labing maayo nga nailhang mga

sundanan samtang nagtinguha sa bag-o ug mas balaan nga mga paagi sa paghigugma sa Dios ug pagtabang kanato ug sa uban nga mangandam sa pagsugat Kaniya, ang atong campfire sa hugot nga pagtuo makaag-aghat kanato sa paghinumdum nga ang kahingpitan anaa kang Kristo, dili sa atong kaugalingon o sa pagkaperpekto sa kalibutan.

Ang pagdapit sa Dios napuno sa gugma ug posibilidad tungod kay si Jesukristo mao “ang dalan, kamatuoran, ug ang kinabuhi.”²⁰ Alang niadtong mibati nga nabug-atan, Siya miawhag, “Umari kanako,” ug niadtong miduol Kaniya, Siya misaad, “papahulayon ko kamo.”²¹ “Duol ngadto kang Kristo, ug paghingpit diha kaniya, . . . mohigugma sa Dios uban sa tibuok ninyo nga gahum, hunahuna ug kusog, niana ang iyang grasya igo alang kaninyo, nga pinaagi sa iyang grasya kamo mahimo nga hingpit diha kang Kristo.”²²

Niini nga pasalig “pinaagi sa iyang grasya kamo mahimo nga hingpit diha kang Kristo” mao usab ang kahupayan, kalinaw, ug panaad nga kita makapadayon uban sa hugot nga pagtuo ug pagsalig diha sa Ginoo bisan kon ang mga butang dili mahiuyon sa atong gilauman, gipaabut, o gani sa unsay angayan, pinaagi sa dili nato sala, bisan human nato gibuhay ang labing maayo.

Sa nagkadaiyang mga panahon ug mga pamaagi, mobati kita og kakulang, dili sigurado, tingali dili takus. Apan sa atong matinud-anon nga mga paningkamot sa paghigugma sa Dios ug pagpangalagad sa atong mga silingan, ato tingaling bation ang gugma sa Dios ug gikinahanglan nga inspirasyon alang sa ila ug atong kinabuhi sa bag-o ug mas balaan nga mga paagi.

Uban sa kalooy, ang atong Manluluwas miawhag kanato ug nanaad nga kita mahimong “mopadayon sa unahan uban ang pagkamakanunayon kang Kristo, magbaton sa usa ka hingpit nga kahayag sa paglaum, ug usa ka gugma sa Dios ug sa tanan nga mga tawo.”²³ Ang doktrina ni Kristo, ang Pag-ula sa atong Manluluwas, ug ang hingpit nga pagtuman sa Iyang dalan sa pakigsaad makatabang kanato nga mahibalo sa

Iyang mga kamatuoran ug makahimo natong gawasnon.²⁴

Ako mopamatuod sa kahingpitan sa Iyang ebanghelyo ug ang Iyang plano sa kalipay gipahiuli ug gitudlo dinhi sa Ang Simbahan ni Jesukristo sa mga Santos sa Ulahing mga Adlaw, sa balaang kasulatan, ug pinaagi sa mga propeta gikan ni Propeta Joseph Smith hangtud ni Presidente Russell M. Nelson karon. Ako mopamatuod nga ang Iyang dalan sa pakigsaad modala ngadto sa labing dakong gasa nga gipanaad sa atong mahigugmaong Langitnong Amahan: “Kamo makabaton og kinabuhi nga dayon.”²⁵

Hinaut nga ang Iyang mga pana-
langin ug malungtarong hingpit nga kalipay maato samtang naglig-on kita sa atong mga kasingkasing ug paglaum ug pasalig sa atong campfire sa hugot nga pagtuo, ako nag-ampo sa sagrado ug balaan nga pangalan ni Jesukristo, amen. ■

MUBO NGA MGA SULAT

1. Tan-awa ang Russell M. Nelson, “Pagpangalagad,” *Liahona*, Mayo 2018, 100.
2. Richard G. Scott, *Finding Peace, Happiness, and Joy* (2007), 162–63; gikutlo sa *Elder Richard G. Scott Art Exhibit: A Self-Guided Tour* (pamphlet, 2010).
3. *A Visual Journal: Artwork of Henry B. Eyring* (booklet, 2017), 2.
4. *A Visual Journal*, 28.
5. Boyd K. Packer, *The Earth Shall Teach Thee: The Lifework of an Amateur Artist* (2012), ix.
6. Alma 30:44.
7. “Gihigugma Ako sa Langitnong Amahan,” Songbook sa mga Bata, 16.
8. Victor Hugo, *Les Misérables*, trans. Julie Rose (New York: Random House, 2008), 728.
9. Tan-awa sa Mga Proverbio 3:5–6.
10. Tan-awa sa Doktrina ug mga Pakigsaad 121:44.
11. Tan-awa sa Lucas 15:20.
12. Ang kasinatian gigamit nga may pagtugot.
13. Deuteronomio 6:5.
14. Josue 22:5.
15. Lucas 10:27.
16. Mga Pulong ni Mormon 1:18.
17. Doktrina ug mga Pakigsaad 4:2.
18. Doktrina ug mga Pakigsaad 59:5.
19. Tan-awa sa Doktrina ug mga Pakigsaad 121:45–46.
20. Juan 14:6.
21. Mateo 11:28.
22. Moroni 10:32.
23. 2 Nephi 31:20.
24. Tan-awa sa Juan 8:32.
25. 2 Nephi 31:20.



Ni Elder Paul B. Pieper

Sa Seventy

Tanan Kinahanglan Gayud Modala diha Kanila sa Ngalan nga Gihatag sa Amahan

Ang ngalan sa Manluluwas adunay lahi ug mahinungdanong gahum.
Kini ang bugtong ngalan diin ang kaluwasan posible.

Pipila ka semana ang milabay, mitambong ko sa bunyag sa mga bata nga nag-otso anyos. Nagsugod na sila sa pagkat-on sa ebanghelyo ni Jesukristo gikan sa ilang ginikanan ug mga magtutudlo. Ang binhi sa ilang hugot nga pagtuo diha Kaniya misugod sa pagtubo. Ug karon gusto nilang mosunod Kaniya ngadto sa mga tubig sa bunyag aron mahimong miyembro sa

Iyang gipahiuli nga Simbahan. Samtang nagtan-aw ko sa ilang mga kahinam ug kadasig, naghunahuna ko kon unsa kadako ang ilang nasabtan kabahin sa importanting aspeto sa ilang pakigsaad sa bunyag: ang ilang pasalig sa pagdala nganha kanila sa pangalan ni Jesukristo.

Sukad sa sinugdanan, gipamahayag sa Dios ang kamahinungdanon sa ngalan ni Jesukristo sa Iyang plano alang



kanato. Usa ka anghel mitudlo sa atong unang amahan, si Adan: “Ikaw mobuhat sa tanan nga imong buhaton diha sa ngalan sa Anak, ug ikaw maghinulsol ug motawag sa Dios diha sa ngalan sa Anak hangtud sa kahangturan.”¹

Ang propeta sa Basahon ni Mormon nga si Haring Benjamin mitudlo sa iyang mga katawhan, “Walay lain nga ngalan nga gihatag ni bisan kinsa nga mga agianan ni mga paagi diin ang kaluwasan modangat.”²

Gibalik-balik sa Ginoo kining kamatuoran ngadto ni propeta Joseph Smith: “Tan-awa, si Jesukristo mao ang ngalan nga gihatag sa Amahan, ug wala nay lain nga ngalan nga gikahatag diin ang tawo maluwas.”³

Sa atong panahon, si Presidente Dallin H. Oaks nagtudlo kanato nga “kadtong kinsa mopakita og hugot nga pagtuo diha sa sagradong ngalan ni Jesukristo . . . ug mohimo sa iyang pakigsaad . . . makaangkon sa maula-ong sakripisyo ni Jesukristo.”⁴

Ang atong Langitnong Amahan gusto nga hingpit kining masabtan nga ang ngalan sa Iyang Anak, si Jesukristo, dili lamang usa sa yanong ngalan taliwala sa kadaghanan. Ang ngalan sa Manluluwas adunay lahi ug mahinungdangong gahum. Kini ang bugtong ngalan diin ang kaluwasan posible. Pinaagi sa paghatag og gibug-aton niining kamatuoran sa matag dispensasyon, ang atong mahigugmaong Amahan nagsiguro nga tanan Niyang mga anak nga adunay paagi balik ngadto Kaniya. Apan ang pag-angkon og sigurado nga dalan wala nagpasabut nga ang atong pagbalik sigurado na gayud. Nagsulti ang Dios kanato nga ang atong aksyon gikinahanglan: “Busa, ang tanan nga mga tawo [ug kababayan-an] kinahanglan *modala* gayud diha kanila sa ngalan nga gihatag sa Amahan.”⁵

Aron makagamit sa makaluwas nga gahum nga moabut lang pinaagi sa ngalan ni Kristo, kinahanglan kita “magpaubos sa [atong kaugalingon] sa atubangan sa Dios . . . ug moduol uban ang masulub-on nga kasingkasing ug mahinulsulon nga mga espiritu . . . ug [mahimong] andam sa *pagdala diha [kanato] sa ngalan ni Jesukristo*

ug aron maangayan, sama sa akong utso anyos nga mga higala, aron “pagadawaton pinaagi sa bunyag ngadto sa iyang simbahan.”⁶

Ang tanan kinsa sinserong nagtinguha sa pagdala sa ngalan sa Manluluwas diha kanila kinahanglan gayud angayan ug modawat sa ordinansa sa bunyag isip usa ka pisikal nga saksi sa Dios sa ilang desisyon.⁷ Apan ang bunyag mao lang ang sinugdanan.

Ang pulong *dalhon* dili palabay lang. Usa kini ka pulong sa buhat inubanan sa daghang kahulugan.⁸ Sa samang paagi, ang atong pasalig sa pagdala sa ngalan ni Jesukristo nagkinahanglan og lihok ug adunay daghang mga demensyon.

Sama pananglit, usa ka kahulugan sa pulong *kuha* mao ang *pagambit* o modawat ngadto sa lawas, sama kon kita *moinom*. Pinaagi sa pagdala sa atong kaugalingon sa ngalan ni Kristo, mopasalig kita sa *pagdala* sa Iyang mga pagtulun-an, sa Iyang mga kinaia, ug sa katapusan sa Iyang gugma, nga bug-os ngadto sa atong pagka-nilalang aron nga kini mahimong kabahin kon si kinsa kita. Sa ingon, ang kaimportante sa imbitasyon ni Presidente Russell M. Nelson sa mga young adult nga “magmainampuon ug magmadasigon sa [pagtinguha] nga makasabut sa kahulugan sa matag usa sa nagkadaiyang mga titulo ug mga ngalan [sa Manluluwas] sa *personal nga paagi* alang [kanila],”⁹ ug magbusog sa mga pulong ni Kristo sa mga kasulatan, ilabi na sa Basahon ni Mormon.¹⁰

Laing kahulugan sa pulong nga *modala* mao ang pagdawat sa usa ka tawo sa piho nga buluhaton o mohangup sa kamatuoran sa usa ka ideya o mga baruganan. Kon kita modala diha kanato sa ngalan ni Kristo, kita modawat Kaniya isip atong Manluluwas ug kanunay nga mohangop sa Iyang mga pagtulun-an isip giya sa atong kinabuhi. Sa matag makahuluganon nga desisyon nga atong himoon, atong *madala* ang Iyang ebanghelyo nga tinuod ug masulundong mosunod niini sa atong kasingkasing, gahum, hunahuna, ug kusog.

Ang pulong *modala* nagpasabut sa pagpahiuyon sa kaugalingon

sa ngalan o sa kawsa. Kadaghanan kanato nakasinati na sa *pagdala og* responsibilidad sa trabaho o sa *pagkuha* og usa ka katuyoan o kalihokan. Kon modala kita sa atong kaugalingon sa ngalan ni Kristo, atong gidawat ang mga responsibilidad sa usa ka tinuod nga disipulo, atong pasiugdahan ang Iyang kawsa, ug kita “mobarug ingon nga mga saksi [Kaniya] sa tanan nga mga panahon ug diha sa tanan nga mga butang, ug sa tanang dapit nga [kita] mahimo nga maanaa.”¹¹ Si Presidente Nelson nanawagan sa “*matag* batan-ong babaye ug *matag* batan-ong lalaki . . . sa pag-apil sa batalyon sa kabatan-unan sa Ginoo sa pagtabang sa pagpundok sa Israel.”¹² Ug kitang tanan mapasalamat sa pagdawat sa propetikanhong tawag sa paggamit sa ngalan sa Iyang gipahiuli nga Simbahan sumala sa gipadayag sa Manluluwas Mismo: Ang Simbahan ni Jesukristo sa mga Santos sa Ulahing mga Adlaw.¹³

Sa proseso sa pagdala sa pangalan sa Manluluwas ngari kanato, kinahanglan gayud atong masabtan nga ang kawsa ni Kristo ug sa Iyang Simbahan mao ra. Dili kini magkabulag. Sa samang paagi, ang atong personal nga pagkadisipulo sa Manluluwas ug ang aktibo nga pagka-miyembro sa Iyang Simbahan dili usab magkabulag. Kon kita magduha-duha sa atong pasalig ngadto sa tawo, ang atong pasalig ngadto sa uban magkakunhod, sigurado kining mahitabo.

Ang ubang magduhaduha sa pagdala sa ngalan ni Jesukristo ug sa Iyang kawsa tungod kay giisip kini nila nga sobra ra ka pig-ot, limitado, ug istrikto. Sa pagkatinuod, ang pagdala diha kanato sa ngalan ni Kristo mao ang mga makapagawasnon ug makapalambo. Nagpukaw kini sa tinguha nga atong gibati kon atong gidawat ang plano sa Dios pinaagi sa hugot nga pagtuo sa Manluluwas. Uban niining tinuod nga buhi sa atong mga kasingkasing, kita makakaplag sa tinuod nga katuyoan sa atong balaanong hinatag nga mga talento, makasinati sa Iyang makaimpluwensya nga gugma, ug mopalambo sa atong

pagpakabana alang sa kaayohan sa uban. Kita modala sa ngalan sa Manluluwas diha sa atong kaugalingon, kita tinud-anay nga naghupot sa matag butang nga maayo ug mamahimong sama Kaniya.¹⁴

Importanting hinumduman nga ang pagdala sa pangalan sa Manluluwas ngari kanato usa ka pasalig nga pakig-saad—nagsugod sa pakigsaad nga atong gihimo sa bunyag. Si Presidente Nelson mitudlo, “Ang [atong] pasalig nga mosunod sa Manluluwas pinaagi sa paghimo og mga pakigsaad uban Kaniya ug dayon sa pagtuman niadto nga mga pakigsaad moabli sa pultahan ngadto sa tanang espirituhanong mga panalangin ug pribilehiyo nga mahimong maanaa.”¹⁵ Usa sa balaa-non nga mga pribilehiyo sa pagdala sa pangalan sa Manluluwas ngari kanato pinaagi sa bunyag mao ang dalan nga gihatag niini ngadto sa sunod nga ordinansa dayon sa dalan sa pakig-saad, sa atong kumpirmasyon. Sa dihang nangutana ko sa usa sa akong mga higala nga utso anyos kon unsay pasabut sa pagdala sa ngalan ni Kristo alang kaniya, siya yanong mitubag, “Kini nagpasabut nga ako makabaton sa Espiritu Santo.” Husto siya.

Ang gasa sa Espiritu Santo madawat pinaagi sa kumpirmasyon human kita makadawat sa ordinansa sa bunyag. Kining gasa mao ang katungod ug kahigayunan nga makabaton sa Espiritu Santo isip kanunay nga kauban. Kon maminaw kita ug mosunod sa Iyang hinay, hinagawhaw nga tingog, Siya mopatunhay kanato diha sa dalan sa pakigsaad kita misulod pinaagi sa bunyag, mopasidaan kanato kon kita matintal sa pagbiya niini, ug moawhag kanato sa paghinulsol ug mopahiangay kon gikinahanglan. Ang atong tutukan human sa bunyag mao ang pagpabilin sa Espiritu Santo kanunay nga maga-uban nato aron nga kita magpadayon sa paglambo sa dalan sa pakigsaad. Ang Espiritu Santo makig-uban lamang kanato hangtud nga ang atong kinabuhi nagpabilin nga limpyo ug gawasnon sa sala.

Tungod niini nga rason, ang Ginoo mihatag og paagi alang nato nga

magmakanunayon sa pagbag-o sa makalimpyo nga epekto sa atong bunyag pinaagi sa laing ordinansa—ang sakrament. Matag semana kita mahimong “makasaksi . . . nga [kita] andam *nga modala [kanato] sa ngalan [sa] Anak*”¹⁶ usab pinaagi sa pagkab-ot ug *pag-ambit* sa simbolo sa lawas ug dugo sa Ginoo diha sa atong mga kamot—ang pan ug tubig—ug *pag-ambit* niini diha sa atong mga kalag. Agi og balos, ang Manluluwas mohimo na usab sa Iyang makalimpyo nga milagro ug sa ingon kita mahimong angayan sa impluwensya sa Espiritu Santo. Dili ba kini ebidensya sa walay kinutuban nga kalooy nga makitan lang diha sa ngalan ni Jesukristo? Sama sa atong pagdala sa Iyang ngalan ngari *kanato*, Siya motangtang sa atong mga sala ug kasub-anan diha *Kaniya*, ug gani ang Iyang “mga bukton sa kalooy gilugway pa gihapon”¹⁷ aron ang Iyang gugma igakos kanato.¹⁸

Ang sakrament usa ka sinemana nga pahinumdom nga sa *pagdala* nganhi kanato sa pangalan ni Jesukristo mao ang usa ka buhi ug padayon nga pasalig, dili kausa lang nga panghitabo sa adlaw sa atong bunyag.¹⁹ Mahimo natong ipadayon ug balik-balikon “ang halad nga sagrado, wala sabti sa tawo, aron mapasaylo ang atong mga sala ug kuhaon ang iyang unod ug dugo.”²⁰ Dili ikahibulong nga sa higayon ang mga anak sa Dios makasabut sa kagamhanan, espirituhanong mga panalangin nga moabut gikan sa pagdala diha kanila sa ngalan ni Kristo, kanunay silang bation og kalipay ug magtinguha sa pagsulod sa pakigsaad sa ilang Dios.²¹

Samtang kita mosunod niining balaa-nong gidesinyo nga dalan sa pakigsaad, ang atong pasalig ug paningkamot sa pagdala diha kanato sa ngalan ni Jesukristo makahatag kanato og kalig-on “sa pagbaton sa [Iyang] ngalan nga nahisulat kanunay sa [atong] mga kasingkasing.”²² Mohigugma kita sa Dios ug sa atong mga silingan ug nagtinguha sa pagpangalagad kanila. Motuman kita sa Iyang mga sugo ug mangandoy nga mahiduol ngadto Kaniya pinaagi sa pagsulod sa dugang nga mga pakigsaad



uban Kaniya. Ug kon mobati kita og kahuyang ug dili makasarang sa pagbuhat sa atong matarung nga gitinguha, mangamuyo kita alang sa kusog nga moabut lang pinaagi sa Iyang ngalan, ug Siya motabang kanato. Samtang kita molahutay diha sa hugot nga pagtuo, ang adlaw moabut nga kita makakita Kaniya ug makauban Kaniya, ug atong makita nga kita mahisama Kaniya, sa ingon angayan nga makabalik sa presensya sa Amahan.

Tungod kay ang saad sa Manluluwas sigurado: kadtong kinsa “motuo sa ngalan ni Jesukristo, ug mosimba sa Amahan sa iyang ngalan, ug molahutay sa hugot nga pagtuo diha sa iyang ngalan ngadto sa katapusan”²³ maluwat diha sa gingharian sa Dios. Uban ninyo, ako naglipay nga kining walay ikatandi nga mga panalangin gihimong posible pinaagi sa pagdala ngari kanato sa ngalan ni Jesukristo, kansang ngalan ako magpamatuod, amen. ■

MUBO NGA MGA SULAT

1. Moises 5:8.
2. Mosiah 3:17.
3. Doktrina ug mga Pakigsaad 18:23.
4. Dallin H. Oaks, “Taking upon Us the Name of Jesus Christ,” *Ensign*, Mayo 1985, 82.
5. Doktrina ug mga Pakigsaad 18:24; emphasis gidugang.
6. Doktrina ug mga Pakigsaad 20:37; emphasis gidugang.
7. Si Presidente Dallin H. Oaks mitudlo: “Kita modala diha kanato sa ngalan sa Manluluwas kon mahimo kitang miyembro sa Ang Simbahan ni Jesukristo sa mga Santos sa Ulahing mga Adlaw. . . . Isip

tinuod nga tumutuo ni Kristo, isip mga Kristiyano, kita malipayong magdala sa iyang ngalan ngari kanato” (“Taking upon Us the Name of Jesus Christ,” 80).

8. Sa online nga diksyonaryo nga Merriam-Webster, naglista og mga 20 ka mga kahulugan sa transitive form sa verb nga *dala*, nga mao ang matang sa verb nga gigamit diha sa hugpong sa mga pulong nga “pagdala sa ngalan ni Jesukristo” (tan-awa sa merriam-webster.com/dictionary/take).
9. Russell M. Nelson, “Mga Propeta, Pagpangulo, ug Balaanon nga Balaod” (tibuok kalibutan nga debusyonal alang sa mga young adult, Ene. 8, 2017), broadcasts.lds.org.
10. Tan-awa sa Russell M. Nelson, “Ang Basahon ni Mormon: Unsa Kaha ang Imong Kinabuhi Kon wala Kini?” *Liahona*, Nob. 2017, 60–63.
11. Mosiah 18:9.
12. Russell M. Nelson, “Paglaum sa Israel” (tibuok kalibutan nga debusyonal sa kabatan-onan, Hunyo 3, 2018), HopeofIsrael.lds.org.
13. “Ang Ginoo midasig sa akong hunahuna sa kaimportante sa ngalan nga Iyang gipadayag alang sa Iyang Simbahan, bisan Ang Simbahan ni Jesukristo sa mga Santos sa Ulahing mga Adlaw. Aduna kitay buluhaton sa pagpahimutang sa atong kaugalingon nga mahiuyon sa Iyang kabubut-on” (Russell M. Nelson, sa “The Name of the Church” [official statement to the press, Ago. 16, 2018], mormonnewsroom.org).
14. Tan-awa sa Moroni 7:19.
15. Russell M. Nelson, “Samtang Dungan Kita nga Magpadayon sa Unahan,” *Liahona*, Abr. 2018, 7.
16. Doktrina ug mga Pakigsaad 20:77; emphasis gidugang.
17. 3 Nephi 9:14; tan-awa usab sa Alma 5:33–34.
18. Tan-awa sa 2 Nephi 1:15.
19. “Kon mosaksi kita sa atong *kaandam* nga modala ngari kanato sa ngalan ni Jesukristo, nagmatuod kita sa atong pasalig sa pagbuhat sa tanan kutob sa atong mahimo aron maangkon ang kinabuhing dayon sa gingharian sa atong Amahan. Atong gipadayag ang atong tinguha—atong determinasyon sa pagpaningkamot alang sa—kahimayaan diha sa celestial nga gingharian. . . .
“ . . . Unsay atong nasaksihan dili nga kita *modala* ngari kanato sa ngalan apan nga kita *andam* sa pagbuhat sa ingon. Niining paagiha, ang atong pagsaksi may kalabutan sa umaabut nga panghitabo o kahimtang kansang pagkab-ot dili mahimo sa kaugalingon, apan nag-agad sa awtoridad o inisyatibo sa Manluluwas mismo” (Dallin H. Oaks, “Taking upon Us the Name of Jesus Christ,” 82, 83).
20. “O Dios, ang Amahan nga Walay Katapusan,” *Mga Himno*, nu. 175.
21. Tan-awa sa Mosiah 5; 6; 18; 3 Nephi 19.
22. Mosiah 5:12.
23. Doktrina ug mga Pakigsaad 20:29.



Ni Elder Dieter F. Uchtdorf

Sa Korum sa Napulog Duha ka mga Apostoles

Motuo, Mohigugma, Mobuhat

Atong makab-ot kanang abunda nga kinabuhi pinaagi sa pagkahimong tinuod nga disipulo ni Jesukristo—pinaagi sa pagsunod sa Iyang pamaagi ug pag-apil sa Iyang buhat.

Minahal ko nga mga Kaigso-onan, pagkanindot niining okasyon nga makauban kamo dinhi niining talagsaong sesyon sa kinatibuk-ang komperensya karon: aron maminaw ngadto sa mga dinasig nga mga mensahe; aron maminaw niining talagsaon, maanidot kaayo nga choir sa mga misyonaryo nga nagrepresentar sa liboan ka mga misyonaryo sa tibuok kalibutan—ang atong mga anak nga babaye, atong mga anak nga lalaki—ug ilabi na aron magkahiusa diha sa atong hugot nga pagtuo karon, usab ang pagpaluyo sa atong minahal nga Presidente ug propeta, si Presidente Russell M. Nelson, sa Unang Kapangulohan, ug sa Kinatibuk-ang Opisyaes sa Simbahan. Pagkadako sa kalipay nga ikauban kamo karon.

Ang karaang Hari nga si Solomon mao ang usa sa labing malampuson nga tawo nga nakita sa tawhanong kasaysayan.¹ Ingon og naangkon na niya ang tanan—kwarta, gahum, pagdayeg, kabantog, dungog. Apan human sa mga dekada sa pagpatuyang sa kaugalingon ug sa luho, giunsa ni

Haring Solomon paghulagway ang iyang kinabuhi?

“Ang tanan kakawangan man,”² miingon siya.

Kining tawhana, kinsa nakaangkon sa tanan, nga misangput sa kahigawad [disappointed], madudahon, ug dili malipayon, bisan pa man ang tanang butang pabor kaniya.³

Adunay panultihon sa German nga, *Weltschmerz*. Dili kaayo eksakto nga pagkahulagway, nagpasabut nga masub-anong naghinuktok nga ang kalibutan ubos sa unsay atong hunahuna niini.

Tingali may pagka-*Weltschmerz* natong tanan.

Kon dili nato mabantayan nga misulod na ang kagul-anan sa atong kinabuhi. Kon molungtad na kini sa atong tibuok adlaw ug mga kagabhion. Kon ang trahedya ug kawalay hustis-ya mahitabo kanato, lakip niadtong atong gihigugma. Kon gibati nato ang pagkawalay swerte sa mga nanghitabo sa atong personal nga kinabuhi ug ang kasakit mongitngit sa kalinaw—tingali matintal kita nga mouyon ni Solomon nga ang kinabuhi kawang ug hingpit nga walay kahulugan.

Ang Dakong Paglaum

Ang maayong balita mao nga, adunay paglaum. Adunay solusyon sa kahaw-ang, kakawang, kaguol, ug ang *Weltschmerz* sa kinabuhi. Adunay solusyon bisan ang tumang kawalay paglaum, ug kasagmuyo nga lagmit inyong gibati.

Kini nga paglaum makita diha sa makapausab nga gahum sa ebanghelyo ni Jesukristo ug sa makatubos nga gahum sa pag-ayo sa sakit sa atong kalag.

“Ako mianhi,” namahayag si Jesus, “aron sila makabaton ug kinabuhi, ug sa pagpakabaton niini sa madagayaon gayud.”⁴

Atong makab-ot kanang abunda nga kinabuhi dili pinaagi sa pagtutok sa atong kaugalingong mga panginahanglan o sa atong kaugalingong kalampusan apan pinaagi sa pagkahimong tinuod nga disipulo ni Jesukristo—pinaagi sa pagsunod sa Iyang pamaagi ug pag-apil sa Iyang buhat. Kita makakaplag og abunda nga kinabuhi pinaagi sa pagkalimot sa atong kaugalingon ug sa pag-apil sa dakong kawsa ni Kristo.

Ug unsa man ang kawsa ni Kristo? Kini mao ang motuo Kaniya, mohigugma sama sa Iyang paghigugma, ug mobuhat sama sa Iyang gibuh.

Si Jesus “nagpangadto-adto sa paghimo og mga kaayohan.”⁵ Milakaw Siya taliwala sa mga kabus, sa sinalikway, sa masakiton, ug sa naulawan. Nangalagad Siya sa mga walay ikagahum, sa huyang, ug walay higala. Migahin Siya og panahon uban nila; Siya nakig-istorya kanila. “Ug iyang giayo silang tanan.”⁶

Bisan asa Siya moadto, ang Manluluwas mitudlo sa “maayong balita”⁷ sa ebanghelyo. Gipaambit Niya ang mahangturong mga kamatuoran nga makapahimo sa tawo nga gawasnon sa espirital ug temporal.

Kadtong mopahinungod sa ilang kaugalingon ngadto sa kawsa ni Kristo makakaplag sa kamatuoran sa gisaad sa Manluluwas: “Bisan Kinsa nga magawagtang sa iyang kinabuhi kay kanako makakaplag siya niini.”⁸

Nasayup si Solomon, akong minahal nga kaigsoonan—ang kinabuhi dili



“kakawangan.” Sa sukwahi, mahimo kining puno sa katuyoan, kahulogan, ug kalinaw.

Ang makaayo nga kamot ni Jesukristo gipadangat sa tanang magtinguha Kaniya. Akong nasayran sa walay pagduhaduha nga ang pagtuo ug paghigugma sa Dios ug ang paningkamot sa pagsunod ni Kristo makapausab sa atong kasingkasing,⁹ mopagaan sa atong kasakit, ug mopuno sa atong kalag sa “tuman nga hingpit nga kalipay.”¹⁰

Motuo, Mohigugma, Mobuhat

Dayag lang, nga kinahanglan gayud kita mobuhat og labaw pa kay sa basta lang makaangkon og salabutan sa ebanghelyo aron ang pagkaayo moimpluwensya sa atong kinabuhi. Kinahanglan gayud nato kining iapil sa atong kinabuhi—himoon kining kabahin kon si kinsa kita ug sa unsay atong buhaton.

Tuguti nga mosugyot ko nga ang pagkadisipulo sugdan sa tulo ka yano nga mga pulong:

Motuo, mohigugma, ug mobuhat.

Ang pagtuo sa Dios mosangput ngadto sa pagtuo Kaniya ug ang pagpalambo og pagsalig sa Iyang pulong. Ang hugot nga pagtuo mopalambo sa gugma diha sa atong kasingkasing alang sa Dios ug sa uban. Samtang molambo kana nga gugma, madasig kita nga sundon ang Manluluwas sa

atong pagpadayon sa atong dakong panaw diha sa dalan sa pagkadisipulo.

“Apan,” moingon kamo nga, “mura og gipasayon ra na og maayo. Ang mga problema sa kinabuhi, ang akong mga problema, layo ra kaayo alang niana nga solusyon. Dili ninyo matambalan ang *Weltschmerz* sa tulo ka yanong mga pulong: *Motuo, mohigugma, mobuhat.*”

Dili ang ideya sa panultihon ang makaayo. Ang gugma sa Dios mao ang moluwas, mopahiuli, ug mopabalik.

Ang Dios nakaila kaninyo. Ikaw Iyang anak. Siya nahigugma kanimo.

Bisan kon naghunahuna kamo nga dili kamo maanyag, nagtabang Siya kanimo.

Niining adlaw mismo—kada adlaw—nagtabang siya kanimo, nagtinguha sa pag-ayo kanimo, aron sa pagbayaw kanimo, ug mohulip sa kahaw-ang sa imong kasingkasing sa gugma nga magpabilin. Nagtinguha Siya sa pagtangtang sa kangitngit sa imong kinabuhi ug mopuno niini sa sagrado ug sanag nga kahayag sa Iyang walay kinutuban nga himaya.

Ako kining nasinati mismo.

Ug mao kini ang akong pagsaksi isip Apostol ni Ginoong Jesukristo nga ang tanan kinsa moduol ngadto sa Dios—ang tanan kinsa tinuod nga *motuo, mohigugma* ug *mobuhat* makasinati sa ingon.

Kita Motuo

Ang kasulatan nagtudlo kanato nga kon “walay hugot nga pagtuo kini imposible ang pagpahimuot sa [Dios]: kay siya nga moabut ngadto sa Dios kinahanglan gayud nga motuo nga siya mao.”¹¹

Alang sa uban, ang pagtuo malisud. Usahay ang atong garbo nag-ali sa agianan. Tingali kay naghunahuna kita nga kita intelihente, edukado, o sinati, simple lang nga kita dili motuo sa Dios. Ug magsugod kita sa pagtan-aw sa mga relihiyon nga isip binuang nga tradisyon.¹²

Sa akong nasinati, ang pagtuo dili sama sa painting nga atong gitan-aw ug gidayeg ug hisgutan ug hunahunaon. Mas nahisama kini sa daro [plow] nga atong dad-on sa daruhan ug, pinaagi sa paghago, makamugna og tudling nga katamnan sa mga liso ug kini magsugod sa pagbunga og maayong resulta ug molampos.¹³

Paduol sa Dios, ug Siya mopaduol kaninyo.¹⁴ Mao kini ang saad ngadto sa tanang magtinguha sa pagtuo.

Kita Mohigugma

Ang mga kasulatan nagpadayag nga kon magkadako ang atong paghigugma sa Dios ug sa Iyang mga anak, mas magmalipayon kita.¹⁵ Ang gugma nga gipamulong ni Jesus, hinoon, dili mahitungod sa gift-card, dili matang sa gugma nga ilabay kon pul-an, moila og usa ka butang apan nakatutok sa lain. Dili kini gugma nga ipamulong ug dayon kalimtan. Dili kini “pahibaloa ako kon aduna ba koy mahimo” nga matang sa gugma.

Ang gugma nga gipamulong sa Dios mao ang matang nga mosulod sa atong mga kasingkasing inig mata nato sa buntag, magpabilin kanato sa tibuok adlaw, ug molambo diha sa atong mga kasingkasing samtang molitok kita sa atong mga pag-ampo sa pagpasalamat sa gabii.

Mao kini ang dili matukib nga gugma nga anaa sa Langitnong Amahan alang kanato.

Kining walay kinutuban nga kalooy makapahimo natong mas motan-aw sa uban kon kinsa gayud sila. Kon ipaagi

sa panlantaw sa gugmang tiunay—atong makita ang imortal nga mga binuhat sa mahangturong potensyal ug ang bili ug ang hinigugmang mga anak sa Makagagahum nga Dios.

Sa higayon kita manlantaw sa ingon nga paagi, dili na kita makaminos, mobaliwala, o mapihigon batok ni bisan kinsa.

Kita Mobuhat

Diha sa buhat sa Manluluwas, sa kanunay kini pinaagi sa gagmay ug yano nga “[mga] dagko nga butang ipahinabo.”¹⁶

Nakahibalo kita nga gikinahanglan ang pagbalik-balik og buhat aron mahanas sa bisan unsang butang. Bisana sa pagdula sa clarinet, sa pagpatid og bola ngadto sa net, pag-ayo og sakyanan, o bisan sa pagpalupad og eroplano, pinaagi lang sa pagbansay nga kita mahimong mas maayo.¹⁷

Ang organisasyon sa atong Manluluwas namugna sa yuta—Ang Simbahan ni Jesukristo sa mga Santos sa Ulahing mga Adlaw—makatabang nato sa pagbuhat gayud niana. Nagtanyag kini og dapit sa pagpraktis nga magpakabuhi sa paagi nga Iyang gitudlo ug mopanalangin sa uban sama sa Iyang gihimo.

Isip miyembro sa Simbahan, gihatagan kita sa mga calling o

responsibilidad, ug mga oportunidad sa pagtabang gumikan sa kalooy ug pagserbisyo ngadto sa uban.

Bag-ohay lang, ang Simbahan naghatag og dugang nga pagpasabut sa pagpangalagad, o pagserbisyo o paghigugma sa uban. Talagsaong hunahuna ang nagamit aron sa pagtino unsay among itawag niining espesyal nga pagpasabut.

Usa sa mga ngalan nahunahunaan mao ang *shepherding*, haum kaayo nga naghulagway sa imbitasyon ni Kristo: “Pakan-a ang akong mga karnero.”¹⁸ Hinoon, duna lang ni komplikasyon: ang paggamit nianang terminoha makapahimo nako nga usa ka *German shepherd*. Busa, kontento na ko kaayo sa termino nga *pagpangalagad*.

Kini nga Buhat alang sa Tanan

Siyempre, kining emphasis dili bag-o. Nakahatag lang kini og pagbag-o ug gipanindot nga oportunidad alang kanato sa pagbuhat sa sugo sa Manluluwas “maghigugmaay sa usag usa,”¹⁹ usa ka gipanindot nga paagi sa pagpatuman ug pagbansay sa katuyoan sa Simbahan.

Hunahunaa lang ang misyonaryo nga buhat; ang maisugon, mapaub-sanon, ug masaligon sa pagpaambit sa ebanghelyo nga mao ang usa ka maanindot kaayong ehemplo sa



pagpangalagad sa espirituhanong panginahanglan sa uban, bisan kinsa man sila.

O ba kaha ang paghimo sa buluhaton sa templo—pagsiksik sa mga ngalan sa katigulangan ug halaran sila sa mga panalangin sa kahang-turan. Pagka-balaan nga paagi sa pagpangalagad.

Hunahunaa ang buhat sa pagpangita sa kabus ug sa timawa, pagtuboy sa mga kamot nga naghooy, o pagpanalangin sa masakiton ug nagkalisud. Dili ba kini buhat mismo sa tiunay nga pagpangalagad nga gibuhay sa Ginoo sa dihang Siya dinhi pa sa yuta?

Kon kamo dili miyembro sa Simbahan, dapiton nako kamo “dali ug tan-awa.”²⁰ Dali ug apil kanamo. Kon kamo miyembro sa Simbahan apan karon dili na aktibong miapil, ako nagdapit kaninyo: palihug balik. Nagkinahanglan kami kaninyo!

Dali, idugang ang imong mga kalig-on ngari kanamo.

Tungod sa inyong talagsaong mga talento, abilidad, ug personalidad, kamo makatabang namo nga mahimong mas maayo ug mas malipayon. Agi og balos, motabang kami ninyo nga mahimong mas maayo ug mas malipayon usab.

Dali, tabangi kami sa pagpalig-on sa usa ka kultura sa pagkaayo, kamination, ug kamaloloy-on ngadto sa tanang anak sa Dios. Kay kitang tanan naningkamot nga mahimong bag-ong binuhay diin “daan nga mga butang nagpangagi na” ug “ang bag-ong butang . . . nahiabut na.”²¹ Gipakita kanato sa Manluluwas ang direksyon sa pagpadayon—sa unahan ug sa pasaka. Siya miingon, “Kon nahigugma kamo kanako, inyong pagatumanon ang akong mga sugo.”²² Magtambaya-yong kita sa pagkahimong mga tawo nga gusto sa Dios nga kita mahimo.

Mao kini ang matang sa kultura sa ebanghelyo nga atong gitinguha nga ugmaron sa tibuok Simbahan ni Jesukristo. Nagtinguha kita sa pagpalig-on sa Simbahan isip usa ka dapit diin kita magpinasayloay sa usag usa. Diin makalikay kita sa tintasyon sa pagpangita og sayop, pagpanglibak, ug

mobira sa uban paubos. Diin, imbis mangitag sayop, mobayaw ug motabang kita sa usag usa nga makab-ot ang atong labing maayo.

Tuguti kong dapiton kamo pag-usab. Dali ug tan-awa. Apil kanamo. Kami nagkinahanglan kaninyo.

Dili Hingpit nga mga Tawo

Inyong masuta nga kining Simbahan napuno og pipila sa pinakamaayong tawo nga anaa sa kalibutan. Sila mga maabi-abihon, mahigugmaon, mabination ug sinsero. Sila mga kugihan, andam nga mosakripisyo, ug gani bayani usahay.

Ug sila dili usab gayud hingpit.

Sila makahimo og sayop.

Sa matag karon ug unya ilang masulti ang dili angay. Ilang mabuhay ang mga butang nga dili unta nila angayng buhaton.

Apan adunay komon diha kanila—gusto nilang molambo ug mas maduol sa Ginoo, nga atong Manluluwas, bisan si Jesukristo.

Naninkamot sila nga mahimong tarong.

Sila *motuo*. Sila *mohigugma*. Sila *mobuhay*.

Gusto nila nga mahimong dili hakog, mas maloloy-on, mas lunsay, mas sama kang Jesus.

Ang Blueprint alang sa Kalipay

Oo, ang kinabuhi usahay malisud. Sigurado kitang tanan dunay mga panahon sa kawalay paglaum ug kasagmuyo.

Apan ang ebanghelyo ni Jesukristo nagtanyag og paglaum. Ug, sa Simbahan ni Jesukristo, makig-uban kita sa mga nangita og dapit sa pamilya ug panaghigalaay—dapit sa kalamboan diin makahimo kita sa *pagtuo*, *paghi-gugma*, ug sa *pagbuhay*.

Dili igsapayan unsay atong kalahian—nagtinguha kami sa paghangop sa usag usa isip mga anak sa atong hinigugma nga Langitnong Amahan.

Naghingapin ang akong kamapalasalamat sa pagkamiyembro sa Ang Simbahan ni Jesukristo sa mga Santos sa Ulahing mga Adlaw ug sa kahibalo nga ang Dios nahigugma sa Iyang mga

anak nga gihatagan sila sa blueprint sa kalipay ug kahulugan niining kinabuhi ug sa paagi nga makasinati og mahangturon nga kalipay diha sa himaya sa kinabuhi nga moabut.

Mapasalamat ko nga ang Dios nakahatag kanato og paagi nga mama-ayo ang sakit sa kalag ug ang *Weltschmerz* sa kinabuhi.

Ako mopamatuod ug magbilin sa akong panalangin nga kon kita *Motuo* sa Dios, kon *Mohigugma* Kaniya ug *mohigugma* sa Iyang mga anak sa tibuok natong kasingkasing, ug samtang kita maningkamot nga *Mobuhay* sumala sa gisugo sa Dios kanato, atong makaplagan ang pagkaayo ug kalinaw, kalipay ug kahulugan. Sa sagradong ngalan ni Jesukristo, amen. ■

MUBO NGA MGA SULAT

1. Usa ka survery sa msn.com nalista si Solomon isip ang ikalima sa labing adunahan nga tawo sa kalibutan. “Sumala sa Biblia, si Haring Solomon nagmando gikan sa 970 BC ngadto sa 931 BC, ug niining higayuna giingon nga siya nakadawat og 25 ka tonilada nga bulawan sa matag tuig sulod sa 39 ka tuig sa iyang paghari, nga mahimong mobalor og binilyon ka mga dolyares sa 2016. Uban sa tumang kaadunahan gikan sa buhis ug patigayon, ang personal nga kabulahan sa magmamando sa milapas na sa \$2 trilyones sa karon nga salapi” (“The 20 Richest People of All Time,” Abr. 25, 2017, msn.com).
2. Tan-awa sa Ecclesiastes 1:1–2.
3. Tan-awa sa Ecclesiastes 2:17.
4. Juan 10:10.
5. Mga Buhat 10:38.
6. Mateo 12:15; tan-awa usab sa Mateo 15:30.
7. Ang pulong *ebanghelyo* naggikan sa Greek nga pulong nga literal nga nagpasabut sa “maayong balita” (tan-awa sa Bible Dictionary, “Ebanghelyo, Mga”).
8. Mateo 16:25.
9. Tan-awa sa Ezekiel 36:26; Jeremias 24:7.
10. 1 Nephi 8:12.
11. Mga Hebreohanon 11:6.
12. Tan-awa sa 2 Nephi 9:28.
13. Tan-awa sa Juan 15:16.
14. Tan-awa sa Santiago 4:8.
15. Tan-awa sa 4 Nephi 1:15–16.
16. Alma 37:6.
17. Si Aristotle mituo nga “sa pagbuhay lamang og matarung nga mga buhat ang matarung nga tawo gihimo” (*The Nicomachean Ethics*, trans. David Ross, pin. Lesley Brown [2009], 28).
18. Tan-awa sa Juan 21:15–17.
19. Juan 15:12.
20. Juan 1:39.
21. 2 Mga Taga-Corinto 5:17.
22. Juan 14:15.



Ni Joy D. Jones

Kinatibuk-ang Presidente sa Primary

Alang Kaniya

Ang pagkahibalo sa kinsa ug sa ngano sa pagserbisyo sa uban makatabang kanato sa pagsabut nga ang kinatas-an nga pagpakita sa gugma mao ang debosyon ngadto sa Dios.

Niining makasaysayon nga gabii, akong ipaabut ang akong gugma ug pasalamat sa matag usa kaninyo, akong minahal nga mga sister. Bisan pila ang atong pangidaron, nahimutangan, o kahimtang, nagkapundok ta karong gabhiona nga nagkahiusa, sa kalig-on, sa katuyoan, ug sa pagpamatuod nga kita gihigugma ug gigiyahan sa atong Langitnong Amahan; sa atong Manluluwas, si Jesukristo; ug sa atong buhi nga propeta, si Presidente Russell M. Nelson.

Isip mga batan-ong managtiayon, ang akong bana ug ako gitawag sa among bishop aron sa pagbisita ug mangalagad sa usa ka pamilya nga wala na mosimba sa daghang katuigan. Andam kaming midawat sa tahas ug miadto sa ilang panimalay pipila ka adlaw human niadto. Diha-diha dayon dayag kaayo kanamo nga dili sila ganahan og mga bisita gikan sa Simbahan.

Mao nga sa among sunod nga pagbisita, amo silang gidad-an og usa ka plato nga mga cookie, masaligon nga ang mga chocolate chip makapahumok sa ilang mga kasingkasing. Wala gayud. Ang managtiayon nakigsulti kanamo pinaagi sa screen sa ilang pultahan, mas nakapaklaro nga kami dili welcome. Apan samtang kami namauli, kami

nakaingon nga daw nagmalampuson unta mi kon mga Rice Krispie nga mga Gasa lang among gidala.

Ang among kakulang sa espirituhanon nga panglantaw nakapahimo sa dugang pakyas nga mga pagsulay nga makapasagmuyo. Ang masalikway dili gayud komportable. Sa paglabay sa panahon nagsugod kami sa pagpangutana sa among kaugalingon, “*Nganong* ato kining gibuhat? Unsa man ang atong katuyoan?”

Si Elder Carl B. Cook mihimo niini nga obserbasyon: “Ang pagserbisyo sa Simbahan . . . mahimong mahagiton kon pabuhaton kita og butang nga makahadlok nato, kon kapuyon kita sa pagserbisyo, o kon tawgon kita sa pagbuhat sa dili kaayo nato ganahan.”¹ Among nasinati ang kamatuoran sa mga pulong ni Elder Cook sa dihang mihukom kami nga kinahanglan mangayo og giya gikan sa Usa ka Tawo nga adunay mas dakong panglantaw kay sa kanamo.

Mao nga, human sa daghang sinsero nga pag-ampo ug pagtuon, nakadawat kami og tubag sa *ngano* sa among pagserbisyo. Kami adunay kausaban sa among pagsabut, kausaban sa kasingkasing, sa tinuod usa ka mapanagnaon nga kasinatian.² Samtang

nangita kami og direksyon gikan sa mga kasulatan, ang Ginoo mitudlo kanamo unsaon paghimo sa proseso sa pagserbisyo sa uban nga mas sayon ug mas makahuluganon. Mao kini ang bersikulo nga among gibasa nga nakapausab sa among mga kasingkasing ug among pamaagi: “Higugmaa ang Ginoo nga inyong Dios uban sa inyong tibuok nga kasingkasing, uban sa inyong tibuok nga gahum, hunahuna, ug kusog; ug sa ngalan ni Jesukristo *kamo moalagad kaniya*.”³ Bisan tuod kini nga bersikulo pamilyar kaayo, sama og nakigsulti kini kanamo sa bag-o ug importante nga paagi.

Nakaamgo kami nga matinud-anon kaming naningkamot sa pagserbisyo niini nga pamilya ug sa pagserbisyo sa among bishop, apan kinahanglan kaming mangutana sa among kaugalingon kon tinuoray ba kaming nagserbisyo tungod sa gugma alang sa Ginoo. Si Haring Benjamin mitataw sa kalainan sa dihang siya namahayag: “Tan-awa, ako moingon nganha kaninyo nga tungod kay ako miingon nganha kaninyo nga ako migahin sa akong mga adlaw diha sa pag-alagad kaninyo, ako wala magtinguha sa pagpanghambog, *kay ako anaa lamang sa pag-alagad sa Dios*.”⁴

Nan kinsa man gayud ang gialagaran ni Haring Benjamin? Ang Langitnong Amahan ug ang Manluluwas. Ang pagkahibalo sa *kinsa* ug sa *ngano* sa pagserbisyo sa uban makatabang kanato sa pagsabut nga ang kinatas-an nga pagpakita sa gugma mao ang debosyon ngadto sa Dios.

Samtang ang among tumong sa hinay-hinay nausab, mao usab ang among mga pag-ampo. Nagsugod mi og kamahinamon sa among mga pagbisita niining minahal nga pamilya tungod sa among gugma alang sa Ginoo.⁵ Amo kining gibuhat alang Kaniya. Iyang gihimo ang kalisud nga dili na malisud. Human sa mga bulan sa among pag-istorya kutob lang sa pultahan, ang pamilya nagsugod na sa pagpasulod kanamo. Sa kadugayan, aduna na kami regular nga pag-ampo ug mabinationong panaghigugma sa ebanghelyo. Usa ka malungtarong

panaghigalaay ang milambo. Kami nag-simba ug nahigugma Kaniya pinaagi sa paghigugma sa Iyang mga anak.

Makahunahuna ba kamo og higayon nga kamo mahigugmaong nangita og paagi uban sa sinsero nga paningkamot sa pagtabang og usa ka tawo nga nanginahanglan ug mibati nga ang imong mga paningkamot wala tagda o tingali wala hangupa o gani wala kinahanglana? Niana nga higayon, inyo bang gikwestyon ang bili sa inyong serbisyo? Kon mao, hinaut nga ang mga pulong ni Haring Benjamin mohulip sa inyong pagduha-duha ug gani sa inyong kasakit: “Kamo anaa lamang sa pag-alagad sa inyong Dios.”⁶

Imbis nga magpundo og kaligutgot, kita makahimo, pinaagi sa pagserbisyo, og usa ka mas hingpit nga relasyon uban sa atong Langitnong Amahan. Ang atong gugma ug debosyon ngadto Kaniya makasanta sa panginahanglan sa pagka-inila o mapasalamatan ug nagtugot sa Iyang gugma nga modagayday ngadto ug pinaagi kanato.

Usahay kita tingali sa sinugdanan moserbisyo tungod kay mibati ta nga katungdanan o obligasyon, apan bisan kana nga serbisyo makatabang kanato nga makakita og usa ka butang nga mas nindot sulod kanato, maggiya kanato sa pagserbisyo “sa labing maayong paagi”⁷—sama sa pagdapit ni Presidente Nelson nga “mas bag-o, mas balaan nga paagi sa pag-amuma ug pagpangalagad sa uban.”⁸

Kon kita mopunting sa tanang gibuhay sa Dios alang kanato, ang atong pagserbisyo madasig sa mapasalamatan nga pagbati. Samtang kita dili na kaayo maguol mahitungod sa kaayuhan sa atong pagserbisyo ngari kanato, kita makaamgo hinuon nga ang gitutukan sa atong pagserbisyo mao ang pag-una sa Dios.⁹

Si Presidente M. Russell Ballard mitudlo, “Pinaagi lamang sa paghigugma nato sa Dios ug kang Kristo sa tibuok natong mga kasingkasing, mga kalag, ug mga hunahuna nga kita makahimo sa pagpakigbahin niini nga gugma ngadto sa atong mga silingan pinaagi sa mga buhat sa kamabination ug pagserbisyo.”¹⁰

Ang una sa Napulo ka mga Sugo mibalik-balik niining balaang kaalam: “Ako mao ang Ginoo nga inyong Dios. . . . Dili ka magbaton og lain nga mga dios sa atubangan ko.”¹¹ Ang pagkahimutang niini nga sugo magtabang kanato sa pagsabut nga *kon* atong ibutang Siya isip ang nag-una natong prayoridad, ang tanang butang sa katapusan mahiluna ra—bisan ang atong pagserbisyo sa uban. Sa higayon nga Siya na ang adunay pinakaimportante nga posisyon sa atong kinabuhi pinaagi sa tinuyo nga pagpili, nan Siya makapanalangin sa atong mga buhat alang sa atong kaayuhan ug sa kaayuhan sa uban.

Ang Ginoo mitambag, “Paghunahuna ngari kanako sa matag hunahuna.”¹² Ug matag semana nakigsaad kita nga mobuhay sa ingon—nga sa “kanunay mohinumdom kaniya.”¹³ Ang samang diosnong pagpunting magamit ba sa tanan natong buhaton? Ang pagbuhay ba bisan sa dili importanting gimbuhaton mahimong kahigayunan sa pagpakita sa atong gugma ug debosyon ngadto Kaniya? Ako nagtuo nga kini makahimo.

Makahimo kita sa matag item sa atong listahan sa buluhaton nga mahimong usa ka paagi sa paghimaya Kaniya. Makita nato ang matag gimbuhaton nga usa ka pribilehiyo ug kahigayunan sa pagserbisyo Kaniya, bisan kon kita anaa taliwala sa mga deadline, mga katungdanan, o hugaw nga mga diaper.

Sama sa gisulti ni Ammon, “Oo, ako nasayud nga ako walay bili; ingon sa akong kusog ako mahuyang; busa ako dili manghambog sa akong kaugalingon, apan ako manghambog sa akong Dios, kay diha sa iyang kusog ako makahimo sa tanan nga mga butang.”¹⁴

Kon ang pagserbisyo sa atong Dios mahimong atong nag-unang prayoridad sa kinabuhi, atong kalimtan ang atong kaugalingon, ug sa katapusan, hikaplagan ang atong tinuod nga pagkatawo.¹⁵

Yano ug direkta nga mitudlo ang Manluluwas niini nga baruganan: “Busa himoa nga ang inyong kahayag mohayag sa atubangan niini nga mga katawhan, aron sila makakita sa inyong

maayo nga mga buhat ug *himayaon ang inyong Amahan kinsa anaa sa langit*.”¹⁶

Mopakigbahin ako kaninyo og pipila ka mga pulong sa kaalam nga makita sa bungbong sa usa ka orphanage sa Calcutta, India: “Kon ikaw mabination, ang mga tawo mopasangil nga ikaw hakog, adunay gitago nga mga motibo. Pagmabination lang gihapon. Unsay imong gigahinan og katuigan sa pagtukod, ang usa ka tawo makaguba niini sa usa ka gabii. Pagtukod lang gihapon. Ang kaayo nga imong gibuhay karon, ang mga tawo kasagaran makalimot na ugma. Pagbuhay lang gihapon og maayo. Ihatag sa kalibutan ang labing nindot nga naa nimo, ug dili gihapon kana igo. Ihatag lang gihapon sa kalibutan ang naa nimo nga labing nindot. Imong makita, sa katapusan, ang importante mao ang relasyon nimo ug sa imong Dios . . . gihapon.”¹⁷

Mga sister, kanunay kini nga tali kanato ug sa Ginoo. Sama sa gisulti ni Presidente James E. Faust: “Unsa ang labing gikinahanglan sa kalibutan?” . . . ‘Dili ba ang labing gikinahanglan sa tibuok kalibutan alang sa matag tawo ang adunay personal, kanunay, matag adlaw, nagpadayon nga relasyon sa Manluluwas?’ Ang makaangkon og samang relasyon makapagawas sa kabalaan nga anaa kanato, ug walay makahimo og mas dakong kalainan sa atong kinabuhi samtang atong mahibaloan ug masabtan ang atong balaang relasyon sa Dios.”¹⁸

Sa samang paagi, si Alma mipasabut ngadto sa iyang anak nga lalaki, “Oo, himoa nga ang tanan nimo nga mga buluhaton himoon ngadto sa Ginoo, ug bisan asa ikaw padulong himoa kini diha sa Ginoo; oo, himoa nga ang tanan nimo nga mga hunahuna ipunting ngadto sa Ginoo; oo, himoa nga ang tanan nga mga pagbati sa imong kasingkasing ibutang diha sa Ginoo sa kahangturan.”¹⁹

Ug si Presidente Russell M. Nelson usab mitudlo kanato, “Sa dihang atong masabtan ang Iyang boluntaryong Pagula, bisan unsang matang sa sakripisyo sa atong bahin mahimong hingpit nga masanapan sa usa ka hilabihan nga

pasalamat alang sa pribilehiyo nga moserbisyo Kaniya.”²⁰

Mga sister, ako mopamatuod nga sa dihang si Jesukristo, pinaagi sa gahum sa Iyang Pag-ula, molihok *diha* kanato ug *sulod* kanato, Siya magsugod sa pagtrabaho *pinaagi* kanato aron mapanalanginan ang uban. Miserbisyo kita kanila, apan mibuhat kita pinaagi sa paghigugma ug pagserbisyo Kaniya. Kita mahimong unsa ang gihulagway sa kasulatan: “Matag tawo nagtinguha sa kaayohan sa iyang silingan, ug nagbuhat sa tanan nga mga butang uban sa usa ka bug-os nga tinguha ngadto sa himaya sa Dios.”²¹

Siguro ang among bishop nahibalo nga mao kana ang leksyon nga makat-onan nako ug sa akong bana gikan niadtong sayo ug maayo nga katuyoan, bisan dili hingpit, nga paningkamot sa pagpangalagad sa Iyang gihigugma nga mga anak nga lalaki ug mga babaye. Ako mohatag sa akong personal ug sigurado nga pagsaksi sa kaayo ug gugma nga Iyang gipakigbahin kanamo bisan sa among paningkamot sa pagserbisyo alang Kaniya. Sa sagradong pangalan ni Jesukristo, amen. ■

MUBO NGA MGA SULAT

1. Carl B. Cook, “Serve,” *Liahona*, Nob. 2016, 110.
2. Tan-awa sa Mosiah 5:2.
3. Doktrina ug mga Pakigsaad 59:5; emphasis gidugang.
4. Mosiah 2:16; emphasis gidugang.
5. Tan-awa sa 1 Nephi 11:22.
6. Mosiah 2:17.
7. 1 Mga Taga-Corinto 12:31.
8. Russell M. Nelson, “Pagpangalagad,” *Liahona*, Mayo 2018, 100.
9. Tan-awa sa Mateo 6:1–4, 33.
10. M. Russell Ballard, “Pagkaplag og Kalipay pinaagi sa Mahigugmaong Pagserbisyo,” *Liahona*, Mayo 2011, 47.
11. Exodo 20:2–3.
12. Doktrina ug mga Pakigsaad 6:36.
13. Doktrina ug mga Pakigsaad 20:77, 79.
14. Alma 26:12.
15. Tan-awa sa Mateo 16:24–25.
16. 3 Nephi 12:16; emphasis gidugang.
17. Often attributed to Mother Teresa; tan-awa sa Kent M. Keith, *The Paradoxical Commandments* (1968).
18. James E. Faust, “A Personal Relationship with the Savior,” *Ensign*, Nob. 1976, 58.
19. Alma 37:36.
20. Russell M. Nelson, “The Atonement,” *Liahona*, Nob. 1996, 35.
21. Doktrina ug mga Pakigsaad 82:19.



Ni Michelle D. Craig

Unang Magtatambag sa Kinatibuk-ang Kapangulohan sa Young Women

Balaan nga Pagkawala Matagbaw

Ang balaan nga pagkawala matagbaw makapalihok kanato inubanan sa pagtuo, makasunod sa mga pagdapit sa Manluluwas sa paghimo og maayo, ug mapainubsanong makahatag sa atong kinabuhi ngadto Kaniya.

Dihaang nag-eskwela pa ko sa elementarya, maglakaw mi pauli sa usa ka sementadong agianan nga nagliko-liko sa taas nga bahin sa kilid sa bungtod. Dunay usa ka laing agianan, dili sementado, gitawag nga “agianan sa mga lalaki.” Ang agianan sa mga lalaki usa ka dalan nga yuta paingon sa taas sa bungtod. Mas laktud kadto pero mas bakilid. Isip usa ka batang babaye, nahibalo ko nga makalakaw ko tungas sa bisan unsa nga agianan nga mahimo sa mga lalaki. Mas importante, akong nahibaloan nga nagpakabuhì ko sa ulahing mga adlaw ug kinahanglang mobuhag og lisud nga mga butang, sama sa gibuhag sa mga pioneer—ug ganahan ko nga maandam. Mao nga matag karon ug unya, maghinay ko og lakaw sa luyo sa akong grupo sa mga higala diha sa sementadong agianan, mohubo sa akong sapatos, ug maglakaw nga magtiniil ngadto sa agianan sa mga lalaki. Naningkamot ko nga maligon ang akong mga tiil.

Isip usa ka batan-ong babaye sa Primary, mao kana ang akong nahanunaan nga akong mabuhag aron

maandam. Karon lain na ang akong nahibaloan! Imbis nga maglakaw nga magtiniil sa pagtungas sa mga agianan sa bukid, kahibalo ko nga maandam nako ang akong mga tiil sa paglakaw diha sa dalan sa pakigsaad pinaagi sa pagtubag sa mga pagdapit sa Espiritu Santo. Kay ang Ginoo, pinaagi sa Iyang propeta, mitawag sa matag usa kanato sa pagpakabuhì ug pag-atiman diha sa “mas halangdon ug mas balaan nga paagi” ug sa “paghimo og mas taas nga lakang.”¹

Kining propetikanhong mga tawag sa paglihok, inubanan sa atong anaa na daan nga pagbati nga makahimo kita ug mas labaw pa, usahay mamugna sa sulod nato ang unsay gitawag ni Elder Neal A. Maxwell nga “balaan nga pagkawala matagbaw.”² Ang balaan nga pagkawala matagbaw moabut kon atong itandi “kon unsa *kita* [ngadto] sa unsay atong gahum nga *mamahimo*.”³ Matag usa kanato, kon matinuoron kita, mobati nga dunay gintang tali sa asa ug kinsa kita, ug asa ug kinsa ang gusto nato nga mamahimo. Nangandoy kita alang sa mas dakong personal nga

kapasidad. Duna kita niining mga pagbati tungod kay mga anak kita sa Dios, natawo uban sa Kahayag ni Kristo pero nagpuyo sa usa ka napukan nga kalibutan. Kining mga pagbati nagagikan sa Dios ug nagmugna og usa ka dinalian nga paglihok.

Kinahanglan natong hangupon ang mga pagbati sa balaan nga pagkawala matagbaw nga nanawagan kanato ngadto sa mas halangdon nga paagi, samtang nagaila ug naglikay sa sinundog ni Satanas—makaparalisar nga pagkawala sa paglaum. Usa kini ka kahigayunan diin si Satanas gusto kaayo nga maoy atong bation. Makapili kita nga maglakaw sa mas halangdon nga dalan nga modala nato sa pagtinguha sa Dios ug sa Iyang kalinaw ug grasya, o mahimong maminaw kita kang Satanas, kinsa kanunayng mopaluya nato og mga mensahe nga dili gayud kita magmalampuson: maadunahan, maantigo, matahum, bisan unsa dili paigo. Ang atong pagkawala matagbaw mahimong balaan—o makalaglag.

Molihok inubanan sa Pagtuo

Usa ka paagi sa pagsulti og balaan nga pagkawala matagbaw gikan sa sinundog ni Satanas mao nga ang balaan nga pagkawala matagbaw makapahimo nato sa paglihok nga matitudanon. Ang balaan nga pagkawala matagbaw dili pagdapit nga magpabilin sa atong kahimtang sa kakomportable, ni miresulta kini sa atong kawalay kadasig. Akong nakat-unan nga sa dihang gitugutan nako ang akong kaugalingon nga magbaton og negatibong mga hunahuna sa tanang butang nga ako *wala*, dili ko mouswag ug ako kining nabantayan nga mas lisud nga mobati ug mosunod sa Espiritu.⁴

Isip batan-on, si Joseph Smith nasa-yud gayud sa iyang mga kahuyang ug nabalaka mahitungod sa “pagpakabana alang sa [iyang] imortal nga kalag.” Sa iyang kaugalingong mga pulong, “Ang akong hunahuna naluya pag-ayo, kay ako mibati nga sad-an tungod sa akong mga sala, ug . . . gibati nga magbangutan alang sa akong kaugalingong mga sala ug alang sa mga sala sa kalibutan.”⁵ Nakapahimo kini kaniya og



“mahinungdanon nga pamalandong ug dako nga kabalisa.”⁶ Pamilyar ba kini? Nabalisa o naluya ba kamo sa inyong mga kahuyang?

Hinoon, si Joseph *mihimo* og usa ka butang. Mipaambit siya, “Ako sa kanunay miingon sa akong kaugalingon: Unsa kaha ang *buhaton*?”⁷ Si Joseph milihok inubanan sa pagtuo. Midangup siya sa mga kasulatan, mibasa sa pagdapit diha sa Santiago 1:5, ug midangup sa Dios alang sa tabang. Ang miresulta nga panan-awon misugod sa Pagpahiuli. Pagkamapasalamaton nako nga ang balaan nga pagkawala matagbaw ni Joseph, ang iyang mga pagbati sa kabalisa ug kalibug, nakapadasig niya ngadto sa matitud-anong paglihok.

Sunda ang mga Pag-aghat sa Pagbuhat og Kaayohan

Ang kalibutan kanunay nga migamit sa pagbati sa pagkawala matagbaw isip rason alang sa pag-focus og maayo sa kaugalingon, sa pagbaling sa atong mga hunahuna pasulod ug pabalik ug maghunahuna og maayo bahin sa kinsa *ko*, unsa ang dili *ko*, ug unsay *akong* gusto. Ang balaan nga pagkawala matagbaw makapadasig nato nga sundon ang ehemplo sa Manluluwas, kinsa “nagpangadto-adto sa paghimog mga kaayohan.”⁸ Samtang maglakaw kita

sa dalan sa pagkadisipulo, makadawat kita og espiritwal nga mga inspirasyon aron makatabang sa uban.

Usa ka istorya nga akong nadungog mga katugan na ang milabay nakatabang nako nga makabantay ug dayon molihok sa mga pag-aghat gikan sa Espiritu Santo. Si Sister Bonnie D. Parkin, kanhi Kinatibuk-ang Presidente sa Relief Society, mipaambit sa mosunod:

“Si Susan . . . usa ka talagsaong sastre. Si Presidente [Spencer W.] Kimball nagpuyo sa [iyang] ward. Usa ka Domingo, nakabantay si Susan nga siya dunay bag-ong amerikana. Ang iyang amahan bag-ohay lang . . . midala niya og nindot kaayo nga panapton nga sida. Naghunahuna si Susan nga kana nga panapton makahimo og nindot nga kurbata nga angayan sa bag-ong amerikana ni Presidente Kimball. Mao nga pagka-Lunes naghimo siya og kurbata. Iya kining giputos og tisyu ug miadto sa dapit nga anaa ang panimalay ni Presidente Kimball.

“Sa pagpadulong niya sa atubangang pultahan, dali siyang mihunong ug naghunahuna, ‘Kinsa man ko nga mohimo og kurbata alang sa propeta? Tingali daghan na siya niini.’ Nakadesisyon nga nakahimo siya og sayop, mitalikod siya aron mobiya.

“Mao gyud ang pag-abli ni Sister Kimball sa atubangang pultahan ug miingon, ‘Oy, Susan!’

“Mibati nga gikuyawan ug naulaw, miingon si Susan, ‘Nakita nako si Presidente Kimball nga nagsul-ob sa iyang bag-ong amerikana pagka-Dominggo. Gidad-an man gud ko ni Papa og sida gikan sa New York . . . ug mao nga gihimoan nako siya og kurbata.’

“Sa wala pa makapadayon si Susan, gipahunong siya ni Sister Kimball, mikupot sa iyang abaga, ug miingon: ‘Susan, ayaw gayud ibaliwala ang maayong hunahuna.’”⁹

Ganahan ko niana! “Ayaw gayud ibaliwala ang maayong hunahuna.” Usahay kon kita dunay impresyon sa pagbuhat og butang alang sa laing tawo, naghunahuna ko kon usa ba kini ka pag-aghat o ako lang kaugalingong hunahuna. Pero napahinumduman ko “kana nga iya sa Dios nagdapit ug

nagdani sa paghimo og maayo sa kanunay; busa, matag butang nga magdapit ug magdani sa pagbuhat og maayo, ug sa paghigugma sa Dios, ug sa pag-alagad kaniya, dinasig sa Dios.”¹⁰

Madirekta man kini nga mga pag-aghay o mga pagbati lang nga motabang, ang usa ka maayong buhat dili gayud mabaliwala, kay ang “gugma wala gayuy pagkatapos”¹¹—ug dili gayud sayop nga tubag.

Kasagaran ang tayming dili maayo, ug panagsa ra kita masayud sa epekto sa atong ginagmay nga mga buhat sa pagserbisyo. Pero matag karon ug unya, makabantay kita nga nahimo kitang mga instrumento sa kamot sa Dios ug magmapasalamaton kita nga masayud nga ang Espiritu Santo nga nagtrabaho pinaagi nato usa ka pagpakita sa pag-uyon sa Dios.

Mga sister, kamo ug ako mahimong mangamuyo alang sa Espiritu Santo nga mopakita kanato sa “tanang nga mga butang nga kinahanglan [natong] buhaton,”¹² bisan kon ang atong listahan sa angayang buhaton puno na. Kon giaghat, mahimo natong biyaan ang mga hugasanan diha sa lababo o ang ubang butang nga gustong ipatuman sa uban nato aron mobasa ngadto sa usa ka bata, mobisita og higala, mobantay sa mga anak sa silingan, o moserbisyo sa templo. Ayaw saypa pagsabut—usa ko ka tighimo og listahan, ganahan kong mosusi og mga butang. Pero ang kalinaw moabut diha sa pagkasayud nga ang dugang nga *pagkahimo* dili pareho sa dugang nga *pagbuhat*. Ang pagtubag sa pagkawala matagbaw pinaagi sa pagdesisyon nga mosunod sa mga pag-aghay makapausab sa paagi sa akong paghunahuna mahitungod sa “akong oras,” ug makita nako ang mga tawo, dili isip makabalda pero isip mao ang katuyoan sa akong kinabuhi.

Ang Balaan nga Pagkawala Matagbaw Makagiya Kanato ngadto kang Kristo

Ang balaan nga pagkawala matagbaw moresulta sa pagpaubos, dili kalooy sa kaugalingon o sa kasagmuyo nga moabut tungod sa pagtandi nga kanunay kita nga wala makakab-ot sa unsay gilauman. Ang nagtuman sa pakigsaad



nga kababayan-an nagkalain-lain; ang ilang mga pamilya, ilang mga kasinatian, ug ilang mga kahintang managlahi.

Siyempre, kitang tanan mapakyas sa atong balaanong potensyal, ug dunay kamatuoran sa pagkaamgo nga kon *mag-inusara* ang atong paningkamot dili igo. Pero ang maayong balita sa ebanghelyo mao nga pinaagi sa grasya sa Dios, kita igo *na*. Pinaagi sa tabang ni Kristo, mahimo nato ang tanang butang.¹³ Ang mga kasulatan misaad nga “makakaplag kitag grasya nga makatabang kanato sa panahon sa pagpanginahanglan.”¹⁴

Ang makatingala nga kamatuoran mao nga ang atong mga kahuyang mahimong usa ka panalangin kon makapahimo kini natong mapainubsanon ug makapadangup nato ngadto kang Kristo.¹⁵ Ang pagkawala matagbaw mahimong balaan kon mapainubsanon kitang moduol kang Jesukristo uban sa mga wala nato makab-ot, imbis nga magpanagana tungod sa kalooy sa kaugalingon.

Gani, ang mga milagro ni Jesus kasagaran magsugod sa pag-ila sa unsay wala makab-ot, panginahanglan, kapakyasan, o pagkadili igo. Kahinumdom ba mo sa mga pan ug sa mga isda? Ang kada usa sa mga tigsulat sa Ebanghelyo nagsulti kon giunsa ni Jesus pagpakaon sa milagrusong paagi ang liboan kinsa misunod Kaniya.¹⁶ Pero ang istorya nagsugod sa pag-ila sa mga disipulo sa ilang kakulang; nakaamgo sila nga sila duna lamang “lima ka pan nga sebada,

ug duha ka isda: apan mag-unsa man kana alang niining hilabihan ka daghan?”¹⁷ Husto ang mga disipulo: sila *walay* igong pagkaon, pero ilang gihtag kon unsay anaa nila ngadto kang Jesus, ug *Siya* mihatag dayon sa milagro.

Mibati ba mo sukad nga ang inyong mga talento ug mga gasa gamay ra kaa-yo alang sa umaabut nga buluhaton? Ako mibati. Pero kamo ug ako makahatag kon unsay anaa nato ngadto kang Kristo, ug Iyang pilo-piloon ang atong mga paningkamot. Unsay inyong mahalad sobra na kaa-yo—bisan pa sa inyong tawhanong mga kahuyang—kon mosalig kamo sa grasya sa Dios.

Ang kamatuoran mao nga ang matag usa kanato usa ra ka henerasyon gikan sa Dios—ang matag usa anak sa Dios.¹⁸ Ug sama sa Iyang gibuhay sa mga propeta ug ordinaryo nga kalalakin-an ug kababayan-an sa kasaysayan sa kalibutan, gusto usab sa Langitnong Amahan nga mousab kanato.

Si C. S. Lewis mipasabut sa makapausab nga gahum sa Dios niining paagiha: “Hunahunaa nga ikaw usa ka balay. Ang Dios miabut aron pagtukod og balik niana nga balay. Sa una, tingali, makasabut ka unsay Iyang gibuhay. Iyang giayo ang agianan sa tubig ug giayo ang mga tolo sa atop ug uban pa: nahibaloan nimo nga kadtong mga trabaho kinahanglang buhaton ug busa ikaw wala matingala. Apan sa pagkakaran Siya nagsugod paghimo og dakong kausaban sa balay sa paagi nga hilabihan ka ngil-ad nga ingon og dili masabtan. . . . [Tan-awa ra,] Siya nagtukod og lahi kaa-yo nga balay kay sa imong gihunahuna. . . . Naghunahuna ka nga ikaw [gina]himo ngadto sa usa ka disentang gamay nga payag; apan Siya nagtukod og palasyo. Tuyo Niya nga moanha ug mopuyo diha niini sa Iyang Kaugalingon Mismo.”¹⁹

Tungod sa maulaong sakripisyo sa atong Manluluwas, mahimo kitang sarang sa mga buluhaton nga nagpaabut. Ang mga propeta nagtudlo kanato nga samtang mokatkat kita sa dalan sa pagkadisipulo, mahimo kitang mabalaan pinaagi sa grasya ni Kristo. Ang balaan nga pagkawala matagbaw makapalihok kanato inubanan sa

pagtuo, makasunod sa mga pagdapit sa Manluluwas sa paghimo og maayo, ug mapainubsanong makahatag sa atong kinabuhi ngadto Kaniya. Sa pangalan ni Jesukristo, amen. ■

MUBO NGA MGA SULAT

1. Russell M. Nelson, sa Tad Walch, “The Lord’s Message Is for Everyone”: President Nelson Talks about Global Tour,” *Deseret News*, Abr. 12, 2018, deseretnews.com.
2. Neal A. Maxwell, “Becoming a Disciple,” *Ensign*, Hunyo 1996, 18.
3. Neal A. Maxwell, “Becoming a Disciple,” 16; emphasis gidugang.
4. “Ang kahingawa makapahuyang sa imong pagtuo. Kon paubsan nimo ang imong mga gilauman [expectations], ang imong kaepektibo mokunhod, ang imong kadasig sa pagtinguha mohuyang, ug mas maglisud ka sa pagsunod sa Espiritu” (“Unsa May Akong Katuyoan isip usa ka Misyunaryo?” *Isangyaw ang Akong Ebanghelyo: Usa ka Giya sa Misyunaryo nga Pangalagad*, rev. ed. [2018], lds.org/manual/missionary).
5. *Mga Pagtulun-an sa mga Presidente sa Simbahan: Joseph Smith* (2007), 32.
6. Joseph Smith—Kasaysayan 1:8.
7. Joseph Smith—Kasaysayan 1:10; emphasis gidugang.
8. Mga Buhat 10:38.
9. Bonnie D. Parkin, “Personal Ministry: Sacred and Precious” (debosyonal sa Brigham Young University, Peb. 13, 2007), 1, speeches.byu.edu.
10. Moroni 7:13.
11. 1 Mga Taga-Corinto 13:8.
12. 2 Nephi 32:5.
13. “Mahimo ko ang tanang butang pinaagi kaniya nga nagapalig-on kanako” (Mga Taga-Filipos 4:13).
14. Mga Hebreohanon 4:16.
15. “Ug kon ang mga tawo moduol ngari kanako Ako mopakita ngadto kanila sa ilang kahuyang. Ako mohatag ngadto sa mga tawo og kahuyang nga sila mahimo nga magpaubos; ug ang akong *grasya* igo alang sa tanan nga mga tawo nga magpaubos sa ilang mga kaugalingon sa akong atubangan, kay kon sila magpaubos sa ilang mga kaugalingon sa akong atubangan, ug magbaton og hugot nga pagtuo ngari kanako, niana Ako mohimo sa mahuyang nga mga butang nga mahimo nga malig-on ngadto kanila” (Ether 12:27; emphasis gidugang).
16. Tan-awa sa Mateo 14:13–21; Marcos 6:31–44; Lucas 9:10–17; Juan 6:1–14.
17. Juan 6:9.
18. Si Presidente Boyd K. Packer nagtudlo: “Bisan unsa ka daghan ang mga henerasyon sa imong mortal nga mga kagiklanan, wala igsapayan kon unsa nga kaliwat o katawhan ang imong girepresentar, ang talaan sa kaliwatan sa imong espiritu mahimong isulat sa usa lamang ka linya. Ikaw usa ka anak sa Dios!” (“To Young Women and Men,” *Ensign*, Mayo 1989, 54).
19. C. S. Lewis, *Mere Christianity* (1960), 160.



Ni Cristina B. Franco

Ikaduhang Magtatambag sa Kinatibuk-ang
Kapangulohan sa Primary

Ang Kalipay sa Dili Hinakog nga Pagserbisyo

Misaad kita sa atong Amahan sa Langit nga moserbisyo kita Kaniya ug sa uban pinaagi sa gugma ug mobuhat sa Iyang kabubut-on sa tanang butang.

Human sa milabayng komperensya, daghang tawo miduol nako dala ang samang pangutana: “Komportable ba kadtong mga lingkuranan?” Ang akong tubag mao ra gihapon sa tanang higayon: “Kanang

mga lingkuranan komportable kon dili ikaw ang mamulong.” Tinuod kana, di ba? Ang akong lingkuranan dili sama kakomportable niini nga komperensya, apan mapasalamaton gyud ko sa panalangin og dungog nga mamulong kaninyo niining gabhiona.

Usahay kon magserbisyo kita, makalingkod kita sa managlahing lingkuranan. Ang uban daw komportable ug ang uban dili, apan misaad kita sa atong Amahan sa Langit nga moserbisyo kita Kaniya ug sa uban pinaagi sa gugma ug mobuhat sa Iyang kabubut-on sa tanang butang.

Pipila ka tuig ang milabay, ang kabatan-onan sa Simbahan nakakat-on nga “kon kamo ‘anaa sa pag-alagad sa Dios’ [Doktrina ug mga Pakigsaad 4:2], nag-apil kamo sa pinakatalagsaong panaw. Nagtabang kamo sa Dios sa pagpadali sa Iyang buhat, ug kini dako, makalipay, ug kahibulongang kasinatian.”¹ Panaw kini nga pwede sa tanan—bisan unsay edad—ug panaw usab nga motultol kanato sa gipamulong sa





atong hinigugmang propeta isip “ang dalan sa pakigsaad.”²

Hinoon, sa walay palad, nagpuyo kita sa hakog nga kalibutan diin ang katawhan padayong nagpangutana, “Unsay akong makuha gikan niini?” imbis mangutana, “Kinsay tabangan nako karon?” o “Unsaon nga makaserbisyo ko sa Ginoo sa akong calling?” o “Gihatag ba nako ang tanan sa Ginoo?”

Usa ka talagsaong ehemplo sa akong kinabuhi sa dili hinakog nga pagserbisyo si Sister Victoria Antonietti. Si Victoria usa sa mga magtutudlo sa Primary sa akong branch samtang nagdako ko sa Argentina. Matag Martes sa hapon, kon magpundok mi sa Primary, dad-an mi niya og chocolate cake. Ang tanan ganahan kaayo sa cake—tanan gawas nako. Di gyud ko ganahan og chocolate cake! Ug bisan ipaambit niya ang cake kanako, kanunay gyud kong mobalibad.

Usa ka adlaw human mipaambit siya sa chocolate cake sa tanang bata, nangutana ko niya, “Nganong dili ka magdala og lahi nga flavor—sama sa orange o vanilla?”

Human mikatawa og gamay, mihangyo siya nako, “Nganong dili man *ka* motilaw og gamay? Kini nga cake gihimo sa espesyal nga sagol, ug mosaad ko nimo nga kon sulayan nimo ni, maganahan ka!”

Mitan-aw ko sa palibut, ug sa akong katingala, ang tanan daw lingaw kaayo

sa cake. Miuyon ko nga sulayan. Kahibalo mo unsay nahitabo? Giganahan ko! Pinakauna kadtong panahon nga nalipay ko sa chocolate cake.

Milabay ang daghang tuig unâ nakô nahibaloan ang sekretong sagol sa chocolate cake ni Sister Antonietti. Ako ug ang akong mga anak mobisita sa akong mama matag semana. Sa usa niining mga pagbisita, si mama ug ako nalingaw sa hiniwa nga chocolate cake, ug gisultihan nako siya paunsa nga naganahan ko sa chocolate cake sa kinaunhang higayon. Dayon gisultihan ko niya sa istorya nga wala nako mahibaloi.

“Tan-awa, Cris,” miingon si mama, “Si Victoria ug ang iyang pamilya dili daghan og kwarta, ug matag semana magpili siya kon magsakay ba siya og bus kuyog sa iyang upat ka anak ngadto sa Primary o mopalit ba og mga pangsagol sa chocolate cake para sa iyang Primary class. Kanunay niyang gipili ang chocolate cake kay sa magsakay og bus, ug siya ug ang iyang mga anak maglakaw padulong og lapas duha ka milya [3 kilometros] ug duha ka milya pauli, bati o maayo ang panahon.”

Nianang adlaw mas naganahan ko sa iyang chocolate cake. Labaw pa, akong nasayran nga ang sekretong sagol sa cake ni Victoria mao ang iyang gugma ngadto sa iyang

giserbisyuhan ug dili hinakog nga sakripisyo alang kanamo.

Ang paghinumdom sa cake ni Victoria nagtabang nga akong mahinumdu-man ang dili hinakog nga sakripisyo sa mahangturon nga leksyon nga gitudlo sa Ginoo ngadto sa Iyang mga disipulo samtang naglakaw Siya padulong sa panudlanan sa templo. Kahibalo mo sa istorya. Si Elder James E. Talmage mitudlo nga dunay 13 ka kaban, “ug didto ihulog sa mga tawo ang ilang mga amot alang sa [lain-laing] katuyoan nga gisulat diha sa mga sudlanan.” Naniid si Jesus sa linya sa mga mitampo, gilangkuban sa lain-laing matang sa mga tawo. Ang uban mihatag sa ilang mga gasa uban ang “sinserong katuyoan” samtang ang uban mihulog og “dagkong kantidad sa pilak ug bulawan,” nanghinaot nga makit-an, mamatikdan, ug dayegon sa ilang mga donasyon.

“Uban sa daghan mao ang kabus nga babayeng balo, kinsa . . . mihulog sa usa ka panudlanan og duha ka gagmayng bronse nga sinsilyo gitawag og diyot: ang iyang giamot nagkantidad og minos duha ka sentimo sa kwarta sa Amerikano. Gitawag sa Ginoo ang Iyang mga disipulo, mitan-aw ngadto sa kabus nga babayeng balo ug sa iyang gibuhay, ug miingon: ‘Sa pagkatinuod, magaingon ako kaninyo nga kining kabus nga babayeng balo nakahulog ug labaw pa kay sa tanan kanila nga nanagpanghulog ngadto sa panudlanan: Kay silang tanan mi- amot gikan sa ilang naghingapin nga kahamugaway; apan kini siya, gikan sa iyang kapit-os mihatag sa tanan nga diha kaniya, sa tanan nga iyang kabuhi-an’ [Marcos 12:43–44].”³

Ang babayeng balo wala maghupot og inilang posisyon sa katilingban sa iyang panahon. Sa tinuod naghupot siya og labaw pa ka importante: tiunay ang iyang mga intensyon, ug gihatag niya ang tanan nga iyang mahatag. Tingali gamay ra ang iyang gihatag kay sa uban, mas tago kay sa uban, lahi kay sa uban. Sa panan-aw sa uban, walay pulos ang iyang gihatag, apan sa panan-aw sa Manluluwas, nga “tigbasa sa mga hunahuna ug katuyoan sa kasingkasing,”⁴ gihatag niya ang tanan.

Mga sister, gihatag ba nato ang tanan sa Ginoo sa walay pagpanuko? Gisakripisyo ba nato ang atong panahon ug mga talento aron ang nagtubong henerasyon makakat-on sa paghigugma sa Ginoo ug motuman sa Iyang mga sugo? Nangalagad ba kita niadtong mga anaa sa atong palibut ug sa gi-assign nga atong amumahan ug uban sa kakugi—nagsakripisyo og panahon ug kusog nga pweding magamit sa ubang pamaagi? Gisunod ba nato ang duha ka dagkong sugo—sa paghigugma sa Dios ug paghigugma sa Iyang mga anak?⁵ Sa kasagaran kana nga gugma makita nga usa ka serbisyo.

Si Presidente Dallin H. Oaks mitudlo: “Ang atong Manluluwas mihatag sa Iyang kaugalingon sa dili hinakog nga pagserbisyo. Siya mitudlo nga ang matag usa kanato kinahanglan nga mosunod Kaniya pinaagi sa pagdumili sa atong mga kaugalingon sa hinakog nga mga tinguha aron sa pagserbisyo sa uban.”

Siya mipadayon:

“Usa ka pamilyar nga ehemplo sa dili paghunahuna sa atong kaugalingon diha sa pagserbisyo sa uban . . . mao ang sakripisyo nga gihimo sa mga ginikanan alang sa ilang mga anak.

Ang mga inahan nag-antus sa kasakit ug pakawala sa personal nga mga prayoridad ug mga kaharuhay aron sa pagdawat ug pagpadako sa matag anak. Ang mga amahan miusab sa ilang mga kinabuhi ug mga prayoridad aron sa pagsuporta sa pamilya. . . .

“ . . . Kita usab nalipay niadtong kinsa nag-atiman sa mga sakop sa pamilya nga may kakulangan ug sa mga tigulang na nga mga ginikanan. Wala usa niini nga pagserbisyo ang mangutana, unsay kaayohan ang mahimo niini ngari kanako? Ang tanan niini nagkinahanglan og pagsalikway sa personal nga kaharuhay alang sa dili hinakog nga pagserbisyo. . . .

“[Ug] kining tanan nagpakita sa mahangturong baruganan nga kita mas malipayon ug mas may katagbawan kon kita molihok ug moserbisyo alang sa unsay atong mahatag, dili alang sa unsay atong madawat.

“Ang atong Manluluwas nagtudlo nato sa pagsunod Kaniya pinaagi sa paghimo og mga sakripisyo nga gikinahanglan aron kalimtan ang atong mga kinabuhi diha sa dili hinakog nga pagserbisyo sa uban.”⁶

Si Presidente Thomas S. Monson mitudlo usab nga “tingali kon moatubang na kita sa atong Magbubuhay, dili

kita pangutan-on, ‘Pila ka posisyon ang inyong nahuptan?’ apan, ‘Pila ka tawo ang inyong natabangan?’ Sa reyalidad, dili nimo mahigugma ang Ginoo hangtud moserbisyo ka Kaniya pinaagi sa pagserbisyo sa Iyang katawhan.”⁷

Sa ato pa, mga sister, walay kaso kon sa komportabling lingkuranan kita naglingkod o naglisud kita’g lingkod sa tayaong lingkuranan sa likod hangtud mahuman ang miting. Wala gani kaso kon kita, kon gikinahanglan moadto sa foyer aron pahilumon ang naghilak nga bata. Ang importante nga mianhi kita uban sa tinguha nga moserbisyo, nga namatikdan nato ang atong pangalagaran ug malipayon silang gitimbaya, ug nagpaila-ila kita sa atong mga katupad sa lingkuranan—nga makighigala bisan og kita *wala* masanguni sa pagpangalagad kanila. Ug importante nga gibuhay nato ang tanan gamit ang espesyal nga sagol sa pagserbisyo inubanan sa gugma ug sakripisyo.

Akong nasayran nga dili kinahanglan nga maghimo pa kita og chocolate cake aron mahimo kitang malampuson o mapahinungurong magtutudlo sa Primary, kay dili man kini mahitungod lang sa cake. Kondili ang gugma nga nagpaluyo sa buhat.

Mopamatuod ko nga gihimong sagrado ang gugma pinaagi sa sakripisyo—ang sakripisyo sa usa ka magtutudlo ug ilabi na pinaagi sa katapusan ug walay katapusang sakripisyo sa Anak sa Dios. Mosaksi ko nga Siya buhi! Gihigugma nako Siya ug nagtinguhang mawagtang ang hinakog nga mga tinguha aron makahigugma ug makaalagad sama sa Iyang gibuhay. Sa pangalan ni Jesukristo, amen. ■

MUBO NGA MGA SULAT

1. Kinatibuk-ang Kapangulohan sa Young Men, “Kining Kahibulongan nga Buhat,” *Liahona*, Ene. 2015, 49.
2. Russell M. Nelson, “Samtang Dungan Kita nga Magpadayon sa Unahan,” *Liahona*, Abr. 2018, 7.
3. James E. Talmage, *Jesus the Christ* (1916), 561.
4. Doktrina ug mga Pakigsaad 33:1.
5. Tan-awa sa Mateo 22:37, 39.
6. Dallin H. Oaks, “Dili Hinakog nga Pagserbisyo,” *Liahona*, Mayo 2009, 93, 96.
7. Thomas S. Monson, “Great Expectations” (Brigham Young University devotional, Ene. 11, 2009), 6, speeches.byu.edu.





Ni Presidente Henry B. Eyring

Ikaduhang Magtatambag sa Unang Kapangulohan

Kababayen-an ug Pagkat-on sa Ebanghelyo diha sa Panimalay

Ang Manluluwas mao ang hingpit ninyong ehemplo kon sa unsang paagi kamo makasalmut sa importante kaayong bahin diha sa Iyang pagbutang og mas dakong gibug-aton sa pagkat-on sa ebanghelyo diha sa panimalay.

Akong minahal nga mga sister, pagkaanindot nga mahimamat kamo. Usa kini ka makapadasing nga panahon sa Ang Simbahan ni Jesukristo sa mga Santos sa Ulahing mga Adlaw. Ang Ginoo mibu-bu og kahibalo mahitungod sa Iyang Simbahan sama sa Iyang gipanaad nga Siya mobuhat sa ingon.

Nahinumdum kamo unsa ang Iyang giingon: “Hangtud kanus-a magpabilin nga mahugaw ang tubig nga nagdagan? Unsa nga gahum ang makapugong sa langit? Maayo pa sa tawo nga molugway sa iyang walay kusog nga kamot sa pagpahunong sa suba sa Missouri sa iyang walay pagkabalhin nga agianan, o sa pagpabalik niini, kay sa pagpugong sa Makagagahum sa pagbu-bu sa kahibalo gikan sa langit diha sa mga ulo sa mga Santos sa Ulahing mga Adlaw.”¹

Kabahin sa kasamtangang pagpaambit og kahibalo sa Ginoo nga may kalabutan sa pagpadali sa Iyang pagbu-bu og mahangturong kamatuoran sa mga salabutan ug ngadto sa mga kasingkasing sa Iyang katawhan. Iyang gipasabut nga ang mga anak nga babaye sa Langitnong Amahan adunay

importanting papel nianang milagro-so nga pagpadali. Usa sa ebidensya sa milagro mao ang Iyang paggiya sa Iyang buhi nga propeta aron sa pagbutang og mas dako nga gibug-aton sa pagtudlo sa ebanghelyo sa panimalay ug sulod sa pamilya.

Mangutana tingali kamo, “Giunsa pagkahimo sa mga matinud-anon nga mga sister nga usa ka nag-unang pwersa nga motabang sa Ginoo sa pagbu-bu sa kahibalo ngadto sa Iyang mga Santos?” Ang Ginoo mihatag sa tubag diha sa “Ang Pamilya: Usa ka Pamahayag ngadto sa Kalibutan.” Makahinumdum kamo sa mga pulong, apan makakita kamo og bag-o nga kahulugan ug mahibalo nga ang Ginoo nakakita nang daan niining makapahinam nga mga kausaban, nga karon nahitabo. Diha sa pamahayag, Iyang gihatagan ang mga sister og responsibilidad nga mahimong nag-unang mga magtutudlo sa ebanghelyo diha sa pamilya pinaagi niini nga mga pulong: “Ang unang mga kapangakohan sa mga inahan mao ang pag-atiman sa ilang mga anak.”² Kini naglakip sa pag-atiman sa kamatuoran ug kahibalo sa ebanghelyo.

Ang pamahayag nagpadayon: “Ang mga amahan ug mga inahan adunay katungdanan sa pagtabang sa usag usa ingon nga magkauban.”³ Sila magkauban, managsama ang ilang potensyal alang sa espirituhanon nga paglambo ug sa pagkat-on og kahibalo, ug busa magkahiusa pinaagi sa pagtinabangay. Sila managsama sa ilang balaang kapalaran nga mag-uban sa pagkabayaw. Sa pagkatinuod, ang mga lalaki ug mga babaye dili mabayaw nga nag-inusara.

Busa, ngano, nga ang anak nga babaye sa Dios diha sa nagkahiusa



ug managsama nga relasyon nakadawat sa nag-unang responsibilidad sa pag-atiman sa labing importante nga kamatuoran nga ang tanan kinahanglang makadawat, ang kahibalo sa kamatuoran nga gikan sa langit? Sumala sa akong pagsabut, mao na kana ang pamaagi sa Ginoo sukad sa pagtukod sa mga pamilya dinhi sa kalibutan.

Sama pananglit, si Eva kadtong nakadawat sa kahibalo nga gikinahanglan ni Adan nga mokaon sa bunga sa kahoy sa kahibalo aron sila makasunod sa tanang mga sugo sa Dios ug makahimo og pamilya. Wala ko makahibalo nganong si Eva ang nag-una niini, apan si Adan ug Eva hingpit nga nagkahiusa sa dihang ang kahibalo gibu-bu ngadto kang Adan.

Laing ehemplo sa paggamit sa Ginoo sa mga gasa sa pag-amuma sa mga kababayan-an mao ang pamaagi nga Iyang gilig-on ang mga anak nga lalaki ni Helaman. Mahimo kong emosyonal sa dihang mobasa ako sa istorya ug makahinumdom ko sa hilum sa mga pulong sa kasiguroan sa akong kaugalingong inahan sa dihang mibiya ko sa among panimalay aron sa pag-serbisyo sa militar.

Si Helaman mitala:

“Sila gitudloan sa ilang mga inahan, nga kon sila dili magduha-duha, ang Dios moluwas kanila.

“Ug sila misaysay pagbalik ngari kanako sa mga pulong sa ilang mga inahan, nga nag-ingon: Kami wala magduha-duha nga ang among mga inahan nasayud niini.”⁴

Samtang wala ako mahibalo sa tanang mga rason sa Ginoo sa pag-hatag og nag-unang responsibilidad alang sa pag-atiman sa pamilya ngadto sa mga matinud-anon nga mga sister, ako nagtuo nga kini may kalabutan sa inyong kapasidad sa paghigugma. Nagkinahanglan og dako kaayong gugma aron mabati ang panginahanglan sa uban labaw pa sa inyong kaugalingon. Mao kana ang putli nga gugma ni Kristo alang sa tawo nga inyong giamuma. Kana nga pagbati sa gugma nga putli naggikan sa tawo nga gipiling tig-amuma nga nahimong takus sa mga epekto sa Pag-ula ni Jesukristo. Ang

motto sa Relief Society, diin gipakita sa akong kaugalingon nga inahan, daw nakadasig kanako: “Ang Gugma nga Putli Dili Gayud Mopakayas.”

Isip anak nga mga babaye sa Dios, kamo adunay natural ug dako nga kapasidad nga mobati sa panginahanglan sa uban ug sa paghigugma. Kana, sa ingon, makahimo kaninyo nga sensitibo sa mga paghunghong sa Espiritu. Ang Espiritu mahimo dayon nga mogiya kon unsa ang inyong mahunahuna-an, unsa ang inyong isulti, ug unsa ang inyong buhaton aron sa pag-amuma sa mga tawo aron ang Ginoo makabu-bu og kahibalo, kamatuoran, ug kaisug ngadto kanila.

Kamo mga sister nga nakadungog sa akong tingog anaa sa talagsaon nga dapit sa inyong panaw sa kinabuhi. Ang uban batan-ong mga babaye nga mitambong sa kinatibuk-ang sesyon sa mga babaye sa unang higayon. Ang uban batan-ong mga babaye nga nag-andam nga mahimong mga tig-amuma nga buot sa Dios nga sila mahimo. Ang uban bag-o nga naminyo kinsa wala pay mga anak; ang uban batan-ong mga inahan nga adunay usa o daghan. Ang uban mga inahan og mga tinedyer ug ang uban adunay mga anak sa misyon field. Ang uban adunay mga anak nga nahimong huyang diha sa pagtuo ug halayo sa panimalay. Ang uban nagpuyo nga nag-inusara nga walay matinud-anon nga kauban. Ang uban mga apuhang babaye.

Apan, bisan unsa ang inyong personal nga kahimtang, kamo kabahin—usa ka importante nga bahin—sa pamilya sa Dios ug sa inyong kaugalingon nga pamilya, bisan pa sa umaabut, niini nga kalibutan, o sa kalibutan sa espiritu. Ang inyong responsibilidad gikan sa Dios mao ang pag-amuma sa daghan sa Iya ug inyong mga sakop sa pamilya kutob sa mahimo uban sa inyong gugma ug inyong hugot nga pagtuo kang Ginoong Jesukristo.

Ang inyong kasagaran nga hagit mao ang pag-ila kinsa ang amumahon, unsaon, ug kanusa-a. Nagkinahanglan kamo sa tabang sa Ginoo. Nahibalo Siya sa mga kasingkasing sa uban, ug nahibalo Siya kanus-a sila andam sa

pagdawat sa inyong pag-amuma. Ang inyong pag-ampo sa hugot nga pagtuo maoy mahimo ninyong yawe sa kalam-pusan. Makasalig ka nga makadawat sa Iyang giya.

Siya mihatag niini nga pagdasig: “Pangayo sa Amahan pinaagi sa akong ngalan, sa hugot nga pagtuo nga ikaw makadawat, ug ikaw makabaton sa Espiritu Santo, nga nagpadayag sa tanan nga mga butang nga angay.”⁵

Agig dugang sa pag-ampo, ang seryuso nga pagtuon sa mga kasulatan mahimong kabahin sa inyong nagtubo nga gahum sa pag-amuma. Kini mao ang saad: “Ni kamo maghunahuna sa wala pa unsa ang inyong isulti; apan mahala sa kanunay diha sa inyong mga hunahuna ang mga pulong sa kinabuhi, ug kini ihatag kaninyo niini nga takna kana nga bahin nga igahin ngadto sa matag tawo.”⁶

Mao nga kamo mogahin og mas dakong panahon sa pag-ampo, sa pag-pamalandong, ug paghinuklog mahitungod sa espiritwal nga mga butang. Makaangkon kamo og kahibalo sa kamatuoran nga ibu-bu kaninyo ug molambo ang inyong gahum sa pag-amuma sa uban nga anaa sa inyong pamilya.

Adunay mga higayon nga inyong bation nga hinay ang inyong paglambo sa pagkat-on unsaon ang mas maayong paagi sa pag-amuma. Nagkinahanglan og hugot nga pagtuo aron sa paglahutay. Ang Manluwas nagpadala kaninyo niini nga pagdasig:

“Busa, ayaw pagluya diha sa maayo nga buhat, kay kamo nagpahimutang sa tukuranan sa usa ka mahinungdanon nga buhat. Ug gikan sa gagmay nga mga butang magagikan ang mga dagko.

“Tan-awa, ang Ginoo nagkinahanglan sa kasingkasing ug sa usa ka andam nga hunahuna; ug ang andam ug ang masulundon mokaon sa kaayo sa yuta sa Zion niining katapusan nga mga adlaw.”⁷

Ang inyong presensya karong gabhiona nagpamatuod nga kamo andam modawat sa pagdapit sa Ginoo sa pag-amuma sa uban. Kana tinuod bisan sa kinamanghuran dinhi karong gabhiona. Mahimo ninyong masayran kinsa ang amumahon sa inyong pamilya. Kon

kamo mag-ampo nga adunay tinuod nga katuyoan, usa ka pangalan o usa ka nawong ang mosantup sa inyong hunahuna. Kon kamo mag-ampo aron mahibalo unsa ang buhaton o unsa ang isulti, inyong bation ang tubag. Matag higayon nga kamo motuman, ang inyong gahum sa pag-amuma molambo. Kamo makapangandam sa adlaw nga kamo mag-amuma sa inyong kaugalingon nga mga anak.

Ang mga inahan sa mga tin-edyer mahimong mag-ampo aron mahibalo unsaon pag-amuma sa usa ka anak nga lalaki o babaye kinsa daw dili mosanong sa pag-amuma. Mahimo kamong mag-ampo aron mahibalo kinsay adunay espirituhanong impluwensya nga gikinahanglan ug dawaton sa inyong anak. Ang Dios maminaw ug motubag nianang kinasingkasing nga mga pag-ampo sa nabalaka nga mga inahan, ug Siya mopadala og tabang.

Usab, usa ka apuhang babaye dinhi karong gabhiona mahimong mibati og kasakit tungod sa mga kahingawa ug mga kalisud sa iyang mga anak ug mga apo. Mahimo kamong mokuha og kaisug ug direksyon gikan sa mga kasinatian sa mga pamilya diha sa mga kasulatan.

Gikan sa panahon ni Eva ug Adan, ngadto ni Amahang Israel, ug ngadto sa matag pamilya diha sa Basahon ni Mormon, adunay labing siguro nga usa ka leksyon bahin sa unsay buhaton mahitungod sa mga kasakit sa dili mosanong nga mga anak: dili gayud mohunong sa paghigugma.

Aduna kitay makadasig nga ehemplo sa Manluluwas samtang Iyang gialima ang masinupakon nga espiritung mga anak sa Iyang Langitnong Amahan. Bisan kon sila ug kita makapasakit, ang kamot sa Manluluwas iya pang ginabakyaw.⁸ Siya namulong diha sa 3 Nephi sa Iyang espirituhanong mga igsoong babaye ug mga lalaki kinsa Iyang gisulayan apan wala magmalampuson sa pag-amuma: “O kamo nga mga katawhan. . . Kinsa sakop sa balay ni Israel, kapila ba Ako magtigum kaninyo ingon sa usa ka himungaan nga magtigum sa iyang mga piso sa ilawon sa iyang mga pako, ug nag-amuma kaninyo.”⁹



Alang sa mga sister sa matag angang sa panaw sa kinabuhi, sa matag sitwasyon sa pamilya, ug tadlas sa matag kultura, ang Manluluwas mao ang hingpit ninyong ehemplo kon sa unsang paagi kamo makasalmut sa importante kaayong bahin diha sa Iyang pagbutang og mas dakong gibug-aton sa pagkat-on sa ebanghelyo diha sa panimalay ug sa pamilya.

Inyong madala ang inyong natural nga pagbati og putli nga gugma ngadto sa mga kausaban sa mga kalihokan ug mga buluhaton sa inyong pamilya. Magdala kana og mas dako nga espirituhanon nga paglambo. Sa dihang mag-ampo kamo uban ug alang sa mga sakop sa inyong pamilya, inyong mabati ang gugma ninyo ug sa Manluluwas alang kanila. Anam-anam kanang mahimong inyong espirituhanong gasa samtang inyo kanang tinguhaon. Mobati niini ang mga sakop sa inyong pamilya samtang kamo mag-ampo uban sa mas hugot nga pagtuo.

Sa higayon nga ang pamilya magkapundok aron sa pagbasa og kusog sa

mga kasulatan, inyo na kanang nabasa ug nag-ampo mahitungod niana aron sa pag-andam sa inyong kaugalingon. Makakita kamo og mga higayon sa pag-ampo aron malamdagan sa Espiritu ang inyong hunahuna. Dayon, sa inyo nang higayon nga mobasa, bation sa mga sakop sa inyong pamilya ang inyong gugma alang sa Dios ug alang sa Iyang pulong. Sila amumahan Niya ug sa Iyang Espiritu.

Ang samang pagbu-bu moabut sa bisan unsang panagtigum sa pamilya kon kamo mag-ampo ug magplano niini. Kini tingali magkinahanglan og paningkamot ug panahon, apan magdala kini og mga milagro. Nakahinumdom ko og leksyon nga gitudlo sa akong inahan sa dihang gamay pa ko. Akong makita sa akong hunahuna ang adunay kolor nga mapa nga iyang gibuhit mahitungod sa mga panaw ni Apostol Pablo. Nahangangha ko kon giunsa niya pagkakita og oras ug kusog sa pagbuhit niana. Ug hangtud karon napanalanginan ako sa iyang gugma alang niadtong matinud-anon nga Apostol.

Matag usa kaninyo makakita og mga pamaagi nga makatabang sa pagbu-bu sa kamatuoran sa inyong mga pamilya diha sa gipahiuli nga Simbahan sa Ginoo. Ang matag usa kaninyo mag-ampo, magtuo, ug mamalandong aron mahibalo unsa ang mahimo ninyong talagsaon nga kontribusyon. Apan kini ako nahibalo: ang matag usa kaninyo, nga adunay samang yugo sa mga anak nga lalaki sa Dios, mahimong importanting kabahin sa milagro sa pagkat-on ug pagtuman sa ebanghelyo nga makapadali sa pagpundok sa Israel ug mag-andam sa pamilya sa Dios alang sa mahimayaong pagbalik ni Ginoong Jesukristo. Sa sagradong pangalan ni Jesukristo, amen. ■

MUBO NGA MGA SULAT

1. Doktrina ug mga Pakigsaad 121:33
2. “Ang Pamilya: Usa ka Pamahayag ngadto sa Kalibutan,” *Liahona*, Mayo 2017, 145.
3. “Ang Pamilya: Usa ka Pamahayag ngadto sa Kalibutan,” 145.
4. Alma 56:47–48.
5. Doktrina ug mga Pakigsaad 18:18.
6. Doktrina ug mga Pakigsaad 84:85.
7. Doktrina ug mga Pakigsaad 64:33–34.
8. Tan-awa sa 2 Nephi 19:12, 21.
9. 3 Nephi 10:4



Ni Presidente Dallin H. Oaks

Unang Magtatambag sa Unang Kapangulohan

Mga Ginikanan ug mga Bata

Ang dakong plano sa kalipay sa Langitnong Amahan nagsulti kaninyo kon si kinsa kamo ug sa katuyoan sa inyong kinabuhi.

Minahal kong mga sister, pagkanindot nga anaa kining bag-ong sesyon sa kinatibukang komperensya sa mga babaye sa Simbahan nga nag-edad og 8 anyos ug pataas. Atong nadungog ang makapadasig nga mga mensahe gikan sa mga lider nga mga sister ug gikan kang Presidente Henry B. Eyring. Si Presidente Eyring ug ako ganahan nga motrabaho ubos sa direksyon ni Presidente Russell M. Nelson, ug nagpaabut sa iyang propetikanhong pagpamulong.

I.

Ang mga bata ang atong labing bililihong gasa sa Dios—atong mahangturon nga pagsanay. Bisan pa niana nagpuyo kita sa panahon nga daghan nga mga babaye dili gustong manginlabut sa pagmatuto ug pag-amuma og mga bata. Daghang mga young adult ang maglangay sa pagminyo hangtud kahatagan og katagbawan ang temporal nga panginahanglan. Ang kasarangan (average) nga pangidarong sa mga kaminyoon sa mga miyembro misaka og kapin sa duha ka tuig, ug ang gidaghanon sa mga nangatawo sa Simbahan

nagkagamay. Ang Estados Unidos ug ubang mga nasud nag-atubang sa umaabut nga gamay nalang kaayo ang mga bata nga mohingkod nga moabag sa gidaghanon sa mangretiro nga mga hamtong.¹ Kapin sa 40 porsyento sa nangatawo sa Estados Unidos gikan sa wala makasal nga mga inahan. Kadtong mga bataa maoy looy. Matag usa niining mga nauso mao ang buhat batok sa balaang plano sa atong Amahan bahin sa kaluwasan.

II.

Ang mga babaye nga Santos sa Ulahing mga Adlaw nakasabut nga ang pagka-inahan mao ang ilang kinatang prayoridad, ang ilang hingpit nga kalipay. Si Presidente Gordon B. Hinckley miingon: “Ang mga babaye sa dakong bahin makakita sa ilang pinakadakong katumanan, sa ilang kinadak-ang kalipay diha sa panimalay ug pamilya. Ang Dios mitisok diha sa mga babaye og butang nga balaan nga gipahayag diha sa mahilom nga kalig-on, sa grasya, sa kalinaw, sa kaayo, sa hiyas, sa kamatuoran, sa gugma. Ug tanan niining dalayegon nga mga kalidad makaplagan ang ilang

pinakatinuod ug labing makapatagbaw nga pagpadayag sa pagkainahan.”

Mipadayon siya: “Ang labing mahinungdanon nga trabaho nga mahimo gayud sa babaye mao ang pag-amuma ug pagtudlo ug pagpakabuhi ug pag-awhag ug pagpadako sa iyang mga anak diha sa pagkamatarung ug kamatuoran. Wala nay laing butang nga ikatandi pa niana, di igsapayan unsay iyang buhaton.”²

Mga inahan, pinalangga nga mga sister, gihigugma namo kamo kon kinsa kamo ug unsay inyong gibuhang alang kanatong tanan.

Sa iyang importanting pakigpulong niadtong 2015 nga giulohan og “Usa Ka Hangyo ngadto sa Akong mga Sister,” si Presidente Russell M. Nelson miingon:

“Ang gingharian sa Dios dili ug dili mahimo nga makompleto kon wala ang mga babaye kinsa naghimo og sagradong mga pakigsaad ug dayon sundon kini, mga babaye nga makasulti uban sa gahum ug awtoridad sa Dios!

“Karon, . . . kita nagkinahanglan og mga babaye kinsa kamao nga mopahinabo sa importante nga mga butang pinaagi sa ilang hugot nga pagtuo ug kinsa maisugon nga mga tigpanalipod sa moralidad ug mga pamilya sa usa ka makasasala nga kalibutan. Kita nagkinahanglan og mga babaye kinsa mapahinunguron sa pagbantay sa mga anak sa Dios diha sa dalan sa pakigsaad padulong sa kahimayaan; mga babaye nga nakahibalo unsaon pagdawat og personal nga pagpadayag, nga nakasabut sa gahum ug kalinaw sa endowment sa templo; mga babaye nga nakahibalo unsaon pagsangpit sa mga gahum sa langit aron sa pagpanalipod ug paglig-on sa mga bata ug mga pamilya; mga babaye nga nagtudlo nga walay kahadlok.”³

Kining dinasig nga mga pagtulunan ang tanan gibase sa “Ang Pamilya: Usa Ka Pamahayag ngadto sa Kalibutan,” diin kining gipahiuli nga Simbahan mipamatuod sa doktrina ug mga buhat nga nagsentro sa plano sa Tiglalang sa wala pa Siya milalang sa yuta.

III.

Karon mamulong ko sa mas batanon nga grupo niining nanambong.



Minahal kong batan-ong mga sister, tungod sa inyong kahibalo sa gipahiuli nga ebanghelyo ni Jesukristo, kamo mga lahi. Ang inyong kahibalo makapahimo ninyong molahutay ug makabuntog sa mga kalisdanan sa pagdako. Sukad pa sa pagkabata, nangapil na kamo sa mga proyekto ug mga programa nga nakapalambo sa inyong mga talento, sama sa pagsulat, pagpamulong, ug pagplano. Nakat-on kamo sa reponsabing pamatasan ug kon unsaon sa paglikay sa mga tintasyon sa pagpamakak, pagpanikas, pagpangawat, o sa paggamit og ilimnon o drogas.

Ang inyong pagkalahi giila sa usa ka pagtuon sa Unibersidad sa North Carolina kabahin sa mga batan-on ug relihiyon sa America. Usa ka artikulo sa *Charlotte Observer* giulohan og “Mormon teens cope best: Study Finds Top Peers at Handling Adolescence [Nasuta sa Pagtuon nga ang mga batan-on nga mga Mormon mas maayong modala sa pagmugos sa agkabatan-on].” Sa katapusan niining artikulo nag-ingon nga “Ang mga Mormon ang labing maayo sa paglikay sa risgo nga pamatasan, maayo diha sa eskwela ug adunay positibo nga kinaiya mahitungod sa umaabut.” Usa sa mga tigpanukiduki (researcher) diha sa pagtuon, nga nakighinabi sa kadaghanan sa atong mga batan-on, nag-ingon, “Hapit tanang kategoriya nga among gitan-aw, adunay klaro nga sumbanan: Nag-una ang mga Mormon.”⁴

Nganong kamo man ang kinamaayohan sa pagsugakod sa mga kalisdanan sa pagdako? Mga batan-ong babaye, tungod kay kamo nakasabut sa talagsaong plano sa kalipay sa atong Langitnong Amahan. Nagsul-ti kini ninyo kon si kinsa kamo ug ang katuyoan sa inyong kinabuhi. Ang kabatan-onan nga aduna niana nga pagsabut mao ang mag-una sa pagsulbad sa problema ug mag-una sa pagpili sa matarung. Nakahibalo kamo nga maangkon ninyo ang tabang sa Ginoo sa pagbuntog sa tanang kalisdanan sa pagdako.

Lain pang rason nganong kamo ang pinaka-epektibo tungod kay kamo nakasabut nga kamo mga anak sa Langitnong Amahan nga nahigugma kaninyo. Sigurado ko nga kamo pamilyar sa atong nindot nga himno nga “Dearest Children, God is Near You.” [Pinalangga nga Mga Anak, ang Dios Haduol Kaninyo].” Ania ang unang lima ka mga bersikulo nga gikanta natong tanan ug gituohan:

*Pinalanggang mga anak, duol ra ang
Dios kaninyo,
Adlaw’g gabii nagbantay kaninyo,
Ug malipay nga moangkon ug manala-
ngin kaninyo,
Kaniya salig kamo.*⁵

Adunay mga duha ka pagtulunan nianang bersikulo: Una, ang atong Langitnong Amahan duol kanato ug

nagbantay kanato adlaw ug gabii. Hunahunaa kini! Ang Dios nahigugma kanato, duol Siya kanato, ug nagbantay Siya kanato. Ikaduha, mahimuot nga mopanalangin Siya kanato kon kita “maningkamot sa pagbuhat unsay matarung.” Makahupay kaayo taliwala sa atong masinati nga mga kabalaka ug mga kalisdanan!

Oo, batan-ong mga babaye, bulahan ug talagsaon kamo, apan kamo sama sa tanang anak sa Langitnong Amahan sa inyong panginahanglan sa “pagpaningkamot sa pagbuhat unsay matarung.”

Ania ako makahatag kaninyo og tambag mahitungod sa daghang lain-laing mga butang, apan duha lang ang akong gipili nga hisgutan.

Ang una nakong tambag mahitungod sa kabalaka sa mga cellphone. Sa bag-ong survey sa nasud nasuta nga kapin sa katunga sa mga batan-on sa Estados Unidos miingon nga migahin sila og dakong panahon diha sa ilang mga cell phone. Kapin sa 40 porsyento miingon nga magguol sila kon mabulag kanila ang ilang mga cell phone.⁶ Mas komon kini sa daghang mga batang babaye kay sa mga lalaki. Mga batan-on kong mga sister—ug mga hamtong nga babaye usab—makapanalangin ang pagminus sa paggamit ug pagsalig diha sa mga cell phone.

Ang akong ikaduha nga tambag mas importante pa. Pagmabination ngadto sa uban. Ang pagkamabination mao ang butang nga gibuhat na sa daghan sa atong kabatan-onan. Pipila ka mga grupo sa mga batan-on sa uban nga mga komunidad nakapakita og agianan alang natong tanan. Nadasig kita sa atong mga batan-ong katawhan sa mga buhat sa pagkamabination ngadto niadtong nanginahanglan og gugma ug tabang. Sa daghang mga paagi, inyong nahatag kana nga tabang ug gipakita kana nga gugma sa usag usa. Nanghinaut kami nga ang tanan mosunod sa inyong ehemplo.

Sa samang higayon, nasayud kita nga ang kaaway motintal natong tanan nga dili magmabination, ug anaa pa gihapoy daghang mga ehemplo niini, bisan sa mga bata ug kabatan-onan. Ang padayon nga pagkadili





mabination adunay daghang tawag, sama sa pagdaugdaog [bullying], pagkonsabo batok sa usa ka tawo, o paghimog pundok sa pagsalikway sa uban. Kining mga ehemplo motuyo sa pagpasakit sa mga kaklase o mga higala. Akong batan-ong mga sister, dili makapahimuot sa Ginoo kon bangis o magminaldita kita ngadto sa uban.

Aniay usa ka ehemplo. Nakaila ko og usa ka batan-ong lalaki, usa ka bakwit dinhi sa Utah, kinsa gisungog tungod kay lahi, lakip usahay sa iyang lumad nga sinultihan. Gisakit siya sa usa ka pundok bintaha nga kabatan-onan hangtud nga siya nanimalos sa paagi nga nabilanggo siya sulod sa 70 ka mga adlaw samtang gikonsiderar nga ipa-deport. Wala ko kahibalo unsay nakapadasig niining grupo sa mga batan-on, daghan nila mga Santos sa Ulahing mga Adlaw sama ninyo, apan akong nakita ang epekto niining pagminaldito, makapasubo nga kasinatian ug naanugon ang usa sa mga anak sa Dios. Ang ginagmay nga buhat sa pagkadili mabination dunay grabeng sangputanan.

Sa pagkadungog nako nianang istoriya, gitandi nako kini sa unsay gisulti sa atong propeta, si Presidente Nelson, sa bag-o lang nga tibuok kalibutan nga debosyonal sa batan-on. Agig paghangyo kaninyo ug sa tanan pang kabatan-unan sa pagtabang sa pagpundok sa Israel, miingon siya: “Barug; mahimong lahi sa kalibutan. Kamo ug ako nasayud nga kamo kinahanglan nga mahimong kahayag sa kalibutan. Busa, ang Ginoo nagkinahanglan nga kamo makita, madungog, molihok, ug magsinina nga sama sa usa ka tinuod nga disipulo ni Jesukristo.”⁷

Ang batalyon sa kabatan-onan nga si Presidente Nelson midapit kaninyo sa pag-apil dili mahimong *magminaldito* sa usag usa. Mosunod sila sa pagtulun-an sa Manluluwas sa pagtabang ug paghigugma, ug pagmahuna-hunaon sa uban, gani ipaon ang pikas aping kon dunay tawo nga mobuhat og sayop kanato.

Sa usa ka pakigpulong sa kinatibuk-ang komperensya sa mga panahon nga kadaghanan ninyo mao pay



pagkatawo, si Presidente Gordon B. Hinckley midayeg “maanyag nga batan-ong mga babaye kinsa naningkamot sa pagsunod sa ebanghelyo.” Mihulagway siya kanila, sama nga ako mibati nga mohulagway kaninyo:

“Buotan sila sa usag usa. Naninguha sila sa paglig-on sa usag usa. Garbo sila sa ilang mga ginikanan ug sa mga panimalay diin sila gikan. Hapit na sila mahimong hamtong nga mga babaye, ug dad-on nila sa tibuok nilang kinabuhi ang mga mithi nga nagdasig kanila karon.”⁸

Isip sulugoon sa Ginoo, ako moingon kaninyo batan-ong mga babaye, ang atong kalibutan nagkinahanglan sa inyong kabuotan ug gugma. Pagmabination ngadto sa usag usa. Si Jesus mitudlo kanato sa paghigugmaay sa usag usa ug sa pagtratar sa uban sama sa atong gusto nga pagtratar. Sa atong pagpaningkamot nga magmabination, mas maduol kita Kaniya ug sa Iyang mahigugmaong impluwensya.

Minahal ko nga kaigsoonan, kon ikaw nalambigit sa pagminaldita o kawalay hinungdan—tinagsa man o grupo—pag-usab na karon ug awaha ang uban nga mag-usab. Mao kana ang akong tambag, ug ako mohatag niini ninyo isip sulugoon sa Ginoo nga si Jesukristo tungod kay ang Iyang Espiritu miaghat kanako sa

pagpamulong kaninyo mahitungod niining importante nga hilisgutan. Ako mopamatuod ni Jesukristo, atong Manluluwas, kinsa mitudlo kanato sa paghigugma sa usag usa sama nga Siya nahigugma kanato. Ako nag-ampo nga unta ato kanang buhaton sa pangalan ni Jesukristo, amen. ■

MUBO NGA MGA SULAT

1. Tan-awa sa Sara Berg, “Nation’s Latest Challenge: Too Few Children,” *AMA Wire*, Hunyo 18, 2018, wire.ama-assn.org.
2. *Teachings of Gordon B. Hinckley* (1997) 387, 390; tan-awa usab sa M. Russell Ballard, “Mga Inahan ug mga Anak nga Babaye,” *Liahona*, Mayo 2010, 18 (gikutlo sa *Mga anak nga mga Babaye sa Akong Gingharian: The History and Work of Relief Society* [2011], 156).
3. Russell M. Nelson, “Usa ka Hangyo ngadto sa Akong mga Sister,” *Liahona*, Nob. 2015, 96; tan-awa usab sa Russell M. Nelson, “Children of the Covenant,” *Ensign* Mayo 1995, 33.
4. Ang pagtuon gimantala sa Oxford University Press as Christian Smith ug Melinda Lundquist Denton, *Soul Searching: The Religious and Spiritual Lives of American Teenagers* (2005).
5. “Dearest Children, God Is Near You [Pinalangga nga Mga Anak, ang Dios Haduol Kaninyo],” *Hymns* nu. 96.
6. Tan-awa sa “In Our Opinion: Captured by cellphones,” *Deseret News*, Ago. 31, 2018, deseretnews.com.
7. Russell M. Nelson, “Hope of Israel” (worldwide youth devotional, Hunyo 3, 2018), 8, HopeofIsrael.lds.org.
8. Gordon B. Hinckley, “Ang Panginahanglan sa Mas Labaw nga Pagkamabination,” *Liahona*, Mayo 2006, 60–61.



Ni Presidente Russell M. Nelson

Ang Partisipasyon sa mga Sister sa Pagpundok sa Israel

Ako mopadangat og usa ka propetikanhong paghangyo kaninyo, ang mga babaye niini nga Simbahan, sa pag-umol sa kaugmaon pinaagi sa pagtabang sa pagpundok sa nagkatibulaag nga Israel.

Pagkanindot nga ikauban kamo, akong minahal ug bililhon nga mga sister. Tingali ang usa ka bag-ohay lang nga kasinatian makahatag kaninyo og ideya kon unsay akong gibati mahitungod kaninyo ug ang balaanong mga abilidad nga kamo gitugahan.

Usa ka adlaw samtang namulong sa usa ka kongregasyon sa South America, nagkadako ang akong kahinam mahitungod sa akong hilisgutan, ug sa labing kritikal nga higayon, ako miingon, “Isip ang *inahan* sa 10 ka bata, ako makai-ngon ninyo nga . . .” Ug mipadayon ko sa pagtapus sa akong mensahe.

Wala ko makaamgo nga ako nakasulti sa pulong nga *inahan*. Ang akong tighubad, nagtuo nga nasayop ko, misab sa pulong nga *inahan* ngadto sa *amahan*, mao nga ang kongregasyon wala gayud masayud nga akong gitawag ang akong kaugalingon nga usa ka *inahan*. Apan ang akong asawa nga si Wendy nakadungog niini, ug nahimuot sa akong sipyat [Freudian slip].

Nianang higayuna, ang kinahiladman nga tinguha sa akong kasingkasing nga makahimo og kalainan sa kalibutan—sama nga ang usa ka inahan lang ang makahimo—mipatigbabaw sa akong kasingkasing. Latas sa katuigan, sa higayon nga pangutan-on ko nganong *mipili* ko nga mahimong doktor, ang akong tubag kanunay mao ra gihapon: “Tungod kay dili ko *makapili* nga mahimong inahan.”

Palihug hibalo nga sa higayon nga akong gamiton ang pulong nga *inahan*, wala lamang ako maghisgot bahin sa mga babaye nga nanganak na o misagop og mga bata niini nga kinabuhhi. Ako naghisgot bahin sa *tanang* mga anak nga babaye sa atong Langitnong Ginikanan. Ang *tanang* babaye usa ka inahan tungod sa iyang mahangturong balaanong kinaiyahan.

Busa karong gabhiuna, isip ang amahan sa 10 ka anak—*siyam ka babaye* ug usa ka lalaki—ug isip Presidente sa Simbahan, ako nag-ampo nga inyong mabantayan unsa ka lawom ang akong pagbati bahin kaninyo—kon kinsa kamo ug tanang maayo nga inyong gibuhat. Walay makabuhat sa mabuhat sa usa ka matarung nga babaye. Walay makapareha sa impluwensya sa usa ka inahan.

Ang mga lalaki kasagaran makapahayag sa gugma sa Langitnong Amahan ug sa Manluluwas ngadto sa uban. Apan ang mga babaye adunay espesyal nga gasa alang niini—usa ka balaan nga pagtuga. Aduna kamoy kapasidad nga makabantay kon unsa ang gikinahanglan sa usa ka tawo—ug *kanus-a* kini nila kinahanglana. Makatabang kamo, makahupay, makatudlo, ug makapalig-on sa usa ka tawo sa higayon mismo sa iyang panginahanglan.

Ang mga babaye lahi ang pagtan-aw sa mga butang kay sa mga lalaki, ug o, gikinahanglan gayud namo kaayo ang inyong panglantaw! Ang inyong kinaiyahan mosangput sa paghunahuna ninyo sa uban og *una*, ikonsiderar ang epekto nianang bisan unsa nga lihoc ngadto sa uban.



Sama sa gipasabut ni Presidente Eyring, si Eva ang atong mahimayaong Inahan—uban sa iyang impluwensyal nga panglantaw sa plano sa atong Langitnong Amahan—ang mipasiugda sa unsay atong gitawag nga “ang Pagkapukan.” Ang iyang maalamon ug maisugon nga pagpili ug ang desisyon ni Adan sa pagsuporta mipauswag sa plano sa kalipay sa Dios. Sila mihimo niini nga posible alang sa matag usa kanato nga makaanhi sa kalibutan, pagdawat og lawas, ug mopamatuod nga kita mopili nga mobarug alang kang Jesukristo *karon* sama sa atong gibuhat sa wala pa dinhi sa kalibutan.

Akong minahal nga mga sister, aduna kamoy espesyal nga espirital nga mga gasa ug natural nga kinaiyahan. Karong gabii ako kamong awhagon, uban sa tanang panghinaut sa akong kasingkasing, sa pag-ampo aron makasabut sa *inyong espirital nga mga gasa*—sa pag-ugmad, paggamit, ug pagpalapad kanila, gani sa mas labaw pa sukad. Inyong mausab ang kalibutan samtang inyo kining gibuhat.

Isip mga babaye, kamo makadasig sa uban, ug makahimo og sumbanan nga takus nga sundon. Tuguti kong mohatag kaninyo og dugang impormasyon bahin sa duha ka dakong mga pahibalo nga gihimo niadtong miagi nga kinatibuk-ang komperensya. Kamo, akong minahal nga mga sister, importante kaayo sa matag usa.

Una, sa pagpangalagad. Ang nag-unang sumbanan alang sa pagpangalagad mao ang atong Manluluwas, si Jesukristo. Sa kinatibuk-an, ang mga babaye sa kanunay, mas duol niana nga sumbanan kay sa mga lalaki. Kon kamo sa tiunay nangalagad, inyong sundon ang inyong mga gibati aron sa pagtabang sa laing tawo nga makasinati sa gugma sa Manluluwas. Ang natural nga pagbati sa pagpangalagad kinaiya sa matarung nga mga babaye. Nakaila ko og mga babaye nga mag-ampo matagadlaw, “Kinsa ang Imong buot nakong tabangan karong adlaw?”

Sa wala pa ang Abril 2018 nga pahibalo mahitungod sa mas taas ug mas balaan nga pamaagi sa pag-amuma sa uban, ang kalagmitang mahitabo sa

ubang mga lalaki mao ang pagtsek sa hometeaching nga tahas nga “nahunan na” ug mopadayon sa sunod nga gimbuhaton.

Apan kon *kamo* nakamatngon nga ang sister nga inyong gibisitahan naging nahanglan og tabang, kamo molihok dayon ug ipadayon sa tibuok bulan. Sa ingon, kadtong *giunsa* ninyo pagbisita ug pagtudlo ang nakadasig sa atong pagpasaka sa kalidad sa pagpangalagad.

Ikaduha, sa miagi nga kinatibuk-ang komperensya, ato usab nga giusab ang mga korum sa Melchizedek Priesthood. Samtang kami nag-ampo kon unsaon pagtabang sa mga lalaki sa Simbahan nga mahimong mas epektibo sa ilang mga responsibilidad, mabinantayon kaming mikonsiderar sa panag-ingnan sa Relief Society.

Sa Relief Society, ang mga babaye sa nagkadayang mga edad ug hugna sa kinabuhi magkapundok. Ang matag dekada sa kinabuhi magdala og talagsaong mga hagit, ug bisan pa niana, anaa *kamo*, matag semana, manag-uban, milambo ug dungan nga nagtudlo sa ebanghelyo, ug naghimo og tinuod nga kalainan dinhi sa kalibutan.

Karon, misunod sa inyong ehemplo, ang mga naghupot sa Melchizedek nga Pagkapari [Priesthood] mga sakop sa korum sa mga elder [elders quorum]. Kini nga mga lalaki nagpangidaron og gikan sa 18 hangtud sa 98 (tingali mas taas pa), nga adunay sama nga lapad nga mga kasinatian sa priesthood ug sa Simbahan. Kini nga mga kaigsoonan karon makahimo og mas lig-on nga panag-igsoonay, dungan nga magkat-on, ug makapanalangin sa uban sa mas epektibong paagi.

Nahinumdum mo niadtong Hunyo, si Sister Nelson ug ako namulong ngadto sa mga kabatan-onan sa Simbahan. Amo silang gidapit sa pag-apil sa grupo sa kabatan-onan sa Ginoo nga motabang sa pagpundok sa Israel sa duha ka habig sa tabil. Kini nga pagpundok mao ang “*labing dakong* hagit, *labing dakong* kawsa, ug ang *labing dakong* buhat sa yuta karon”!¹

Usa kini ka kawsa nga nagkinahanglan pag-ayo sa mga babaye, tungod kay ang mga babaye ang moulas sa

umaabut. Mao nga karong gabhiona, ako mopadangat og usa ka propetikanhong paghangyo kaninyo, ang mga babaye niini nga Simbahan, sa pagumol sa kaugmaon pinaagi sa pagtabang sa pagpundok sa nagkatibulaag nga Israel.

Asa man kamo magsugod?

Mahimo bang motanyag ko og *upat ka pagdapit*:

Una, ako kamong dapiton sa pag-apil sa 10 ka adlaw nga pagpuasa gikan sa social media ug gikan sa bisan unsa nga media nga makahatag og negatibo ug law-ay nga mga butang sa inyong hunahuna. Pag-ampo aron mahibalo hain nga mga impluwensya ang tangtangan atol sa inyong pagpuasa. Ang epekto sa inyong 10 ka adlaw nga pagpuasa makasurpresa kaninyo. Unsay inyong nabantayan human mohunong sa kalibutanong mga panglantaw [pagbasa o pag-post sa social media] nga dugay nang misamad sa inyong espiritu? Aduna bay kausaban kon asa na ninyo *karon* buot nga gamiton ang inyong oras ug kusog? Ang inyo bang mga prayoridad nausab—bisan og gamay lang? Awhagon ko kamo sa pagrekord ug buhaton ang matag impresyon.

Ikaduha, dapiton ko kamo sa pagbasa sa Basahon ni Mormon sugod karon hangtud sa katapusan sa tuig. Ingon og imposible man kini uban sa tanan nga inyong gipaningkamutan sa pagdumala diha sa inyong kinabuhi, kon inyong dawaton kining pagdapit uban ang hingpit nga katuyoan sa kasingkasing, ang Ginoo motabang kaninyo sa pagpangita og paagi sa pagkab-ot niini. Ug, samtang kamo mainampuon magtuon, ako mosaad nga ang kalangitan maabli alang kaninyo. Ang Ginoo mopanalangin kaninyo og dugang inspirasyon ug pagpadayag.

Samtang kamo magbasa, ako kamong awhagon sa pagmarka sa matag bersikulo nga naghigot o nagpunting ngadto sa Manluluwas. Dayon, tuyoa ang paghigot mahitungod kang Kristo, maglipay diha kang Kristo, ug magsangyaw kang Kristo uban sa inyong mga pamilya ug mga higala.² Kamo ug sila mapaduol ngadto sa Manluluwas pinaagi niini nga proseso. Ug

ang mga kausaban, gani mga milagro, magsugod og kahitabo.

Ganihang buntag ang pahibalo gihimo mahitungod sa bag-ong eskedyul sa Dominggo ug nakasentro sa panimalay, gisuportahan sa Simbahan nga kurikulum. Kamo, akong minahal nga mga sister, importante sa kalampusan niining bag-o, balanse, ug pinahiluna nga paningkamot sa pagtudlo sa ebanghelyo. Palihug tudloi kadtong inyong gihigugma kon unsa ang inyong nakat-unan gikan sa mga kasulatan. Tudloi sila unsaon pagdangop ngadto sa Manluluwas alang sa Iyang makaayo ug makalimpyo nga gahum kon sila makasala. Ug tudloi sila unsaon paggamit sa Iyang makapalig-on nga gahum matag adlaw sa ilang kinabuhi.

Ikatulo, pag-establisar og sundanan sa regular nga pagtambong sa templo. Kini tingali manginahanglan og daku-dako og dyutay nga sakripisyo sa inyong kinabuhi. Ang mas daghang regular nga panahon sulod sa templo magtugot sa Ginoo nga magtudlo kaninyo unsaon paggamit sa Iyang gahum sa pagkapari [priesthood power] diin kamo gitugahan diha sa Iyang templo. Alang kaninyo nga wala magpuyo duol sa usa ka templo, ako modapit kaninyo nga mainampuon magtuon mahitungod sa mga templo diha sa mga kasulatan ug diha sa mga pulong sa buhi nga mga propeta. Pagtinguha nga *mahibalo* pa og dugang, aron *makasabut* pa og dugang, aron *mobati* pa og dugang mahitungod sa mga templo kay sa inyong nabuhat sukad.

Sa atong tibuok kalibutan nga debosyonal sa kabatan-onan sa miaging Hunyo, ako namulong bahin sa usa ka batan-ong lalaki kansang kinabuhi nausab sa dihang ang iyang ginikanan miilis sa iyang smartphone og usa ka flip phone [telepono nga pang-tawag ug text lang]. Ang inahan niining batan-ong lalaki usa ka walay kahadlok nga babaye nga may hugot nga pagtuo. Iyang nakita ang iyang anak nga nagkaduol ngadto sa mga pagpili nga makapugong kaniya sa pagerbisyo og misyon. Siya midala sa iyang pangamuyo ngadto sa templo aron mahibalo unsa ang labing maayo nga paagi sa

pagtabang sa iyang anak. Dayon siya mibuhat sa matag impresyon.

Siya miingon: “Akong gibati ang Espiritu nga migiya kanako aron sa pagsusi sa telepono sa akong anak sa piho nga mga oras aron sa pagkasakop sa piho nga mga butang. Dili ko kahibalo mogamit niining mga smartphone, apan ang Espiritu migiya kanako sa tanang mga social media nga wala gani nako gamita! Nasayud ko nga ang Espiritu motabang sa mga ginikanan nga nangita og giya aron maprotektahan ang ilang mga anak. [Sa sinugdanan] ang akong anak nasuko kaayo kanako. . . . Apan human lamang sa tulo ka adlaw, siya mipasalamat kanako! Iyang mabati ang kalainan.”

Dako kaayo ang kausaban sa kinaiya ug mga pamatasan sa iyang anak. Siya nahimong mas matinabangon sa panimalay, mas mopahiyom na, ug mas maminaw na sa simbahan. Giganahan siyang moserbisyo sa temple baptism sa usa ka higayon ug nangandam alang sa iyang misyon.

Ang akong ikaupat nga pagdapit, alang kaninyo kinsa anaa na sa saktong pangidaron, mao ang hingpit nga

pag-apil sa Relief Society. Ako kamong giaghat sa pagtuon sa kasamtangang pamahayag sa katuyoan sa Relief Society. Makadasig kini. Kini tingali makagiya kaninyo sa pagpalambo sa inyong kaugalingong pamahayag sa katuyoan alang sa inyong kaugalingong kinabuhi. Ako usab mohangyo kaninyo nga tagamtama ang mga kamatuoran diha sa pamahayag sa Relief Society nga gimantala dul-an sa 20 ka tuig na ang milabay.³ Usa ka gi-frame nga kopya sa pamahayag nagbitay sa bungbong sa opisina sa Unang Kapangulohan. Ako mapuno sa kalipay *matag* higayon nga mobasa ko niini. Kini naghulagway kinsa kamo ug kinsa ang gikinahanglan sa Ginoo nga mahimo kamo niining *tukmang* panahon samtang inyong gibuhat ang *inyong* bahin sa pagtabang sa pagpundok sa nagkatibulaag nga Israel.

Akong minahal nga mga sister, nagkinahanglan kami *kaninyo*! Kami “nagkinahanglan sa *inyong* kalig-on, sa *inyong* pagkakabig, sa *inyong* konbiksyon, sa *inyong* abilidad sa pagpangulo, sa *inyong* kaalam, ug sa *inyong* mga tingog.”⁴ Kami dili makapundok sa Israel kon wala kamo.

Gihigugma ko kamo ug nagpasalamat kaninyo ug karon mopanalangin kaninyo sa abilidad sa pagbiya sa kalibutanong mga butang samtang kamo motabang niining importante ug dinaliang buhat. Kon magkahiusa mabuhat nato ang tanang gikinahanglang ipabuhat sa atong Langitnong Amahan aron sa pag-andam sa kalibutan alang sa Ikaduhang Pag-anhi sa Iyang Pinalangga nga Anak.

Si Jesus mao ang Kristo. Kini Iyang Simbahan. Niini ako mopamatuod sa pangalan ni Jesukristo, amen. ■

MUBO NGA MGA SULAT

1. Russell M. Nelson, “Paglaum sa Israel” (tibuok kalibutan nga debosyonal sa kabatan-onan, Hunyo 3, 2018), [HopeofIsrael.org](https://www.hopeofisrael.org).
2. Tan-awa sa 2 Nephi 25:26.
3. Kini nga mga dokumento anaa online. Alang sa pahayag sa katuyoan sa Relief Society tan-awa sa [lds.org/callings/relief-society](https://www.lds.org/callings/relief-society). Alang sa pamahayag sa Relief Society, tan-awa ang Mary Ellen Smoot, “Rejoice, Daughters of Zion,” *Liahona*, Ene. 2000, 111–14.
4. Russell M. Nelson, “Usa ka Hangyo ngadto sa Akong mga Sister,” *Liahona*, Nob. 2015, 96; emphasis gidugang.

Ang Katuyoan sa Relief Society

Ang Relief Society nagtabang sa pag-andam sa kababayenan alang sa mga panalangin sa kinabuhing dayon samtang sila:

- Mopalambo og hugot nga pagtuo diha sa Langitnong Amahan ug ni Jesukristo ug sa Iyang Pag-ula.
- Molig-on sa mga indibidwal, mga pamilya, ug mga panimalay pinaagi sa mga ordinansa ug mga pakigsaad.
- Magkahiusa sa pagtrabaho aron sa pagtabang niadtong nanginahanglan.

Mga kopya mahimong makuha sa [lds.org/callings/relief-society/purposes or at store.lds.org](https://www.lds.org/callings/relief-society/purposes-or-at-store).

Mga General Authority ug Kinatibuk-ang mga Opisyal sa Ang Simbahan ni Jesukristo sa mga Santos sa Ulahing mga Adlaw

ANG UNANG KAPANGULOHAN



Dallin H. Oaks
Unang Magtatambag



Russell M. Nelson
Presidente



Henry B. Eyring
Ikaduhang Magtatambag

ANG KORUM SA NAPULOG DUHA KA MGA APOSTOLES



M. Russell Ballard



Jeffrey R. Holland



Dieter F. Uchtdorf



David A. Bednar



Quentin L. Cook



D. Todd Christofferson



Neil L. Andersen



Ronald A. Rasband



Gary E. Stevenson



Dale G. Renlund



Gerrit W. Gong



Ulisses Soares

ANG KAPANGULOHAN SA SEVENTY



L. Whitney Clayton



Patrick Kearon



Carl B. Cook



Robert C. Gay



Terence M. Vinson



José A. Teixeira



Carlos A. Godoy

MGA GENERAL AUTHORITY SEVENTY

(sa alpabetikal nga pagkahan-ay)



Marcos A. Alubukalis



Jose L. Alonso



Wilford W. Andersen



Ian S. Arden



Steven R. Bangenter



W. Mark Bassett



David S. Baxter



Randall K. Bennett



Shayne M. Bowen



Mark A. Bragg



Matthew L. Carpenter



Yoon Hwan Choi



Craig C. Christensen



Kim B. Clark



Weatherford T. Clayton



Lawrence E. Corbridge



Valeri V. Cordin



J. Devin Cornish



Claudio R. M. Costa



Joaquin E. Costa



LeGrand R. Curtis Jr.



Massimo De Feo



Benjamin De Hoyos



Edward Dube



Kevin R. Duncan



Timothy J. Dyches



David F. Evans



Enrique R. Fabella



Bradley D. Foster



Randy D. Funk



Eduardo Gavaret



Jack N. Gerard



Taylor G. Goboy



Christoffel Golden



Walter F. Gonzalez



O. Vincent Haleck



Brook P. Hales



Donald L. Hallstrom



Kevin S. Hamilton



Allen D. Haynie



Mathias Held



David P. Homer



Paul V. Johnson



Larry S. Kachar



Jorg Klebingat



Joni L. Koch



Erich M. Kopischke



Hugo E. Martinez



James B. Martino



Richard J. Maynes



Kyle S. Mckay



Peter F. Meurs



Hugo Montoya



Marcus B. Nash



K. Brett Nattress



S. Gifford Nielsen



Brent H. Nielson



Adrian Ochao



S. Mark Palmer



Adilson de Paula Paella



Kevin W. Pearson



Anthony D. Perkins



Paul B. Pieper



John C. Piegree Jr.



Rafael E. Pino



Michael T. Ringwood



Lynn G. Robbins



Gary B. Sablin



Evan A. Schmutz



Joseph W. Shati



Steven E. Snow



Vern P. Stanfill



Brian K. Taylor



Michael John U. Teh



Juan A. Uceda



Amulfo Valenzuela



Juan Pablo Villar



Takashi Wada



Taniela B. Waiolo



Scott D. Whiting



Jorge F. Zaballios



Chi Hong (Sam) Wong



Kazuhiko Yamashita



Garry B. Sablin



Joseph W. Shati



Steven E. Snow



Vern P. Stanfill



Brian K. Taylor



Michael John U. Teh



Juan A. Uceda



Amulfo Valenzuela



Juan Pablo Villar



Takashi Wada



Taniela B. Waiolo



Scott D. Whiting

ANG PRESIDING BISHOPRIC



Dean M. Davies
Presiding Bishop
Unang Magarambag



Gerald Causse
Presiding Bishop
Unang Magarambag



W. Christopher Vaddell
Unang Magarambag

KINATIBUK-ANG MGA OPISYAL

SUNDAY SCHOOL



Devin G. Durrant
Unang Magarambag



Tad R. Callister
Presidente
Ikaduhang Magarambag



Brian K. Ashton
Ikaduhang Magarambag

YOUNG WOMEN



Michelle D. Craig
Unang Magarambag



Bonnie H. Gordon
Presidente
Ikaduhang Magarambag



Becky Craven
Ikaduhang Magarambag

RELIEF SOCIETY



Sharon Eubaik
Unang Magarambag



Jean B. Bingham
Presidente
Ikaduhang Magarambag



Reyna J. Aburto
Ikaduhang Magarambag

PRIMARY



Lisa L. Hakkruss
Unang Magarambag



Joy D. Jones
Presidente
Ikaduhang Magarambag



Cristina B. Franco
Ikaduhang Magarambag

YOUNG MEN



Douglas D. Holmes
Unang Magarambag



Stephen W. Owen
Presidente
Ikaduhang Magarambag



M. Joseph Brough
Ikaduhang Magarambag



Sesyon sa Dominggo sa Buntag | Oktubre 7, 2018

Ni Presidente M. Russell Ballard

Aking nga Presidente sa Korum sa
Napulog Duha ka mga Apostoles

Ang Panan-awon sa Katubsanan sa mga Patay

Mopamatuod ko nga ang panan-awon nga nadawat ni Presidente Joseph F. Smith tinuod. Mosaksi ko nga ang matag tawo mahimong masayud nga kini tinuod.

Mga kaisaon, ang akong pakigpulong giandam sa wala pa mamatay ang akong minahal nga asawa, si Barbara. Ang akong pamilya ug ako magpasalamat sa inyong gugma ug sa inyong kamabination. Mag-ampo ko nga ang Ginoo mopanalangin kanako samtang mamulong ko ninyo karong buntaga.

Niadlong Oktubre 1918, 100 ka tuig na ang milabay, si Presidente Joseph F. Smith nakadawat og mahimayaon nga panan-awon. Human sa hapit 65 ka tuig nga mahalarong pagserbisyo sa Ginoo diha sa Ang Simbahan ni Jesukristo sa mga Santos sa Ulahing mga Adlaw ug pipila lang ka semana sa wala pa ang iyang kamatayan niadtong Nobyembre 19, 1918, milingkod siya sa iyang kwarto nga namalandong sa maulaong sakripisyo ni Kristo ug nagbasa sa deskripsyon ni Apostol Pedro sa pagpangalagad sa Manluluwas sa kalibutan sa espiritu human sa Iyang Pagkalansang sa Krus.

Mirekord siya: “Samtang ako nagbasa ako nahimuot kaayo. . . . Samtang ako nagpalandong diha niini nga mga butang . . . , ang mga mata sa akong salabutan nabuksan, ug ang Espiritu sa Ginoo nagpabilin ngari kanako, ug ako nakakita sa mga panon sa mga patay.”¹ Ang kompleto nga teksto sa panan-awon narekord diha sa Doktrina ug mga Pakigsaad seksyon 138.

Mohatag ko og gamayng background aron mas hingpit natong masabtan ang tibuok kinabuhing pagpangandam ni Joseph F. aron makadawat niining talagsaon nga pinadayag.

Sa dihang siya ang Presidente sa Simbahan, mibisita siya sa Nauvoo niadtong 1906 ug namalandong sa usa niya ka panumduman sa dihang singko anyos pa siya. Miingon siya: “Mao kini ang tukmang dapit diin nagbarug ko sa dihang [si Joseph, akong uyoan, ug ang akong amahan, si Hyrum] miagi padulong sa Carthage. Sa walay pag-naug gikan sa iyang kabayo ang akong papa midungo gikan sa iyang montura

ug mialsa kanako. Nanamilit siya nga mihalok kanako ug mibutang kanako pag-usab ug ako siyang nakita nga mipadagan palayo.”²

Ang sunod higayon nga nakita sila ni Joseph F., ang iyang inahan, si Mary Fielding Smith, mialsa kaniya aron makakita sa mga martir nga nagtupad sa paghigda human bangis nga gipatay sa Bilanggoan sa Carthage niadtong Hunyo 27, 1844.

Paglabay sa duha ka tuig, si Joseph F., uban sa iyang pamilya ug matinud-anong inahan, si Mary Fielding Smith, mibiya sa iyang panimalay sa Nauvoo aron mobalhin sa Winter Quarters. Bisan wala pay otso anyos, kinahanglang si Joseph F. ang mogiya sa usa ka pundok sa mga baka gikan sa Montrose, Iowa, padulong sa Winter Quarters ug wala madugay padulong sa Walog sa Salt Lake, miabut didto nga hapit na siya mag-10. Hinaut nga naminaw kamo mga bata ug batan-ong lalaki ug makaamgo sa responsibilidad ug ekspektasyon nga gibutang kang Joseph F. panahon sa iyang kabatan-on.

Paglabay sa upat lamang ka tuig, niadtong 1852, dihang nag-edad siya og 13, ang iyang minahal nga inahan namatay—nga nakapahimong ilo ni Joseph ug sa iyang mga igsoon.³

Si Joseph F. gitawag sa pagmisyong ngadto sa Hawaiian Islands niadtong 1854 sa dihang 15 anyos siya. Kini nga misyon, nga milungtad og sobra sa tulo ka tuig, mao ang sinugdanan sa usa ka kinabuhing pagserbisyo diha sa Simbahan.

Sa iyang pag-uli sa Utah, si Joseph F. naminyo niadtong 1859.⁴ Sa misunod nga pipila ka tuig, ang iyang kinabuhing napuno sa trabaho, mga katungdanan sa banay, ug duha ka dugang nga mga misyon. Niadtong Hulyo 1, 1866, sa edad nga 27, ang kinabuhing ni Joseph F. nausab sa hangtud dihang gi-orden siya nga Apostol ni Presidente Brigham Young. Pagka-Oktubre sa misunod nga tuig, siya ang gihulip sa nabakante diha sa Konseho sa Napulog Duha.⁵ Miserbisyo siya isip magtatambag ni Brigham Young, John Taylor, Wilford Woodruff,



Diha sa usa ka mahimayaong panan-awon nga nadawat niadtong Oktubre 1918, nakita ni Presidente Joseph F. Smith ang iyang amahan, si Hyrum, ug si Propeta Joseph Smith.

ug Lorenzo Snow sa wala pa siya mahimong Presidente mismo niadtong 1901.⁶

Si Joseph F. ug ang iyang asawa nga si Julina nakaangkon sa ilang unang anak, si Mercy Josephine.⁷ Duha ka tuig ug tunga pa lang siya sa dihang namatay siya. Wala madugay human niini, mirekord si Joseph F.: “Usa na ka bulan gahapon sukad ang akong . . . pinangga nga si Josephine namatay. O! kon naluwas pa lang unta nako siya aron modako ngadto sa pagkadalaga. Gimingaw ko niya matag adlaw ug magul-anon ko. . . . Pasayloon unta ko sa Dios sa akong kahuyang kon sayop ang paghigugma sa akong gagmayng mga bata sama sa akong paghigugma kanila.”⁸

Sa iyang tibuok kinabuhi, nawad-an si Presidente Smith sa iyang amahan, inahan, usa ka igsoong lalaki, duha ka igsoong babaye, duha ka asawa, ug trese ka anak. Sinati kaayo niya ang kagul-anan ug ang mawad-an sa mga minahal.

Sa dihang namatay ang iyang anak nga si Albert Jesse, si Joseph F. misulat sa iyang igsoong si Marta Ann nga nangamuyo siya sa Ginoo sa pagluwas

kaniya ug nangutana, “Nganong ingon man niini? O. Dios nganong ingon niini man?”⁹

Bisan pa sa iyang mga pag-ampo nianang higayona, wala makadawat og tubag si Joseph F. kalabut niini.¹⁰ Misulti siya kang Marta Ann nga “ang kalangitan [mora og] gisalipdan ibabaw kanato” mahitungod sa hilisgutan sa kamatayon ug sa kalibutan sa espiritu. Bisan pa niana, ang iyang pagtuo sa mahangturong mga saad sa Ginoo lig-on ug makanunayon.

Sumala sa panahon sa Ginoo, ang dugang nga mga tubag, kahupayan, ug panabut mahitungod sa kalibutan sa espiritu nga gitinguha ni Presidente Smith miabut kaniya pinaagi sa talagsaon nga panan-awon nga iyang nadawat niadtong Oktubre 1918.

Kanang tuiga sakit kaayo alang kaniya. Naguol siya sa gidaghanon sa namatay sa Dakong Gubat sa Kalibutan nga padayon nga misaka ngadto sa sobra sa 20 ka milyon ka tawo ang namatay. Dugang pa, ang sakit nga trangkaso mikaylap sa tibuok kalibutan, nga mikutlo sa kinabuhi sa gidaghanon nga 100 ka milyon ka tawo.

Nianang tuiga, si Presidente Smith nawad-an usab og tulo pa ka mas bililhong mga sakop sa pamilya. Si Elder Hyrum Mack Smith sa Korum sa Napulog Duha ka mga Apostoles, ang iyang unang anak nga lalaki ug akong lolo, kalit nga namatay tungod sa mibu-to nga apendiks.

Misulat si Presidente Smith: “Dili ko makatingog—[naminhod] sa kasu-bo! . . . Nahugno ang akong kasingka-sing; ug daw nawad-an sa kinabuhì! . . . O! Gimahal nako siya! . . . Mahalon nako siya hangtud sa hangtud. Ug mao usab kini ngadto sa tanan nakong mga anak, apan siya ang akong kinamagulangang anak, ang unang mihatag kanako og kalipay ug paglaum sa walay katapusan, dungganon nga ngalan taliwala sa katawhan. . . . Gikan sa kinaladman sa akong kalag magpasalamat ko sa Dios tungod kaniya! Apan . . . O! Gikinahanglan ko siya! Kaming tanan nagkinahanglan kaniya! Mapuslanon kaayo siya sa Simbahan. . . . Ug karon, . . . O! unsay akong mabuhat! . . . O! Dios, tabangi ko!”¹¹

Pagkasunod bulan, ang umagad ni Presidente Smith, si Alonzo Kesler, namatay sa makalilisang nga aksidente.¹² Misulat si Presidente Smith sa iyang journal, “Kining labing grabe ug makahugno nga aksidente, nakapag-uol na usab pag-ayo sa akong tibuok pamilya.”¹³

Paglabay sa pito ka bulan, niadtong Septyembre 1918, ang umagad nga babaye ni Presidente Smith ug akong lola, si Ida Bowman Smith, namatay human manganak sa iyang ikalimang anak, ang akong tiyo Hyrum.¹⁴

Ug mao nga pagka-Oktubre 3, 1918, human nakasinati sa grabeng kasubo tungod sa minilyon nga nangamatay sa kalibutan tungod sa gubat ug sakit ingon man usab sa kamatayon sa mga sakop sa iyang kaugalingong pamilya, si Presidente Smith nakadawat og langitnong pagpadayag nga nailhan isip “ang panan-awon sa katubsan sa mga patay.”

Gihisgutan niya ang pagpadayag pagkasunod adlaw sa pangbukas nga sesyon sa kinatibuk-ang komperensya sa Oktubre. Nagkaluya na

ang panglawas ni Presidente Smith, apan namulong siya kadiyot: “Dili ako mangahas sa pagsulay og sulti sa daghang mga butang nga anaa sa akong hunahuna niining buntaga, ug akong ihulat sa umaabut nga panahon, kon tugutan sa Ginoo, ang akong pagsulay sa pagsulti kaninyo sa pipila sa mga butang nga ania sa akong hunahuna, ug gibati sa akong kasingkasing. Wala ako mag-inusara niining [milabay] nga lima ka bulan. Nagpuyo ko diha sa diwa sa pag-ampo, sa pagpangamuyo, sa pagtuo ug determinasyon; ug padayon ang akong komunikasyon sa Espiritu sa Ginoo.”¹⁵

Ang pinadayag nga iyang nadawat sa Oktubre 3 mihupay sa iyang kasingkasing ug nakahatag og tubag sa daghan sa iyang mga pangutana. Kita usab mahupay ug makakat-on pa kalabut sa atong kaugalingong umaabut kon kita ug ang atong mga minahal mamatay ug moadto sa kalibutan sa espiritu pinaagi sa pagtuon niini nga pinadayag ug pagpamalandong sa kamahinungdanon niini diha sa paagi sa atong pagpakabuhian matag adlaw.

Lakip sa daghang mga butang nga nakita ni Presidente Smith mao ang pagbisita sa Manluluwas sa mga matinud-anon didto sa kalibutan sa espiritu human sa Iyang kaugalingong kamatayon sa krus. Mokutlo ko gikan sa panan-awon:

“Apan tan-awa, taliwala diha sa mga matarung siya mihan-ay sa iyang pundok ug mitudlo ug mga sinugo, sinul-uban uban sa gahum ug pagtugot, ug gitugyan kanila ang paglakaw ngadto ug pagdala sa kahayag sa ebanghelyo ngadto kanila nga anaa diha sa kangitngit, bisan ngadto sa tanan nga mga espiritu sa mga tawo;¹⁶ ug sa ingon ang ebanghelyo nasangyaw ngadto sa mga patay. . . .

“Sila gitudloan sa hugot nga pagtuo sa Dios, sa paghinulsol gikan sa sala, sa puli nga bunyag alang sa kapasayloan sa mga sala, sa gasa sa Espiritu Santo pinaagi sa pagpandong sa mga kamot,

“Ug ang tanan nga ubang mga baruganan sa ebanghelyo nga gikinahanglan alang kanila nga mahibaloan aron mahimo nga takus ang ilang

kaugalingon nga sila unta mahukman sumala sa mga tawo diha sa unod, apan mabuhian sumala sa Dios diha sa espiritu. . . .

“Kay ang patay nagtan-aw diha sa dugay nga pagkawala sa ilang mga espiritu gikan sa ilang mga lawas ingon sa usa ka ulipon.

“Kini ang gitudlo sa Ginoo, ug mihatag kanila og gahum sa pagtungha, human sa iyang pagkabanhaw gikan sa mga patay, aron sa pagsulod ngadto sa gingharian sa iyang Amahan, didto pagakoronahan uban sa pagka-imortal ug kinabuhian nga dayon,

“Ug magpadayon sukad niadto sa ilang paghago sa gisaad sa Ginoo, ug makig-ambit sa tanan nga mga panalangin nga gitagana alang kanila kinsa nahigugma kaniya.”¹⁷

Diha sa panan-awon, nakita ni Presidente Smith ang iyang amahan, si Hyrum, ug si Propeta Joseph Smith. 74 ka tuig na sukad nga katapusan niyang nakita sila isip gamay nga bata sa Nauvoo. Mahunahuna lang nato ang iyang kalipay nga makita ang iyang minahal nga amahan ug uyoan. Tingali nadasig ug nahupay siya nga masayud nga ang tanan nga mga espiritu adunay samang panagway sa ilang mortal nga lawas ug nga sila madasigong nagpaabut sa adlaw sa gisaad kanila nga pagkabanhaw. Ang panan-awon mas hingpit nga mipadayag sa mga detalye sa plano sa Langitnong Amahan alang sa Iyang mga anak ug sa matubsanon nga gugma ni Kristo ug sa dili hitupngan nga gahum sa Iyang Pag-ula.¹⁸

Niining espesyal nga ika-100 nga anibersaryo, dapiton ko kamo nga mobasa sa hingpit ug mahunahunaong paagi niini nga pinadayag. Kon inyo kining buhaton, hinaut ang Ginoo mopanalangin kaninyo nga mas hingpit nga makasabut ug makadayeg sa gugma sa Dios ug sa Iyang plano sa kaluwasan ug kalipay alang sa Iyang mga anak.

Mopamatuod ko nga ang panan-awon nga nadawat ni Presidente Joseph F. Smith tinuod. Mosaksi ko nga ang matag tawo mahimong mobasa niini ug masayud nga kini tinuod. Kadtong wala makadawat



niini nga kahibalo niini nga kinabuhian siguradong mahibalo sa katinuod niini sa dihang moabut na ang tanan sa kalibutan sa espiritu. Didto, ang tanan mohigugma ug modayeg sa Dios ug ni Ginoong Jesukristo alang sa mahinungdanong plano sa kaluwasan ug sa panalangin sa gisaad nga Pagkabanhaw sa diha nga ang lawas ug ang espiritu mahiusa pag-usab nga dili na gayud magkabalug pa.¹⁹

Mapasalamaton kaayo ko nga masayud kon asa karon ang akong pinanggang si Barbara ug nga magkauban kami pag-usab uban sa among pamilya, hangtud sa tanang kahangturan. Hinaut ang kalinaw sa Ginoo mosuporta kanato karon ug sa kahangturan mao ang akong mapaubsanong pag-ampo sa ngalan ni Jesukristo, amen. ■

MUBO NGA MGA SULAT

1. Doktrina ug mga Pakigsaad 138:6, 11.
2. Joseph F. Smith, sa Preston Nibley, *The Presidents of the Church* (1959), 228.
3. Tan-awa sa Joseph Fielding Smith, *Life of Joseph F. Smith* (1938), 13.
4. Naminyo siya kang Levira Clark niadtong 1859, kang Julina Lambson niadtong 1866, kang Sarah Richards niadtong 1868, kang Edna Lambson niadtong 1871, kang Alice Kimball niadtong 1883, ug kang Maria Schwartz niadtong 1884.
5. Si Joseph F. Smith gitawag isip dugang nga magtatambag sa Unang Kapangulohan (Brigham Young, Heber C. Kimball, ug Daniel H. Wells). Miserbisyo usab siya isip Ikaduhang Magtatambag sa Unang Kapangulohan sa tulo ka mga Presidente sa Simbahan: Presidente John Taylor, Wilford Woodruff, ug Lorenzo Snow.
6. Si Joseph F. Smith miserbisyo isip magtatambag sa Unang Kapangulohan

panahon sa pagdumala ni Brigham Young ug miserbisyo isip Ikaduhang Magtatambag sa Unang Kapangulohan panahon sa pagdumala ni John Taylor, Wilford Woodruff, ug Lorenzo Snow. Siya ang unang Presidente sa Simbahan nga nakaserbisyo sa Unang Kapangulohan sa wala pa gitawag isip Presidente.

7. Si Mercy Josephine, unang anak ni Joseph F., natawo niadtong Agosto 14, 1867, ug namatay niadtong Hunyo 6, 1870.
8. Joseph F. Smith, journal, Hulyo 7, 1870, Church History Library, Ang Simbahan ni Jesukristo sa mga Santos sa Ulahing mga Adlaw, Siyudad sa Salt Lake, Utah.
9. Joseph F. Smith ngadto ni Martha Ann Smith Harris, Ago. 26, 1883, Church History Library; tan-awa ang Richard Neitzel Holzapfel ug David M. Whitchurch, *My Dear Sister: The Letters between Joseph F. Smith and His Sister Martha Ann* (2018), 290–91.
10. Sa daghang mga sitwasyon, ang Ginoo migiya ni Joseph F. Smith sa iyang personal nga kinabuhi ug diha sa iyang pangalagad isip Apostol ug Presidente sa Simbahan pinaagi sa dinasig nga mga damgo, mga pinadayag, ug mga panan-awon. Kasagaran kining bililhon nga mga gasa gikan sa Ginoo narekord diha sa iyang mga journal, mga wali, mga paghinumdom, ug sa opisyal nga mga rekord sa Simbahan.
11. Joseph F. Smith, journal, Ene. 23, 1918, Church History Library; tan-awa sa Joseph Fielding Smith, *Life of Joseph F. Smith*, 473–74.
12. Tan-awa ang “A. [P.] Kesler Is Killed in Fall from a Building,” *Ogden Standard*, Peb. 5, 1918, 5.
13. Joseph F. Smith, journal, Peb. 4, 1918, Church History Library.
14. Tan-awa ang “Ida Bowman Smith,” *Salt Lake Herald-Republican*, Sept. 26, 1918, 4.
15. Joseph F. Smith, sa Conference Report, Okt. 1918, 2.
16. Tan-awa ang paghisgut sa “atong mahimayaon nga Inahan nga si Eva” ug ang “matinud-anon nga mga anak nga babaye kinsa . . . misimba sa tinuod ug buhi nga Dios” (Doktrina ug mga Pakigsaad 138:39).
17. Doktrina ug mga Pakigsaad 138:30, 33–34, 50–52.
18. Ang teksto sa panan-awon unang migawas diha sa Nobyembre 30, 1918, nga edisyon sa *Deseret News*, 11 ka adlaw human sa pagkamatay ni Presidente Smith, niadtong Nobyembre 19. Gimantala kini sa Disyembre nga *Improvement Era* ug sa Enero 1919 nga mga edisyon sa *Relief Society Magazine*, sa *Utah Genealogical and Historical Magazine*, sa *Young Woman's Journal*, ug sa *Millennial Star*.
19. Bisan og ang mga anak sa kapildihan mabanhaw, dili sila mohatag og gugma ug pagdayeg sa Langitnong Amahan ug ni Jesukristo sama niadtong makadawat og gingharian sa himaya. Tan-awa sa Alma 11:41; Doktrina ug mga Pakigsaad 88:32–35.



Ni Bonnie H. Cordon

Kinatibuk-ang Presidente sa Young Women

Pagkahimong usa ka Magbalantay

Ako nanghinaut nga kadtong inyong gipangalagaran magtan-aw kaninyo isip usa ka higala ug makaamgo nga, diha kaninyo, aduna silay usa ka magdadapig, ug usa ka kasumbungan.

Usa ka tuig ang milabay, usa ka bata sa Primary ang akong nahi-mamat sa Chile ang nakapahimuot kanako. “Kumusta,” siya miingon, “ako si David. Mahimo bang maghisgut ka bahin nako sa kinatibuk-ang komperensya?”

Sa hilum nga mga higayon, ako namalandong sa wala damha nga pagtimbaya ni David. Kitang tanan gusto nga maila. Gusto kitang mahimong importante, mahinumduman, ug moba-ti nga gihigugma.

Mga sister ug mga brother, ang matag usa kaninyo importante. Bisan og dili kamo mahisgutan sa kinatibuk-ang komperensya, ang Manluluwas nakaila kaninyo ug nahigugma kaninyo. Kon nagduha-duha mo kon tinuod ba kini, gikinahanglan lamang ninyo nga maghunahuna nga Siya “mikulit [kaninyo] diha sa mga palad sa [Iyang] mga kamot.”¹

Nasayud nga ang Manluluwas nahigugma kanato, tingali kita unya maghunahuna, unsa ang labing maayo nga paagi sa pagpakita sa atong gugma alang Kaniya?

Ang Manluluwas nangutana kang Pedro, “Gihigugma mo ba ako . . . ?”

Mitubag si Pedro, “Oo, Ginoo; nasa-yud ka nga gihigugma ko ikaw. Siya miingon kaniya, Pakan-a ang akong mga nating karnero.”

Sa dihang gipangutana niini sa ika-duha ug ikatulo nga higayon, “Gihigugma mo ba ako?” Si Pedro naguol apan bisan pa niana mikumpirmar sa iyang gugma: “Ginoo, nasayud ikaw sa tanan; nasayud ka nga gihigugma ko ikaw.



Si Jesus miingon kaniya, *Pakan-a ang akong mga karnero.*"²

Wala pa ba mapamatud-i ni Pedro ang iyang kaugalingon nga usa ka mahigugmaong sumusunod ni Kristo? Gikan sa unang panagtagbo sa baybayon, siya mibiya "gilayon" sa iyang mga pukot aron mosunod sa Manluluwas.³ Si Pedro nahimong tinuod nga mananagat sa mga tawo. Iyang giubanan ang Manluluwas atol sa Iyang personal nga pangalagad ug mitabang sa pagtudlo sa uban sa ebanghelyo ni Jesukristo.

Apan karon ang nabanhaw nga Ginoo nasayud nga Siya mawala na gayud sa kiliran ni Pedro, mipakita kaniya unsaon ug kanus-a gayud siya moserbisyo. Sa pagkawala sa Manluluwas, si Pedro manginahanglan nga mangayo og giya gikan sa Espiritu, siya mismo modawat og pagpadayag, ug dayon adunay kaisug ug hugot nga pagtuo sa paglihok. Nagpunting ngadto sa Iyang karnero, ang Manluluwas nagtinguha nga si Pedro mobuhat kon unsa ang Iyang buhaton kon Siya anaa didto. Iyang giawhag si Pedro nga mahimong usa ka magbalantay.

Sa milabayng Abril, si Presidente Russell M. Nelson mipaabut og samang pagdapit kanato sa pagpakaon sa karnero sa atong Amahan sa mas balaan nga paagi ug pagbuhat niini pinaagi sa pagpangalagad.⁴

Aron epektibong madawat kini nga pagdapit, kinahanglan kitang mopalambo og kasingkasing sa usa ka magbalantay ug makasabut sa mga panginahanglan sa karnero sa Ginoo. Sa unsang paagi nga kita mahimong mga magbalantay nga gikinahanglan sa Ginoo nga kita mahisama?

Sama sa tanang mga pangutana, makatan-aw kita sa atong Manluluwas, si Jesukristo—ang Maayong Magbalantay. Ang karnero sa Manluluwas nailhan ug naihap; gibantayan sila ug gipundok sila ngadto sa panon sa Dios.

Nailhan ug Naihap

Samtang kita naningkamot sa pagsunod sa ehemplo sa Manluluwas, gikinahanglan nga kita nakaila ug nagihap sa Iyang karnero. Kita gitahasan

og piho nga mga indibidwal ug mga pamilya nga atimanon aron atong masiguro nga ang tanan nga panon sa Ginoo naihap ug walay nakalimtan. Ang pagbutang og numero, hinuon, dili gayud mahitungod lang sa mga numero; kini mahitungod sa pagsiguro nga ang *matag* tawo mobati sa gugma sa Manluluwas pinaagi sa usa ka tawo nga miserbisyo *alang* Kaniya. Sa ingon nga paagi, ang tanan makaamgo nga sila nailhan sa usa ka mahigugmaong Amahan sa Langit.

Bag-ohay lang akong nakahimat og usa ka young woman kinsa natahasan nga mangalagad ngadto sa usa ka sister nga hapit kalima pil-on ang iyang edad. Sa ilang panag-uban, nadiskobrehan nila ang komon nga hilig sa musika. Kon kini nga young woman mobisita, manganta sila, ug magbinayloay og ilang mga paborito. Sila nag-umol og panaghigalaay nga nakapanalangin sa ilang kinabuhi.

Ako nanghinaut nga kadtong inyong gipangalagaran magtan-aw kaninyo isip usa ka higala ug makaamgo nga, diha kaninyo, aduna silay usa ka magdadapig, ug usa ka kasumbungan—usa ka tawo nga nahibalo sa ilang mga kahintang ug mopaluyo kanila sa ilang mga paglaum ug mga pangandoy.

Dili pa dugay ako nakadawat og tahas sa pagpangalagad ngadto sa usa ka sister nga ako o ang akong kompanyon wala kaayo makaila. Samtang mipakigtambag ako ni Jess, akong 16 anyos nga kompanyon sa pagpangalagad, maalamon siyang misugyot, "Kinahanglan kitang makaila kaniya."

Kami diha-diha dayon nakahukom nga ang usa ka selfie ug usa ka pasiuna nga text maoy tukma. Akong gigunitan ang phone, ug si Jess ang mipislit sa button aron pagkuha sa hulagway. Ang among unang oportunidad sa pagpangalagad usa ka managkompanyon nga paningkamot.

Sa among unang pagbisita, among gipangutana ang among sister kon aduna bay bisan unsa nga among maapil sa among mga pag-ampo alang kaniya. Siya mipakigbahin og mabinat-on nga personal nga hagit ug miingon nga iyang ikalipay ang among mga

pag-ampo. Ang iyang kamatinuoron ug pagsalig nagdala og usa ka diha-diha nga kutay sa gugma. Pagkanindot nga pribilehiyo ang paghinumdum kaniya diha sa akong inadlaw-adlaw nga mga pag-ampo.

Samtang kamo mag-ampo, inyong mabati ang gugma ni Jesukristo alang niadtong inyong gipangalagaran. Ipakigbahin kana nga gugma ngadto kanila. Unsay mas labing maayo nga pamaagi sa pagpakaon sa Iyang karnero kay sa pagtabang kanila nga makatagamtam sa Iyang gugma—*pinaagi kaninyo?*

Gibantayan

Ang ikaduha nga pamaagi sa pagpalambo sa kasingkasing sa usa ka magbalantay mao ang pagbantay sa Iyang karnero. Isip mga miyembro sa Ang Simbahan ni Jesukristo sa mga Santos sa Ulahing mga Adlaw, kita makalihok, makaayo, makapalig-on, ug makapatukod og hapit bisan unsa. Abtik kitang makahatag sa panginahanglan uban sa matinabangon nga kamot o usa ka plato nga cookies. Apan aduna pa bay ikadugang?

Nahibalo ba ang atong karnero nga nagbantay kita kanila uban sa gugma ug molihok kita aron sa pagtabang?

Sa Mateo 25 atong mabasa:

"Umari kamo, O mga dinayeg sa akong Amahan, panunda ninyo ang gingharian nga gitagana alang kaninyo . . .

"Kay gigutom ako ug inyo ako nga gipakaon: Giuhaw ako ug inyo ako nga gipainom: Langyaw ako ug ginahangop ninyo ang pagpasaka kanako: . . .

"Ug kaniya motubag ang mga matarung nga manag-ingon, Ginoo kanus-a ba kami *makakita* kanimo nga gigutom ug amo ikaw nga gipakaon? o giuhaw ug amo ikawng gipainom?

"Ug kanus-a ba kami *makakita* kanimo nga langyaw, ug amo ikawng gipasaka?"⁵

Mga kaigsoonan, ang importante nga pulong mao ang *makakita*. Ang matarung nakakita niadtong nanginahanglan tungod kay sila nagbantay ug naniid. Kita usab mahimong mabinantayon aron sa pagtabang ug paghupay,

aron sa pagsaulog ug gani sa paglaum. Samtang kita nagbuhat, mahatagan kita og kasigurohan sa panaad diha sa Mateo: “Nga maingon nga gibuhat ninyo kini ngadto sa usa sa labing gagmay niini[ng] . . . , gibuhat usab ninyo kini kanako.”⁶

Usa ka higala—ato siyang tawgon og John—mipakigbahin kon unsa ang mahitabo kon atong makita ang dili kaayo dayag nga panginahanglan sa uban: “Usa ka sister sa among ward misulay sa pagpakamatay. Human sa duha ka bulan, akong nahibaloan nga wala gayud sa akong korum ang miduol sa iyang bana aron sa pag-atubang niining maka-trauma nga kasinatian. Subo palandungon, ako wala usab molihok. Sa katapusan, akong gidapit ang bana og paniudto. Siya usa ka maulawon nga tawo, kasagaran pinahimutang kaayo. Ug bisan pa niana sa dihang ako miingon, ‘Ang imong asawa misulay paghikog. Lisud tingali kadto alang kanimo. Gusto ba nimo nga maghisgot mahitungod niini?’ siya dayag nga mihilak. Emosyonal ug lawom kaayo ang among panagistoryahanay ug mipalambo og usa ka talagsaong kasuod ug pagsalig sulod lang sa minutos.”

Si John midugang, “Tingali ang kalagmitan kita magdala lang og brownies imbis mangita og paagi unsaon pag-atubang sa sitwasyon nga adunay kamatinud-anon ug gugma.”⁷

Ang atong karnero tingali nasakit, nawala, o gani tuyo nga nahisalaag; isip ilang magbalantay, mahimo kitang usa sa nag-unang makakita sa ilang panginahanglan. Kita makapaminaw ug makahigugma nga walay paghukom ug motanyag og paglaum ug tabang uban sa mapanid-anong giya sa Espiritu Santo.

Mga sister ug mga brother, ang kalibutan mas napuno sa paglaum ug kalipay tungod sa dinasig nga mga buhat sa pagkamabination nga inyong gihimo. Samtang magtinguha kamo sa direksyon sa Ginoo kon unsaon pagpaabut sa Iyang gugma ug pagkakita sa mga panginahanglan niadtong inyong gipangalagaran, ang inyong mga mata maabli. Ang inyong

sagradong tahas sa pagpangalagad maghatag kaninyo sa balaanong katungod sa pagdawit og inspirasyon. Makapangayo kamo niana nga inspirasyon nga adunay pagsalig.

Mapundok ngadto sa Panon sa Dios

Ikatulo, gusto nato nga ang atong karnero mapundok ngadto sa panon sa Dios. Sa pagbuhat sa ingon, kinahanglan atong ikonsiderar hain silang dapita dinha sa dalan sa pakigsaad ug mangandam nga molakaw uban kanila sa ilang panaw sa hugot nga pagtuo. Usa ka sagrado nga pribilehiyo alang kanato ang mahibalo sa ilang gibati ug ipunting sila ngadto sa ilang Manluluwas.

Si Sister Josivini sa Fiji naglisud sa iyang pagsubay sa dalan sa pakigsaad—sa literal nga paagi. Ang iyang higala nakakita nga si Josivini naglisud sa pagkakita sa mga kasulatan bisan igo lang aron makabasa. Siya mihatag kang Josivini og bag-o nga antyohos nga pangbasa ug usa ka hayag nga dalag [yellow] nga lapis aron sa pagmarka sa matag hisgot og Jesukristo diha sa Basahon ni Mormon. Ang nag-sugod sa yano nga tinguha sa pagpangalagad ug sa pagtabang sa pagtuon sa ebanghelyo misangput ngadto sa pagtambong ni Josivini sa templo sa unang higayon 28 ka tuig human siya mabunyagi.

Lig-on man o huyang ang atong karnero, nagmaya o anaa sa kasakit, mahimo kitang makapaniguro nga walay maglakaw nga mag-inusara. Mahimo nato silang higugmaon bisan asa man sila sa espirituhanon nga paagi ug motanyag og suporta ug pagdasig alang sa kalamboan. Samtang kita mag-ampo ug magtinguha sa pagsabut sa ilang mga kasingkasing, ako mopamatuod nga ang Langitnong Amahan mogiya kanato ug ang Iyang Espiritu magauban kanato. Aduna kitay kahigayunan nga mahimong “mga anghel anaa libut” kanila samtang Siya molakaw diha sa ilang atubangan.⁸

Ang Ginoo nagdapit kanato sa pagpakaon sa Iyang karnero, sa pagatiman sa Iyang mga panon sama sa Iyang gibuhat. Nagdapit Siya kanato

nga mahimong mga magbalantay sa matag nasud. (Ug oo, Elder Uchtdorf, ganahan mi ug nanginahanglan og mga German shepherd.) Ug Siya nagtinguha sa Iyang mga kabatan-onan sa pag-apil sa kawasa.

Ang atong mga kabatan-onan [youth] mahimong pipila sa labing lig-on nga mga magbalantay. Sila mao, sama sa giingon ni Presidente Russell M. Nelson, “Apil sa labing maayo nga gipadala sa Ginoo *sukad* dinhi sa kalibutan.” Sila mga “halangdon nga mga espiritu,” ang atong “labing maayo nga mga magdudula,” kinsa mosunod sa Manluluwas.⁹ Mahunahuna ba ninyo ang gahum nga dala nianang mga magbalantay samtang sila mag-amuma sa Iyang karnero? Sa pagpangalagad uban niining mga kabatan-onan, kita makakita og mga katingalahan.

Mga young woman ug mga young man, gikinahanglan namo kamo! Kon wala kamoy tahas sa pagpangalagad, pakigsultihi ang inyong presidente sa Relief Society o korum sa mga elder [elders quorum]. Magmaya sila sa inyong kaandam sa pagsiguro nga ang Iyang karnero nailhan ug naihap, gibantayan, ug mapundok ngadto sa panon sa Dios.

Sa dihang moabut ang adlaw nga mangluhod kita sa tiilan sa atong gimahal nga Manluluwas, human miamuma sa Iyang panon, ako nag-ampo nga makatubag kita sama ni Pedro: “Oo, Ginoo; nasayud ka nga gihigugma ko ikaw.”¹⁰ Kining, Imong karnero, *gihigugma, luwas*, ug anaa na sa *panimalay*. Sa pangalan ni Jesukristo, amen. ■

MUBO NGA MGA SULAT

1. 1 Nephi 21:16.
2. Tan-awa sa Juan 21:15–17; emphasis gidugang.
3. Tan-awa sa Mateo 4:20.
4. Tan-awa sa Russell M. Nelson, “Pagpangalagad,” *Liahona*, Mayo 2018, 100.
5. Mateo 25:34–35, 37–38; emphasis gidugang.
6. Mateo 25:40.
7. Personal nga pakigsinulatay.
8. Doktrina ug mga Pakigsaad 84:88.
9. Russell M. Nelson, “Paglaum sa Israel” (tibuok kalibutan nga debosyonal sa kabatan-onan, Hunyo 3, 2018), *HopeofIsrael.Ids.org*.
10. Juan 21:15.



Ni Elder Jeffrey R. Holland

Sa Korum sa Napulog Duha ka mga Apostoles

Ang Pangalagad sa Pagpasig-uli (Reconciliation)

Ako mopamatuod sa kalinaw ngadto nianang diwa nga ang pagpasig-uli sa Dios ug sa usag usa mahatag kon kita maaghup ug igo ang kaisug sa pagkab-ot niini.

Niadlong Abril, sa dihang si Presidente Russell M. Nelson mipaila sa konsepto sa pagpangalagad, iyang gipasabut og maayo nga mao kadto ang usa ka paagi sa pagtuman sa dagkong mga sugo sa paghigugma sa Dios ug paghigugma sa usag usa.¹ Kami, isip mga opisyaes sa Simbahan, bukas kaayo nga moabiba ug mopalipay kaninyo sa hilabihan kadako nga pagresponde nga inyong gisugdan ang kalabut niana. Nagpasalamat kami ninyo sa pagsunod sa atong pina-langgang propeta niining maanidot kaayong paningkamot ug mosugyot nga dili kamo maghulat pa og dugang pang mga panudlo. Sugdi lang gyud dayon ang pag-apil. Ngadto niadtong nagkinahanglan. Ayaw pagsige og hinuktok kon unsang matang sa pag-alagad ang inyong ikahatag. Kon atong sundon ang sukaranang baruganan nga natudlo, mopahiuyon sa mga yawe sa priesthood, ug magtinguha sa Espiritu Santo sa paggiya nato, dili gyud kita mapakyas.

Karong buntaga gusto kong mamulong og mas personal nga bahin sa pagpangalagad nga dili pinasikad sa assignment, wala maglakip og pag-eskedyul og interbyu, ug ang tulubagong ngadto ra sa Dios. Tuguti ko nga mopaambit og yano nga ehemplo nianang matang sa pagpangalagad.

Si Grant Morrell Bowen usa ka kugihan, maunungon nga bana ug amahan kinsa, sama sa kadaghanan



nanginabuhi sa panguma, adunay pinansyal nga kalisud sa dihang nagnihit ang lokal nga abut sa patatas. Siya ug ang iyang asawa, si Norma, misugod sa pagpanarbaho sa laing dapit, sa kadugayan mibalhin sa laing siyudad, ug misugod sa pag-angkon og igo-igo alang sa panginahanglan. Apan, sa grabe kaayong panghitabo, si Brother Bowen nasakitan og maayo sa dihang, sa interbyu sa rekomen sa templo, ang bishop medyo wala motuo, kalabut sa pagdeklarar ni Morrell nga siya hingpit nga tigbayad sa ikapulo.

Wala ko makahibalo hain niining duha ang mas husto nianang adlaw, apan nakahibalo ko nga si Sister Bowen migawas nianang interbyu nga nabag-o ang iyang rekomen sa templo, samtang si Brother Bowen migawas nga may kasuko nga nakapahilayo niya gikan sa Simbahan sulod sa 15 ka tuig.

Dili igsapayan kon si kinsa ang husto mahitungod sa ikapulo, klaro kaayo nga si Morrell ug ang Bishop nalimot sa sugo sa Manluluwas nga “pakighigala dayon sa imong magsusumbong samtang sa inyong kaaway pakig-uyon dayon kamo”² ug sa tambag ni Pablo nga “ayaw pasalopi sa adlaw ang inyong kasuko.”³ Sa pagkatinuod nga *wala* sila magkauyon ug milungtad *gyud* og mga adlaw ang kasuko ni Brother Bowen, dayon mga semana, mga tuig, namatud-an ang punto nga nahimo sa usa sa labing maalamon sa karaang Romano, nga miingon, “Ang kasuko, kon dili pugngan, kanunayng mas [makadaut] kay sa kadaut nga maoy hinungdan niini.”⁴ Apan ang milagro sa pagpasig-uli kanunayng anaa kanunay kanato, ug tungod sa gugma alang sa iyang pamilya ug sa Simbahan nga iyang nahibaloan nga tinuod, si Morrell Bowen mibalik sa pagkaaktibo sa Simbahan. Sultihan ko kamo og kadali kon unsay nahitabo.

Ang anak ni Brother Bowen si Brad usa ka maayo namong higala ug mahalaron nga Area Seventy nga nagserbisyo sa habatagang Idaho. 11 anyos pa si Brad atol nianang insidente, ug sulod sa 15 ka tuig iyang nakita ang pagkunhod sa relihiyusong debosyon



sa iyang amahan, usa ka pagsaksi niining makaguol nga gisangputan tungod sa gitanum nga kasuko ug pagkawalay pagsinabtanay. Butang nga kinahanglan gayud buhaton. Mao nga samtang nagsingabut ang holiday sa Thanksgiving niadtong 1977, si Brad, 26 anyos nga estudyante sa Brigham Young University; ang iyang asawa, si Valerie, ug ang iyang bag-ong masuso nga anak nga lalaki, si Mic, mikarga sa ilang mga butang sa baratuhon nga awto ug, bisan sa kabati sa panahon, mibiyahe ngadto sa Billings, Montana. Bisan ang bundo nga snow nga duol sa West Yellowstone walay makapugong niining pamilya sa pagpangalagad ni Brother Bowen Sr.

Sa pag-abut, si Brad ug ang iyang igsoong babaye si Pam mihangyo og pribadong higayon uban sa uban sa ilang amahan. “Pa maayo kaayo ka nga pagka-amahan,” emosyonal nga gisugdan ni Brad, “ug nasayud kaayo mi kon unsa mi nimo ka pinangga. Apan dunay butang nga sayop, ug taas na kaayo ang panahon. Tungod kay nasakitan ka sa makausa, kining tibuok pamilya gisakitan sulod sa mga katuigan. Nagguol mi, ug ikaw lang ang bugtong makaayo kanato. Palihug, palihug, niining higayuna, utingkaya kini diha sa imong kasingkasing aron ihikling kadtong ngil-ad nga panghitabo uban sa bishop ug sa makausa

dad-a kini nga pamilya sa ebanghelyo sama sa imong gihimo sa una?”

Dihay hingpit nga kahilum. Dayon si Brother Bowen mitan-aw niining duha, iyang mga anak, nga bukog sa iyang bukog ug unod sa iyang unod,⁵ ug hilum kaayo nga miingon, “Oo. Oo, akong buhaton.”

Nahingangha apan nasurpresa sa wala damhang tubag, si Brad Bowen ug ang iyang pamilya nagtan-aw sa ilang amahan sa pag-adto sa iyang kasamtangan nga bishop sa diwa sa pagpasig-uli aron matarung ang mga butang sa iyang kinabuhi. Agig usa ka hingpit nga tubag niining maisugon apan hingpit nga wala damha nga pagbisita, ang bishop, kinsa mipadangat og balik-balik nga imbitasyon ngadto kang Brother Bowen sa pagbalik sa simbahan, migakos kang Morrell ug gigunitan siya—gigakos siya og dugay kaayo.

Sa pipila lang ka semana—wala magdugay—si Brother Bowen hingpit nga miapil sa kalihokan sa Simbahan ug mihimo sa iyang kaugalingon nga takus sa pagbalik sa templo. Wala madugay midawat siya og tawag sa pagdumala og usa ka naglisud nga gamayng branch sa 25 katawo ug gipatubo kini ngadto sa malamboon nga kongregasyon nga kapin sa 100. Kining tanan nahitabo hapit na tunga sa siglo nang miagi, apan ang sangputanan sa

pagpangalagad nga hangyo sa mga anak ngadto sa ilang amahan ug ang kaandam mopasaylo sa amahan ug mopadayon bisan sa pagka-dili hingpit sa uban naghatag og mga panalangin nga nangabut pa gihapon—ug moabut hangtud sa kahangturan—ngadto sa pamilyang Bowen.

Mga kaigsoonan, si Jesus naghangyo nga kita “magpuyo nga maghiusa sa gugma”⁶ uban sa “walay panagbingkil taliwala kaninyo.”⁷ “Siya nga may espiritu sa panagbingkil dili gikan kanako,” mipasidaan Siya sa mga Nephite.⁸ Sa pagkatinuod, sa dakong lugway, ang atong relasyon ngadto ni Kristo matino—pinaagi sa atong relasyon ngadto sa uban.

“Kon kamo . . . magtinguha sa pagduol ngari kanako,” Siya miingon, “ug mahinumdom sa inyong igsoon nga may kasuko batok kaninyo—

“Lakaw ngadto sa inyong igsoon, ug *makig-uli una [kaniya], ug unya duol ngari kanako uban sa bug-os nga kasingkasing, ug Ako modawat kaninyo.*”

Sigurado nga ang matag usa nato makahisgut og nagkadaiyang nanglabay nga kasakit ug kagul-anan ug sakit nga panumduman nga hangtud karon nagdaut gihapon sa kalinaw diha sa kasingkasing sa tawo o sa pamilya o silingan. Mahimong kita ang hinungdan sa kasakit o ang gipahamtangan og kasakit, kadtong mga samad kinahanglan maalim aron ang kinabuhi mahimong magantihon sumala sa tumong sa Dios. Sama sa pagkaon diha sa inyong refrigerator nga ang inyong apo hinay-hinay og okoy para ninyo, kadtong daan na nga mga kasakit dugay nang mihupas. Palihug ayaw na kini og hatagi sa bililhong luna diha sa inyong kalag. Sama sa giingon ni Prospero sa nagbasol nga si Alonso sa *Ang Bagyo* “Dili nato pabug-atan ang atong panumduman sa nanglabay na.”¹⁰

“Pagpasaylo, ug pagapasayloon kamo,”¹¹ si Kristo nagtudlo sa mga panahon sa Bag-ong Tugon. Ug sa atong panahon: “Ako, ang Ginoo, mopasaylo kinsa Ako mopasaylo, apan kamo gikinahanglan nga mopasaylo sa tanan nga mga tawo.”¹²

Hinoon, importante kini, alang sa pipila kaninyo nga nagsinati sa tinuod nga kasakit nga maghunahuna nga *wala* Siya nag-ingon. *Wala* Siya nag-ingon nga, “Kamo wala tuguti nga mopabati og tinuod nga kasakit gikan sa napusgay nga kasinatian nga naangkon gikan sa uban.” *Wala* usab Siya nag-ingon, “Aron makapasaylo sa hingpit ipadayon ang makadaot nga relasyon o balik ngadto sa abusado, makadaot nga kahimtang.” Apan bisan pa man labing makaguol nga kalapasan nga tingali moabut kanato, molampos lang kita batok sa atong kasakit kon motunob kita sa dalan sa tinuod nga pagkaalim. Kana nga dalan mao ang pagpasaylo nga gisubay ni Jesus sa Nazaret, kinsa nagtawag sa matag usa kanato, “Umanhi ka ug sumunod kanako.”¹³

Sa maong imbitasyon nga mahimong Iyang disipulo ug maningkamot nga makahimo sa Iyang gibuhay, si Jesus naghanyo kanato nga mahimong mga instrumento sa Iyang grasya—sa “mga sinugo alang kang Kristo” diha sa “pangalagad sa pagpasig-uli,” sumala sa paghulagway ni Pablo niini sa Mga Taga-Corinto.¹⁴ Ang Tig-alim [Healer] sa matag samad, Siya kinsa mitarung sa matag sayop, naghanyo kanato nga makigtambayayong Kaniya sa lisud nga tahas sa pagpasiugda og kalinaw sa kalibutan nga dili makakaplag niini sa bisan unsang paagi.

Busa, sa sulat ni Phillips Brooks: “Kaninyo kinsa mitugot nga magpadayon ang dili pagsinabtanay nga modangat sa katuigan, pasabut nga unya-unyaon ang paghusay niini; kaninyo nga anaa pa gihapon sa panagsumpaki tungod kay dili magkatakdo ang inyong hunahuna karon mao ang adlaw sa pagsakripisyo sa inyong garbo ug [husaya] kini; kaninyo kinsa magmug-ot nga ikahinagbo og tawo sa tuyo nga mopasakit nila . . . ; kaninyo nga mitugot nga . . . [ang tawo] nga gisakit dili mahatagan og simpatiya nga imong plano nga ihatag . . . sa umaabut, . . . lakaw dayon ug buhata ang butang nga wala gayud nimo mahimo basin og wala na gyud kay kahigayunan sa pagbuhay.”¹⁵



Minahal kong mga kaigsoonan, ako mopamatuod nga ang pagpasaylo ug pagbiya sa kasaypanan, madaan o bag-o, mao ang sentro sa kahalangdon sa Pag-ula ni Jesukristo. Ako mopamatuod nga sa katapusan ang ingon nga espirituhanong pagkaayo moabut lang gikan sa balaan nga Manunubos, Siya kinsa magdali alang sa atong panabang “nga adunay kaluwasan sa iyang mga pako.”¹⁶ Magpasalamat kita Kaniya, ug sa atong Langitnong Amahan kinsa mipadala Kaniya, nga ang pagbag-o ug pagkatawo pag-usab, usa ka umaabut nga gawasnon gikan sa karaang mga kasub-anan ug sa nangagi nga mga sayop, dili lamang posible, apan kini napalit na, nabayaran na, sa tumang kasakit nga kantidad nga nag-simbolo pinaagi sa dugo sa Kordero kinsa mipaagas niini.

Uban sa apostolikanhong awtoridad nga gihatag ngari nako pinaagi sa Manluluwas sa kalibutan, ako mopamatuod sa kalinaw ngadto nianang diwa nga sa pagpasig-uli ngadto sa Dios ug sa usag usa kon kita maaghup ug igo ang kaisug sa pagkab-ot niini. “Hunong sa pakigbisog sa usag usa,” ang Manluluwas nangamuyo.¹⁷ Kon kamo dunay nahibaloan nga dugay nang samaran, ayoha kini. Amumaha ang usag usa diha sa gugma.

Mga pinalangga kong kahigalaan, sa atong gipaambit nga pagpangalagad sa

pagpasig-uli, mohangyo ko kanato nga mahimong magbalantay sa kalinaw—sa paghigugma sa kalinaw, sa pagpatinguha og kalinaw, sa pagmugna og kalinaw, sa pagpatunhay sa kalinaw. Ako mohimo niana nga pangamuyo diha sa ngalan sa Prinsipe sa Kalinaw, kinsa nasayud sa tanan mahitungod sa “samdan diha sa balay sa [Iyang] mga higala,”¹⁸ apan nakakaplag gihapon og kalig-on sa pagpasaylo ug pagkalimot—ug sa pag-alim—ug magmalipayon. Tungod niana ako nag-ampo, alang kaninyo ug kanako, sa ngalan ni Ginoong Jesukristo, amen. ■

MUBO NGA MGA SULAT

1. Tan-awa sa Mateo 22:36–40; Lucas 10:25–28.
2. Mateo 5:25.
3. Mga Taga-Efeso 4:26.
4. Seneca, sa Tryon Edwards, *A Dictionary of Thoughts* (1891), 21.
5. Tan-awa sa Genesis 2:23.
6. Doktrina ug mga Pakigsaad 42:45.
7. 3 Nephi 11:22; tan-awa usab sa 3 Nephi 11:28.
8. 3 Nephi 11:29.
9. 3 Nephi 12:23–24; emphasis gidugang.
10. William Shakespeare, *The Tempest*, act 5, scene 1, mga linya 199–200.
11. Lucas 6:37.
12. Doktrina ug mga Pakigsaad 64:10.
13. Lucas 18:22.
14. Tan-awa sa 2 Mga Taga-Corinto 5:18–20.
15. Phillips Brooks, *The Purpose and Use of Comfort* (1906), 329.
16. Malachi 4:2; tan-awa usab sa 2 Nephi 25:13; 3 Nephi 25:2.
17. Doktrina ug mga Pakigsaad 136:23.
18. Zechariah 13:6; tan-awa usab sa Doktrina ug mga Pakigsaad 45:52.



Ni Elder Shayne M. Bowen
Sa Seventy

Ang Papel sa Basahon ni Mormon diha sa Pagkakabig

Gipundok nato ang Israel sa katapusang higayon ug nagbuhat niini gamit ang Basahon ni Mormon, usa sa labing gamhanang mga himan sa pagkakabig.

Daghang tawo karon ang naghuhahuna mahitungod sa katinuod sa Dios ug sa atong relasyon ngadto kaniya. Daghan ang gamay ra og nahibaloan o wala gayud mahitungod sa Iyang mahinungdanong plano sa kalipay. Sobra sa 30 ka tuig ang milabay, si Presidente Ezra Taft Benson nakaobserbar nga “kadaghanan sa . . . kalibutan karon nagsalikway sa kabalaan sa Manluluwas. Ilang gikwestyon ang Iyang milagroso nga pagkatawo, Iyang hingpit nga kinabuhi, ug ang katinuod sa Iyang mahima-yaong pagkabanhaw.”¹

Sa atong panahon, ang mga pangutana nakapunting dili lamang sa atong Manluluwas pero sa Iyang Simbahan usab—Ang Simbahan ni Jesukristo sa mga Santos sa Ulahing mga Adlaw—nga Iyang gipahiuli pinaagi ni Propeta Joseph Smith. Kining mga pangutana kasagaran nakapunting sa kasaysayan, mga pagtulunan, o mga gipangbuhat sa Simbahan sa Manluluwas.

Ang Basahon ni Mormon Makatabang Kanato nga Molambo diha sa Pagpamatuod

Gikan sa *Isangyaw ang Akong Ebanghelyo*, atong mabasa: “Hinum-dumi nga ang atong pagsabut [bahin sa Langitnong Amahan ug sa Iyang plano sa kalipay] nagagikan sa moderno nga mga propeta—ni Joseph Smith ug sa iyang mga sumusunod—kinsa nakadawat og pagpadayag nga gikan gayud sa Dios. Busa, ang pangutana nga angay tubagon sa investigator mao kon si Joseph Smith ba usa ka propeta, ug makatubag siya niini nga pangutana pinaagi sa pagbasa ug pag-ampo mahitungod sa Basahon ni Mormon.”²

Ang akong pagpamatuod bahin sa balaang tawag ni Propeta Joseph Smith nalig-on pinaagi sa mainampung pagtuon sa Basahon ni Mormon: Lain nga Tugon ni Jesukristo. Gibuhat nako ang pagdapit ni Moroni nga “mangutana sa Dios, ang Amahan sa Kahangturan, sa ngalan ni Kristo,” aron masayud sa katinuod sa Basahon

ni Mormon.³ Mosaksi ko nga nasayud ko nga kini tinuod. Kana nga kahi-balo miabut kanako, ingon nga kini mahimong moabut kaninyo, “pinaagi sa gahum sa Espiritu Santo.”⁴

Ang pasiuna sa Basahon ni Mormon namahayag: “Kadto kinsa makabaton niini nga balaanon nga pagpamatuod gikan sa Balaang Espiritu modangat usab sa kamatuoran pinaagi sa sama nga gahum nga si Jesukristo mao ang Manluluwas sa kalibutan, nga si Joseph Smith mao ang iyang tigpadayag ug ang propeta niining katapusan nga mga adlaw, ug nga Ang Simbahan ni Jesukristo sa mga Santos sa Ulahing mga Adlaw mao ang gingharian sa Ginoo nga sa makausa pa gitukod na usab dinhi sa yuta, pagpangandam sa ikaduha nga pag-anhi sa Mesiyas.”⁵

Isip batan-ong misyonaryo nga mopaingon sa Chile, nakakat-on ko og makapausab sa kinabuhi nga leksyon mahitungod sa gahum sa pagkabig sa Basahon ni Mormon. Nagserbisyo si Mr. Gonzalez og respetado nga posisyon sa iyang simbahan sulod sa daghang katugan. Hilabihan ang iyang pagbansay sa iyang relihiyon, lakip na ang usa ka degree sa teyolohiya. Medyo mapasigarbuhon siya sa iyang biblikanhong kasinatian. Klaro ngari namo nga usa siya ka iskolar sa relihiyon.

Nahibalo gayud siya bahin sa mga misyonaryo sa mga Santos sa Ulahing mga Adlaw samtang nagtrabaho sila



didto sa iyang siyudad nga gipuy-an sa Lima, Peru. Ganahan kaayo siya nga makahimamat nila aron matudloan niya sila sa Biblia.

Usa ka adlaw, murag usa ka gasa gikan sa langit, sa iyang hunahuna, duha ka misyonaryo ang mipahunong niya diha sa dalan ug nangutana kon mahimo ba silang moadto sa iyang panimalay ug mopaambit sa mga kasulatan ngadto niya. Usa kini niya ka damgo nga natuman! Ang iyang mga pag-ampo natubag. Sa katapusan, mapakita niya niining nahisalaag nga mga batan-ong lalaki ang mga sayop sa ilang mga pagtulun-an. Iya silang giingnan nga malipay siya nga moadto sila sa iyang balay ug maghisgot sa mga kasulatan.

Hapit dili na siya makahulat sa ilang sabut. Andam na siya nga gamiton ang Biblia sa pagsupak sa ilang mga gituohan. Masaligon siya nga ang Biblia moklaro ug mopakita gayud sa sayop sa ilang mga pagtulun-an. Miabut ang gabii nga nasabutan, ug ang mga misyonaryo nanuktok sa pultahan. Naghi-nam-hinam na gayud siya. Ang iyang higayon miabut na sa katapusan.

Iyang giablihan ang pultahan ug gidapit ang mga misyonaryo ngadto sa iyang panimalay. Usa sa mga misyonaryo mihatag kaniya og blue nga basahon ug mihatag og sinsero nga pagpamatuod nga nasayud siya nga ang basahon naglangkob sa pulong sa Dios. Ang ikaduhang misyonaryo midugang sa iyang gamhanang pagpamatuod bahin sa basahon, nga nagpamatuod nga gihubad kini sa usa ka moderno nga propeta sa Dios nga ginganlan og Joseph Smith ug nga kini nagtudlo bahin ni Kristo. Nananghid ang mga misyonaryo ug mibiya sa iyang panimalay.

Nasagmuyo kaayo si Mr. Gonzalez. Pero giabli niya ang basahon, ug nag-sugod siya sa pagbasa sa mga pahina niini. Iyang gibasa ang unang pahina. Gibasa niya ang matag pahina ug wala mohunong hangtud na pagkahapon sa sunod adlaw. Gibasa niya ang tibuok basahon ug nasayud nga kini tinuod. Nasayud siya kon unsa ang kinahanglan niyang buhaton. Nanawag siya sa



mga misyonaryo, nakadawat sa mga leksyon, ug gibiyaan ang kinabuhi nga iyang nahibaloan aron mahimong miyembro sa Ang Simbahan ni Jesu-kristo sa mga Santos sa Ulahing mga Adlaw.

Kanang buotan nga tawo mao ang akong magtutudlo sa MTC sa Provo, Utah. Ang istorya sa pagkakabig ni Brother Gonzalez ug ang gahum sa Basahon ni Mormon nakahimo og dakong impresyon ngari nako.

Pag-abut nako sa Chile, ang akong mission president, si President Royden J. Glade, midapit namo sa pagbasa kada semana sa pagpamatuod ni Propeta Joseph Smith nga narekord diha sa Joseph Smith—Kasaysayan. Gitudloan mi niya nga ang pagpamatuod bahin sa Unang Panan-awon dunay direktang kalabutan sa kaugalingon namong pagpamatuod sa ebanghelyo ug sa among pagpamatuod sa Basahon ni Mormon.

Seryuso nakong gidawat ang iyang pagdapit. Gibasa nako ang mga istorya bahin sa Unang Panan-awon; gibasa nako ang Basahon ni Mormon. Nag-ampo ko sama sa gisugo ni Moroni ug nangutana sa “Dios, ang Amahan sa Kahangturan, sa ngalan ni Kristo”⁶ kon tinuod ba ang Basahon ni Mormon. Ako mosaksi karon nga ako nasayud

nga ang Basahon ni Mormon, sama sa giingon ni Propeta Joseph Smith, mao “ang labing tukma sa bisan hain nga basahon dinhi sa yuta, ug ang sukaranan sa atong tinuohan, ug ang tawo labi nga maduol sa Dios pinaagi sa pagsunod sa iyang mga lagda, kay sa bisan hain nga basahon.”⁷ Si Propeta Joseph namahayag usab: “Kuhaa ang Basahon ni Mormon ug ang mga pagpadayag, ug asa na man ang atong relihiyon? Wala kita’y relihiyon.”⁸

Personal nga Pagkakabig

Samtang masabtan nato og maayo kon kinsa kita ug ang mga katuyoan sa Basahon ni Mormon, ang atong pagkakabig malig-on ug mahimong mas sigurado. Malig-on kita diha sa atong pasalig nga maghupot sa mga pakigsaad nga atong gihimo uban sa Dios.

Ang nag-unang katuyoan sa Basahon ni Mormon mao ang pagpundok sa nagkatibulaag nga Israel. Kini nga pagpundok makahatag sa tanang anak sa Dios og oportunidad nga mosulod sa dalan sa pakigsaad ug, pinaagi sa pagtahud niadtong mga pakigsaad, mobalik ngadto sa presensya sa Amahan. Samtang magtudlo kita og paghinulsol ug mamunyang og mga kinabig, atong gipundok ang nagkatibulaag nga Israel.

Ang Basahon ni Mormon dunay 108 ka pakisayran bahin sa balay ni Israel. Sa sinugdanan sa Basahon ni Mormon, si Nephi nagtudlo, “Kay ang kahingpitan sa akong tuyo mao nga ako unta makakabig sa mga tawo sa pagpaduol ngadto sa Dios ni Abraham, ug sa Dios ni Isaac, ug sa Dios ni Jacob, ug maluwas.”⁹ Ang Dios ni Abraham, Isaac, ug Jacob mao si Jesukristo, ang Dios sa Daang Tugon. Maluwas kita kon moduol kita kang Kristo pinaagi sa pagsunod sa Iyang ebanghelyo.

Sa wala madugay, si Nephi misulat:

“Oo, gani ang akong amahan namulong og daghan mahitungod sa mga Hentil, ug usab mahitungod sa balay ni Israel, nga sila gayud itandi sama sa usa ka kahoy nga oliba, kansang mga sanga pagabalion ug pagatibulaagon diha sa ibabaw sa tibuok yuta. . . .

“Ug human ang balay ni Israel pagatibulaagon sila kinahanglan pagapundukon pag-usab; o, sa katapusan, human madawat sa mga Hentil ang kahingpitan sa Ebanghelyo, ang kinaiyanhon nga mga sanga sa kahoy nga oliba, o ang mga salin sa balay ni Israel, kinahanglan isumbak, o moabut sa kasayuran sa tinuod nga Mesiyas, ang ilang Ginoo ug ang ilang Manunubos.”¹⁰

Sa samang paagi, sa katapusan sa Basahon ni Mormon, si propeta Moroni nagpahinumdum nato sa atong mga pakigsaad, nga nag-ingon, “Nga kamo dili na mahimo nga pagalibugon, nga ang mga pakigsaad sa Amahan sa Kahangturan diin siya mihimo nganha kaninyo, O balay ni Israel, mahimo nga matuman.”¹¹

Ang mga Pakigsaad sa Amahan sa Kahangturan

Unsa man ang “mga pakigsaad sa Amahan sa Kahangturan” nga gipasabut ni Moroni? Atong mabasa sa basahon ni Abraham:

“Ang akong ngalan mao si Jehova, ug Ako nasayud sa katapusan gikan sa sinugdanan; busa ang akong kamot anaa ibabaw kanimo.

“Ug Ako mobuhat gikan kanimo og usa ka dako nga nasud, ug Ako mopanalangin kanimo sa walay sukod,



ug mohimo sa imong ngalan nga bantugan sa tanan nga mga nasud, ug ikaw mahimo nga panalangin ngadto sa imong binhi nga mosunod kanimo, nga sa ilang mga kamot sila modala niini nga pagpangalagad ug Pagkapari ngadto sa tanan nga mga nasud.”¹²

Si Presidente Russell M. Nelson nagtudlo sa bag-ohay lang nga tibuok kalibutan nga sibya nga “kini *karon* ang ulahing mga adlaw, ug ang Ginoo mipadali sa Iyang buhat sa pagpundok sa Israel. Kana nga panagpundok mao ang labing importanting butang nga nahitabo sa yuta karon. Walay makatandi niini sa gidak-on, walay makatandi niini sa kaimportante, walay makatandi niini sa kahalangdon. Ug kon pilion ninyo, kon gustuhon ninyo, mamahimo kamong dakong bahin niini. Mahimo kamong dakong bahin sa usa ka dakong butang, mahinungdanong butang, halangdong butang!

“Kon maghigot kita kalabut sa *pagpundok*, nagsulti lamang kita niining sukaranang kamatuoran: ang matag usa sa mga anak sa atong Langit-nong Amahan, sa matag kilid sa tabil, angayang makadungog sa mensahe sa gipahiuli nga ebanghelyo ni Jesukristo. Mohukom sila sa ilang kaugalingon kon gusto ba nilang masayud pa og dugang.”¹³

Kana ang atong gibuhay isip mga miyembro sa Ang Simbahan ni Jesukristo sa mga Santos sa Ulahing mga Adlaw: nagtinguha kita sa pagdala ngadto sa kalibutan og usa ka panabut—ug pagkakabig ngadto—sa ebanghelyo ni Jesukristo. Kita ang “mga tigpundok sa ulahing mga adlaw.”¹⁴ Ang atong misyon klaro. Mga kaigsoonan, kinahanglang mailhan kita nga mao kadtong kinasingkasing nga nagdala sa saad ni Moroni, nag-ampo ug nakadawat og tubag nga masayud nga ang Basahon ni Mormon tinuod, ug dayon mipaambit nianang kahibalo ngadto sa uban diha sa pulong ug, labing importante, diha sa buhat.

Ang Papel sa Basahon ni Mormon diha sa Pagkakabig

Ang Basahon ni Mormon naglangkob sa kahingpitan sa ebanghelyo ni Jesukristo.¹⁵ Modala kini kanato ngadto sa mga pakigsaad sa Amahan, nga kon tumanon makapaniguro kanato sa Iyang labing mahinungdanon nga gasa—kinabuhing dayon.¹⁶ Ang Basahon ni Mormon mao ang sukaranan sa pagkakabig sa tanang anak sa Langit-nong Amahan.

Nagkutlo pag-usab gikan ni Presidente Nelson: “Samtang kamo . . . magbasa matag adlaw gikan sa Basahon ni Mormon, inyong makatunan ang doktrina sa pagpundok, mga kamatuoran mahitungod ni Jesukristo, Iyang Pag-ula, ug ang kahingpitan sa Iyang ebanghelyo nga dili makita diha sa Biblia. Ang Basahon ni Mormon mahinungdanon sa pagpundok sa Israel. Gani, kon wala ang Basahon ni Mormon, ang gisaad nga pagpundok sa Israel dili mahitabo.”¹⁷

Akong tapuson pinaagi sa mga pulong sa Manluluwas samtang nagtudlo Siya sa mga Nephite bahin sa gisaad nga mga panalangin: “Kamo mao ang mga kaliwatan sa mga propeta; ug kamo mga sakop sa balay ni Israel; ug kamo anaa sa pakigsaad diin ang Amahan mihimo uban sa inyong mga amahan, nag-ingon ngadto kang Abraham: Ug diha sa imong binhi ang tanan nga mga kaliwatan sa yuta mapanalanginan.”¹⁸

Ako mopamatuod nga kita mga anak sa Dios, ang binhi ni Abraham, ang balay ni Israel. Atong gipundok ang Israel sa katapusang higayon ug nagbuhat sa ingon pinaagi sa Basahon ni Mormon—usa ka basahon nga, inubanan sa Espiritu sa Ginoo, mao ang labing gamhanan nga himan sa pagkakabig. Gipangulohan kita og usa ka propeta sa Dios, si Presidente Russell M. Nelson, kinsa mao ang nagdumala sa pagpundok sa Israel sa atong panahon. Ang Basahon ni Mormon tinuod. Nakapausab kini sa akong kinabuhi. Mosaad ko, sama kang Moroni ug sa daghang propeta sa tibuok kasaysayan, nga makapa-usab kini sa inyong kinabuhi.¹⁹ Sa pangalan ni Jesukristo, amen. ■

MUBO NGA MGA SULAT

1. *Mga Pagtulun-an sa mga Presidente sa Simbahan: Ezra Taft Benson* (2014), 156.
2. “Unsa ang Papel [Role] sa Basahon ni Mormon?” *Isangyaw ang Akong Ebanghelyo: Usa ka Giya sa Misyonaryo nga Pangalagad*, rev. ed. (2018), lds.org/manual/missionary.
3. Moroni 10:4.
4. Moroni 10:4.
5. Pasiuna sa Basahon ni Mormon.
6. Moroni 10:4.
7. Pasiuna sa Basahon ni Mormon.
8. *Mga Pagtulun-an sa mga Presidente sa Simbahan: Joseph Smith* (2007), 233.
9. 1 Nephi 6:4.
10. 1 Nephi 10:12, 14.
11. Moroni 10:31.
12. Abraham 2:8–9.
13. Russell M. Nelson, “Paglaum sa Israel” (tibuok kalibutan nga debosyonal sa kabatan-onan, Hunyo 3, 2018), 4, HopeofIsrael.lids.org.
14. Tan-awa sa Jacob 5:72.
15. Si Presidente Ezra Taft Benson nagtudlo: “Ang Ginoo Mismo nagpahayag nga ang Basahon ni Mormon naglangkob sa ‘kahingpitan sa ebanghelyo ni Jesukristo’ (D&P 20:9). Kana wala magpasabut nga kini naglangkob sa tanang pagtulun-an, sa tanang doktrina nga sukad gipadayag. Hinoon, kini nagpasabut nga diha sa Basahon ni Mormon atong makit-an ang kahingpitan niadtong mga doktrina nga gikinahanglan sa atong kaluwasan. Ug kini gitudlo sa yano ug sayon nga paagi aron bisan ang mga bata makakat-on sa mga pamaagi sa kaluwasan ug kahimayaan” (*Mga Pagtulun-an: Ezra Taft Benson*, 157–58).
16. Tan-awa sa Doktrina ug mga Pakigsaad 14:7.
17. Russell M. Nelson, “Paglaum sa Israel,” 7.
18. 3 Nephi 20:25.
19. Tan-awa, pananglitan sa, Henry B. Eyring, “The Book of Mormon Will Change Your Life,” *Liahona*, Peb. 2004, 12–16.



Ni Elder Neil L. Andersen

Sa Korum sa Napulog Duha ka mga Apostoles

Nasamdan

Sa panglimbasog sa yutan-ong mga pagsulay, nga nagmapailubon sa pagpadayon, ang makaayo nga gahum sa Manluluwas magdala og kahayag, panabut, kalinaw, ug paglaum.

Niadtong Marso 22, 2016, sa hapit na gyud mag alas otso sa buntag, duha ka bomba sa terorista ang mibuto sa airport sa Brussels. Si Elder Richard Norby, Elder Mason Wells, ug Elder Joseph Empey midala ni Sister Fanny Clain ngadto sa airport aron moadto sa iyang misyon sa Cleveland, Ohio. Trayntay dos ka tawo ang nawad-an sa ilang kinabuhi, ug tanan nga misyonaryo nasamdan.

Ang nagrabihan sa samad mao si Elder Richard Norby, edad 66, nga nagsebisyo uban sa iyang asawa, si Sister Pam Norby.



Si Richard Norby nagpaalim sa ospital.

Gipamalandungan ni Elder Norby kadto nga gutlo:

“Diha dayon, nahibaloan nako unsay nahitabo.

“Misulay ko sa pagdagan aron maluwas, apan kalit kong nahagba. . . . Akong nakita nga ang wala nakong paa grabe nga nasamdan. [Nakabantay] ko nga may nag-itom, anohos nga daw balay sa lawa-lawang ang akong mga kamot. Akong gihinay og tangtang, apan dili diay kini anohos, ang akong panit nasunog. Ang puti nako nga polo mipula tungod sa samad sa akong buko-buko.

“Dihang nakahinumdon na ko sa unsay nahitabo, mibati ko og grabing kalig-on sa paghunahuna, . . . ang Manluluwas nahibalo asa ako, sa unsay nahitabo, ug [unsay] akong nasinati nianang gutlo.”¹

Dunay malisud nga mga adlaw sa unahan alang ni Richard Norby ug sa iyang asawa, nga si Pam. Gitirahan siya og tambal aron dili siya makamatngon, gisundan sa mga pag-opera, sa mga impeksyon, ug sa walay kasiguroan.

Wala mamatay si Norby, apan ang iyang kinabuhi dili na gayud susama sa una. Paglabay sa duha og tunga ka tuig, padayon pa ang pagkaayo sa mga samad; gipulihan og pugong [brace]



Si Richard ug Pam Norby.

ang nawala nga bahin sa iyang paa; ang matag lakang lahi na kay sa didto sa Airport sa Brussels.

Nganong nahitabo man kini kang Richard ug Pam Norby?² Nagmatinud-anon sila sa ilang mga pakigsaad, nakaserbisyo sila og misyon sa Ivory Coast ug nakapasanay og maanindot nga pamilya. Posibling masabtan ra kon dunay tawo nga moingon nga, “Dili kini patas! Dili gayud kini eksakto! Gipahinungod nila ang ilang kinabuhi alang sa ebanghelyo ni Jesukristo; nganong nahitabo man kini?”

Ingon Niini ang Mortalidad

Bisan og managlahi ang mga detalye, ang mga trahedya, ang wala dahumang mga pagsulay, sa pisikal man ug espiritwal, moabut kanato kay ingon niini ang mortalidad.

Samtang naghunahuna ko karong buntag sa mga mamumulong niini gayud nga sesyon sa komperensya, may nahitabo nga dunay duha nga nawad-an og mga anak ug tulo ang nawad-an og mga apo nga wala dahumang mipauli ngadto sa ilang langitnong panimalay. Walay makalikay sa mga sakit ug kasubo, ug sigun sa gipamulong niining semanaha, usa ka anghel sa yuta nga gipangga kaayo nato, si Sister Barbara Ballard, mitikang sa pikas tabil. Presidente Ballard, dili gayud namo hikalimtan ang imong pagpamatuod niining buntaga.

Nangita kita og kalipay. Naghandom kita og kalinaw. Nangandoy kita og gugma. Ug gibisbisan kita sa Ginoo pinaagi sa makatingalang kaabunda sa mga panalangin. Apan sagol niana nga

kamaya ug kalipay, usa ka butang ang sigurado: dunay mga gutlo, mga oras, mga adlaw, usahay mga tuig nga ang inyong kalag masamdan.

Ang mga kasulatan nagtudlo nga makatilaw kita sa pait ug sa tam-is³ ug nga adunay “katugbang sa tanan nga mga butang.”⁴ Miingon si Jesus, “[Ang inyong Amahan] nagapasubang sa iyang adlaw sa ibabaw sa mga dautan ug sa ibabaw sa mga maayo, ug nagpadalag ulan ngadto sa mga matarung ug sa mga dili matarung.”⁵

Ang mga samad sa kalag dili kay para lang sa mga adunahan o sa kabus, sa usa ka kultura, usa ka nasud, o usa ka henerasyon. Moabut kini sa tanan ug mga kabahin kini sa pagkat-on nga atong madawat niining mortal nga kasinatian.

Wala Magpasabut nga Dili Madutlan ang mga Matarung

Ang akong mensahe karon para gayud niadtong nagtuman sa mga sugo sa Dios, nagtuman sa ilang mga gipangsaad sa Dios, ug, sama sa mga Norby, o sa ubang mga lalaki, mga babaye, ug mga anak niining kinatibuk-ang tigpaminaw, nag-atubang og mga pagsulay ug mga hagit nga wala dahuma ug mahapdos.

Ang atong mga samad posibling maggikan sa natural nga katalagman o sa dimalas nga aksidente. Posibling maggikan kini sa dili matinud-anong bana o asawa, pagbaligtad sa kinabuhi sa matarung nga kapikas ug mga anak. Ang mga samad posibling naggikan sa kasakit ug kasubo tungod sa depresyon, sa wala dahumang balatian, sa pag-antus o sa sayo nga pagkamatay sa tawong gimahal, sa kasubo gikan sa sakop sa pamilya nga mibiya sa iyang gituohan, sa kasubo diin ang mga kahintang wala motugot nga makabaton og mahangturong kapares, o sa gatusan pang uban nga makapasakit, pait nga mga “[kasub-anan] nga dili makita sa mga mata.”⁶

Ang matag usa kanato makasabut nga ang mga kalisdanan kabahin sa kinabuhi, apan kon kini moabut kanato sa personal, makuratan kita. Bisan sa walay pasidaan, kinahanglang

mangandam kita. Si Apostol Pedro miingon, “Ayaw kamo paghikurat sa magasilaob nga kalisdanan nga magabut sa pagsulay kaninyo, nga kaha pagaingnon ninyo nga usa ka talagsaong butang ang nahitabo kaninyo.”⁷ Kauban sa sanag nga mga kolor sa kalipay ug kamaya, ang mas ngiob nga dekolor nga hapnig sa mga pagsulay ug trahedya mga mahinungdanong bahin sa plano sa Amahan. Kini nga mga panglimbasog, bisan lisud, sa kasagaran maoy atong pinakamaayong mga magtutudlo.⁸

Kon magsugilon sa milagrusong sugilanon bahin sa 2,060 ka batan-ong mga sundalo ni Helaman, ganahan kita niini nga kasulatan: “Sumala sa kaayo sa Dios, ug sa among dako nga kahibulong, ug usab sa hingpit nga kalipay sa among tibuok nga kasundalohan, walay usa ka kalag kanila kinsa namatay.”

Apan ang kapahayag [sentence] nagpadayon: “Ug ni usa ka kalag taliwala kanila kinsa wala makadawat og daghan nga mga samad.”⁹ Ang matag usa sa 2,060 nasamdan og daghan, ug ang matag usa kanato masamdan sa pakigbugno sa kinabuhi, sa pisikal man, espiritwal, o niining duha.

Si Jesukristo Ang Atong Maayo nga Samarianhon

Ayaw gayud pagkaluya—bisan unsa kalawom sa mga samad sa inyong kalag, bisan unsay hinungdan, bisan diin o kanus-a nahitabo, ug unsa kadali o kadugay kining maayo, dili tuyo nga kamo mamatay sa espiritwal nga paagi. Gituyo nga kamo makalahutay sa espiritwal nga paagi ug magpuyo ug molambo sa inyong pagtuo ug pagsalig sa Dios.

Wala himoa sa Dios ang atong mga espiritu aron kita dili magkinahanglan Kaniya. Ang atong Ginoo ug Manluluwas, si Jesukristo, pinaagi sa dili masukod nga gasa sa Pag-ula, wala lamang moluwas kanato gikan sa kamatayon ug mitanyag kanato, pinaagi sa paghinulsol, kapasayloan sa atong mga sala, apan Siya mibarug usab nga andam sa pagluwas kanato gikan sa mga kasubo ug mga kasakit sa nasamdan natong mga kalag.¹⁰

Ang Manluluwas mao ang atong Maayo nga Samarianhon,¹¹ nga gipadala sa “pag-ayo sa masulob-ong kasingkasing.”¹² Moduol Siya kanato samtang moagi ra ang uban. Uban sa kalooy, ibutang Niya ang Iyang makaayo nga tambal sa atong mga samad ug bugkusan kini. Siya moagak kanato. Siya nagpakabana kanato. Siya nagdapit kanato, “Duol ngari kanako . . . ug Ako moayo [kaninyo].”¹³

“Ug si [Jesus] . . . [mag-antus] sa mga sakit ug mga kasakit ug mga pagtintal sa matag matang; . . . nga . . . siya [unta] modala diha kaniya sa mga sakit ug mga balatian sa iyang mga katawhan . . . [magdala diha sa Iyang Kaugalingon sa atong] mga kahuyang, [inubanan] sa kalooy.”¹⁴

Dali, kamong nagbangutan, gani nagmagul-anon;

Dali sa lingkuranan sa kalooy, mainitong mag-ampo.

Dad-a ang kasingkasing ninyong samaran: isugilon ang pagbangutan.

*Walay kasub-anan sa yuta nga dili mahupay sa langit.*¹⁵

Atol sa grabing pag-antus, ang Ginoo miingon kang Propeta Joseph, “Kining tanan nga mga butang makahatag kanimo og kasinatian, ug alang sa imong kaayohan.”¹⁶ Sa unsang paagi ang nagngutngot nga mga samad mahimong para sa atong kaayohan? Sa panglimbasog sa yutan-ong mga pagsulay, nga nagmapailubon sa pagpadayon, ang makaayo nga gahum sa Manluluwas magdala og kahayag, panabut, kalinaw, ug paglaum.¹⁷

Ayaw Gayud Paghunong

Pag-ampo sa tibuok ninyong kasingkasing. Lig-ona ang inyong pagtuo kang Jesukristo, diha sa Iyang reyalidad, sa Iyang grasya. Hupot sa iyang mga pulong: “Ang akong grasya igo alang kanimo: kay ang akong gahum ginahingpit diha sa kahuyang.”¹⁸

Hinumdumi, ang paghinulsol usa ka gamhanang espirituhanon nga medisina.¹⁹ Tumana ang mga sugo ug


pagpakatakus sa Maghuhupay, nga mohinumdom sa gisaad sa Manluluwas, “Dili ko kamo pagabiyaan nga daw mga ilo; ako mobalik ra kaninyo.”²⁰

Ang kalinaw diha sa templo makahupay nga tambal sa kalag nga nasamdan. Balik ngadto sa balay sa Ginoo dala ang inyong samaran nga kasingkasing ug mga ngalan sa pamilya kutob sa mahimo. Ang templo mopasalida sa atong mubo nga panahon sa mortalidad sa lapad nga telon sa kahangturan.²¹

Lingia pagbalik, maghinumdom nga giprubahan ninyo ang inyong katakus sa inyong premortal nga kinabuhi. Mga maisug kamo nga anak sa Dios, ug uban niini nga tabang, modaog kamo sa mga pakig-away niining napukan nga kalibutan. Kaniadto nahimo na ninyo kini, ug mahimo na usab ninyo kini.

Tan-awa sa unahan. Ang inyong mga problema ug mga kasub-anan anaa gayud, apan dili kini hangtud sa hangtud.²² Molabay ra ang adlaw ninyong mangitngit, tungod kay “ang Anak . . . [mibangon] uban ang pang-ayo diha sa Iyang mga pako.”²³

Ang mga Norby misulti kanako, “Sa mga okasyon mobisita ang kasagmuyo apan dili tugutan nga magpabilin.”²⁴ Si Apostol Pablo miingon, “Kami ginasa-ki . . . apan wala manghiubos; nangelibog, apan wala kawad-i sa paglaum; ginalutos, apan wala ikapanugyan; gipamunalan hangtud sa pagkapukan, apan wala mangalaglag.”²⁵ Posibling



Sa Abril 1995 nga kinatibuk-ang komperensya, sa pagpamulong mahitungod sa bag-ohay lang nga pagkamatay sa iyang anak nga si Emily, si Presidente Russell M. Nelson mipamatuod nga si Jesukristo naghupot sa mga yawe sa Pagkabanhaw.

mangaluya kamo, apan ayaw gayud paghunong.²⁶

Bisan sa kaugalingon ninyong hapdos nga mga samad, tawhanong kinaiya nga kamo motabang sa uban, magasalig sa saad sa Manluluwas: “Bisan kinsa nga magawagtang sa iyang kina-buhi tungod kanako, makakaplag siya niini.”²⁷ Ang nasamdan nga motambal sa mga samad sa uban mga anghel sa Dios dinhi sa yuta.

Sa pipila na lang ka gutlo, makapaminaw kita sa atong pinalanggang propeta, si Presidente Russell M. Nelson, tawo nga dili matarug ang pagtuo kang Jesukristo, tawo sa paglaum ug kalinaw, gihigugma sa Dios apan wala makalikay sa mga samad sa kalag.

Niadtung 1995 ang iyang anak nga babaye si Emily, sa hapit na manganak,



“Pinaagi sa pagtuman sa mga sugo sa Dios,” si Presidente Nelson misulti sa mga Santos sa Puerto Rico, “makakaplag kita’g kalipay bisan sa kinangil-arang mga kahintang.”

nadayagnos nga dunay kanser. Dunay mga adlaw sa paglaum ug kalipay samtang nahimugso ang baskog niyang anak. Apan mibalik ang kanser, ug ang pinangga nilang si Emily duha lang ka semana human sa iyang ika-37 nga birthday, mibiya sa iyang mapinangga-ong bana ug lima ka gagmayng anak.

Sa kinatibuk-ang komperensya, wala madugay human siya namatay, mitug-an si Elder Nelson: “Ang akong mga luha sa kasubo midagayday inubanan sa mga panghinaot nga unta nakahimo ko og mas daghan pa sa akong anak. . . . Kon duna pa koy gahum sa pagbanhaw, tingali matintal ko sa pagbuhi kaniya. . . . [Apan] si Jesus ang naghupot niana nga mga yawe ug gamiton kini alang kang Emily . . . ug sa tanang katawhan sa kaugalingong panahon sa Ginoo.”²⁸

Sa miaging bulan, samtang mibisita sa mga Santos sa Puerto Rico, ug naghinumdom sa makaguba nga kusog kaayo nga bagyo, namulong si Presidente Nelson uban sa gugma ug kalooy:

“[Usa kini ka bahin] sa kinabuhi.

Mao nga nia kita dinhi. Ania kita aron makaangkon og lawas ug masulayan. Ang uban niini nga pagsulay mga piskal; ang uban mga espirital, ug ang inyong mga pagsulay dinhi pisikal ug espirital.”²⁹

“Wala kamo mawad-i sa paglaum. Mapasigarbuhon [kaayo] mi kaninyo. Kamong matinud-anong mga Santos nawad-an og daghan, apan bisan sa tanan, giugmad ninyo ang inyong pagtuo diha ni Ginoong Jesukristo.”³⁰

“Pinaagi sa pagtuman sa mga sugo sa Dios, makakaplag kita’g kalipay bisan sa kinangil-arang mga kahimtang.”³¹

Ang Tanang Luha Mapahiran

Mga kaigsoonan, akong saad diha ninyo nga ang pagpalambo sa inyong pagtuo diha ni Ginoong Jesukristo magdala kaninyo og dugang nga kalig-on ug mas dakong paglaum. Alang kaninyo, ang matarung, ang Tig-ayo sa atong mga kalag, sa Iyang panahon ug sa Iyang paagi, moayo sa inyong mga samad.³² Walay inhustisya, walay pagpanglutos, walay pagsulay,

walay kasakit, walay pag-antus, walay samad—bisan unsa ka lawom, unsa ka dako, unsa kahapdos—ang dili malakip sa pagkahupay, sa kalinaw, ug malungtarong paglaum diha Kaniya kansang mahangupon nga mga bukton ug samaran nga mga kamot mohangop kanato balik sa Iyang presensya. Nianang adlaw, si Apostol Juan nagpamatuod, nga ang mga matarung nga “nanagpakalabang sa dagkung kasakitan”³³ mobarug nga “nanagsul-ob ug mga bisting maputi . . . atubangan sa trono sa Dios.” Ang Kordero “anaa [taliwala kanato] . . . ug pagapahiran sa Dios ang tanang luha sa [inyong] mga mata.”³⁴ Kining adlaw moabut. Mopamatuod ako sa pangalan ni Jesukristo, amen. ■

MUBO NGA MGA SULAT

1. Personal nga pagpakigsulti, Ene. 26, 2018.
2. Sa usa ka pagpakigsulti sayo niining tuiga, si Richard Norby miingon kanako, “Manubag kita sa unsay gihatag kanato.” Gipaambit niya kini gikan sa iyang journal: “Ang mga pagsulay nga moabut sa matag usa kanato maghatag og oportunidad ug kahigayunan sa pagkaila og maayo sa Manluluwas ug pagsabut sa mas lawom nga detalye sa iyang maulaon nga sakripisyo. Siya ang atong kasandigan. Siya ang atong gipangita. Siya ang atong kasaligan. Siya ang butangan sa atong pagsalig. Siya ang atong higugmaon sa tibuok natong kasingkasing, sa walay pagduha-duha. Ang Manluluwas mitabon sa tanang pisikal ug emosyonal nga mga kasakit nga mga kabahin sa mortalidad. Siya ang motangtang sa mga kasakit gikan kanato. Giangkon Niya ang atong mga kasub-anan.”
3. Tan-awa sa Doktrina ug mga Pakigsaad 29:39.
4. 2 Nephi 2:11.
5. Mateo 5:45.
6. “Lord, I Would Follow Thee,” *Hymns*, nu. 220.
7. 1 Pedro 4:12.
8. “Ug kita mosulay kanila dinhi, aron pagsuta kon sila mobuhat ba sa tanan nga mga butang bisan unsa ang isugo sa Ginoo nga ilang Dios ngadto kanila” (Abraham 3:25; tan-awa usab sa Doktrina ug mga Pakigsaad 101:4–5).
9. Alma 57:25.
10. Usa ka higala ang misulat kanako: “Ang habit lima ka tuig nga pagpakigbatok sa emosyonal nga ‘kangitngit ug kasubo’ sa managlahi nga ang-ang modala kanimo ngadto sa pinakangilit sa inyong kapasidad, pagdesisyon, pagtuo, ug pagpailub. Human sa mga adlaw sa ‘pag-antus,’ naluya ka. Human sa mga semana nga ‘pag-antus,’ nahutdan ka sa kusog. Human sa mga bulan nga ‘pag-antus,’ nagkahuyang ka. Human

sa mga tuig sa ‘pag-antus,’ gidawat nimo ang posibilidad nga dili ka na maulian pa. Ang paglaum maoy pinakabilhon, ug pinakaidlas, sa mga gasa. Buot ipasabut, dili ako sigurado kon nahibalo ba ko kon unsaon nako paglatas kini nga pagsulay, gawas [sa Manluluwas]. Mao lamang kana ang ikapasabut. Wala ko mahibalo giunsa nako sa pagkahibalo niini, gawas nga ako nahibalo. Tungod Kaniya, ako nakalatas niini.”

11. Tan-awa sa Lucas 10:30–35.
12. Lucas 4:18; tan-awa usab sa Isaias 61:1.
13. 3 Nephi 18:32.
14. Alma 7:11–12. “Siya mikunsad sa tanan nga mga butang, niana siya nakatugkad sa tanan nga mga butang” (Doktrina ug mga Pakigsaad 88:6).
15. “Come, Ye Disconsolate,” *Hymns*, nu. 115.
16. Doktrina ug mga Pakigsaad 122:7.
17. “Ikaw nasayud sa pagkagamhanan sa Dios; ug siya nagpahinugod sa imong mga kasakit alang sa imong kaayohan.” (2 Ne. 2:2). “Ako nasayud nga kinsa ang mobutang sa ilang pagsalig diha sa Dios pagabuligan sa ilang mga pagsulay ug sa ilang mga kasamok, ug sa ilang mga kasakit, ug pagabayawon sa katapusan nga adlaw” (Alma 36:3).
18. 2 Mga Taga-Corinto 12:9.
19. Tan-awa sa See Neil L. Andersen, “The Joy of Becoming Clean,” *Ensign*, Abr. 1995, 50–53.
20. Juan 14:18.
21. “Kon niini rang kinabuhia may paglaum kita kang Kristo, nan, sa tanang mga tawo kita mao ang labing takus pagakaloy-an” (1 Mga Taga-Corinto 15:19).
22. Sa unang bersikulo sa Basahon ni Mormon, mipasabut si Nephi nga siya, “nakasinati sa daghan nga mga kasakit sa [inyang] panahon” (1 Nephi 1:1). Sa wala madugay, miingon si Nephi, “Bisan pa niini, ako midangop sa akong Dios, ug ako midayeg kaniya sa tibuok adlaw; ug wala ako magbagulbol batok sa Ginoo tungod sa akong mga kasakit” (1 Nephi 18:16).
23. 3 Nephi 25:2.
24. Personal nga pagpakigsulti, Ene. 26, 2018.
25. 2 Mga Taga-Corinto 4:8–9.
26. Si Presidente Hugh B. Brown, samtang mibisita sa Israel, gipangutana kon nganong si Abraham gisugo sa pagsakripisyo sa iyang anak. Mitubag siya, “Si Abraham nagkinahanglan nga makakat-on og butang mahitungod ni Abraham” (sa Truman G. Madsen, *Joseph Smith the Prophet* [1989], 93).
27. Mateo 16:25.
28. Russell M. Nelson, “Children of the Covenant,” *Ensign*, Mayo 1995, 32.
29. Russell M. Nelson, sa Jason Swensen, “Better Days Are Ahead for the People of Puerto Rico,” *Church News*, Sept. 9, 2018, 4.
30. Russell M. Nelson, sa Swensen, “Better Days Are Ahead,” 3.
31. Russell M. Nelson, sa Swensen, “Better Days Are Ahead,” 4.
32. Tan-awa sa Russell M. Nelson, “Jesukristo—ang Gamhanang Tig-ayo,” *Liahona*, Nob. 2005, 85–88.
33. Pinadayag 7:14.
34. Tan-awa sa Pinadayag 7:13, 15, 17.



Ni Presidente Russell M. Nelson

Ang Sakto nga Ngalan sa Simbahan

Si Jesukristo misugo nato sa pagtawag sa Simbahan pinaagi sa Iyang ngalan tungod kay kini Iyang Simbahan, nga puno sa Iyang gahum.

Minahal nakong mga kaigsoonan, niining matahum nga adlaw sa Igpapahulay nalipay kita sa atong daghang panalangin gikan sa Ginoo. Mapasalamaton kami kaayo sa inyong pagpamatuod sa gipahiuli nga ebanghelyo ni Jesukristo, sa mga sakripisyo nga inyong gihimo sa pagpadayon o pagbalik ngadto sa Iyang dalan sa pakigsaad, ug sa inyong gipahinungod nga pag-alagad sa Simbahan.

Karon nakahukom ko nga mohisgot ninyo sa butang nga importante kaayo. Pipila ka semana ang milabay, mipagawas ko og pamahayag kabahin sa saktong pagtawag sa ngalan sa Simbahan.¹ Gibuhat nako kini tungod kay ang Ginoo midasig sa akong hunahuna sa kaimportante sa ngalan nga Iyang gihatag alang sa Iyang Simbahan, bisan Ang Simbahan ni Jesukristo sa mga Santos sa Ulahing mga Adlaw.²

Sama sa gipaabut, ang mga tubag niini nga pamahayag ug sa giusab nga giya³ nagkadaiya. Daghang mga miyembro diha-diha mikorihir sa ngalan sa Simbahan sa ilang mga pahina sa blog ug social media. Ang uban natingala ngano, nianang tanan nga nahitabo, gikinahanglan nga hatagan

og gibug-aton ang butang nga ingon og “dili importante.” Ug ang pipila mi-ingon nga dili kana mahimo, mao nga nganong mosulay pa man? Ipasabut nako nganong nagpakabana kaayo kami niini nga isyu. Apan una tuguti ko nga mopahayag unsa nga paningkamot ang *dili*:

- Dili kini pag-usab sa ngalan.
- Dili kini pag-usab sa imahe.
- Dili kini taphaw.
- Dili usa ka kapritso.
- Ug dili kini gamayng butang.

Hinoon kini *usa ka* koreksyon. *Kini* mao ang sugo sa Ginoo. Si Joseph Smith wala mipangalan sa Simbahan nga gipahiuli pinaagi kaniya; mao usab si Mormon. Ang Manluluwas Mismo ang nag-ingon, “Kay sa ingon ang akong simbahan pagatawgon sa katapusan nga mga adlaw, gani Ang Simbahan ni Jesukristo sa mga Santos sa Ulahing mga Adlaw.”⁴

Bisan sa sayo pa, niadtong AD 34, ang atong nabanhaw nga Ginoo mihatag sa susama nga instruksyon ngadto sa mga miyembro sa Iyang Simbahan sa dihang mibisita Siya kanila didto

sa Amerika. Nianang higayuna Siya miingon:

“Busa kamo motawag sa simbahan sa akong ngalan. . . .

“Ug unsaon kining akong simbahan kon kini dili pagatawgon sa akong ngalan? Kay kon ang usa ka simbahan pagatawgon sa ngalan ni Moises niana kini simbahan ni Moises; o kon kini pagatawgon sa ngalan sa usa ka tawo niana kini simbahan sa tawo; apan kon kini pagatawgon sa akong ngalan niana kini mao ang akong simbahan, kon kini mao nga sila natukod diha sa akong ebanghelyo.”⁵

Sa ingon, ang ngalan sa Simbahan dili mausab. Sa dihang ang Manluluwas klaro nga namahayag unsay ngalan sa Iyang Simbahan ug gani giunhan sa Iyang pamahayag sa, “Kay sa ingon ang akong simbahan pagatawgon,” Siya seryoso. Ug kon kita motugot nga gamiton ang mga angga o modawat o kita mismo mopasiugda niadto nga mga angga, Siya masilo.

Unsay naa sa ngalan o niining kahimtanga, ang usa ka angga? Kon bahin na sa mga angga sa Simbahan, sama sa “LDS Church,” ang “Mormon Church,” o ang “Simbahan sa mga Santos sa Ulahing mga Adlaw,” ang labing importanting butang *sa* maong mga ngalan mao ang *pagkawala* sa ngalan sa Manluluwas. Ang pagkuha sa ngalan sa Ginoo gikan sa Simbahan sa Ginoo usa ka dakong kadaugan ni Satanas. Kon atong *kuhaon* ang ngalan sa





Manluluwas, gituyo sa *pagbaliwala* ang tanan nga gibuhay ni Jesukristo alang nato—bisan sa Iyang Pag-ula.

Ikonsiderar kini gikan sa Iyang panglantaw: Sa kinabuhi nga wala pa dinhi sa yuta Siya mao si Jehova, ang Dios sa Daang Tugon. Ubos sa direksyon sa Iyang Amahan, Siya ang Tiglalang niini ug sa ubang mga kalibutan.⁶ Siya mipili sa pagtugyan ngadto sa kabubut-on sa Iyang Amahan ug sa pagbuhay og butang alang sa mga anak sa Dios nga walay lain ang makahimo! Mikunsad aron moanhi sa yuta isip ang Bugtong Anak sa Amahan sa unod, Siya bangis nga giinsulto, gibugal-bugalan, gilud-an, ug gihampak. Sa Tanaman sa Getsemani, ang atong Manluluwas midala sa Iyang Kaugalingon sa *matag* kasakit, *matag* sala, ug sa *tanang* nga hilabihan nga kagulangan ug pag-antus nga *sukad* ninyo nasinati ug nako ug sa tanan nga sukad natawo o matawo pa. Ubos sa masakit kaayo nga alantuson, miagas ang Iyang dugo sa matag lungag sa panit.⁷ Kining tanang mga pag-antus migrabe pa sa dihang bangis Siya nga gilansang sa krus didto sa Kalbaryo.

Pinaagi niining masakit kaayo nga mga kasinatian ug sa Iyang misunod nga Pagkabanhaw—ang Iyang walay kinutuban nga Pag-ula—Iyang gihatag ang pagka-imortal ngadto sa tanan, ug mitubos sa matag usa kanato gikan sa mga epekto sa sala,

sa kondisyon sa atong paghinulsol.

Human sa Pagkabanhaw sa Manluluwas ug sa kamatayon sa Iyang mga Apostoles, ang kalibutan nag-antus sa taas nga panahon sa kangitngit. Dayon niadtong 1820, ang Dios nga Amahan ug ang Iyang Anak, nga si Jesukristo, nagpakita ngadto ni Propeta Joseph Smith aron sugdan ang Pagpahiuli sa Simbahan sa Ginoo.

Human sa tanan nga Iyang giantus—ug human sa tanan nga iyang nahi-mo alang sa katawhan—nakaamgo ko og dakong kasubo nga kita midawat nga wala maghunahuna sa gipahiuli nga Simbahan sa Ginoo nga tawagon sa laing mga ngalan, ang matag usa mikuha sa sagrado nga pangalan ni Jesukristo!

Matag Dominggo samtang takus kitang moambit sa sakrament, atong gibag-o ang atong sagrado nga saad ngadto sa atong Langitnong Amahan nga kita andam sa pagdala diha kanato sa ngalan sa Iyang Anak, nga si Jesukristo.⁸ Misaad kita nga mosunod Kaniya, maghinulsol, motuman sa Iyang mga sugo, ug sa *kanunay* mahinumdom Kaniya.

Kon kuhaon nato ang Iyang ngalan gikan sa Iyang Simbahan, wala nato tuyoa ang pagkuha *Kaniya* nga mao ang sentro nga gitutukan sa atong kinabuhi.

Ang pagdala sa ngalan sa Manluluwas diha kanato naglakip sa pagpahayag ug pagsaksi ngadto sa

uban—pinaagi sa atong mga lihog ug sa atong mga pulong—nga si Jesus mao ang Kristo. Nahadlok ba kaayo kita nga *masilo* ang usa ka tawo nga motawag nato og “Mormons” nga kita napakyas sa *pagpanalipod* sa Manluluwas Mismo, sa pagbarug alang Kaniya bisan sa ngalan diin gitawag ang Iyang Simbahan?

Kon kita isip katawhan ug indibidwal gustong makagamit sa gahum sa Pag-ula ni Jesukristo—sa paglimpyo ug pag-ayo kanato, sa paglig-on ug pagpalambo nato, ug sa katapusan sa paghimaya kanato—kinahanglan nga atong klarohon ang pag-ila Kaniya isip ang tinubdan niana nga gahum. Makasugod kita pinaagi sa pagtawag sa Iyang Simbahan sa ngalan nga Iyang gihatag.

Alang sa kalibutan, ang Simbahan sa Ginoo sa karon nagtakuban nga “Simbahan sa Mormon.” Apan kita nga mga miyembro sa Simbahan sa Ginoo nasayud kinsa ang nagbarug niini nga pangulo: si Jesukristo Mismo. Subo lang, ang kadaghanan nga makadungog sa pulong *Mormon* maghunahuna nga kita nagsimba ni Mormon. Dili baya! Atong gipasidunggan ug gitahud kad-tong bantugan nga karaang propeta sa Amerika.⁹ Apan *dili* kita mga disipulo ni Mormon. Kita mga disipulo sa Ginoo.

Sa unang mga adlaw sa gipahiuli nga Simbahan, ang mga pulong sama sa *Simbahan sa Mormon* ug *Mormons*¹⁰ sa kasagaran gigamit isip angga—isip dili maayo ug giabusohan nga mga pulong—gihimo aron sa pagbabag sa Dios sa pagpahiuli sa Simbahan ni Jesukristo niining ulahing mga adlaw.¹¹

Mga kaisugsoonan, adunay daghang kalibutanong argumento batok sa pagpahiuli sa saktong ngalan sa Simbahan. Tungod sa digital nga kalibutan sa atong panahon ug uban sa search engine optimization nga nagtabang natong tanan sa pagpangita og impormasyon nga atong gikinahanglan hapit diha-diha dayon—lakip sa impormasyon mahitungod sa Simbahan sa Ginoo ang mga kritiko nagsulti nga ang koreksyon niining higayuna dili maalamon. Ang uban mibati nga tungod kay kita nailhan sa kadaghanan isip “Mormons” ug isip “Simbahan sa Mormon,” dawaton na lang nato kini.

Kon kini nga panaghisgutan mahitungod sa paghingalan sa hinimo sa tawo nga organisasyon, kadto nga mga argumento maoy mopatigbabaw. Apan niining importante nga butang, kita nagtan-aw Kaniya kansang Simbahan mao kini ug miila nga ang mga pamaagi sa Ginoo dili, ug dili gayud, mao ang pamaagi sa tawo. Kon kita magmapailubon ug maayong mobuhat sa atong bahin, ang Ginoo mogiya nato agi niining importante nga buluhaton. Human sa tanan, nasayud kita nga ang Ginoo motabang niadtong kinsa nagtinguha sa pagbuhat sa Iyang kabubut-on, sama sa Iyang pagtabang ni Nephi nga mahuman ang buluhaton sa pagbuhat og barko aron motabok sa dagat.¹²

Gusto kitang magmatinahuron ug magmapailubon sa atong paningkamot sa pagkorihir niini nga mga sayop. Ang responsable nga media makasabut sa pagtubag sa atong hangyo.

Sa milabay nga kinatibuk-ang komperensya, si Elder Benjamín De Hoyos naghisgot sa mao nga kalihokan. Miingon siya:

“Pipila ka mga tuig ang milabay samtang nagserbisyo sa opisina sa public affairs sa Simbahan didto sa Mexico, [akong kompanyon ug ako] gidapit kami sa pag-apil sa usa ka pasundayag sa radyo. . . . [Usa sa mga direktor sa programa] nangutana [kanamo], ‘Ngano nga ang Simbahan adunay taas kaayo nga pangalan? . . .’

“Mipahiyom ang akong kompanyon ug ako sa ingon kanindot nga pangutana ug dayon mipadayon sa pagpasabut nga ang pangalan sa Simbahan dili

pinili sa tawo. Kini gihatag sa Manlu-luwas. . . . Ang direktor sa programa diha-diha dayon ug matinahuron nga mitubag, ‘Busa kami mosubli niini uban sa dakong kalipay.’”¹³

Kana nga report nakahatag og sundanan. Tagsa-tagsa, ang atong labing maayong paningkamot isip indibidwal gikinahanglan sa pagkorihir sa mga sayop nga gidawat sa nanglabay nga katuigan.¹⁴ Ang uban sa kalibutan mahimong mosunod o dili sa atong pagsulti nga tawagon kita sa sakto nga ngalan. Apan nagpakaaron-ingnon kita nga nahigawad kon ang kadaghanan sa kalibutan motawag sa Simbahan ug sa mga miyembro niini sa sayop nga mga ngalan kon mao usab ang atong gibuhat.

Ang atong giusab nga estilo nga giya makatabang. Kini namahayag: “Sa unang pagpasabut, ang hingpit nga ngalan sa Simbahan maoy sakto: ‘Ang Simbahan ni Jesukristo sa mga Santos sa Ulahing mga Adlaw.’ Kon ang gipamubo ang [ikaduha] nga pagpasabut gikinahanglan, ang mga pulong ‘ang Simbahan’ o ang ‘Simbahan ni Jesukristo’ giawhag. Ang ‘gipahiuli nga Simbahan ni Jesukristo’ sakto usab ug giawhag.”¹⁵

Kon dunay mangutana, “Mormon ka ba?” mahimo kang motubag, “Kon ikaw nangutana kon ako miyembro ba sa Ang Simbahan ni Jesukristo sa mga Santos sa Ulahing mga Adlaw, oo, ako!”

Kon dunay mangutana, “Ikaw ba Santos sa Ulahing mga Adlaw?”¹⁶ mahimo kang motubag, “Oo, ako. Mituo ko ni Jesukristo ug ako miyembro sa Iyang gipahiuli nga Simbahan.”

Minahal kong mga kaigsoonan, mosaad ko kaninyo nga kon kita mobuhat sa atong labing maayo sa pagpahiuli sa saktong ngalan sa Simbahan sa Ginoo, Siya kansang Simbahan mao kini mobu-bu sa Iyang gahum ug mga panalangin diha sa mga ulo sa mga Santos sa Ulahing mga Adlaw,¹⁷ sa mga paagi nga wala nato makita sukad. Makabaton kita sa kahibalo ug gahum sa Dios aron matabangan kita sa pagdala sa mga panalangin sa gipahiuli nga ebanghelyo ni Jesukristo ngadto sa matag nasud, kaliwatan, pinulongan, ug katawhan ug sa pag-andam sa kalibutan alang sa Ikaduhang Pag-anhi sa Ginoo.

Unsay anaa sa ngalan? Kon bahin kini sa ngalan sa Simbahan sa Ginoo, ang tubag mao ang “Tanani!” Si Jesukristo misugo nato sa pagtawag sa Simbahan pinaagi sa Iyang ngalan tungod kay kini Iyang Simbahan, nga puno sa Iyang gahum.

Nasayud ko nga ang Dios buhi. Si Jesus mao ang Kristo. Gigiyaan Niya ang Iyang Simbahan karon. Sa ingon niana ako mopamatuod pinaagi sa sagradong ngalan ni Jesukristo, amen. ■

MUBO NGA MGA SULAT

1. “Ang Ginoo midasig sa akong hunahuna sa kaimportante sa ngalan nga Iyang gipadayag alang sa Iyang Simbahan, bisan Ang Simbahan ni Jesukristo sa mga Santos sa Ulahing mga Adlaw. Naningkamot kita sa una sa pagpahiangay sa atong kaugalingon nga subay sa Iyang kabubut-on. Sa milabayng mga semana, ang lain-laing mga lider ug mga departamento nagsugod sa gikinahanglan nga mga lakang sa pagbuhat sa ingon. Dugang nga impormasyon mahitungod niining importante nga butang anaa na sa umaabut nga mga bulan” (Russell M. Nelson, “The Name of the Church” [official statement, Ago. 16, 2018], mormonnewsroom.org).
2. Ang Nangagi nga mga Presidente sa Simbahan mihimo sa susama nga mga hangyo. Pananglitan, si Presidente George Albert Smith miingon: “Ayaw itugot nga ang Ginoo masuko pinaagi sa pagtawag niini nga Simbahan ni Mormon. Wala kini Niya tawaga nga Simbahan ni Mormon” (sa Conference Report, Abr. 1948, 160–61).
3. Tan-awa sa “Style Guide—The Name of the Church” mormonnewsroom.org.
4. Doktrina ug mga Pakigsaad 115:4.
5. 3 Nephi 27:7–8.
6. Tan-awa sa Moises 1:33.
7. Tan-awa sa Doktrina ug mga Pakigsaad 19:18.
8. Tan-awa sa Moroni 4:3; Doktrina ug mga Pakigsaad 20:37, 77.



9. Si Mormon mao ang usa sa upat ka importante nga magsusulat sa Basahon ni Mormon, ang uban mao sila si Nephi, Jacob, ug Moroni. Ang tanan mga saksi sa Ginoo, sama sa nadasig nga maghuhubad, si Propeta Joseph Smith.
10. Bisan ang pulong nga *Mormonites* apil sa mga pulong nga gigamit sa pagtamay (tan-awa sa *History of the Church*, 2:62–63, 126).
11. Laing mga angga ingon og makita sa panahon sa Bag-ong tugon. Atol sa husay ni Apostol Pablo sa atubangan ni Felix, si Pablo giingon nga “usa ka pangulo sa pundok sa Nazareno” (Mga Buhat 24:5). Kabahin sa paggamit sa mga pulong “sa mga Nazareno,” usa ka komentarista misulat: “Mao kini ang ngalan nga gihatag ngadto sa mga Kristiyano nga gitamay. Gitawag sila niini tungod kay si Jesus gikan man sa Nazaret” (Albert Barnes, *Notes, Explanatory and Practical, on the Acts of the Apostles* [1937], 313).
Sa samang paagi, laing komentarista namahayag: “Sama sa atong Ginoo nga tinamay nga gitawag ‘Ang Nazareno’ (Matt. xxvi. 71), mao nga ang mga Judeo mitawag sa iyang mga tinun-an nga ‘mga Nazareno.’ Dili sila modawat nga sila mga Kristiyano, *pananglit* mga tinun-an sa Mesiyas” (*The Pulpit Commentary: The Acts of the Apostles* ed. H. D. M. Spence and Joseph S. Exell [1884], 2:231).
Sa samang paagi, si Elder Neal A. Maxwell nakaobserbar: “Sa tibuok kasaysayan sa kasulatan, makita nato ang nagbalik-balik nga paningkamot sa pagpakaulaw sa mga propeta aron sa pagsalikway kanila—sa paghingalan kanila aron sila mawala. Kasagaran, hinoon, sila gibaliwala ra sa ilang mga kauban ug sa sekular nga kasaysayan. Human sa tanan, ang unang mga Kristiyano gitawag lang og ‘ang pundok sa mga Nazareno.’ (Mga Buhat 24:5.)” (“Out of Obscurity,” *Ensign*, Nob. 1984, 10).
12. Tan-awa sa 1 Nephi 18:1–2.
13. Benjamín De Hoyos, “Gitawag nga Mahimong mga Santos,” *Liahona*, Mayo 2011, 106.
14. Samtang kita walay kontrol sa unsay itawag kanato sa ubang mga tawo, kita adunay kompleto nga pagkontrol kon unsaon nato sa pagpaila sa atong kaugalingon. Unsaon nato sa pagpaabut nga ang uban motahud sa sakto nga ngalan sa Simbahan kon kita nga mga miyembro mapakyas sa pagbuhat sa ingon?
15. Style Guide—The Name of the Churchmormonnewsroom.org.
16. Ang pulong nga *santos* gigamit kanunay sa Balaan nga Biblia. Sa Sulat [Epistle] ni Pablo ngadto sa Mga Taga-Efeso, pananglitan, migamit siya sa pulong nga *santos* dili mominus kausa sa matag kapitulo. Ang usa ka santos mao ang usa ka tawo kinsa nagtuo ni Jesukristo ug naningkamot sa pagsunod kaniya.
17. Tan-awa sa Doktrina ug mga Pakigsaad 121:33.



Ni Presidente Henry B. Eyring

Ikaduhang Magtatambag sa Unang Kapangulohan

Sulayi, Sulayi, Sulayi

Ang Manluluwas mibutang sa Iyang ngalan diha sa inyong kasingkasing. Ug kamo mibati sa tiunay nga gugma ni Kristo alang sa uban ug sa inyong kaugalingon.

Minahal kong mga kaigsoonan, nagpasalamat ko sa oportunidad nga makapamulong kaninyo. Kini nga komperensya makabayaw ug makapalig-on kanako. Ang gikanta nga musika ug ang mga pulong nga gipamulong misulod sa atong kasingkasing pinaagi sa Espiritu Santo. Nag-ampo ko nga ang akong isulti mahatud diha kaninyo pinaagi nianang sama nga Espiritu.

Daghang tuig ang milabay, unang magtatambag ko sa district president sa sidlakan sa Estados Unidos. Sobra sa kausa, samtang nagbiyahe kami ngadto sa among gagmayng branch, miingon siya nako, “Hal, kon makahimamat ka og tawo, tagda sila sama nga daw anaa silay dagkong problema, maeksakto ka labaw sa sengkwenya porsyento nianang panahona.” Dili lang kay eksakto siya, apan sulod sa katuigan akong nahibaloan nga ubos ra kaayo ang iyang pagbanabana. Karon gusto kong modasig kaninyo sa mga problema nga inyong giatubang.

Ang mortal natong kinabuhi gidesinyo sa mapinanggaon nga Dios isip pagsulay ug tinubdan sa kalamboan sa matag usa kanato. Hinumdumi ang mga pulong sa Dios bahin sa Iyang mga anak panahon sa paglalang sa

kalibutan: “Ug kita mosulay kanila dinhi, aron pagsuta kon sila mobuhat ba sa tanan nga mga butang bisan unsa ang isugo sa Ginoo nga ilang Dios ngadto kanila.”¹

Sukad sa sinugdanan, ang mga pagsulay dili sayon. Nag-atubang kita og mga pagsulay gumikan sa pag-angkon og mga lawas nga mortal. Tanan kita nagpuyo sa kalibutan diin nagkagrade ang pakiggubat ni Satanas batok sa kamatuoran ug batok sa personal natong kalipay. Ang kalibutan ug ang inyong kinabuhi posibling para ninyo anaa sa nagtubo nga kasamok.

Ang akong pagpaniguro mao kini: ang mapinanggaon nga Dios kinsa mitugot niining mga pagsulay alang ninyo usab midesinyo og siguradong paagi nga malatasan kini. Kay gihigugma gayud sa Langitnong Amahan ang kalibutan nga Iyang gipadala ang Iyang Hinigugmang Anak sa pagtabang kanato.² Ang Iyang Anak, si Jesukristo, mihtag sa Iyang kinabuhi alang kanato. Gipas-an ni Jesukristo sa Getsemani ug sa krus ang gibug-aton sa tanan natong mga sala. Gisinati Niya ang tanan natong mga kasub-anan, mga kasakit, ug mga epekto sa atong mga sala aron Iya kitang mahupay ug malig-on latas sa matag pagsulay sa kinabuhi.³

Hinumdumi nga ang Ginoo miingon sa Iyang mga sulugoon:

“Ang Amahan ug Ako usa ra. Ako anaa sa Amahan ug ang Amahan ania kanako; ug tungod kay kamo nakadawat kanako, kamo ania kanako, ug Ako anaa kaninyo.

“Busa, Ako anaa sa inyong taliwala, ug Ako ang maayo nga magbalantay, ug ang bato sa Israel. Siya nga nagtukod sa ibabaw niining lig-on nga sukaranan dili gayud mapukan.”⁴

Ang atong propeta, si Presidente Russel M. Nelson, mihatag usab kanato nianang sama nga kasiguroan. Dugang pa, gihulagway niya ang paagi nga atong matukod diha sa bato ug mabutang ang ngalan sa Ginoo diha sa atong mga kasingkasing sa paggiya kanato latas sa atong mga pagsulay.

Miingon siya: “Kamo kinsa posibling masakitan sa makadiyot, hinumdumi, ang kinabuhi wala himoa nga sayon. Mga pagsulay kinahanglang pas-anon ug kasub-anan antuson samtang magpadayon. Kon inyong mahinumduman nga uban ‘sa Dios walay butang nga dili mahimo’ (Lucas 1:37), sayri nga Siya inyong Amahan. Kamo mga anak nga gimugna subay sa Iyang panagway, may katungod pinaagi sa inyong katakus sa pagdawat og pagpadayag aron matabangan kamo sa matarung ninyong mga paningkamot. Pwede ninyong dad-on diha kaninyo ang balaan nga ngalan sa Ginoo. Pwede kamong mosarang sa pagpamulong sa sagradong pangalan sa Dios (tan-awa sa D&P 1:20).”⁵

Ang mga pulong ni Presidente Nelson nagpahinumdom kanato sa saad nga anaa sa mga pag-ampo sa sakramento, saad sa atong Langitnong Amahan nga tumanon kon buhaton nato ang atong gisaad.

Paminawa ang mga pulong: “O Dios, ang Amahan sa Kahangturan, kami mangayo kanimo pinaagi sa ngalan sa imong Anak, nga si Jesukristo, sa pagpanalangin ug pagbalaan niining pan ngadto sa mga kalag sa tanan niadto kinsa moambit niini; nga sila unta mokaon agi og handumanan sa lawas sa imong Anak, ug mosaksi nganha kanimo, O Dios, ang Amahan



sa Kahangturan, nga sila andam sa pagdala nganha kanila sa ngalan sa imong Anak, ug sa kanunay mohinumdom kaniya ug maghupot sa iyang mga sugo diin siya mihatag kanila, nga sila unta sa kanunay makabaton sa iyang Espiritu uban kanila. Amen.”⁶

Matag adlaw sa atong paglitok sa pulong nga *amen* kon ihalad kana nga pag-ampo alang kanato, nagsaad kita nga sa pag-ambit sa pan, kita andam sa pagdala diha kanato sa balaan nga ngalan ni Jesukristo, kanunay nga mohinumdom Kaniya, ug maghupot sa Iyang mga sugo. Agig balos, gisaaran kita nga kita sa kanunay makabaton sa iyang Espiritu uban kanato. Tungod niining mga saad, ang Manluluwas maoy bato diin kita makabarug nga luwas ug walay kahadlok sa matag unos nga atong atubangan.

Samtang namalandong ako sa mga pulong sa pakigsaad ug sa katugbang nga panalangin nga gisaad, naghunahuna ko unsay ipasabut sa pagkaandam nga modala diha kanato sa ngalan ni Jesukristo.

Si Presidente Dallin H. Oaks mipasabut: “Mahinungdanon nga kon moambit kita sa sakrament dili kita mosaksi nga kita *nagdala diha kanato* sa ngalan ni Jesukristo. Mosaksi kita nga kita *andam* sa pagbuhat niana. (Tan-awa sa D&P 20:77.) Ang katinuod nga magsaksi lamang kita sa atong kaandam nagsugyot nga dunay laing butang nga kinahanglang gayud nga mahitabo sa dili pa kita modala nianang sagrado nga ngalan ngari kanato sa pinakamahinungdanong paagi.”⁷

Ang pamahayag nga kita “andam nga modala diha [kanato]” sa Iyang

ngalan nag-ingon kanato nga samtang una natong gidala ang ngalan sa Manluluwas dihang gibunyagan kita, ang pagdala sa Iyang ngalan wala matapos diha sa bunyag. Padayon pa kitang maningkamot sa pagdala sa Iyang ngalan sa tibuok natong kinabuhi, lakip sa higayon nga magbag-o kita sa atong mga pakigsaad sa pag-ambit sa sakramento ug makigsaad diha sa balaang mga templo sa Ginoo.

Mao nga ang labing importanting mga pangutana sa matag usa kanato mao “Unsay angay nakong buhaton aron madala ang Iyang ngalan ngari kanako?” ug “Unsaon nako sa pagkahibalo nga ako naglambo?”

Ang pamahayag ni Presidente Nelson nagsugyot og usa ka mapuslanong tubag. Miingon Siya nga mahimo nato ang pagdala sa ngalan sa Manluluwas ngari kanato ug nga kita makapamulong alang Kaniya. Kon mamulong kita alang Kaniya, kita moserbisyo Kaniya. “Kay unsaon pagkasayud sa usa ka tawo sa agalon kinsa siya wala makaalagad, ug kinsa usa ka dili kaila ngadto kaniya, ug layo gikan sa mga lawom nga mga pagbati ug katuyoan sa iyang kasingkasing?”⁸

Ang paghisgot mahitungod Kaniya nagkinahanglang og matuohong pag-ampo. Nagkinahanglang og mainitong pag-ampo ngadto sa Langitnong Amahan ang pagkat-on kon unsa nga mga pulong ang mahimo natong isulti aron makatabang sa Manluluwas sa Iyang buhat. Kinahanglang mahimo kitang takus sa saad: “Bisan pinaagi sa akong kaugalingon nga tingog o pinaagi sa tingog sa akong mga sulugoon, kini managsama ra.”⁹

Gani nagkinahanglan og labaw pa kay sa pakig-istorya Kaniya ang pagdala sa Iyang ngalan ngari kanato. Dunay mga pagbati sa atong kasingkasing nga atong gikinahanglan aron mahimong sarang isip Iyang mga sulugoon.

Gihulagway ni propeta Mormon ang mga pagbati nga mopasarang kana-to ug mohimo nato nga makadala sa Iyang ngalan ngari kanato. Kini nga mga pagbati maglakip sa pagtuo, paglaum, ug gugmang putli, nga mao ang lunsay nga gugma ni Kristo.

Mipasabut si Mormon:

“Kay ako maghukom nga kamo adunay hugot nga pagtuo kang Kristo tungod sa inyong kaaghup; kay kon kamo walay hugot nga pagtuo kaniya busa kamo dili angay nga pagaiphon taliwala sa mga katawhan sa iyang simbahan.

“Ug usab, akong hinigugma nga mga kaigsoonan, ako mamulong nganha kaninyo mahitungod sa paglaum. Unsaon nga kamo makakab-ut ngadto sa hugot nga pagtuo, gawas nga kamo magbaton og paglaum?”

“Ug sa unsa kana nga kamo mola-um? Tan-awa ako moingon nganha kaninyo nga kamo magbaton og paglaum pinaagi sa pag-ula ni Kristo ug sa gahum sa iyang pagkabanhaw, aron mabanhaw ngadto sa kinabuhi nga dayon, ug kini tungod sa inyong hugot nga pagtuo diha kaniya sumala sa saad.

“Busa, kon ang usa ka tawo adunay hugot nga pagtuo siya kinahanglan nga magbaton og paglaum; kay kon wala ang hugot nga pagtuo wala usab ang paglaum.

“Ug usab, ako mosulti nganha kaninyo nga siya dili makabaton sa hugot nga pagtuo ug paglaum, gawas nga siya magmaaghup, ug magmapainubsanon sa kasingkasing.

“Kon mao, ang iyang hugot nga pagtuo ug paglaum kawang, kay walay madawat sa atubangan sa Dios, gawas sa maaghup ug mapainubsanon nga kasingkasing; ug kon ang tawo magmaaghup ug magmapainubsanon sa kasingkasing, ug mokumpisal pinaagi sa gahum sa Espiritu Santo nga si Jesus mao ang Kristo, siya kinahanglan gayud adunay gugma nga putli; kay



kon siya walay gugma nga putli, siya walay kapuslanan; busa siya kinahanglan gayud nga makabaton og gugma nga putli.”

Human mahulagway ang gugmang putli, miingon si Mormon:

“Apan ang gugma nga putli mao ang tiunay nga gugma ni Kristo, ug kini molahutay sa kahangturang; ug bisan kinsa nga makaplagan nga aduna niini sa katapusan nga adlaw, kini makaayo uban kaniya.

“Busa, akong hinigugma nga mga kaigsoonan, pag-ampo ngadto sa Aman uban sa tibuok kusog sa kasingkasing, nga kamo unta mapuno niini nga gugma, diin siya mitugyan diha sa tanan kinsa tinuod nga mga sumusunod sa iyang Anak, nga si Jesukristo; aron mahimo kamo nga mga anak sa Dios; nga kon siya moabut, kita mahisama kaniya, kay kita makakita kaniya nga mao gihapon; nga kita mahimo nga makabaton niini nga paglaum; aron mahimo kita nga putli ingon nga siya putli. Amen.”¹⁰

Ang akong pagpamatuod mao nga ang Manluluwas mibutang sa Iyang ngalan diha sa inyong kasingkasing. Kay daghan kaninyo, ang inyong pagtuo Kaniya nagtubo. Mibati kamo og mas dakong paglaum ug kapositibo. Ug kamo mibati sa tiunay nga gugma ni Kristo alang sa uban ug sa inyong kaugalingon.

Kana akong nakita sa mga misyonaryo nga nagserbisyo sa tibuok

kalibutan. Nakita ko kana diha sa mga miyembro nga nakigsulti sa ilang mga higala ug mga sakop sa pamilya mahitungod sa Ang Simbahan ni Jesukristo sa mga Santos sa Ulahing mga Adlaw. Ang mga lalaki, mga babaye, mga batan-on, ug gani mga bata nangalad gumikan sa gugma alang sa Manluluwas ug sa ilang mga silingan.

Sa una pa lang nga report bahin sa mga katalagman sa tibuok kalibutan, ang mga miyembro nagplano alang sa pag-rescue, usahay tabok sa kadagatan, nga wala hangyoa. Usahay dili sila makahulat hangtud nga madawat kini sa dapit nga naapektuhan.

Nasayud kong pipila kaninyo nga naminaw karon tingali mibati nga ang inyong pagtuo ug paglaum gibuntog sa inyong mga problema. Ug naglaum kamo nga mobati og gugma.

Mga kaigsoonan, ang Ginoo nagbutang og mga oportunidad duol kaninyo aron mobati ug makapaambit sa Iyang gugma. Makaampo kamo uban sa pagsalig sa Ginoo nga mogiya kaninyo sa paghigugma og tawo alang Kaniya. Tubagon Niya ang mga pag-ampo sa malumong mga boluntaryo sama kaninyo. Bation ninyo ang gugma sa Dios alang ninyo ug sa tawo nga inyong giserbisyuhan alang Kaniya. Samtang tabangan ninyo ang mga anak sa Dios sa ilang mga problema, ang kaugalingon ninyong mga problema mogaan. Ang inyong pagtuo ug paglaum malig-on.

Usa ako ka saksi niana nga kama-tuoran. Sa tibuok kinabuhi, ang akong asawa namulong alang sa Ginoo ug miserbisyo sa mga tawo alang Kaniya. Sigun sa akong nahisgutan sa una, usa sa among bishop kausa misulti kana-ko: “natingala ko. Matag higayon nga makadungog ko og tawo sa ward nga dunay problema, magdali ko sa pagtabang. Apan sa akong pag-abut, daw ang imong asawa kanunay nga naa na didto.” Tinuod kana sa tanang dapit nga among napuy-an sulod sa 56 ka tuig.

Karon gamay ra ang iyang ikasulti matag adlaw. Bisitahan siya sa mga tawo nga iyang gihigugma alang sa Ginoo. Matag gabii ug buntag mokaanta ko og mga himno uban niya ug mag-ampo. Ako ra ang molitok sa mga

pag-ampo ug sa mga kanta. Usahay makita nako siyang daw molitok sa mga pulong sa mga himno. Mas ganahan siya sa mga kanta sa mga bata. Ang pagbati nga daw iya kaayong ganahan gi-summarize sa kanta nga “Gusto kong Mahisama kang Jesus.”¹¹

Sa miaging adlaw, human mokanta sa mga pulong sa chorus: “Higugma-on ta ang usag usa. Ang kaayo atong ipakita,” miingon siya sa hinay, apan klaro, “Sulayi, sulayi, sulayi.” Tingali iyang mahibaloan, kon Siya iya na unyang makita, nga ang atong Manluluwas mibutang sa Iyang ngalan diha sa iyang kasingkasing ug nga siya mahisama Kaniya. Iya siyang gipas-an latas sa iyang mga problema karon, sama nga Siya mopas-an sa inyoha.

Mosaksi ko nga ang Manluluwas nakaila ug nahigugma kaninyo. Nakaila Siya sa inyong ngalan sama nga kamo nakaila Kaniya. Nahibalo Siya sa inyong mga problema. Siya nakasinati niini. Pinaagi sa Iyang Pag-ula, gibuntog Niya ang kalibutan. Pinaagi sa inyong kaandam nga modala sa Iyang ngalan diha kaninyo, inyong mapagaan ang palas-anon sa daghan. Ug inyo unyang mahibaloan nga kamo mas nakaila diay sa Manluluwas ug nga kamo mas nahigugma Kaniya. Ang Iyang ngalan maanaa sa inyong kasingkasing ug masilsil sa inyong panumduman. Mao kini ang ngalan diin kamo pagatawag. Ako mosaksi gayud, uban sa pasalamat sa Iyang mapinanggaong pagbati kanako, sa akong mga minahal, ug kaninyo, sa pangalan ni Jesukristo, amen. ■

MUBO NGA MGA SULAT

1. Abraham 3:25.
2. Tan-awa sa Juan 3:16–17.
3. Tan-awa sa Alma 7:11–12.
4. Doktrina ug mga Pakigsaad 50:43–44.
5. Russell M. Nelson, “With God Nothing Shall Be Impossible,” *Ensign*, Mayo 1988, 35.
6. Doktrina ug mga Pakigsaad 20:77.
7. Dallin H. Oaks, “Taking upon Us the Name of Jesus Christ,” *Ensign*, Mayo 1985, 81.
8. Mosiah 5:13.
9. Doktrina ug mga Pakigsaad 1:38.
10. Moroni 7:39–44, 47–48.
11. Tan-awa sa “Maninguha Kong Mahimong Mahisama Kang Jesus,” *Songbook sa mga Bata*, 40–41.



Ni Brian K. Ashton

Ikaduhang Magtatambag sa Kinatibuk-ang Kapangulohan sa Sunday School

Ang Amahan

Matag usa kanato adunay potensyal nga mahimong sama sa Amahan. Sa pagbuhat sa ingon, kinahanglan gayud kitang mosimba sa Amahan pinaagi sa ngalan sa Anak.

Sa tibuok niyang kinabuhi, ang akong asawa, si Melinda, naningkamot sa tibuok niyang kasingkasing nga mahimong matinud-anon nga disipulo ni Jesukristo. Pero, sugod pa sa iyang kabatan-on, gibati niya nga dili takus sa gugma ug mga panalangin sa Langitnong Amahan tungod kay sayop ang iyang nasabtan bahin sa Iyang kinaiya. Swerte lang, kay nagpadayon si Melinda sa pagsunod sa mga sugo bisan sa kaguol nga iyang gibati. Pipila ka tuig ang milabay, siya dunay sunod-sunod nga mga kasinatian nga nakatabang niya nga mas masabtan ang kinaiya sa Dios, lakip na ang Iyang gugma alang sa Iyang mga anak ug sa Iyang pasalamat alang

sa atong mga paningkamot sa paghimo sa Iyang buhat bisan dili kini hingpit.

Iyang gipasabut kon sa unsang paagi kini nakaimpluwensya kaniya: “Ako nang gibati karon ang kasiguroan nga ang plano sa Amahan mosalir, nga Siya personal nga nanginlabut sa atong kalampusan, ug nga Siya mohatag nato og mga leksyon ug mga kasinatian nga atong gikinahanglan aron makabalik sa Iyang presensya. Mas akong natan-aw ang akong kaugalingon ug ang uban sama sa natan-aw sa Dios kanato. Nakahimo ko sa paglihok isip ginikanaan, pagtudlo, ug pagserbisyo inubanan sa dugang nga gugma ug minus nga kahadlok. Mibati ko og kalinaw



ug pagsalig imbis nga pagpanagana ug kawalay kasiguroan. Imbis nga mobati nga gihukman, gibati nako nga gisuportahan. Ang akong pagtuo mas sigurado. Gibati nako ang gugma sa akong Amahan nga mas kanunay ug mas lawom.”¹

Ang pagbaton og “usa ka *hustong* ideya bahin sa kinaiya, kahingpitan, ug mga hiyas sa [Langitnong Amahan]” gikinahanglan sa paggamit og pagtuo nga igo aron makabaton og kahimayaan.² Ang husto nga panabut bahin sa kinaiya sa Langitnong Amahan makapausab sa paagi sa atong pagtan-aw sa atong kaugalingon ug sa uban ug makatabang kanato nga masabtan ang hilabihan nga gugma sa Dios alang sa Iyang mga anak ug sa Iyang dakong tinguha sa pagtabang kanato nga mahisama Kaniya. Ang sayop nga panglantaw bahin sa Iyang kinaiya magbibilin kanato og pagbati nga morag dili kita makahimo sa pagbalik ngadto sa Iyang presensya.

Ang akong tumong karon mao ang pagtudlo og mahinungdanong mga punto sa doktrina mahitungod sa Amahan nga magtugot sa matag usa kanato, pero ilabi na niadtong kinsa naghunahuna kon nahigugma ba nila ang Dios, aron mas masabtan ang Iyang tinuod nga kinaiya ug sa pagpakita og mas dako nga pagtuo diha Kaniya, sa Iyang Anak, ug sa Iyang plano alang kanato.

Ang Premortal nga Kinabuhi

Sa premortal nga kalibutan, natawo kita isip mga espiritu ngadto sa Langitnong mga Ginikanan ug nagpuyo uban Kanila isip usa ka pamilya.³ Nakaila sila kanato, nagtudlo kanato, ug nahigugma kanato.⁴ Ganahan kaayo kita nga mahisama sa atong Langitnong Amahan. Hinoon, sa pagbuhat sa ingon, nahibalo kita nga kinahanglan kita nga:

1. Makabaton og nahimaya, imortal, pisikal nga mga lawas;⁵
2. Maminyo ug maghimo og mga pamilya pinaagi sa gahum sa pagkapani [priesthood] sa pagbugkos;⁶ ug
3. Makaangkon sa tanang kahibalo, gahum, ug balaanong mga hiyas.⁷

Tungod kay kinahanglan natong buhaton kining tanan, ang Amahan

naghimo og plano nga magtugot kanato, kon makab-ot ang pipila ka kondisyon,⁸ aron makabaton og pisikal nga mga lawas nga mahimong imortal ug mahimaya sa Pagkabanhaw; magminyo ug maghimo og mga pamilya dinhi sa mortalidad o, alang sa matinu-d-anon kinsa walay oportunidad, human sa mortalidad;⁹ mouswag ngadto sa pagkahingpit; ug sa katapusan mobalik sa atong Langitnong mga Ginikanan ug magpuyo uban Kanila ug sa atong mga pamilya sa usa ka kahimtang sa kahimayaan ug mahangturong kalipay.¹⁰

Ang mga kasulatan mitawag niini nga ang plano sa kaluwasan.¹¹ Mapasalamaton kaayo kita alang niining plano nga sa dihang gipresentar kini kanato, misinggit kita sa kalipay.¹² Matag usa kanato midawat sa mga kondisyon sa plano, lakip na sa mga kasinatian ug mga hagit sa mortalidad nga makatabang kanato aron makapalambo og balaang mga hiyas.¹³

Mortal nga Kinabuhi

Sa mortalidad, ang Langitnong Amahan mohatag kanato og mga kondisyon nga atong gikinahanglan aron mouswag sa sulod sa Iyang plano. Nahimong anak sa Amahan si Jesukristo diha sa unod¹⁴ ug mihatag Kaniya og balaanong tabang aron matuman ang Iyang misyon sa mortalidad. Ang Langitnong Amahan motabang usab sa matag usa kanato kon maningkamot kita sa pagtuman sa Iyang mga sugo.¹⁵ Ang Amahan mihatag kanato og kabubut-on.¹⁶ Ang atong kinabuhi anaa sa Iyang mga kamot, ug ang atong “mga adlaw nahibaloan” ug “dili makulangan.”¹⁷ Ug Iyang gipaniguro nga sa katapusan ang tanang butang mahitabo alang sa kaayohan niadtong kinsa nahigugma Kaniya.¹⁸

Ang Langitnong Amahan mao ang naghatag kanato sa atong inadlaw nga kalan-on,¹⁹ nga naglakip sa pagkaon nga atong kan-on ug sa kusog nga atong gikinahanglan sa pagtuman sa Iyang mga sugo.²⁰ Ang Amahan mohatag og maayong mga gasa.²¹ Maminaw ug motubag Siya sa atong mga pag-ampo.²² Ang Langitnong Amahan mopalingkawas kanato gikan sa dautan kon Siya atong tugutan.²³ Mobakho Siya

alang kanato kon kita mag-antus.²⁴ Sa katapusan, ang tanan natong mga panalangin nagagikan sa Amahan.²⁵

Ang Langitnong Amahan mogiya ug mohatag kanato sa mga kasinatian nga atong gikinahanglan base sa atong mga kalig-on, mga kahuyang, ug mga pagpili aron unta mamunga kita og maayo.²⁶ Ang Amahan mopanton nato kon gikinahanglan tungod kay Siya nahigugma nato.²⁷ Siya usa ka “Tawo sa Tambag,”²⁸ kinsa motambag kanato kon kita mangayo.²⁹

Ang Langitnong Amahan mao ang nagpadala sa impluwensya ug sa gasa sa Espiritu Santo sa atong kinabuhi.³⁰ Pinaagi sa gasa sa Espiritu Santo, ang himaya—o salabutan, kahayag, ug gahum—sa Amahan makapuyo kanato.³¹ Kon maningkamot kita nga molambo diha sa kahayag ug kamatuoran hangtud nga bug-os na ang atong tinguha ngadto sa himaya sa Dios, ang Langitnong Amahan mopadala sa Balaan nga Espiritu sa Saad aron sa pagsilyo kanato ngadto sa kinabuhing dayon ug mopadayag sa Iyang panagway ngari kanato—dinhi niining kinabuhia o sa sunod.³²

Kinabuhi Human dinhi sa Yuta

Sa kalibutan sa mga espiritu human sa mortal nga kinabuhi, ang Langitnong Amahan padayon nga mopadayag sa Espiritu Santo ug mopadala og mga misyonaryo ngadto niadtong nagkinahanglan sa ebanghelyo. Motubag siya sa mga pag-ampo ug motabang niadtong nagkulang niini nga makadawat sa makaluwas nga mga ordinansa.³³

Gibuhi sa Amahan si Jesukristo ug mihatag Kaniya og gahum sa pagpahanabo sa Pagkabanhaw,³⁴ nga mao ang pamaagi nga atong maangkon ang imortal nga mga lawas. Ang Pagtubos ug Pagkabanhaw sa Manluwas modala kanato og balik ngadto sa presensya sa Amahan, diin pagahukman kita ni Jesukristo.³⁵

Kadtong kinsa misalig “sa mga maayo nga buhat, ug kalooy, ug grasya sa Balaang Mesiyas”³⁶ makadawat og nahimaya nga mga lawas sama sa Amahan³⁷ ug mopuyo uban Kaniya “diha sa usa ka kahimtang nga walay katapusan ang kalipay.”³⁸ Didto, ang Amahan

mopahid sa tanan natong mga luha³⁹ ug motabang kanato nga magpadayon sa atong panaw aron mahisama Kaniya.

Klaro kini, ang Langitnong Amahan anaa kanunay alang kanato.⁴⁰

Ang Kinaiya sa Amahan

Aron mahisama sa Amahan, kinahanglan gayud nga atong palambuon sa atong kaugalingon ang Iyang mga kinaiya. Ang kahingpitan ug mga hiyas sa Langitnong Amahan naglakip sa mosunod:

- Ang Amahan “Walay Katapusan ug Mahangturon.”⁴¹
- Hingpit Siya nga makiangayon, maloloy-on, mabination, mainan-tuson, ug gusto lamang sa unsay labing maayo alang kanato.⁴²
- Ang Langitnong Amahan gugma.⁴³
- Iyang tumanon ang Iyang mga pakigsaad.⁴⁴
- Dili Siya mausab.⁴⁵
- Dili Siya mamakak.⁴⁶
- Ang Amahan walay pinalabi sa mga tawo.⁴⁷
- Nasayud Siya sa tanang mga butang—kaniadto, karon, ug sa umaabut—gikan sa sinugdanan.⁴⁸
- Ang Langitnong Amahan mas maa-lam⁴⁹ kay sa natong tanan.⁵⁰
- Ang Amahan aduna sa tanang gahum⁵¹ ug nagbuhat sa tanan nga Iyang gitinguha.⁵²

Mga kaigsoonan, makasalig ug makadepende kita ngadto sa Amahan. Kay Siya adunay mahangturon pang-lantaw, ang Langitnong Amahan makakita sa mga butang nga dili nato makita. Ang Iyang hingpit nga kalipay, buhat, ug himaya mao ang pagpahinabo sa atong pagka-imortal ug kahimayaan.⁵³ Ang tanan nga Iyang gihimo alang sa atong kaayohan. Siya “gusto sa [atong] mahangturon kalipay nga mas labaw pa kay sa [nato].”⁵⁴ Ug Siya “dili manginahanglan [nato] nga makasinati og gutlo nga mas lisud kay sa unsa gayuy gikinahanglan alang sa [atong] kaayohan o alang niadtong [atong] gimahal.”⁵⁵ Isip resulta, nag-focus Siya sa pagtabang kanato nga mouswag, dili sa paghukom ug pagpanghimaraut kanato.⁵⁶



Mamahimong Sama sa Atong Amahan

Isip espiritu nga mga anak sa Dios, matag usa kanato adunay potensyal nga mahimong sama sa Amahan. Sa pagbuhat sa ingon, kinahanglan gayud kitang mosimba sa Amahan pinaagi sa ngalan sa Anak.⁵⁷ Ato kining buhaton pinaagi sa pagpaninguha nga magmasulundon sa kabubut-on sa Amahan, sama sa Manluluwas,⁵⁸ ug pinaagi sa padayon nga paghinulsol.⁵⁹ Sa pagbuhat nato niining mga butanga, kita “makaangkon og grasya ug dugang pa nga grasya” hangtud madawat nato ang kahingpitan sa Amahan⁶⁰ ug matugahan sa “iyang kinaiya, kahingpitan, ug mga hiyas.”⁶¹

Maghunahuna sa kalainan tali sa unsa kita isip mga mortal ug unsay nakab-ot sa Langitnong Amahan, dili ikatingala nga ang uban mobati nga ang pagkahimong sama sa Amahan dili makab-ot. Bisan pa man niana, ang mga kasulatan klaro. Kon magpabilin kita diha sa pagtuo kang Kristo, maghinulsol, ug magtinguha sa grasya sa Dios pinaagi sa pagkamasulundon, sa katapusan mamahimo kitang sama sa Amahan. Nakadawat ko og kahupayan nga masayud nga kadtong naningkamot nga magmasulundon “makaangkon og grasya ug dugang pa nga grasya” ug sa katapusan “makadawat sa iyang kahingpitan.”⁶² Sa laing pagkasulti, dili kita mamahimong sama sa Amahan pinaagi lamang sa kaugalingon natong paningkamot.⁶³ Hinoon, moabut kini pinaagi sa mga gasa sa grasya, ang uban dagko pero kasagaran gagmay, nga mapatong-patong sa usag usa

hangtud makabaton kita og kahingpitan. Pero, mga kaigsoonan, moabut kini!

Dapiton nako kamo nga mosalig nga ang Langitnong Amahan nasayud kon unsaon sa paghimaya kaninyo; tinguhaa ang Iyang inadlaw, makapatunhay nga tabang; ug padayon uban sa hugot nga pagtuo kang Kristo bisan kon dili ninyo mabati ang gugma sa Dios.

Dunay daghan nga wala nato masabti mahitungod sa pagkahimong sama sa Amahan.⁶⁴ Pero makapamatuod ko uban sa kasiguroan nga ang pagpaninguha nga mamahimong sama sa Amahan angay lamang sa matag sakripisyo.⁶⁵ Ang mga sakripisyo nga atong gihimo dinhi sa mortalidad, bisan unsa pa ka dako, dili gayud ikatandi sa dili masukod nga kalipay, kamaya, ug gugma nga atong bation didto sa presensya sa Dios.⁶⁶ Kon nanglimbasug kamo nga motuo nga angay lamang kini sa mga sakripisyo nga kinahanglan ninyong himoon, nanawagan ang Manluluwas kaninyo, nga nag-ingon, “Kamo wala pa gihapon makasabut unsa ka dako ang mga panalangin sa Amahan nga anaa . . . giandam alang kaninyo; . . . kamo dili makaantus sa tanan nga mga butang karon; sa ingon niana, paglipay, kay Ako mogiya kaninyo.”⁶⁷

Mopamatuod ko nga ang inyong Langitnong Amahan nahigugma *kaninyo* ug gusto nga *kamo* magpuyo pag-usab uban Kaniya. Sa pangalan ni Jesukristo, amen. ■

MUBO NGA MGA SULAT

1. Mubo nga mga sulat anaa sa tagsulat; tan-awa usab sa D. Melinda Ashton, “The Holy Ghost: Direction, Correction, and Warning” (Brigham Young University Women’s Conference, Abr. 28, 2016), byutv.org.
2. *Lectures on Faith* (1985), 38.
3. Tan-awa sa “Ang Pamilya: Usa ka Pamahayag ngadto sa Kalibutan,” *Liahona*, Mayo 2017, 145; “Mother in Heaven,” Gospel Topics, topics.lds.org.
4. Si Apostol Pablo nagpasabut nga nakaila gayud kita sa Amahan nga ang atong mga kalag mangandoy gihapon sa pagtawag kaniya og *Abba*, nga nagpasabut og “Papa,” usa ka termino nga gireserba alang sa mga amahan nga pamilyar kaayo nato (tan-awa sa Mga Taga-Roma 8:15).
5. Tan-awa sa Doktrina ug mga Pakigsaad 130:22.
6. Tan-awa sa Doktrina ug mga Pakigsaad 132:19–20.
7. Tan-awa sa Mateo 5:48; tan-awa usab sa 2 Pedro 1:3–8.

8. Kining mga kondisyon naglakip sa pagpabilin nga mopuyo sa kinabuhi nga wala pa dinhi sa yuta (tan-awa sa Abraham 3:26) ug dayon dinhi sa mortalidad magpakita og hugot nga pagtuo diha ni Jesukristo ug sa Iyang Pag-ula, maghinulsol, magpabunyang pinaagi sa pagpaunlod pinaagi sa usa ka tawo nga naghupot sa awtoridad sa priesthood sa Dios, modawat sa gasa sa Espiritu Santo, ug molahutay hangtud sa katapusan (tan-awa sa 3 Nephi 27:16–20).
9. Si Presidente Dallin H. Oaks nagtudlo: “Ang uban nga naminaw niini nga mensahe tingali moingon, ‘Pero unsa na man lang ko?’ Nasayud kita nga daghang takus ug talagsaong mga Santos sa Ulahing mga Adlaw ang kasamtangang nagkulang sa ideyal nga mga oportunidad ug mahinungdanong mga gikinahanglan alang sa ilang pag-uswag. Ang pagkawala maminyo, pagkawalay anak, kamatayon, ug diborsyo makapugong sa mga unsay ideyal ug mopalangan sa katumanan sa gisaad nga mga panalangin. . . . Pero kining mga pagpugong temporaryo lamang. Ang Ginoo misaad nga sa kahangturan walay panalangin nga ihikaw sa iyang mga anak nga nagtuman sa mga sugo, matitud-anon sa ilang mga pakigsaad, ug nagtinguha sa unsay matarung” (“The Great Plan of Happiness,” *Ensign*, Nob. 1993, 75).
10. Tan-awa sa Mosiah 2:41.
11. Tan-awa sa Alma 42:5; gitawag usab kini og plano sa katubsanan (tan-awa pananglit sa, Jacob 6:8) ug ang plano sa kalipay (tan-awa sa Alma 42:8, 16).
12. Tan-awa sa Job 38:4–7.
13. Tan-awa pananglit sa, Mga Hebreohanon 5:8; 12:11; Ether 12:27. Sa una, ang ubang mga hagit nga atong nasinati sa mortalidad morag sa atong limitado nga panabut makapugong kanato sa pagbaton sa pipila sa atong labing gilauman nga gisaad nga mga panalangin. Bisan pa man niining daw mga panagsumpaki, ang Dios mohatag kanato sa matag gisaad nga panalangin kon magpabilin kita nga matitud-anon.
14. Tan-awa sa Lucas 1:31–35; Juan 1:14; 1 Nephi 11:18–21; Giya ngadto sa mga Kasulatan, “Jesukristo,” scriptures.lds.org.
15. Tan-awa sa Doktrina ug mga Pakigsaad 93:4–5, 16–17, 19–20.
16. Tan-awa sa Moises 7:32.
17. Doktrina ug mga Pakigsaad 122:9.
18. Tan-awa sa Mga Taga-Roma 8:28.
19. Tan-awa sa Mateo 6:11.
20. Tan-awa sa N. Eldon Tanner, “The Importance of Prayer,” *Ensign*, Mayo 1974, 50–53.
21. Tan-awa sa Lucas 11:10–13; Santiago 1:17.
22. Tan-awa sa Lucas 11:5–10; 3 Nephi 13:6.
23. Tan-awa sa Mateo 6:13.
24. Tan-awa sa Moises 7:31–40.
25. Tan-awa sa Santiago 1:17.
26. Tan-awa sa Juan 15:1–2; Doktrina ug mga Pakigsaad 122:6–7.
27. Tan-awa sa Mga Hebreohanon 12:5–11; Doktrina ug mga Pakigsaad 95:1.
28. Moises 7:35.
29. Tan-awa sa Alma 37:12, 37.
30. Tan-awa sa Juan 14:26; 2 Nephi 31:12.
31. Tan-awa sa Juan 17:21–23, 26; Doktrina ug



- mga Pakigsaad 93:36.
32. Tan-awa sa Doktrina ug mga Pakigsaad 76:53; 88:67–68.
 33. Tan-awa sa 1 Pedro 4:6. Si Elder Melvin J. Ballard, nga namulong kon nganong ang tawo nga iyang gibunyanan mipasakop sa Simbahan, miingon, “Akong nasayan nga ang iyang mga katigulangan didto sa kalibutan sa mga espiritu midawat sa Ebanghelyo nga tuig na ang milabay ug nag-ampo nga duna sa ilang pamilya dinhi sa yuta ang mopahigayon sa gikinahanglan nga mga ordinansa alang kanila, ug nga ang ilang mga pag-ampo nagmalampuson ug ang Ginoo migiya sa mga misyonaryo ngadto sa pultahan niining tawhana” (sa Melvin R. Ballard, *Melvin J. Ballard, Crusader for Righteousness* [1966], 250).
 34. Tan-awa sa Mormon 7:5–6; tan-awa usab sa Juan 5:21, 26; 1 Mga Taga-Corinto 6:14; 2 Nephi 9:11–12; Alma 40:2–3; 3 Nephi 27:14.
 35. Tan-awa sa Juan 5:22; Jacob 6:9; Alma 11:44; Helaman 14:15–18. Ang Pag-ula ni Kristo mibuntog sa tanang epekto sa Pagkapukan ni Adan, lakip na ang pisikal ug espirituhanon nga kamatayon, nga kinahanglan gayud nga mabuntog aron matugutan kita nga mobalik ngadto sa presensya sa atong Langitnong Amahan. Kadtong naghinulsol sa ilang mga sala mopuyo uban sa Amahan ug sa Anak didto sa kahangturan. Hinoon, kadtong napakyas sa paghinulsol mag-antus sa ikaduhang kamatayon, nga nahitabo tungod sa ilang kaugalingong mga sala (tan-awa sa Helaman 14:15–18).
 36. 2 Nephi 2:8.
 37. Tan-awa sa Doktrina ug mga Pakigsaad 76:56; 88:28–29.
 38. Mosiah 2:41.
 39. Tan-awa sa Pinadayag 7:17.
 40. Tan-awa sa Moises 7:30. Ang Langitnong Amahan nagpadayon pa gani sa pagbantay ug pagsangkap niadtong anaa sa terrestrial nga gingharian pinaagi sa pagpangalagad ni Jesukristo ug sa uban pang celestial nga mga binuhat (tan-awa sa Doktrina ug mga Pakigsaad 76:77, 87) ug kadtong anaa sa telestial nga gingharian pinaagi sa pagpangalagad sa Espiritu Santo ug mga anghel (tan-awa sa Doktrina ug mga Pakigsaad 76:86, 88).
 41. Moises 7:35; tan-awa usab sa Salmo 90:2.
 42. Tan-awa sa Salmo 103:6–8; Lucas 6:36; Moises 7:30.
 43. Tan-awa sa 1 Juan 4:16.
 44. Tan-awa sa Doktrina ug mga Pakigsaad 84:40.
 45. Tan-awa sa Santiago 1:17.
 46. Tan-awa sa Numeros 23:19.
 47. Tan-awa sa Mga Buhat 10:34–35.
 48. Tan-awa sa 1 Nephi 9:6; Doktrina ug mga Pakigsaad 130:7.
 49. Ang dictionary.com naghatag og kahulugan sa *salabutan* isip ang “kapasidad alang sa pagkat-on, pagpangatarungan, panabut, ug susama nga mga matang sa mental nga kalihokan; kahanas sa pagsabut sa mga kamatuoran, mga relasyon, mga katinuoran [fact], mga kahulugan, ubp.” ug “kahibalo.”
 50. Tan-awa sa Abraham 3:19. Si Jesukristo isip usa ka nahimaya, nahingpit nga binuhat mas maalam usab kay sa natong tanan.
 51. Tan-awa sa Pinadayag 21:22.
 52. Tan-awa sa Abraham 3:17.
 53. Tan-awa sa Moises 1:39.
 54. Richard G. Scott, “Trust in the Lord,” *Ensign*, Nob. 1995, 17.
 55. Richard G. Scott, “Trust in the Lord,” 17.
 56. Tan-awa sa Juan 5:22; Moises 1:39. Si Satanas ug kita mismo ang mipanghimaraut kanato (tan-awa sa Pinadayag 12:10; Alma 12:14).
 57. Tan-awa sa Juan 4:23; Doktrina ug mga Pakigsaad 18:40; 20:29.
 58. Tan-awa sa 3 Nephi 11:11; Doktrina ug mga Pakigsaad 93:11–19.
 59. Ang paghinulsol mao ang proseso nga usbon nato ang ato mismong kinaiya aron mamahimo kitang sama sa Dios. Sa ingon, kinahanglan kitang magpadayon sa paghinulsol, dili lamang maghinulsol kon “makahimo kita og butang nga sayop.”
 60. Tan-awa sa Doktrina ug mga Pakigsaad 93:19–20.
 61. *Lectures on Faith*, 38; tan-awa usab sa Moroni 7:48; 10:32–33; Doktrina ug mga Pakigsaad 76:56, 94–95; 84:33–38.
 62. Doktrina ug mga Pakigsaad 93:20; emphasis gidugang.
 63. Tan-awa sa Moroni 10:32–33; Doktrina ug mga Pakigsaad 76:69, 94–95.
 64. Nganong dili man ipadayag sa Dios ang dugang pa mahitungod sa proseso sa pagkahimong sama Kaniya? Sa tinuod lang wala ko kahibalo sa tanang rason. Pero dunay dili mominus sa duha nga akong nasabtan. Ang una mao nga ang ubang butang dili lang gayud masabtan sa atong mortal nga kahimtang (tan-awa sa Doktrina ug mga Pakigsaad 78:17). Ikatandi kini sa pagsulay og pagpasabut sa internet ngadto sa usa ka tawo nga nagpuyo sa Tunga-tunga nga Kapanahonan [Middle Ages]. Ang konteksto ug perspektibo wala lang gayud didto. Ug ang ikaduha mao nga ang mga gasa sa grasya kasagaran moabut gayud kanato tungod kay kinahanglan gayud natong maghingutas ug manglimbasug pinaagi sa pagkawala masayud.
 65. Ang mga sakripisyo nga kinahanglan natong himoon mahinungdanon sa pagkab-ot og kahingpitan.
 66. Tan-awa sa Mga Taga-Roma 8:18.
 67. Doktrina ug mga Pakigsaad 78:17–18.



Ni Elder Robert C. Gay
Sa Kapangulohan sa Seventy

Pagdala ngari Kanato sa Ngalan ni Jesukristo

Akong pag-ampo nga kita matinud-anong modala sa atong kaugalingon sa ngalan ni Jesukristo—pinaagi sa pagtan-aw sa sama sa Iyang pagtan-aw, pinaagi sa pagserbisyo sama sa Iyang pagserbisyo, ug pinaagi sa pagsalig nga ang Iyang grasya paigo.

Mga kaigsoonan, bag-ohay lang, samtang namalandong ko sa panawagan ni Presidente Russell M. Nelson sa pagtawag sa Simbahan sa pinadayag nga ngalan niini, akong gitan-aw sa kasulatan diin ang Manluluwas mitudlo sa mga Nephite mahitungod sa ngalan sa Simbahan.¹ Sa akong pagbasa sa pulong sa Manluluwas, natandog ko kon giunsa usab niya pagsulti sa mga tawo nga “kamo kinahanglan modala nganha kaninyo sa ngalan ni Kristo.”² Akong gipanaminan ang akong kaugalingon ug nangu-tana, “Ako bang gidala ngari nako ang ngalan sa Manluluwas sigun sa Iyang gipabuhat nako?”³ Karon gusto kong mopaambit og pipila ka mga impresyon nga akong nadawat agig tubag sa akong pangutana.

Una, ang pagdala ngari kanato sa ngalan ni Kristo nagpasabut nga matinud-anon kitang maningkamot sa pagtan-aw sama nga ang Dios nagtan-aw.⁴ Sa unsang paagi ang Dios nagtan-aw? Si Joseph Smith miingon, “Samtang ang usa ka bahin sa kaliwatan sa tawo naghukom ug nanghimaraut sa uban nga

walay kalooy, ang Halangdong Ginikanan sa uniberso nagtan-aw sa kinatibuk-ang tawhanong pamilya uban sa inamahan nga pag-atiman ug pagtagad,” kay ang “Iyang gugma dili matugkad.”⁵

Pipila ka tuig na ang milabay ang akong magulang nga babaye namatay.

Nagkalisud siya sa iyang kinabuhi. Nanlimbasug siya sa ebanghelyo ug wala gayud maaktibo. Ang iyang bana mibiya sa ilang kaminyoon ug nagbilin kaniya nga magbuhi sa upat ka gagmayng bata. Sa gabii sa iyang pagkamatay, sa kwarto uban sa iyang mga anak, mihatag ko og usa ka panalangin sa malinawon nga pagpauli. Nianang higayuna nakaamgo ko nga kasagaran akong mahulagway ang kinabuhi sa akong magulang nga babaye diha sa iyang mga pagsulay ug pagkadili aktibo. Sa ako nang gibutang akong mga kamot sa iyang ulo nianang gabhiuna, nakadawat kog bug-at nga pagbadlong gikan sa Espiritu. Gipahibalo gayud ko sa iyang kamaayo ug natugtan nga makita siya sama nga ang Dios mitan-aw kaniya—dili isip tawo nga nanlimbasug sa ebanghelyo ug sa kinabuhi, apan isip usa ka tawo nga nagsagubang og malisud nga mga problema nga wala nako. Nakita nako siya isip usa ka talagsaong inahan kinsa, bisan pa sa dagkong babag, mipadako sa iyang upat ka matahum, talagsaong mga anak. Nakita nako siya isip usa ka higala sa akong inahan kinsa migahin og panahon sa pag-atiman ug kauban niya human ang among amahan namatay.

Atol sa katapusang gabii sa akong igsoon, nagtuo ko nga ang pagpangutana sa Dios kanako, “Dili ba nimo





makita nga ang tanan nga naglibut kanimo usa ka sagradong binuhat?”

Si Brigham Young nagtudlo:

“Gusto kong moawhag sa mga Santos . . . nga sabton ang kalalakin-an ug kababayen-an sa ilang pagkasila ug dili sumala sa imong pagsabut.”⁶

“Kanunay kining gisulti ngadto sa tawo—‘Kining tawhana nakahimo og sayop ug siya dili mahimong Santos.’ . . . Makadungog kita og pamalikas ug pagpamakak . . . [o] paglapas sa Igpapa-hulay. . . . Ayaw hukmi ang ingon niana nga mga tawo, kay wala kamo masayud sa plano sa Ginoo kabahin nila. . . . [Hinonoa,] magpailob ngadto kanila.”⁷

Aduna bay bisan usa ninyo nga makahunahuna nga ang atong Manluluwas mitugot nga kamo ug ang inyong palas-anon molabay lang nga wala Siya makamatikod? Ang Manluluwas mitan-aw diha sa Samarianhon, sa mananapaw, sa tigkolekta sa buhis, sa sanlahon, sa may sakit sa pangisip, ug sa makasasala sa samang pagsabut. Ang tanan mga anak sa Iyang Amahan. Tanan mahimong matubos.

Makahunahuna ba mo Kaniya nga mitalikod sa tawo nga dunay pagduhaduha mahitungod sa ilang pagkabutang sa gingharian sa Dios o si bisan kinsang

apektado sa bisan unsang butang?⁸ Dili ko makahimo. Sa mga mata ni Kristo, ang matag kalag adunay bili nga walay kinutuban. Walay usa nga gi-orden nang daan nga mapakyas. Ang kinabuhing dayon posible alang sa tanan.⁹

Gikan sa pagbadlong sa Espiritu diha sa kiliran sa akong igsoong babaye, nakakat-on ko og mahinungdanong leksyon: nga kon kita motan-aw sama nga Siya nagtan-aw, atong makab-ot ang tumong—ang katubsanan niadtong atong natandog ug katubsanan sa atong kaugalingon.

Ikaduha, sa pagdala ngari kanato sa ngalan ni Kristo, kinahanglang dili lang sa pagtan-aw sama sa pagtan-aw sa Dios, apan kita kinahanglang mobuhat sa Iyang buhat ug moserbisyo sama nga Siya miserbisyo. Mosunod kita sa dakong mga sugo, mopaubos sa kabu-but-on sa Dios, mopundok sa Israel, ug mohimo sa atong kahayag nga “modan-ag sa mga tawo.”¹⁰ Modawat ug magpakabuhi kita sa mga pakigsaad ug ordinansa sa Iyang gipahiuli nga Simbahan.¹¹ Kon kita mobuhat niini, ang Dios motuga nato sa gahum aron mapan-alanginan ang atong kaugalingon, atong mga pamilya, ug ang kinabuhi sa uban.¹² Pangutan-a inyong kaugalingon,

“Aduna ba koy nailhan nga tawo nga wala magkinahanglan sa mga gahum sa langit sa ilang mga kinabuhi?”

Ang Dios mobuhat og mga kahi-bulongan taliwala kanato kon kita mopabalaan sa atong kaugalingon.¹³ Atong mabalaan ang atong kaugalingon pinaagi sa paglimpyo sa atong mga kasingkasing.¹⁴ Malimpyohan nato ang atong kasingkasing kon Siya atong dunggon,¹⁵ maghinulsol sa atong mga sala,¹⁶ makabig,¹⁷ ug mohigugma sama sa Iyang paghigugma.¹⁸ Ang Manluluwas nangutana kanato, “Kay kon mao ray inyong higugmaon ang mga nahigugma kaninyo, unsa may balus nga madawat ninyo?”¹⁹

Bag-ohay lang nahibaloan nako ang bahin sa kasinatian sa kinabuhi ni Elder James E. Talmage nga nakapahinuktok nako ug gikonsiderar kon giunsa nako paghigugma ug pagserbisyo kadtong naglibut kanako. Isip usa ka propesor sa batan-on pa, nihimo siyang usa ka Apostol ug sa taliwala sa makamatay nga epidemya sa diphtheria niadtong 1892, nadiskubrihan ni Elder Talmage ang pamilya sa mga estranghero, dili miyembro sa Simbahan, kinsa nagpuyo duol kaniya ug kinsa natakbuyan sa sakit. Walay usa nga gustong morisgo sa ilang mga kaugalingon pinaagi sa pag-sulod sa natakbuyan nga panimalay. Si Elder Talmage, hinoon, daling misulod sa panimalay. Iyang nakita ang upat ka mga anak: ang duha ka tuig ug unom ka bulan nga bata patay na diha sa katri, usa ka singko-anyos ug dyes-anyos nag-antus sa tumang kasakit, ug usa ka trese-anyos nga nagluya. Ang mga ginikanan nag-antus sa kasubo ug kakapoy.

Si Elder Talmage miatiman sa patay ug sa buhi, nanilhig sa mga kwarto, gigawas ang hugaw nga sinina, ug gidauban ang mga nuog nga nagka-hugaw sa sakit. Tibuok adlaw siya nga nagtrabaho ug dayon mibalik pagkasunod buntag. Ang dyes-anyos namatay nianang pagkagabii. Iyang gialsang ug gigunitan ang singko-anyos. Nakaubong kini og sip-on nga dunay dugo diha sa iyang nawong ug sinina. Siya misulat, “Dili nako siya mabutang gikan nako,” ug iya kining gigunitan hangtud kini namatay diha sa iyang mga bukton.

Mitabang siya sa paglubong sa tulo ka mga bata ug nag-andam og pagkaon ug limpyo nga sinina alang sa nagbangutan nga pamilya. Sa iyang pag-uli, si Brother Talmage milabay sa iyang mga sinina, naligo og zinc solusyon, gilain ang iyang kaugalingon gikan sa iyang pamilya, ug miantos og gamay nga pag-atake sa sakit.²⁰

Daghan kaayong kinabuhi nga naglibut kanato nga anaa sa risiko. Ang mga Santos modala sa ngalan sa Manluluwas diha sa ilang kaugalingon pinaagi sa pagkahimong balaan ug mangalagad sa uban dili igsapayan kon asa man sila nagbarug—mga kinabuhi maluwas kon kita mohimo sa ingon.²¹

Sa katapusan, motuo ko nga sa pagdala ngari kanato sa Iyang ngalan, kinahanglang mosalig kita Kaniya. Sa usa ka miting nga akong gitambungan usa ka Dominggo, usa ka batan-ong babaye nangutana sama sa mosunod: “Akong uyab ug ako bag-ohay lang nagkabulag, ug mipili siya nga mobiya sa Simbahan. Nagsulti siya nako nga wala pa siya sukad nakabati og kalipay. Sa unsa man nga paagi?”

Ang Manluluwas mitubag niining pangutana sa dihang Siya miingon ngadto sa mga Nephite, “Apan kon ang [inyong kinabuhil] wala matukod sa akong ebanghelyo, ug natukod diha sa buhat sa mga tawo, o diha sa mga buhat sa yawa, sa pagkatinuod ako moingon nganha kaninyo [kamo] makaangkon og hingpit nga kalipay diha sa [inyong] mga buhat sa mubo nga panahon ug unya moabut ang

katapusan.”²² Simple lang nga walay molungtad nga kalipay sa gawas sa ebanghelyo ni Jesukristo.

Niana nga panagtigum, hinoon, nakahunahuna ko sa daghang maayo nga mga tawo nga akong kaila kinsa nanglimbasug sa dakong palas-anon ug mga kasugoan nga malisud kaayo alang nila. Akong gipangutana ang akong kaugalingon, “Unsa pa kaha ang ikasulti sa Manluluwas ngadto nila?”²³ Nagtuo ko nga Siya mangutana, “Mosalig ka ba kanako?”²⁴ Sa babaye nga gitalinug-an [issue of blood], Siya miingon, “Imong pagsalig nakapaayo kanimo, lakaw diha sa kalinaw.”²⁵

Usa sa akong paborito nga kasulatan ang Juan 4:4, diin mabasa, “Ug siya kinahanglang gayud nga mahiagi latas sa Samaria.”

Nganong ganahan ko niana nga kasulatan? Tungod kay si Jesus wala *magkinahanglan* nga moadto sa Samaria. Ang mga Judeo sa Iyang panahon mibiay-biay sa mga Samaritanhon ug moagi sa dalan nga libut sa Samaria. Apan gipili ni Jesus nga moadto aron ipahayag sa tanang tawo sa unang higayon nga Siya mao ang gisaad nga Mesiyas. Tungod niini nga mensahe, wala lang Siya mipili sa sinalikway nga grupo, apan usab usa ka babaye—ug dili lang bisan kinsa nga babaye apan usa ka babaye nga nagpuyo diha sa sala—usa ka tawo nga gikonsiderar nianang higayuna nga ang kina-ubsan sa mga labing ubos. Nagtuo ko nga gibuhhat ni Jesus ang ingon aron ang matag usa kanato kanunayng makasabut nga

ang Iyang gugma mas labaw pa kay sa atong mga kahadlok, atong pagkaadik, atong mga pagduha-duha, atong mga pagtintal, atong mga sala, atong masulub-on nga mga pamilya, atong depresyon ug mga kabalaka, atong kawalay kapaulian, atong pagkaibug sa sama og sekso, atong grabe nga sakit, atong kawad-on, atong pag-abuso, ug atong pag-inusara.²⁶ Gusto niya nga masayud ang tanan nga wala ug walay usa nga dili Niya mahimong ayohon ug matubos ngadto sa malungtarong kalipay.²⁷

Ang Iyang grasya paigo.²⁸ Siya lang ang mipaubos sa tanang butang aron pagluwas kanato. Ang gahum sa Iyang Pag-ula mao ang gahum sa pagbuntog sa bisan unsa nga palas-anon sa atong kinabuhi.²⁹ Ang mensahe sa babaye diha sa tabay mao nga Siya nasayud sa mga sitwasyon sa atong kinabuhi³⁰ ug sa kanunay mahimo kitang makig-uban Kaniya bisan kinsa man kita. Ngadto kaniya ug sa matag usa kanato, Siya miingon, “Si bisan kinsa nga magainom sa tubig nga akong igahatag kaniya dili na gayud pagauhawon; apan [makaangkon] og usa ka tabay sa tubig, nga magatubod ngadto sa kinabuhing dayon.”³¹

Sa bisan unsa nga mga panaw sa kinabuhi, nganong mopalayo man gayud kamo gikan sa bugtong Manluluwas kinsa anaa ang tanang gahum sa pag-ayo ug pagtubos kaninyo? Bisana unsa pa ang bugti nga kinahanglan inyong ibayad aron mosalig Kaniya igo lang kini. Mga kaigsoonan, atong pillion ang pagpalambo sa atong hugot nga pagtuo sa Langitnong Amahan ug atong Manluluwas, si Jesukristo.

Gikan sa kinauyokan sa akong kalag, ako mopamatuod nga Ang Simbahan ni Jesukristo sa mga Santos sa Ulahing mga Adlaw mao ang Simbahan sa Manluluwas, gidumala sa buhi nga Kristo pinaagi sa usa ka tinuod nga propeta. Akong pag-ampo nga kita matinuod-anong modala sa atong kaugalingon sa ngalan ni Jesukristo—pinaagi sa pagtan-aw sama sa Iyang pagtan-aw, pinaagi sa pagserbisyo sama sa Iyang pagserbisyo, ug pinaagi sa pagsalig nga ang Iyang grasya paigo aron mahatud kita sa panimalay ug sa malungtarong kalipay. Sa ngalan ni Jesukristo, amen. ■



MUBO NGA MGA SULAT

1. Tan-awa sa 3 Nephi 27:3–8.
2. Tan-awa sa 3 Nephi 27:5–6; tan-awa usab sa Doktrina ug mga Pakigsaad 20:77 ug ang pakigsaad sa sakrament.
3. Tan-awa sa Dallin H. Oaks, *His Holy Name* (1998) alang sa usa ka komprehensibo nga pagtuon mahitungod sa pagdala diha sa atong kaugalingon ug isip usa ka saksi sa ngalan ni Jesukristo.
4. Tan-awa sa Mosiah 5:2–3. Bahin sa dakong kausaban sa kasingkasing sa mga katawhan ni Haring Benjamin kinsa midala sa ilang mga kaugalingon sa ngalan ni Kristo mao nga ang ilang mga mata nabukas sa “dako nga panglantaw.” Kadtong kinsa makapanunod sa celestial nga gingharian mao ang mga indibidwal nga “nakakita ingon nga sila nakit-an” (Doktrina ug mga Pakigsaad 76:94).
5. *Mga Pagtulun-an sa mga Presidente sa Simbahan: Joseph Smith* (2007), 45.
6. Brigham Young, sa *Journal of Discourses*, 8:37.
7. *Discourses of Brigham Young*, sel. John A. Widtsoe (1954), 278.
8. Tan-awa sa 3 Nephi 17:7.
9. Tan-awa sa Juan 3:14–17; Mga Buhat 10:34; 1 Nephi 17:35; 2 Nephi 26:33; Doktrina ug mga Pakigsaad 50:41–42; Moises 1:39. Si Elder D. Todd Christofferson mitudlo usab nga: “Uban sa pagsalig kami mopamatuod nga ang Pag-ula ni Jesukristo nagpaabut ug, sa katapusan, mobayad sa tanang paghikaw ug nawala alang niadtong modangop ngadto Kaniya. Walay usa nga gitakda nang daan nga makadawat og minus pa kay sa tanan nga aduna ang Amahan alang sa Iyang mga anak” (“Nganong Kaminyoon, Nganong Pamilya,” *Liahona*, Mayo 2015, 52).
10. Tan-awa sa Mateo 5:14–16; 22:35–40; Mosiah 3:19; Doktrina ug mga Pakigsaad 50:13–14; 133:5; tan-awa usab sa Russell M. Nelson, “Ang Pagpundok sa Nagkatibulaag nga Israel,” *Liahona*, Nob. 2006, 79–81.
11. Tan-awa sa Levitico 18:4; 2 Nephi 31:5–12; Doktrina ug mga Pakigsaad 1:12–16; 136:4; Mga Artikulo sa Hugot nga Pagtuo 1:3–4.
12. Tan-awa sa Doktrina ug mga Pakigsaad 84:20–21; 110:9.
13. Tan-awa sa Josue 3:5; Doktrina ug mga Pakigsaad 43:16; tan-awa usab sa Juan 17:19. Ang Manluluwas mabalaan sa Iyang kaugalingon aron makabaton og gahum sa pagpanalangin kanato.
14. Tan-awa sa Helaman 3:35; Doktrina ug mga Pakigsaad 12:6–9; 88:74.
15. Tan-awa Joseph Smith—Kasaysayan 1:17, ang unang sugo nga gihatag sa Dios ngadto ni Propeta Joseph Smith; tan-awa usab sa 2 Nephi 9:29; 3 Nephi 28:34.
16. Tan-awa sa Marcos 1:15; Mga Buhat 3:19; Alma 5:33; 42:22–23; Doktrina ug mga Pakigsaad 19:4–20. Pamalandungi usab kining duha ka paghinuktok sa sala. Una, si Hugh Nibley misulat: “Ang sala mao ang pag-usik. Kini ang pagbuhat sa usa ka butang kon ikaw angay nga mobuhat sa lain ug mas maayong mga butang diin kamo adunay kapasidad” (*Approaching Zion*, ed. Don E. Norton [1989], 66). Inahan ni John Wesley, nga si Susanna Wesley, misulat sa iyang anak nga lalaki: “Dawata kini nga lagda. Bisan unsay makapahuyang sa inyong pangatarungan, makapaluya sa kalumo sa inyong konsyensya, mopahanap sa inyong paghati sa Dios, o mokuha sa inyong pagkalingaw sa espirituhanong mga butang; . . . bisan unsay makapadugang sa . . . awtoridad sa inyong lawas labaw sa inyong hunahuna; kanang butanga sala nganha ninyo, bisan unsa pa kini kainosente tan-awon.” (*Susanna Wesley: The Complete Writings* ed. Charles Wallace Jr. [1997], 109).
17. Tan-awa sa Lucas 22:32; 3 Nephi 9:11, 20.
18. Tan-awa sa Juan 13:2–15, 34. Sa bisperas sa Iyang Pag-ula, ang Manluluwas mihugas sa mga tiil sa tawo kinsa mobudhi Kaniya, sa lain kinsa molimud Kaniya, ug sa uban gihapon kinsa nakatulog diha sa Iyang labing gikinahanglan nga takna. Dayon Siya mitudlo, “Ako magahatag kaninyog bag-ong sugo, Nga kinahanglan maghigugmaay kamo ang usa sa usa; maingon nga Ako nahigugma kaninyo.”
19. Mateo 5:46.
20. Tan-awa sa John R. Talmage, *The Talmage Story: Life of James E. Talmage—Educator, Scientist, Apostle* (1972), 112–14.
21. Tan-awa sa Alma 10:22–23; 62:40.
22. 3 Nephi 27:11.
23. Sa Mateo 11:28, 30, ang Ginoo nag-ingon: “Umari kanako, kamong tanan nga nabudlay ug nabug-atan, ug papahulayon ko kamo. . . . Kay masayon ang akong yugo, ug magaan ang akong luwan.” Ikonsiderar usab ang 2 Mga Taga-Corinto 12:7–9; Gihulagway ni Pablo nga nag-antus sa hilabihan ka gamhanang “tunok dinhi sa lawas,” diin siya nag-ampo aron matangtang. Si Kristo miingon ngadto kaniya, “Ang akong grasya igo alang kanimo, kay ang akong gahum ginahingpit diha sa kahuyang.” Tan-awa usab sa Ether 12:27.
24. Tan-awa sa Mosiah 7:33; 29:20; Helaman 12:1; Doktrina ug mga Pakigsaad 124:87.
25. Tan-awa sa Lucas 8:43–48; Marcos 5:25–34. Ang babaye nga gitaling-an anaa sa dakong panginahanglan ug nahutdan sa mga kapilian. Nag-antus siya sulod sa 12 ka tuig, nagasto ang tanang kapanguhaan diha sa mga mananambal, ug nagkagrab pa. Gisalikway sa iyang katawhan ug pamilya, siya mituyo sa pagsuot sa bagang duot sa mga tawo ug gidutdot ang iyang kaugalingon ngadto sa Manluluwas. Hingpit ang iyang pagsalig ug hugot nga pagtuo diha sa Manluluwas, ug nabati Niya ang iyang paghikap sa sidsid sa Iyang saput. Gumikan nianang hugot nga pagtuo sa diha-diha dayon ug hingpit Siya nga miayo kaniya. Gitawag dayon Siya ngadto kaniya nga “anak.” Dili na siya sinalikway apan usa na ka sakop sa pamilya sa Dios. Ang iyang pagkaayo pisikal, katilingbanon, emosyonal, ug espiritwal. Ang mga hagit mahimong molanat og mga katuigan o sa tibuk kinabuhi, apan ang Iyang saad sa pag-ayo sigurado.
26. Tan-awa sa Lucas 4:21; Juan 4:6–26. Si Lucas, dili si Juan, ang nagrekord nga sa sayong bahin sa pagpangalagad ni Jesus, miadto Siya sa Iyang mismong sinagoga sa Nazaret, gibasa ang tudling gikan sa Isaia nga nanagna sa Mesias, ug dayon mipahayag, “karon kini nga kasulatan matuman diha sa inyong mga dalunggan.” Mao kini ang unang higayon ang Manluluwas namulong kabahin Niya Mismo isip ang Mesias. Hinoon, diha sa atabay ni Jacob, girekord ni Juan sa unang higayon nga si Jesus namahayag sa Iyang pagka-Mesias diha sa gawas. Niini nga sitwasyon, tungod kay ang mga Samaritanhon gikonsiderar nga dili ka Judeo, si Jesus nagtudlo usab nga ang Iyang ebanghelyo alang sa tanan, sa Judeo ug Hentil. Nahitabo kini nga pahayag sa “ikaunom nga oras”, o sa udto, sa dihang ang yuta makadawat sa hingpit nga kahayag gikan sa adlaw. Sa atabay ni Jacob mao usab diha sa walog duol sa eksakto nga dapit diin ang karaang Israel mihimog seremonya sa pakigsaad uban sa Ginoo human misulod sa yutang gisaad. Makapaikag kaayo, sa usa ka habig sa walog mao ang usa ka ug nga bukid ug sa pikas habig mao ang bukid nga puno sa mga tubod sa makahatag og kinabuhi nga tubig.
27. Si Elder Neal A. Maxwell mitudlo: “Kon ang mga sitwasyon sa kalisud nga maghunahuna kita kon kita aduna bay ikahatag, makahupay nga masayon nga ang Dios, kinsa nakahibalo sa atong kapasidad, mibutang kanato dinhi aron molampus. Walay gi-orden nang daan nga mapakyas o mahimong dautan. . . . Kon kita mobati nga nabug-atan, mahinumduman nato ang kasiguroan nga kita dili palabian sa Dios” (“Meeting the Challenges of Today” [Brigham Young University devotional, Okt. 10, 1978], speeches.byu.edu).
28. Si Presidente Russell M. Nelson nagtudlo: “Moabut ang panahon, kamo mopresentar sa inyong kaugalingon atubangan sa Manluluwas. Dili kamo makatingog ngadto sa punto nga kamo makahilak nga maanaa sa Iyang balaang presensya. Manlimbasug kamo sa pagpangita og mga pulong sa pagpasalamat Kaniya tungod sa pagbayad sa inyong mga sala, sa pagpasaylo ninyo sa bisan unsa nga pagkadili mabination ngadto sa uban, sa pag-ayo ninyo gikan sa mga kasakit ug pagkadili makiangayon niining kinabuhia. “Pasalamatan ninyo Siya tungod sa paglig-on ninyo sa pagbuhat sa imposible, sa paghimo sa inyong mga kahuyang ngadto sa mga kalig-on, ug sa paghimong posible nga makapuyo kamo uban Niya ug sa inyong pamilya sa kahangturan. Ang Iyang pagkatawo, Iyang Pag-ula, ug ang Iyang mga hiyas mahimong personal ug tinuod nganha kaninyo” (“Prophets, Leadership, and Divine Law” [tibuk kalibutan nga debosyonal alang sa youth adults, Ene. 8, 2017], broadcasts.lds.org).
29. Tan-awa sa Isaia 53:3–5; Alma 7:11–13; Doktrina ug mga Pakigsaad 122:5–9.
30. Tan-awa sa Joseph Smith—Kasaysayan 1:17; Elaine S. Dalton, “Siya Nakaila Kaninyo sa Ngalan,” *Liahona*, Mayo 2005, 109–11.
31. Juan 4:14.



Ni Elder Matthew L. Carpenter
Sa Seventy

Buot Ka Bang Maayo?

Tungod sa Pag-ula ni Jesukristo, kon pilion nato ang paghinulsol ug sa bug-os, atong ipaling ang atong kasingkasing ngadto sa Manluluwas, Siya sa espirituhanong paagi moayo kanato.

Pipila ka bulan sa iyang pagmisyon, ang kamanghuran namong anak nga lalaki ug ang misyonaryo niyang kompanyon hapit na mahuman sa ilang pagtuon dihang ang among anak mibati og kasakit sa iyang ulo. Lahi kaayo ang iyang gibati; sa una nawad-an og kusog ang wala niyang kamot; dayon naminhod ang iyang dila. Ang wala nga bahin sa iyang nawong nagsugod og kalusno. Maglisud na siya og sulti. Nasayud siyang dunay problema. Ang wala niya hibali nga giataki na diay ang tulo ka dapit sa iyang utok. Nabalaka siya dihang nagsugod sa pagkaparalisar ang ubang bahin sa iyang lawas. Ang diha-diha nga pagtabang sa biktima sa ataki [stroke] adunay mahingdanung kalabutan sa iyang pagkaayo. Ang iyang matinud-anong kompanyon milihok dayon. Human motawag sa 911, iya siyang gipanalanginan. Milagro kaayo, ang ambulansya singko minutos ra ang gilay-on.

Human gidali pagdala sa hospital ang among anak, gisusi dayon sa mga kawani ang sitwasyon ug natino nga kinahanglan nilang tirahan og tambal ang among anak aron mapugngan ang pag-ataki nga makaparalisar sa pagdagan sa panahon.¹ Apan, kon ugaling ang among anak wala man atakiha,

ang tambal mogama og grabing sangputanan, sama sa pagdugo sa utok. Kinahanglang mopili ang among anak. Gipili niya ang pagdawat sa tambal. Samtang ang hingpit nga pagkaayo nagkinahanglan og mas daghang pang operasyon ug daghang bulan, sa katapusan nauli ra ang among anak ug nakakompleto sa iyang misyon human napugngan sa igo ang mga epekto sa iyang pag-ataki.

Ang atong Langitnong Amahan gamhanan sa tanan ug nahibalo sa tanan.



Nasayud siya sa pisikal natong mga kalisud. Nasayud Siya sa atong mga pisikal nga kasakit tungod sa balatian, sakit, pangidaron, mga aksidente, o mga kakulian dala sa pagkatawo. Nasayud siya sa mga emosyonal nga kalisud inubanan sa kahamol, kasubo, kaluya, o mental nga balatian. Nasayud Siya sa matag tawo nga nag-antus sa in hustiya o giabusohan. Nasayud Siya sa atong mga kahuyang ug sa mga kalagmitan ug mga tintasyon nga atong gipanglimbasugan.

Sa mortalidad sulayan kita kon mopili ba kita sa maayo batok sa dautan. Alang niadtong motuman sa Iyang mga sugo, sila makapuyo uban Kaniya sa “kahintang sa walay katapusan nga kalipay.”² Aron mabangan kita sa atong pag-uswag sa pagkahisama Kaniya, mihatag ang Langitnong Amahan sa tanang gahum ug kahibalo ngadto sa Iyang Anak, si Jesukristo. Walay pisikal, emosyonal, o espiritwal nga balatian nga dili maayo ni Kristo.³

Gikan sa mortal nga pagpangalagad sa Manluluwas, nagsugilon ang mga kasulatan og daghang milagrusong mga hitabo diin si Jesukristo migamit sa Iyang balaan nga gahum sa pag-ayo niadtong mga nanag-antus sa pisikal.

Ang ebanghelyo ni Juan nagsugilon sa istorya bahin sa tawo nga nag-antus sa makahugno nga sakit sulod sa 38 ka tuig.

“Sa pagkakita ni Jesus kaniya nga naghigda, ug sa nasayran niya nga siya naglubog didto sulod na sa hataas nga panahon, siya miingon kaniya, Buot ka bang maayo?”

Ang masakiton mitubag kaniya nga walay tawo nga makatabang kaniya dihang nanginghanglan kaayo siya.

“Si Jesus miingon sa tawo, “Bangon, dad-a ang imong higdaanan, ug lakaw.

“Ug *diha-diha* ang tawo naayo, ug gidala niya ang iyang higdaan ug milakaw.”⁴

Palihug timan-i ang kadugayon sa pag-antus niining tawhana sa paginusara—38 ka tuig—ug ang kadali sa pag-ayo nga miabut dihang nalakip ang Manluluwas. Ang pagkaayo “*diha-diha*.”



Sa laing sitwasyon, usa ka babaye nga may problema sa pagdugo sulod sa 12 ka tuig, kinsa “nahutdan sa tanan niyang katigayonan nga igasto alang sa mananambal, . . . miduol sa iyang luyo ug mihikap sa borlas sa iyang sapot: ug *diha-diha* ang iyang talinugo [*nahunong*]. . . .

“Ug si Jesus miingon, May mihikap kanako: kay gibati ko nga may gahum [hiyas] nga migula kanako.

“Ug sa pagtan-aw sa babaye nga wala man diay siya malilong . . . gisugilon niya sa atubangan sa tanang tawo . . . giunsa niya sa pagkaayo *diha-diha*.”⁵

Pinaagi sa Iyang pagpangalagad, gitudlo ni Jesus nga may gahum Siya batok sa pisikal nga lawas. Dili kita makakontrolar sa panahon kon kanus-a ang makaayo nga gahum ni Kristo moepekto sa atong mga balatian nga pisikal. Ang pagkaayo moepekto sumala sa Iyang kabubut-on ug kaalam. Diha sa mga kasulatan, ang uban nag-antus sulod sa mga dekada; ang uban, sa tibuok nilang kinabuhi. Ang mga kahuyang sa mortal makahashas kanato ug molig-on sa atong pagsalig sa Dios. Apan kon motugot kita nga maapil si Kristo, sa kanunay Siya molig-on kanato sa espirital nga paagi aron makabaton kita og mas dakong kapasidad sa paglahutay sa atong mga palas-anon.

Sa katapusan, nasayud kita nga ang matag pisikal nga balatian, sakit, o imperpeksyon mamaayo ra unya

Inigkabanhaw. Mao kana ang gasa sa tanang katawhan tungod sa Pag-ula ni Jesukristo.⁶

Si Jesukristo makaayo dili lang sa atong pisikal nga lawas. Makaayo usab Siya sa atong espiritu. Sa tibuok kasulatan atong nakat-unan giunsa sa pagtabang ni Kristo kadtong may mahuyang nga mga espiritu ug gayo sila.⁷ Samtang mamalandong kita niini nga mga kasinatian, ang atong paglaum ug pagtuo sa gahum sa Manluluwas nga mopanalingin sa atong kinabuhi molambo. Si Jesukristo makausab sa atong kasingkasing, moayo kanato gikan sa mga epekto sa inhustisya o abuso nga atong masinati, ug molig-on sa atong kapasidad nga makaantus sa kapildihan ug kasakit, magdala kanato og kalinaw aron matabangan kita sa paglahutay sa mga pagsulay sa atong kinabuhi, moayo sa atong pagbati.

Si Kristo usab moayo kanato kon kita makasala. Makasala kita kon gituyo nato paglapas ang usa sa mga balaod sa Dios.⁸ Kon kita makasala, mahugawan ang atong kalag. Walay mahugaw nga butang nga makapuyo sa presensya sa Dios.⁹ “Ang mamahimong limpyo gikan sa sala nagpasabut nga maayo o maalim sa espirituhanong paagi.”¹⁰

Nasayud ang atong Dios nga Amahan nga makasala kita, apan nag-andam Siya og paagi nga kita matubos. Si Elder Lynn G. Robbins mitudlo: “Ang paghinulsol dili alternatibo nga plano sa [Dios] sa higayon nga kita mapakyas.

Ang paghinulsol *mao* ang Iyang plano, nakahibalo nga kita makasala.”¹¹ Kon kita makasala, may oportunidad kita sa pagpili sa maayo gikan sa dautan. Mapili nato ang maayo kon maghinulsol kita human kita makasala. Pinaagi kang Jesukristo ug sa Iyang maulaon nga sakripisyo, matubos kita sa atong mga sala ug madala og balik ngadto sa presensya sa Dios nga Amahan kon maghinulsol kita. Ang espirital nga pagkaayo dili kay usa ra ang maghimo—nagkinahanglan kini sa matub-sanong gahum sa Manluluwas ug sinserong paghinulsol sa tawong nakasala. Niadtong mopili nga dili maghinulsol, gisalikway nila ang makaayong gahum nga gitanyag ni Kristo. Para nila sama og walay pagtubos nga nahimo.¹²

Sa akong pagtambag sa uban nga nagtinguhang maghinulsol, natingala ko nga ang katawhan nga anaa sa pagpakasala maglisud sa paghimo og hustong mga desisyon. Mibiya kanila ang Espiritu Santo, ug kasagaran maglisud sa mga pagpili nga maoy magpaduol kanila sa Dios. Makigbisog sila sulod sa mga bulan o gani katuigan, maulaw o mahadlok sa mga sangputanan sa ilang mga sala. Kasagran mobati sila nga dili na sila mausab o mapasaylo. Sa kasagaran makadungog ko nilang mopa-ambit sa ilang kahadlok nga basin kon mahibaloan sa ilang mga minahal ang ilang nahimo, mohunong sila sa paghigugma kanila o biyaan sila. Kon kining hunahunaa ang ilang sundon, hukman nila nga itago lang kini ug ilangay ang ilang paghinulsol. Sayop ang ilang gibati nga mas maayong dili maghinulsol karon aron dili nila madugangan ang kasakit sa ilang mga gimahal. Sa ilang hunahuna mas maayo nga magantus human niining kinabuhia kay sa mohimo sa proseso sa paghinulsol karon. Mga kaigsoonan, *dili gayud* maayong ideya nga ilangay ang inyong paghinulsol. Ang kaaway kanunayng mogamit sa kahadlok aron mapugngan kita sa diha-diha nga paglihok gamit ang atong pagtuo kang Jesukristo.

Kon ang mga minahal mag-atubang og kamatuoran bahin sa masalaypong kinaiya, samtang dako ang ilang samad, sa kasagaran gusto silang motabang sa

tawo nga tinuorayng naghinulsol aron mausab ug makig-uli sa Dios. Sa katinuod, ang espiritwal nga pagkaayo mas mopaspas kon motug-an ang nakasala ug palibutan siya niadtong nahigugma kanila ug motabang nila sa pagbiya sa ilang mga sala. Palihug hinumdumi nga si Jesukristo gamhanan kon sa unsang paagi Niya ayuhon ang inosenting mga biktima sa sala kinsa mobalik Kaniya.¹³

Si Presidente Boyd K. Packer nama-hayag: “Ang atong espiritu madaut kon kita masayop ug makasala. Apan dili sama sa kahimtang sa atong mortal nga lawas, kon ang proseso sa paghinulsol makompleto, walay mga uwat ang magpabilin tungod sa Pag-ula ni Jesukristo. Ang saad mao: ‘Tan-awa, siya kinsa naghinulsol sa iyang mga sala, ang mao gipasaylo, ug Ako, ang Ginoo, dili na mahinumdom [niini]’ [Doktrina ug mga Pakigsaad 58:42].”¹⁴

Kon maghinulsol kita “uban sa hingpit nga katuyoan sa kasingkasing,”¹⁵ “*diha diha* ang laraw sa katubsanan mapadangat” sa atong kinabuhi.¹⁶ Ang Manluluwas moayo kanato.

Ang misyonaryong magkompanyon ug ang mga propesyunal nga doktor kinsa mitabang sa giataki nakong anak didto sa misyon milihok diha-diha. Gipili sa among anak ang pagdawat sa tambal nga maoy mobatok sa ataki. Ang makaparalisar nga mga epekto sa iyang pagkaataki nga makaapekto sa iyang mortal nga kinabuhi nabatukan. Sa samang paagi, kon maghinulsol dayon kita ug ang Pag-ula ni Jesukristo dad-on nato sa atong kinabuhi, mas dali kitang maayo gikan sa mga epekto sa sala.

Si Presidente Russell M. Nelson mitanyag niini nga pagdapit: “Kon mihawa kamo sa dalan, . . . dapiton ko kamo . . . nga palihug balik. Bisan unsa pa ang inyong mga problema, bisan unsa ang inyong mga hagit, adunay luna alang kaninyo dinhi, sa Simbahan sa Ginoo. Kamo ug ang mga henerasyon nga wala pa matawo mapanalanginan sa inyong mga kasamtangang mga buhat sa pagbalik ngadto sa dalan sa pakigsaad.”¹⁷

Ang atong espiritwal nga pagkaayo nagkinahanglan nga kita mosumiter sa


atong kaugalingon sa mga kondisyon nga gilatid sa atong Manluluwas. Kinahanglan dili gayud kita maglangay! Kinahanglan gayud kitang molihok karon! Molihok karon aron ang espiritwal nga pagkaataki dili mopugong sa inyong mahangturon nga paglambo. Samtang namulong ko, kon gibati nin-yo nga kinahanglan mong mangayo’g pasaylo sa tawo nga inyong nasaypan, modapit ko lihoka kini. Sultihi sila unsay inyong nabuhat. Pangayo og pasaylo. Kon nakahimo mo og sala nga nakaapekto sa inyong pagkatakus sa templo, dapiton ko kamo sa pagpakitambag sa inyong bishop—karon. Ayaw ilangay.

Mga kaigsoonan, ang Dios mao ang atong mapinanggaon nga Amahan sa Langit. Gihatag Niya ang tanang gahum ug kahibalo ngadto sa Hinigugma Niyang Anak, si Jesukristo. Tungod Kaniya, hangtud sa hangtud ang tanang tawo ugma damlag mamaayo sa tanang pisikal nga balatian. Tungod sa Pag-ula ni Jesukristo, kon pilion nato ang paghinulsol ug sa bug-os, atong ipaling ang atong kasingkasing ngadto sa Manluluwas, Siya sa espirituhanong paagi moayo kanato. Kana nga pagkaayo posibling masugdan diha-diha. Kita ra ang mopili. *Buot ba kitang maayo?*

Mopamatuod ko nga si Jesukristo mibayad sa kantidad aron kita mamaayo. Apan kinahanglan kitang mopili aron makatumar sa makaayo nga tambal nga Iyang gihalad. Tumara kini karon. Ayaw ilangay. Sa ngalan ni Jesukristo, amen. ■

MUBO NGA MGA SULAT

1. Ang medisina gitawag og tPA (tissue plasminogen activator).
2. Mosiah 2:41.
3. Tan-awa sa Mateo 4:24. Si Kristo nagpangadto-ngadto sa pagpang-ayo sa mga tawong masakiton, bisan katong adunay “nakadaiyang sakit,” “mga kasakit,” “nasudlan og dautang espiritu,” ug “niadtong mga adunay patol.”
4. Tan-awa sa Juan 5:5–9; emphasis gidugang.
5. Tan-awa sa Lucas 8:43–47; emphasis gidugang.
6. Tan-awa sa Alma 40:23; Helaman 14:17.
7. Tan-awa sa Lucas 5:20, 23–25; tan-awa usab sa Joseph Smith Translation, Lucas 5:23 (diha sa Lucas 5:23, footnote a): “Nagkinahanglan ba og dugang nga gahum ang pagpasaylo sa mga sala kay sa pagpabangon ug pagpalakaw sa masakiton?”



8. Tan-awa sa 1 Juan 3:4.
9. Tan-awa sa 3 Nephi 27:19.
10. “Ang Ebanghelyo ni Jesukristo,” *Isangyaw ang Akong Ebanghelyo: Usa ka Giya sa Misyonaryo nga Pagserbisyo*, giusab. ed. (2018), lds.org/manual/missionary.
11. Lynn G. Robbins, “Kondili Kapitoan Ka Pito,” *Liahona*, Mayo 2018, 22.
12. Tan-awa sa Mosiah 16:5.
13. Sa daghang okasyon nakasaksi ko sa napadali nga pagkaayo sa mga tawo dihang ang mga sakop sa pamilya misuporta sa tawo kinsa nakasupak sa mga gipakigsaad mahitungod sa kamatinud-anon ug pagsalig, nagtabang nga mobalik sila sa Manluluwas sa hingpit nga paagi alang sa Iyang makaayo nga gahum sa ilang kinabuhi. Kon ang tinuoray nga mahinulsulon nga kalag sinsero nga magtinguha og kausaban, ang mga sakop sa pamilya nga motabang kanila diha sa pagtuon sa ebanghelyo, tinuorayng pag-ampo, ug Kristohanong pagserbisyo dili lang makatabang aron mausab ang nakasala apan sa pagkakita usab sa ilang kaugalingong paspas nga pagkaayo gikan sa Manluluwas diha sa ilang kinabuhi. Kon angay, ang inosenting mga biktima makatabang sa nakasala pinaagi sa pagtinguha og langitnong giya kon unsay angay nilang tun-an, unsaon sa pagserbisyo, ug unsaon sa pagpalakip sa mga sakop sa pamilya sa pagsuporta ug paglig-on sa mahinulsulon nga kalag aron mausab ug makabenipisyo gikan sa matubsanong gahum ni Jesukristo.
14. Boyd K. Packer, “Ang Plano sa Kalipay,” *Liahona*, Mayo 2015, 28.
15. 3 Nephi 18:32.
16. Alma 34:31; emphasis gidugang.
17. Russell M. Nelson, “Samtang Dungan Kita nga Magpadayon sa Unahan,” *Liahona*, Abr. 2018, 7.



Ni Elder Dale G. Renlund

Sa Korum sa Napulog Duha ka mga Apostoles

Magpili Kamo Niining Adlaw

Ang gidak-on sa atong mahangturong kalipay mag-agad sa pagpili sa buhi nga Dios ug sa pag-apil Kaniya sa Iyang buhat.

Ang dili tinuod nga tawo nga si Mary Poppins usa ka kasagarang English nga yaya—kinsa makahimo og imposible nga mga butang.¹ Miabut siya sakay sa silangang hangin aron sa pagtabang sa naglisud nga pamilyang Banks sa Numero 17, Cherry Tree Lane, London sa mga katuigang 1900. Gisangunan siya sa pag-atiman sa mga bata nga sila si Jane ug Michael. Sa lig-on apan mabinationg paagi, misugod siya sa pagtudlo kaniya og bililhong mga leksyon uban ang pinamadyik nga paagi.

Dako ang nahimong kalamboan ni Jane ug Michael, apan nakahukom si Mary nga biyaan sila. Sa dula sa entablado, ang higala ni Mary nga tiglimpyo og panghaw, si Bert, misulay sa pagpugong kaniya. Mirason siya, “Apan maayo sila nga mga bata, Mary.”

Mitubag si Mary, “Maghasol kaha ko og tudlo nila kon dili pa? Apan dili ko makatudlo kanila kon dili sila motugot, ug walay mas lisud tudloan kay sa bata nga nagtuo nga nasayud siya sa tanan.”

Nangutana si Bert, “Unya?”

Mitubag si Mary, “Kinahanglan nilang buhaton ang sunod nga bahin nga walay tabang.”²

Mga kaigsoonan, sama ni Jane ug Michael Banks, kita “maayo nga mga bata” nga takus nga tudloan. Ang atong Langitnong Amahan gustong motabang ug mopanalangin kanato, apan dili nato Siya kanunay’ng tugutan. Usahay, molihok pa gani ta nga daw nahibalo sa tanan. Ug kita usab kinahanglang mobuhat sa “sunod nga bahin” nga kita



ra. Mao kana nga mianhi kita sa yuta gikan sa atong premortal, langitnong panimalay. Ang atong “bahin” naglakip sa paghimo og mga pagpili.

Ang tumong sa atong Langitnong Amahan sa pagkaginikanaan dili ang *pagbuhat* sa Iyang mga anak sa unsay matarung; kini ang *pagpili* sa Iyang mga anak sa pagbuhat sa matarung ug sa katapusan mahimong sama Kaniya. Kon gusto lang Niya nga magmasulundon kita, mogamit Siya og diha-diha dayon nga mga ganti ug mga silot aron sa pagimpluwensya sa atong mga kinaiya.

Apan dili interesado ang Dios nga ang Iyang mga anak mahimo lang nga disiplinado ug masulundon nga mga “binuhi” nga dili mokitkit sa Iyang tsinelas diha sa celestial nga sala.³ Dili, gusto sa Dios nga ang Iyang mga anak mohingkod sa espirituanong paagi ug moapil Kaniya sa buluhaton sa pamilya.

Miestablisar ang Dios og plano diin mamahimo kitang mga manununod sa Iyang gingharian, usa ka dalan sa pakigsaad nga moggiya kanato nga mahimong sama Kaniya, makabaton sa matang sa Iyang kinabuhi, ug mopuyo sa kahangturan diha sa Iyang presensya.⁴ Ang personal nga pagpili kaniadto—ug karon—mahinungdanon niini nga plano, nga atong nakat-unan didto sa atong premortal nga kinabuhi. Midawat kita sa plano ug mipili nga moanhi sa yuta.

Aron masiguro nga mopakita kita og pagtuo ug makat-on sa tukma nga paggamit sa atong kabubut-on, usa ka tabil sa kalimot ang gial sa atong mga hunahuna aron dili kita mahinumdom sa plano sa Dios. Kon wala kana nga tabil, ang mga katuyoan sa Dios dili matuman tungod kay dili kita mouswag ug mahimong kasaligan nga mga manununod nga maoy gusto Niya nga kita mahimo.

Si propeta Lehi miingon, “Busa, ang Ginoong Dios mihatag ngadto sa tawo nga siya molihok alang sa iyang kaugalingon. Busa, ang tawo dili makalihok alang sa iyang kaugalingon gawas kini siya pagadanohon sa usa o sa lain.”⁵ Sa sukarang lebel, ang usa ka opsyon girepresentar ni Jesukristo, ang Unang Natawo sa Amahan. Ang laing opsyon

girepresentar ni Satanas, Lucifer, kinsa gustong molaglag sa kabubut-on ug moilog sa gahum.⁶

Diha ni Jesukristo, “kita adunay manlalaban nga mangatubang sa Amahan,”⁷ Human makompleto ang Iyang maulaong sakripisyo, si Jesus “[mikayab ngadto sa langit . . . aron sa pagpangayo gikan sa Amahan sa iyang mga kahigayunan sa kalooy nga anaa kaniya diha sa mga katawhan.” Ug, human makuha ang mga kahigayunan sa kalooy, “siya naglaban sa kaayohan sa mga katawhan.”⁸

Ang paglaban ni Kristo ngadto sa Amahan alang kanato dili pakigbatok sa plano sa Dios. Si Jesukristo, kinsa mitugot nga ang Iyang kabubut-on ipatuhop ngadto sa kabubut-on sa Amahan,⁹ dili mosuporta og bisan unsa gawas sa unsay gusto sa Amahan gikan sa sinugdanan. Walay duda nga ang Langitnong Amahan moabiba ug magmaya sa atong mga kalampusan.

Ang paglaban ni Kristo, sa usa ka bahin, mao ang pagpahinumdom kanato nga gibayaran na Niya ang atong mga sala ug nga walay tawo nga wala maapil sa impluwensya sa kalooy sa Dios.¹⁰ Alang niadtong motuo kang Jesukristo, maghinulsol, mabunyagan, ug molahutay sa kahangturan—usa ka proseso nga mosangput ngadto sa pagpakig-uli¹¹—ang Manluluwas mopasaylo, moayo, ug molaban. Siya ang atong tigtabang, tighupay, ug tigpataliwala—mimatuod ug miendorso sa atong pakig-uli sa Dios.¹²

Sa tumang kalahi, si Lucifer usa ka tig-akusar o tigsumbong. Si Juan ang Tigpadayag mihulagway sa katapusang kapildihan ni Lucifer: “Ug usa ka makusog nga tingog didto sa langit akong nadungog nga nag-ingon, Karon nahiabut na ang kaluwasan ug ang gahum ug ang gingharian sa atong Dios, ug ang pagbulot-an sa iyang Kristo.” Ngano? Tungod kay “gikatambog na ang magsusumbong batok sa atong kaigsoonan, siya nga sa adlaw ug sa gabii mao ang nagasumbong batok kanila sa atubangan sa atong Dios. Kay sila nakadaug batok kaniya pinaagi sa dugo sa Kordero, ug sa pulong sa ilang pagpanghimatuod.”¹³



Si Lucifer mao kini nga magsusumbong. Namulong siya batok kanato sa premortal nga kinabuhi, ug padayon siya nga nanghimaraut kanato. Tinguha niya ang pagbira kanato paubos. Gusto niya nga makasinati kita og walay katapusang kaalautan. Siya ang nagasulti kanato nga dili kita makasarang, ang nagsulti kanato nga dili igo ang atong kamaayo, ang nagsulti kanato nga dili na kita makabawi gikan sa sayop. Siya ang pinakagrabe nga tigdaug-daog, ang motiwas kanato kon anaa na kita sa kalisud.

Kon si Lucifer nagtudlo og bata sa paglakaw ug ang bata madagma, iyang singgitan ang bata, silotan kini, ug sultihan sa paghunong. Ang mga paagi ni Lucifer mosangput sa pagkawala sa kadasig ug kasagmuyo—sa katapusan ug sa kanunay. Kining amahan sa mga bakak mao ang pinakagrabeng tighatag sa mga dili tinuod¹⁴ ug maliputong naningkamot sa paglingla ug pag-ilad kanato, “kay siya nagtinguha nga ang tanan nga mga tawo unta mahimo nga mauyamot sama ngadto kaniya.”¹⁵

Kon si Kristo nagtudlo og bata sa paglakaw ug ang bata madagma, Iyang tabangan nga makabarug ang bata ug moawhag sa sunod nga mga lakang.¹⁶ Si Kristo mao ang tigtabang ug tighupay. Ang iyang mga paagi nagdala og kalipay ug paglaum—sa katapusan ug sa kanunay.

Ang plano sa Dios naglakip og mga direksyon alang kanato, nga gitawag diha sa mga kasulatan isip mga sugo. Kini nga mga sugo dili panglingaw-lingaw nga pundok ni

pinasulagma nga koleksyon sa ipatuman nga mga lagda aron sa pagbansay kanato nga magmasulundon. Konektado kini sa atong pagpalambo og mga kinaiya sa pagkadiosnon, pagbalik ngadto sa atong Langitnong Amahan, ug pagdawat og malungtarong kalipay. Ang pagsunod sa Iyang mga sugo dili usa ka buhat nga walay paghunahuna; maalamon kitang mipili sa Dios ug sa Iyang dalan pauli. Ang sumbanan alang kanato susama kaniadto kang Adan ug Eva, diin “ang Dios mihatag ngadto kanila sa mga sugo, human ikapahibalo ngadto kanila ang laraw sa katubsanan.”¹⁷ Bisan og gusto sa Dios nga maa-naa kita sa dalan sa pakigsaad, mihatag Siya kanato sa dignidad sa pagpili.

Sa pagkatinuod, ang Dios nagtinguha, naglaum, ug naggiya aron ang matag usa sa Iyang mga anak mopili alang sa iyang kaugalingon. Dili Siya mopugos kanato. Pinaagi sa gasa sa kabubut-on, ang Dios nagtugot sa Iyang mga anak “sa pagbuhat alang sa ilang mga kaugalingon ug nga dili pagaaghaton.”¹⁸ Ang kabubut-on nagtugot kanato sa pagpili nga maanaa sa dalan sa pakigsaad, o dili. Nagtugot kini kanato sa pagpalayo, o dili. Sama nga dili kita mapugos sa pagsunod, dili usab kita mapugos sa pagsupak. Walay usa, kon wala ang atong pag-uyon, nga makapalayo kanato sa dalan. (Karon, dili kini angay nga masaypan nga nagpasabut niadtong kansang kabubut-on gilapas. Wala sila mapalayo sa dalan; mga biktima sila. Ilang madawat ang pagsabut, gugma, ug kalooy sa Dios.)

Apan kon mopalayo kita sa dalan, ang Dios maguol tungod kay nasayud Siya nga sa katapusan, mosangput kini kanunay sa pagkunhod sa kalipay ug pagkawala sa mga panalangin. Sa mga kasulatan, ang pagpalayo sa dalan gitawag og sala, ug ang miresulta nga pagkunhod sa kalipay ug pagkawala sa mga panalangin gitawag og silot. Niini nga pagsabut, ang Dios wala magsilot kanato; ang silot mao ang sangputanan sa atong kaugalingon nga mga pagpili, dili Iyaha.

Kon atong madiskubrihan nga mipalayo kita sa dalan, mahimo kitang magpabilin nga anaa sa layo, o tungod sa Pag-ula ni Jesukristo, makapili kita sa pagbali sa atong mga lakang ug mobalik sa dalan. Sa mga kasulatan, ang proseso sa paghukom nga mag-usab ug mobalik sa dalan gitawag og paghinulsol. Ang kapakyas sa paghinulsol nagpagsabut nga gipili nato nga dili mahimong takus ang atong kaugalingon sa mga panalangin nga gitinguha sa Dios nga ihatag. Kon kita “wala mouyon sa paglipay niana nga [kita] unta nakadawat,” kita “[mobalik] . . . sa [atong] kaugalingon nga dapit, aron maglipay niana diin [kita] mouyon sa pagdawat”¹⁹—atong pagpili, dili sa Dios.

Bisan unsa kita kadugay nga nahilayo sa dalan o unsa ka layo kita nga nahisalaag, sa higayon nga modesisyon kita sa pag-usab, ang Dios motabang kanato nga makabalik.²⁰ Gikan sa panglantaw sa Dios, pinaagi sa sinsero nga paghinulsol ug sa pagpadayon sa unahan uban ang pagkamakanunayon kang Kristo, sa higayon nga mabalik na sa dalan, sama ra kini nga wala gayud kita mopalayo.²¹ Ang Manluluwas mobayad sa atong mga sala ug mopalingkawas kanato gikan sa umaabut nga pagkunhod sa kalipay ug mga panalangin. Gipasabut kini diha sa mga kasulatan isip pagpasaylo. Human sa bunyag, ang tanang mga miyembro madakin-as sa dalan—ang uban kanato manglukso pa gani palayo. Busa, ang pagpakita og pagtuo diha ni Jesukristo, paghinulsol, pagdawat og tabang gikan Kaniya, ug mapasaylo dili kausa ra nga mga panghitabo apan tibuok kinabuhi



nga mga proseso, mga proseso nga pabalikbalik ug kanunay. Kini ang paagi nga kita “molahutay hangtud sa katapusan.”²²

Kinahanglang pilion nato kon kinsa ang atong serbisyuhan.²³ Ang gidak-on sa atong mahangturong kalipay mag-agad sa pagpili sa buhi nga Dios ug sa pag-apil Kaniya sa Iyang buhat. Samtang maningkamot kita nga “buhaton ang sunod nga bahin” nga kita ra, nagpraktis kita sa husto nga paggamit sa atong kabubut-on. Sama sa gisulti sa duha ka kanhi Kinatibuk-ang Presidente sa Relief Society, kinahanglan nga dili kita “mga batang gagmay nga nagkinahanglan nga tagdon ug korihian sa tanang higayon.”²⁴ Dili, gusto sa Dios nga mahimo kitang hamtong nga mga tawo ug modumala sa atong kaugalingon.

Ang pagpili sa pagsunod sa plano sa Amahan mao ang bugtong paagi nga mahimo kitang mga manununod sa Iyang gingharian; niana lamang nga Siya makasalig kanato nga dili mangayo niana nga sukwahi sa Iyang kabubut-on.²⁵ Apan kinahanglan natong hinumduman nga “walay mas lisud tudloan kay sa bata nga nagtuo nga nasayud siya sa tanan.” Busa kinahanglan kitang andam nga matudloan sa mga pamaagi sa Ginoo pinaagi sa Ginoo ug sa Iyang mga sulugoon.

Makasalig kita nga hinigugma kita nga mga anak sa Langitnong mga Ginikannan²⁶ ug takus “nga tudloan” ug makapaniguro nga ang “kita ra” wala gayud magpasabut nga “mag-inusara.”

Sama sa gisulti sa propeta sa Basahon ni Mormon nga si Jacob, ako mosulti uban kaniya:

“Busa, lipaya ang inyong mga kasingkasing, ug hinumdumi nga kamo gawasnon sa paglihok alang sa inyong mga kaugalingon—sa pagpili sa agianan sa walay katapusan nga kamatayon o sa agianan sa kinabuhi nga dayon.

“Busa, akong hinigugma nga mga kaigsoonan, pakig-uli sa inyong kaugalingon ngadto sa kabubut-on sa Dios, ug dili ngadto sa kabubut-on sa yawa . . . ; ug hinumdumi, human kamo mahiuli ngadto sa Dios, nga kini diha lamang ug pinaagi sa grasya sa Dios nga kamo maluwas.”²⁷

Busa, pilia ang pagtuo diha kang Kristo; pilia ang paghinulsol; pilia ang pagpabunyang ug pagdawat sa Espiritu Santo; pilia ang mahunahunaong pagpangandam ug takus nga pag-ambit sa sakrament; pilia ang paghimo og mga pakigsaad sa templo; ug pilia ang pagserbisyo sa buhing Dios ug sa Iyang mga anak. Ang atong mga pagpili motino kon kinsa kita ug mamahimo kitang kinsa.

Akong tapuson uban sa pagtiwas sa panalangin ni Jacob: “Busa, hinaut pa unta nga ang Dios mobanhaw kaninyo gikan sa . . . walay katapusan nga kamatayon pinaagi sa gahum sa pag-ula, nga kamo mahimo nga dawaton ngadto sa mahangturong nga gingharian sa Dios.”²⁸ Sa pangalan ni Jesukristo, amen. ■

MUBO NGA MGA SULAT

1. Ang dili tinuod nga tawo nga si Mary Poppins gimugna diha sa mga sinulat ni P. L. Travers. Ang iyang mga libro mao ang gibasihan sa usa ka musikal-pantasya nga sine sa 1964, gipasundayag ni Walt Disney, ug sa wala madugay sa usa ka pagpahiangay sa sine diha sa entablado.
2. Ang drama sa entablado naglangkob sa eksena nga gihulagway. Tan-awa sa *Libretto to Mary Poppins: The Broadway Musical*, 70.
3. Tan-awa sa Spencer W. Kimball, sa Brisbane Area Conference 1976, 19. Si Presidente Kimball nanaghap: “Ang pinakaunang butang sa wala pa magsugod

ang atong kinabuhi dinhi, miingon ang Ginoo, 'Hatagan ko kamo sa inyong kabubut-on. Gusto ko og mga lalaki ug mga babaye nga lig-on tungod kay matarung ang mahimong lig-on. Dili ko gusto og mga huyang nga matarung lamang tungod kay kinahanglan silang mahimong matarung.'"

4. Tan-awa, sama pananglit, ang Russell M. Nelson, "Samtang Dungan Kita nga Magpadayon sa Unahan," *Liahona*, Abr. 2018, 7. Ang dalan sa pakigsaad gitawag usab og laraw sa kalipay (tan-awa sa Alma 42:8, 16) ug laraw sa katubsanan (tan-awa sa Alma 12:25-35).
5. 2 Nephi 2:16.
6. Tan-awa sa Moises 4:3.
7. 1 Juan 2:1; tan-awa usab ang Hubad ni Joseph Smith, 1 Juan 2:1.
8. Moroni 7:27, 28.
9. Tan-awa sa Mosiah 15:7.
10. Tan-awa sa 1 Juan 2:2.
11. Tan-awa sa 2 Mga Taga-Corinto 5:16-21; Mga Taga-Colosas 1:19-23; 2 Nephi 10:24.
12. Ang Gresyanhong pulong alang sa manlalaban (*paraklētōs*) nagpasabut nga tigpataliwala, tigtabang, tighupay, o tiglingaw (tan-awa sa *The New Strong's Expanded Exhaustive Concordance of the Bible* [1984], Greek dictionary section, 55; 2 Nephi 10:23-25; Doktrina ug mga Pakigsaad 45:3-5).
13. Pinadayag 12:10-11.
14. Tan-awa sa Ether 8:25.
15. 2 Nephi 2:27; tan-awa usab sa 2 Nephi 2:6-8, 16, 26.
16. Tan-awa sa Fiona ug Terryl Givens, *The Christ Who Heals* (2017), 29, 124. Alang sa orihinal nga paghisgot, tan-awa sa Anthony Zimmerman, *Evolution and the Sin in Eden* (1998), 160, nga naghisgot sa Denis Minns, *Irenaeus* (2010), 61.
17. Alma 12:32.
18. 2 Nephi 2:26; tan-awa usab sa 2 Nephi 2:16.
19. Doktrina ug mga Pakigsaad 88:32.
20. Tan-awa sa Alma 34:31.
21. Tan-awa sa 2 Nephi 31:20; Mosiah 26:29-30; Doktrina ug mga Pakigsaad 58:42-43; Boyd K. Packer, "Ang Plano sa Kalipay," *Liahona*, Mayo 2015, 28. Si Presidente Packer miingon, "Kon ang proseso sa paghinulsol makompleto, walay mga uwat ang magpabilin tungod sa Pag-ula ni Jesukristo."
22. 2 Nephi 31:20.
23. Tan-awa sa Josue 24:15.
24. Julie B. Beck, "Ug Ibabaw sa mga Sulugoong Babaye Niadtong mga Adlaw Igabubu Ko ang Akong Espiritu," *Liahona*, Mayo 2010, 12; si Sister Beck mikutlo ni Eliza R. Snow, pakigpulong ngadto sa Lehi Ward Relief Society, Okt. 27, 1869, Lehi Ward, Alpine (Utah) Stake, sa Relief Society, Minute Book, 1868-79, Church History Library, Siyudad sa Salt Lake, 26-27.
25. Tan-awa sa 2 Nephi 4:35; Helaman 10:5.
26. Tan-awa sa "Ang Pamilya: Usa ka Pamahayag ngadto sa Kalibutan," *Liahona*, Mayo 2017, 145.
27. 2 Nephi 10:23-24.
28. 2 Nephi 10:25.



Ni Elder Jack N. Gerard
Sa Seventy

Karon ang Panahon

Kon adunay bisan unsa nga butang sa inyong kinabuhi nga kinahanglan ninyong ikonsiderar, karon mao ang panahon.

Pipila ka tuig na ang milabay, samtang nag-andam sa usa ka biyahe kabahin sa negosyo, nagsugod ko sa pagsinati og kasakit sa dughan. Tungod sa kabalaka, gikuyugan ko sa akong asawa. Sa unang bahin sa among biyahe, ang sakit migrabe pagayo ngadto sa punto nga ako naglisud sa pagginhawa. Sa pagtugpa na namo, mibiya mi sa airport ug miadto sa lokal nga ospital, diin, human sa daghang mga pag-eksamin, ang nag-atiman nga doktor mideklarar nga luwas na kami nga mopadayon sa among biyahe.

Mibalik mi sa airport ug misakay sa biyahe padulong sa among katapusan nga destinasyon. Samtang nagpaubos na kami, ang piloto miadto sa intercom ug mihangyo nako nga magpaila sa akong kaugalingon. Ang flight attendant miduol, miingon nga bag-o lang sila nakadawat og emerhensya nga tawag, ug misulti nako nga dunay ambulansya nga naghulat sa airport nga modala nako ngadto sa ospital.

Misakay mi sa ambulansya ug dali nga gidala ngadto sa emergency room. Didto gisugat kami sa duha ka



mabalak-on nga doktor kinsa mipasabut nga wala matarung ang pag-dayagnos nako ug sa tinuod adunay seryoso nga pulmonary embolism, o mibagtok nga dugo, sa akong baga, nga nagkinahanglan og dinalian nga medikal nga pagtagad. Ang mga doktor mipahibalo namo nga daghang mga pasyente dili makalahutay niini nga kondisyon. Nakahibalo nga layo mi sa amoa ug wala mi makasiguro kon andam ba kami sa maong makapausab sa kinabuhi nga panghitabo, ang mga doktor miingon nga kon adunay bisan unsa nga butang sa among kinabuhi nga kinahanglan namong hunahunaon, karon mao ang panahon.

Nakahinumdom ko pag-ayo nga hapit diha-diha nianang mabalak-on nga higayon, ang akong tibuok panglantaw nausab. Unsay importante kaayo mga pipila ka gutlo lang ang milabay karon wala na kaayo makapa-interes. Ang akong hunahuna nausab gikan sa kalibutanong mga kabalaka ngadto sa mahangturong panglantaw—naghunahuna sa pamilya, mga anak, sa akong asawa, ug sa katapusan sa paghunahuna sa akong kaugalingong kinabuhi.

Unsay among nahimo isip pamilya ug indibidwal? Nagpuyo ba kami sa among kinabuhi nga nagsubay sa mga pakigsaad nga among gihimo ug sa mga gipaabut sa Ginoo, o wala tuyoa nga gitugutan ba namo ang mga kabalaka sa kalibutan sa pagbalda namo gikan sa mga butang nga mas labing importante?

Modapit ko kaninyo sa pagkonsiderar og importante nga leksyon nga nakat-unan gikan niini nga kasinatian: sa paghunong sa pagtutok sa kalibutanong mga kabalaka ug sa pagtimbang-timbang sa inyong kinabuhi. O sama sa gisulti sa doktor, kon dunay bisan unsa nga butang sa among kinabuhi nga kinahanglan namong hunahunaon, karon mao ang panahon.

Pagtimbang-timbang sa Atong Kinabuhi

Nagpuyo kita sa kalibutan nga daghan na kaayo og impormasyon nga lisud na sa paghunahuna og klaro, gidominar sa nagkadaghan nga mga makabalda nga nakapahimo niini nga



mas lisud sa pagpili pinaagi sa kalibug niini nga kinabuhi ug sa pagtutok sa mga butang nga dunay mahangturong bili. Ang atong inadlaw-adlaw nga kinabuhi kanunay nga nabantang sa mga balita nga gitumong sa pagkuha sa atong pagtagad, sa pagpakita nato pinaagi sa dali kaayong mausab nga mga teknolohiya.

Gawas kon kita mogahin og panahon sa pagpamalandong, tingali dili kita makaamgo sa epekto niining dali kaayong mausab nga kahimtang sa atong inadlaw-adlaw nga kinabuhi ug sa mga pagpili nga atong himoon. Makita nato ang atong kinabuhi nga nahurot sa ginagmay nga impormasyon nga gipasa sa usa ka tawo ngadto sa lain nga tawo hangtud nga nag-viral nga kasagaran gibuhat pinaagi sa internet, mga video, ug mga balita nga makadani sa atong pagtagad. Bisan og makapaikag ug makalingaw, kadaghanan gamay ra ang mahimo niini sa atong mahangturong kauswagan, ug unya nakaimpluwensya kini sa paagi sa atong pagtan-aw sa atong mortal nga kasinatian.

Kining kalibutanong mga makabalda mahimong ipahisama ngadto sa damgo ni Lehi. Samtang kita mouswag diha sa dalan sa pakigsaad nga nangguni pag-ayo sa gunitanan nga puthaw, madungog ug makita nato kadtong “nagbiay-biay ug nagtulisok sa ilang mga tudlo” gikan sa dako ug lapad nga gambalay (1 Nephi 8:27). Tingali wala nato tuyoa ang pagbuhat sa ingon, apan usahay kita mohunong ug mobalhin sa atong pagtagad aron motan-aw

unsay nahitabo sa dako ug lapad nga gambalay. Ang pipila kanato mamuhi sa gunitanan nga puthaw ug magpaduol aron mas makaklaro. Ang uban hingpit nga nangawala “tungod niadto nga nagbugal-bugal kanila” (1 Nephi 8:28).

Mipasidaan ang Manluluwas kanato “magbantay kamo . . . basi sa inyong mga kasingkasing mahiluwan ang pagpatuyang . . . kabalaka tungod niining kinabuhia” (Lucas 21:34). Ang moderno nga pagpadayag nagpahinumdom nato nga daghan ang gitawag, apan pipila lang ang napili. Wala sila mapili “tungod kay ang ilang mga kasingkasing gipahimutang . . . diha sa mga butang niini nga kalibutan, ug naninguha sa mga pasidungog sa mga tawo” (Doktrina ug mga Pakigsaad 121:35; tan-awa usab sa bersikulo 34). Ang pagtimbang-timbang sa atong kinabuhi maghatag nato og kahigayunan sa paghunong sa pagtutok sa kalibutan, mamalandong asa kita nagbarug sa dalan sa pakigsaad, ug, kon gikinahanglan, maghimo og mga kausaban aron sa pagsiguro og hugot nga paggunit ug sa pagpadayon.

Karong bag-o, sa usa ka tibuok kalibutan nga debosyonal, si Presidente Russell M. Nelson midapit sa kabatan-onan sa paghunong sa pagtutok sa kalibutan, paghunong gikan sa social media pinaagi sa paghimo og pito ka adlaw nga pagpuasa. Ug kagabii lang, mihatag siya og susama nga pagdapit sa mga sister isip kabahin sa sesyon sa komperensya sa mga babaye. Dayon misugo siya kanila sa pagbantay sa bisan unsa nga mga kalainan nga ilang bation, unsay ilang gihunahuna, o bisan sa unsa nga paagi sila maghunahuna. Dayon midapit siya kanila “nga maghimo kamo og pagtimbang-timbang sa kinabuhi uban sa Ginoo . . . sa pagsiguro nga nagbuhat kamo sa gikinahanglang buhaton diha sa dalan sa pakigsaad.” Giawhag niya sila nga kon adunay mga butang sa ilang kinabuhi nga kinahanglang usbon, “karon mao ang saktong panahon sa pag-usab.”¹

Sa pagtimbang-timbang sa mga butang sa atong kinabuhi nga kinahanglang usbon, mangutana kita sa atong kaugalingon og praktikal nga

pangutana: Unsaon nato nga makabuntog sa mga makababag niini nga kalibutan ug magpabilin nga nakatutok sa panan-awon sa kahangturan nga anaa sa atong atubangan?

Sa 2007 nga pakigpulong sa komperensya nga giulohan og “Maayo, Mas Maayo, Labing Maayo,” si Presidente Dallin H. Oaks mitudlo unsaon sa pag-una sa mga pagpili uban sa atong daghang nagkasungi nga kalibutanong mga kalisud. Mitambag siya, “Kinahanglan atong ipalabay ang ubang maayo nga mga butang aron sa pagpili sa uban nga mas maayo o labing maayo tungod kay kini nag-ugmad og hugot nga pagtuo kang Ginoong Jesukristo ug naglig-on sa atong mga pamilya.”²

Mosugyot ko nga ang labing maa-yong mga butang niini nga kinabuhi nakasentro ni Jesukristo ug sa pagsabut sa mahangturong mga kamatuoran kon kinsa Siya ug kinsa kita sa atong relasyon uban Kaniya.

Pangita sa Kamatuoran

Samtang maningkamot kita nga makaila sa Manluluwas, kinahanglan nga dili nato kalimtan ang sukaranang kamatuoran kon kinsa kita ug ngano nga kita ania dinhi. Si Amulek nagpahinumdom nato nga “kini nga kinabuhi mao ang panahon . . . sa pagpangandam sa pagsugat sa Dios,” ang panahon “diin gihatag kanato aron pagpangandam alang sa kahangturan” (Alma 34:32–33). Sama sa usa ka inila nga panultihon nga nagpahinumdom kanato, “Dili kita mga tawo nga adunay espirituhanong kasinatian. Espirituhanon kita nga mga binuhat nga adunay tawhanong kasinatian.”³

Ang pagsabut sa atong balaan nga gigikanan importante sa atong mahangturong kauswagan ug makapalingkawas nato gikan sa mga makabalda niini nga kinabuhi. Ang Manluluwas mitudlo:

“Kon pabilin kamo sa akong pulong, nan, kamo tinuod gayud nga akong mga tinun-an;

“Ug kamo mahibalo sa kamatuoran, ug ang kamatuoran magahatag kaninyog kagawasan” (Juan 8:31–32).

Si Presidente Joseph F. Smith mipahayag, “Ang pinakadakong makab-ot



nga mahimo sa katawhan niini nga kalibutan mao ang pagsinati sa ilang mga kaugalingon sa balaanong kamatuoran, sa hilabihan, sa hingpit, nga walay ehemplo o kinaiya sa usa ka nilalang nga nagpuyo sa kalibutan ang makapahilayo kanila gikan sa kahibalo nga ilang naangkon.”⁴

Sa kalibutan karon, ang debati mahitungod sa kamatuoran miabut sa taas kaayo nga ang-ang, uban sa tanan nga nangangkon sa kamatuoran ingon nga kini may kalabutan nga konsepto nga bukas alang sa indibidwal nga paghubad. Ang batan-ong si Joseph Smith nakakita nga, “hilabihan ang kalibug ug kagubot” sa iyang kinabuhi “nga kini dili mahimo . . . aron pagkab-ut sa usa ka piho nga paghukom kinsa ang tinuod ug kinsa ang sayop” (Joseph—Kasaysayan 1:8). Diha “sa taliwala niini nga gubat sa mga pulong ug kagubot sa mga opinyon” nga siya nagtinguha og balaan nga giya pinaagi sa pagpangita sa kamatuoran (Joseph Smith—Kasaysayan 1:10).

Sa komperensya sa Abril, si Presidente Nelson mitudlo, “Kon gusto kitang makaangkon og paglaum nga makaayag sa daghang mga opinyon ug sa mga pilosopiya sa katawhan nga nag-atake sa kamatuoran, kinahanglan makakat-on kita sa pagdawat og pagpadayag.”⁵ Kinahanglan kita nga makat-on sa pagsalig sa Espiritu sa Kamatuoran, nga “ang kalibutan dili makadawat, tungod kay ang kalibutan dili man makakita kaniya ni makaila kaniya” (Juan 14:17).

Samtang kini nga kalibutan dali nga makabalhin ngadto sa alternatibo nga

mga reyalidad, kinahanglan nga mahinumdom kita sa mga pulong ni Jacob nga “ang Espiritu namulong sa kamatuoran ug dili mamakak. Busa, kini namulong sa mga butang ingon nga sila gayud mao, ug sa mga butang ingon nga sila gayud mahimo unya; busa, kini nga mga butang gipakita ngari kanato sa yano nga paagi, alang sa kaluwasan sa atong mga kalag” (Jacob 4:13).

Samtang kita mohunong sa pagtutok sa kalibutan ug magtimbang-timbang sa atong kinabuhi, karon mao ang panahon sa paghunahuna unsa nga mga kausaban ang kinahanglan natong himoon. Makakuha kita og dakong paglaum sa pagkahibalo nga ang atong Ehemplo, nga si Jesukristo sa makausa migiya sa agianan. Sa wala pa ang Iyang kamatayon ug Pagkabanhaw, samtang Siya naningkamot sa pagtabang niadtong anaa sa Iyang palibut nga makasabut sa Iyang balaan nga tahas, mipahinumdom Siya kanila “nga dinhi kanako makabaton kamo og kalinaw. Dinhi sa kalibutan aduna kamoy kagul-anan: apan sumalig kamo; gida-ug ko na ang kalibutan” (Juan 16:33). Kaniya ako mosaksi diha sa pangalan ni Jesukristo, amen. ■

MUBO NG MGA SULAT

1. Russell M. Nelson, “Paglaum sa Israel” (tibuok kalibutan nga debosyonal sa kabatan-onan, Hunyo 3, 2018), hopeofIsrael.lds.org.
2. Dallin H. Oaks, “Maayo, Mas Maayo, Labing Maayo,” *Liahona*, Nob. 2007, 107.
3. Kanunay nga gipahinungod ngadto ni Pierre Teilhard de Chardin.
4. *Mga Pagtulun-an sa mga Presidente sa Simbahan: Joseph F. Smith* (1998), 49.
5. Russell M. Nelson, “Pagpadayag alang sa Simbahan, Pagpadayag alang sa Atong mga Kinabuhi,” *Liahona*, Mayo 2018, 96.



Ni Elder Gary E. Stevenson

Sa Korum sa Napulog Duha ka mga Apostoles

Pagbantay sa mga Kalag

Motabang kita sa uban pinaagi sa gugma tungod kay mao kini ang gisugo sa Manluluwas nga atong buhaton.

Sa bag-ohay lang nga panag-istoryahanay uban sa usa nako ka higala, iya kong gisultihan nga sa dihang batan-on pa siya, bag-ong nabunyagan nga miyembro sa Simbahan, kalit siyang mibati nga morag wala na siya mahisakop sa iyang ward. Ang mga misyonaryo nga nagtudlo kaniya nabalhin na, ug mibati siya nga walay nagpakabana. Kay walay mga higala sa ward, nakit-an niya ang iyang karaang mga higala ug kauban nilang nalambigit sa mga kalihokan nga nakapugong aron makaapil sa simbahan—sa ingon nagsugod na siya sa pagpalayo sa simbahan. Uban sa mga luha sa iyang mga mata, iyang gihulagway kon unsa siya kamapasalamat sa dihang usa ka sakop sa ward mipadangat og mapangalagarong kamot ngadto niya ug, sa mainiton ug malakipon nga paagi, midapit niya nga mobalik. Sulod sa mga bulan, aktibo na siyang miapil sa simbahan, mipalig-on sa uban ingon man sa iyang kaugalingon. Dili ba kita magpasalamat alang sa magbalantay didto sa Brazil kinsa nangita niining batan-ong lalaki, si Elder Carlos A. Godoy, kinsa naglingkod sa akong luyo isip sakop sa Kapangulohan sa Seventy?

Dili ba talagsaon kon sa unsang paagi nga ang ingon ka gagmayng mga paningkamot makahimo og

mahangturong mga sangputanan? Kini nga kamatuoran anaa sa sentro sa mga paningkamot sa Simbahan kalabut sa pagpangalagad. Ang Langitnong Amahan mahimong modawat sa atong yano, inadlaw nga mga paningkamot ug mohimo niini ngadto sa butang nga milagroso. Unom na ka bulan sukad gipahibalo ni Presidente Russell M. Nelson nga “ang Ginoo naghimo og importanting kausaban sa paagi nga kita moatiman sa usag usa,”¹ nga nagpasabut, “Atong ipatuman ang mas bag-o, mas balaan nga paagi sa pagamuma ug pagpangalagad sa uban. Atong tawagon kining mga paningkamot isip ‘pagpangalagad.’”²

Si Presidente Nelson mipasabut: “Ang timailhan sa tinuod ug buhi nga Simbahan sa Ginoo kanunay mao ang organisado, gidumala nga paningkamot sa pagpangalagad ngadto sa indibidwal nga mga anak sa Dios ug ilang mga pamilya. Tungod kay kini Iyang Simbahan, kita isip Iyang mga sulugoon mangalagad ngadto sa usa, sama sa Iyang gibuhay. Mangalagad kita sa Iyang ngalan, sa Iyang gahum ug katungod, ug uban sa Iyang mahigugmaong pagbati.”³

Sukad nianang pagpahibalo, ang inyong tubag talagsaon kaayo! Nakadawat kami og mga report bahin sa

dakong kalampusan sa pag-implementar niining mga kausaban sa hapit tanang stake sa kalibutan nga giniyahan sa atong buhi nga propeta. Pananglitan, ang mga tigpangalagad nga mga kaigsoonan nasangunan ngadto sa mga pamilya, mga managkompanyon—lakip na sa mga batan-ong lalaki ug babaye—naorganisar na, ug gipahigayon na ang mga interbyu sa pagpangalagad.

Dili ko motuo nga sulagma ra nga unom ka bulan sa wala pa ang mapadayagong pagpahibalo kagahapon—“usa ka bag-ong balanse ug koneksyon tali sa pagtudlo sa ebanghelyo diha sa panimalay ug sa Simbahan”⁴—ang mapadayagong pagpahibalo bahin sa pagpangalagad gihatag. Sugod sa Enero, samtang maminusan og usa ka oras ang atong pagsimba, tanan nga atong nahibaloan sa pagpangalagad makatabang nato nga mabalanse og balik kanang gintang sa mas halangdon, mas balaan, nakasentro sa panimalay nga kasinatian sa adlaw nga Igapahulay ngadto sa pamilya ug mga minahal sa kinabuhi.

Kay naestablisar na ang istruktura sa organisasyon, tingali makapangutana kita, “Unsaon nato pagkahibalo nga nangalagad kita sa paagi sa Ginoo? Nakaabag ba kita sa Maayong Magbalantay sa paagi nga Iyang gitumong?”

Sa bag-ohay lang nga panaghigot, si Presidente Henry B. Eyring midayeg sa mga Santos sa pagpahiangay niining klaro nga mga kausaban pero mipahayag usab sa iyang sinsero nga paglaum nga mahibaloan sa mga miyembro nga ang pagpangalagad sobra pa sa “basta maayo lang.” Wala kana magpasabut nga ang basta maayo lang dili importante, pero kadtong nakasabut sa tinuod nga diha sa pagpangalagad makaamgo nga lapas pa kini sa basta maayo lang. Kon buhaton sa paagi sa Ginoo, ang pagpangalagad makahimo og malungtarong impluwensya alang sa kaayohan nga magpadayon sa tibuk kahangturan, sama sa nahimo niini kang Elder Godoy.

“Ang Manluluwas mipakita sa ehemplo kon unsay gipasabut sa pagpangalagad samtang miserbisyo Siya tungod sa gugma. . . . Iyang . . . gitudloan, gi-ampo, gihupay, ug gipanalanginan

kadtong naglibut Kaniya, nagdapit sa tanan sa pagsunod Kaniya. . . . Samtang nangalagad ang mga miyembro sa Simbahan [sa mas halangdon ug mas balaan nga paagi], mainampuon silang nagtinguha nga moserbisyo sama sa Iyang buhaton—sa . . . ‘pagbantay diha sa simbahan sa kanunay, ug magpaduol ug maglig-on kanila,’ sa ‘pagduaw sa balay sa matag sakop,’ ug motabang sa matag usa nga mahimong tinuod nga disipulo ni Jesukristo.”⁵

Nakasabut kita nga ang usa ka tinuod nga magbalantay nahigugma sa iyang mga karnero, nakaila sa ngalan sa matag usa, ug “dunay personal nga interes diha” kanila.⁶

Ang akong higala sa daghang katugwayan migahin sa iyang kinabuhi isip usa ka rantsero [rancher], naghimo sa bug-at nga trabaho sa pagbuhi og mga baka ug mga karnero sa lisud nga dapit sa Rocky Mountains. Kausa mipaambit siya nako sa mga hagit ug mga kape-ligro nga may kalabutan sa pagbuhi og mga karnero. Iyang gihulagway nga sa sayong bahin sa tingpamulak, sa dihang ang snow sa dako kaayo nga kabukiran kasagaran natunaw na, iyang ibutang ang mga binuhi sa pamilya nga mga 2,000 ka karnero didto sa kabukiran alang sa ting-init. Didto, iyang bantayan ang mga karnero hangtud sa hinapos sa tinglarag, sa dihang balhinon na sila gikan sa tugwayanan sa ting-init ngadto sa tugwayanan sa tingtugnaw didto sa disyerto. Iyang gihulagway kon unsa kalisud ang pag-atiman og dako nga panon sa mga karnero, nga nagkinahanglan og mga sayo sa buntag ug mga lawom nga gabii—magmata na sa dili pa mosidlak ang adlaw ug mahuman og dugay human mongitngit. Tingali dili niya kadto mahimo nga mag-inusara.

Mitabang ang uban sa pag-atiman sa mga karnero, lakip na sa eksperyensyado nga rantsero nga giabagan sa mas batan-on nga nakabenepisyo gikan sa kaalam sa ilang mga kauban. Misalig usab siya sa duha ka edaran nga mga kabayo, duha ka laki nga mas bata nga mga kabayo nga gibansay, duha ka dagkong mga iro nga tigbantay sa mga karnero, ug duha o tulo ka itoy nga

tigbantay sa mga karnero. Panahon sa ting-init, ang akong higala ug ang iyang mga karnero nakasinati og hangin ug mga unos nga may ulan, sakit, mga angol, huwaw, ug hapit tanang kalisud nga mahunahunaan sa tawo. Pipila ka tuig kinahanglan sila nga maghakot og tubig sa tibuok ting-init aron lang mabuhi ang mga karnero. Dayon, kada tuig sa hinapos sa tinglarag, sa dihang ang panahon sa tingtugnaw nanghulga ug ang mga karnero gikuha gikan sa kabukiran ug gihip, dihay kasagaran sobra sa 200 nga nangawala.

Ang pundok sa 2,000 ka karnero nga gibutang sa kabukiran sa sayong bahin sa tingpamulak naminusan ngadto sa dili kaabot sa 1,800. Kasagaran sa nawala nga mga karnero *wala* mawala tungod sa sakit o natural nga kamatayon pero ngadto sa mga manunukob [predator] sama sa mga mountain lion o mga coyote. Kining mga manunukob kasagaran makakita sa mga gagmayng karnero nga nangasaag gikan sa kasiguroan sa pundok, mipalayo gikan sa proteksyon sa magbalantay niini. Makonsiderar ba ninyo kadali kon unsay akong gihulagway bag-o lang sa usa ka espirital nga konteksto? Kinsa ang magbalantay? Kinsa ang panon? Kinsa kadtong miabag sa magbalantay?

Si Ginoong Jesukristo Mismo miingon, “Ako mao ang maayong magbalantay sa mga karnero, ug ako nakaila sa mga ako, . . . ug igahalad ko ang akong kinabuhi sa pagpakamatay alang sa mga karnero.”⁷

Si propeta Nephi sa samang paagi nagtudlo nga si Jesus “mopakaon sa iyang karnero, ug diha kaniya sila makakita og katugwayan.”⁸ Nakakita ko og malungtarong kalinaw sa pagkasayud nga “ang Ginoong mao ang *akong* magbalantay”⁹ ug nga ang matag usa kanato nailhan Niya ug ubos sa Iyang pag-atiman. Kon magsagubang kita og hangin ug mga unos nga may ulan, sakit, mga angol, ug huwaw, ang Ginoong—ang atong Magbalantay—mangalagad kanato. Iyang ipahiuli ang atong mga kalag.

Sa samang paagi sa pag-atiman sa akong higala sa iyang mga karnero uban sa abag sa batan-on ug edaran

nga mga rantsero, mga kabayo, ug mga iro nga tigbantay sa mga karnero, ang Ginoong nagkinahanglan usab og abag sa mahagitong buhat sa pag-atiman sa mga karnero diha sa *Iyang* panon.

Isip mga anak sa mahigugmaong Langitnong Amahan ug isip mga karnero sa Iyang panon, matagamtaman nato ang panalangin nga mapangalagaran sa tagsa-tagsa ni Jesukristo. Sa dungan nga paagi, kita dunay responsibilidad sa paghatag og mapangalagaron nga abag ngadto sa uban sa atong palibut isip mga magbalantay mismo. Mopatalinghug kita sa mga pulong sa Ginoong nga “mag-alagad kanako ug molakaw diha sa akong ngalan, ug . . . mopundok sa akong mga karnero.”¹⁰

Kinsa ang magbalantay? Tanang lalaki, babaye, ug bata diha sa gingharian sa Dios usa ka magbalantay. Walay calling nga gikinahanglan. Gikan sa higayon nga mikawas kita gikan sa tubig sa bunyag, gisugo na kita ngadto niini nga buhat. Motabang kita sa uban pinaagi sa gugma tungod kay mao kini ang gisugo sa Manluluwas nga atong buhaton. Si Alma mihatag og gibugaton: “Unsa nga magbalantay . . . nga adunay daghan nga mga karnero apan dili mobantay kanila, nga ang mga lobo dili makasulod ug motukob sa iyang panon? . . . Siya dili ba mobugaw kaniya sa gawas?”¹¹ Sa higayon nga ang atong mga silingan magkalisud sa temporal o sa espirital nga paagi, magdali kita sa pagtabang kanila. Magtambayayong kita sa mga alantuson sa usag usa aron mahimo kining gaan. Magbangu-tan kita uban niadtong nagbangutan. Hupayon nato kadtong nanginahanglan og paghupay.¹² Ang Ginoong mahigugmaong naglaum niini gikan nato. Ug moabut ang adlaw sa dihang manubag kita sa atong gihimong pag-atiman sa pagpangalagad sa Iyang panon.¹³

Ang akong higala nga magbalantay og mga karnero mipaambit nako og laing importante nga elemento sa pagbantay sa mga karnero diha sa tugwayanan. Iyang gihulagway nga ang nawala nga karnero delikado kaayo sa mga peligro sa mga manunukob. Gani, hangtud sa 15 porsiyento sa panahon sa iyang pundok ug sa iyang



Usa ka determinadong iro nga tigbantay sa mga karnero ang migiya sa nawala nga mga karnero balik ngadto sa kahilwasan sa ilang magbalantay ug panon.

kaubanan ang gigahin sa pagpangita sa nawala nga mga karnero. Kon mas dali nilang makit-an ang nawala nga karnero, sa dili pa mopalayo og maayo ang mga karnero gikan sa panon, mas dili mameligro nga masakitan ang mga karnero. Ang pagpangita sa nawala nga karnero nagkinahanglan og dakong pailub ug disiplin.

Pipila ka tuig ang milabay, nakakita ko og artikulo sa lokal nga paman-talaan nga nakapaintriga kaayo nga ako kining ghipusan. Ang headline sa unang pahina mabasa, “Determinado nga Iro Dili Mobyia sa Nawala nga Karnero.”¹⁴ Kini nga artikulo naghulagway sa gamay nga gidaghanon sa mga karnero nga nalakip sa rantso nga dili kaayo layo sa gipanag-iy sa akong higala nga nabiyaan sa ilang tugwayanan panahon sa ting-init. Duha o tulo ka bulan human niana, natanggong sila ug wala kagawas sa snow didto sa kabukiran. Sa dihang ang mga karnero nabiyaan, ang iro nga tigbantay sa mga karnero nagpabilin uban nila, kay iya kadtong katungdanan nga bantayan sila ug proteksyunan ang mga karnero. Dili gayud siya mohunong sa pagbantay sa mga karnero! Didto nagpabilin siya—nagtuyok-tuyok sa nawala nga mga karnero sulod sa mga bulan sa bugnaw ug dunay snow nga panahon, nagserbisyo isip proteksyon batok sa mga coyote, mga liyon sa bukid, o

bisan unsa nga laing manunukob nga mopasakit sa mga karnero. Nagpabilin siya didto hangtud nakahimo siya sa paggiya o pagbantay sa mga karnero balik sa luwas nga kahimtang uban sa magbalantay ug sa panon. Ang imahe nga nakuha diha sa unang pahina niining artikulo nagtugot nga makita sa usa ka tawo ang kinaiya diha sa panan-aw ug kinaiya niining iro nga tigbantay sa mga karnero.

Sa Bag-ong Tugon, atong makita ang samingay ug panudlo gikan sa Manluluwas nga naghatag og dugang nga ideya kalabut sa atong responsibilidad isip mga magbalantay, mga tigpangalagad nga mga kaigsoonan, sa nawala nga mga karnero:

“Kinsa bang tawhana kaninyo, nga may usa ka gatus ka mga karnero, nga kon kawad-an siyag usa ka buok niini, dili mobiya sa kasiyaman ug siyam diha sa kaawaawan ug moadto sa pagpangita niadtong usa nga nawala, hangtud nga hikaplagaan niya kini?”

“Ug sa iya na kining makaplagaan, kini pas-anon niya nga malipayon diha sa iyang mga abaga.

“Ug sa mahiuli na siya, iyang tigumon ang iyang mga higala ug mga sili-ngan ug ingnon sila, Pangalipay kamo uban kanako; kay hingkaplagaan ko ang akong karnero nga nawala.”¹⁵

Sa atong pag-summarize sa leksyon nga gitudlo diha sa samingay, atong makita kining bililhong tambag:

1. Kinahanglan natong ilhon ang nawala nga mga karnero.
2. Ato silang pangitaon hangtud nga makit-an sila.
3. Kon makit-an na sila, mahimo nato silang ibutang sa atong abaga aron dad-on pauli.
4. Ato silang palibutan og mga higala sa ilang pagbalik.

Mga kaigsoonan, ang atong kinadak-ang mga hagit ug kinadak-ang mga ganti mahimong moabut samtang mangalagad kita sa nawala nga mga karnero. Ang mga miyembro sa Simbahan diha sa Basahon ni Mormon “mibantay ibabaw sa ilang mga katawhan, ug nagamuma kanila sa mga butang kabahin sa pagkamatarung.”¹⁶ Atong masunod ang ilang ehemplo samtang atong hinumduman nga ang pagpangalagad kinahanglang “giniyahan sa Espiritu, . . . flexible, ug . . . gipahaum ngadto sa mga panginahanglan sa matag miyembro.” Kritikal usab nga kita “magtinguha sa pagtabang sa mga indibidwal ug mga pamilya nga maandam alang sa ilang sunod nga ordinansa, motuman sa [ilang] mga pakigsaad . . . , ug mahimong self-reliant.”¹⁷

Bililhon ang tanang tawo sa atong Langitnong Amahan. Ang iyang personal nga pagdapit nga mangalagad hila-bihan ang bili ug kaimportante ngadto Kaniya, kay kini Iyang buhat ug himaya. Sa literal nga paagi kini ang buhat sa kahangturan. Ang matag usa sa Iyang mga anak dunay dili masukod nga potensyal sa Iyang panan-aw. Nahigugma Siya *kaninyo* pinaagi sa gugma nga dili gani ninyo masugdan sa pagsabut. Sama sa mapahinunguron nga iro nga tigbantay sa mga karnero, ang Ginoo magpabilin sa kabukiran aron manalipod *kaninyo* sa hangin, mga unos nga dunay ulan, snow, ug *uban pa*.

Si Presidente Russell M. Nelson nagtudlo kanato sa miaging kompe-rensya: “Ang among mensahe ngadto sa kalibutan [ug modugang ko, ‘ngadto sa atong nangalagad nga panon’] yano ug sinsero: among gidapit ang tanang anak sa Dios sa *duha ka habig sa tabil* sa pagduol ngadto sa ilang Manluluwas, dawata ang mga panalangin

sa balaan nga templo, pagbaton og molahutay nga kalipay, ug mahimong angayan sa kinabuhing dayon.”¹⁸

Hinaut nga maghimo kita og mas taas nga tumong niining propetikanhong panglantaw aron makabantay kita sa mga kalag paingon sa templo ug sa katapusan ngadto sa atong Manluluwas, nga si Jesukristo. Wala Siya magpaabut nga mohimo kita og mga milagro. Mihangyo lamang Siya nga atong dad-on ang atong mga kaigsoonan ngadto Kaniya, kay *Siya* adunay gahum sa pagtubos sa mga kalag. Sa pagbuhat nato sa ingon, makahimo kita ug masiguro kining saad: “Ug inig padayag kaninyo sa pangulong Magbalantay, kamo managpakadawat unya sa mahimayang purong-purong nga dili malawos.”¹⁹ Niini ako mopamatuod—ug kang Jesukristo isip atong Manluluwas ug Manunubos—sa pangalan ni Jesukristo, amen. ■



Ni Presidente Russell M. Nelson

Ang Mahimong Labing Dalaygon nga mga Santos sa Ulahing mga Adlaw

Akong ibilin ang akong gugma ug panalangin nganha kaninyo, nga kamo unta magbusog sa pulong sa Ginoo ug gamiton ang lyang mga panudlo diha sa inyong personal nga kinabuhi.

MUBO NGA MGA SULAT

1. Russell M. Nelson, “Magpadayon Tang Tanan,” *Liahona*, Mayo 2018, 118.
2. Russell M. Nelson, “Pagpangalagad,” *Liahona*, Mayo 2018, 100.
3. Russell M. Nelson, “Ang Pagpangalagad uban sa Gahum ug Katungod sa Dios,” *Liahona*, Mayo 2018, 69.
4. Russell M. Nelson, “Pasiuna nga Pakigpulong,” *Liahona*, Nob. 2018, 8.
5. “Pagpangalagad pinaagi sa Gipalig-on nga mga Korum sa Melchizedek Priesthood ug mga Relief Society,” gisukip sa sulat sa Unang Kapangulohan nga pinetsahan og Abr. 2, 2018, 3, ministering.lds.org; Mosiah 18:9; Doktrina ug mga Pakigsaad 20:51, 53; tan-awa usab sa Juan 13:35.
6. Tan-awa sa James E. Talmage, *Jesus the Christ* (1916), 417.
7. Juan 10:14–15.
8. 1 Nephi 22:25.
9. Salmo 23:1; emphasis gidugang.
10. Mosiah 26:20.
11. Alma 5:59.
12. Tan-awa sa Mosiah 18:8–9.
13. Tan-awa sa Mateo 25:31–46.
14. Tan-awa sa John Wright, “Safe or Stranded? Determined Dog Won’t Abandon Lost Sheep,” *Logan Herald Journal*, Ene. 10, 2004, hjnews.com.
15. Lucas 15:4–6.
16. Mosiah 23:18.
17. “Pagpangalagad pinaagi sa Gipalig-on nga mga Korum sa Melchizedek Priesthood ug mga Relief Society,” 4, 5, ministering.lds.org.
18. Russell M. Nelson, “Magpadayon Tang Tanan,” 118–19; emphasis gidugang.
19. 1 Pedro 5:4.

Kini nahimong usa ka makadasig ug makasaysayanong komperensya. Magtan-aw kita sa umaabut nga adunay kadasig. Kita nadasig sa *pagbuhat* og mas maayo ug *mahimong* mas maayo. Ang katingalahang mga mensahe nga gipaabut sa atong mga General Authority ug Kinatibuk-ang mga Opisyaes gikan niining pulpito ug ang musika makapadasig! Ako kusang nong moawhag kaninyo sa pagtuon niini nga mga mensahe, sugod karong semanaha.¹ Sila mipahayag sa hunahuna ug kabubut-on sa Ginoo alang sa Iyang mga katawhan, karon.

Ang bag-o nga nakasentro sa panimalay, gisuportahan sa Simbahan nga integrated nga kurikulum adunay potensyal sa pagpakita sa kalig-on sa mga pamilya, samtang ang matag pamilya mosunod sa pagbuhat nga mahunahunaon ug mainampingon

nga mousab sa ilang panimalay ngadto sa usa ka santuwaryo sa hugot nga pagtuo. Ako mosaad nga samtang makugihon kamo nga molihok aron sa pagbag-o sa inyong panimalay ngadto sa usa ka sentro sa pagkat-on sa ebanghelyo, sa hinayhinay ang *inyong* mga adlaw nga Igpapahulay mahimong ikahimuot. Ang *inyong* mga anak maghinam-hinam sa pagkat-on ug pagsunod sa mga panudlo sa Manluluwas, ug ang impluwensya sa kaaway sa inyong kinabuhi ug sa *inyong* panimalay makuhaan. Ang mga kausaban sa inyong pamilya dako ug magpadayon.

Atol niini nga komperensya atong napalig-on ang atong tinguha sa pagbuhat sa gikinahanglan nga paningkamot aron sa pagpasidungog ni Ginoong Jesukristo *matag* higayon nga maghisgut kita sa Iyang Simbahan. Ako mosaad kaninyo nga ang atong



kanunay nga pagmatngon sa paggamit sa husto nga ngalan sa Simbahan sa Manluluwas ug sa mga miyembro niini mosangput sa paglambo sa pagtuo ug pag-angkon og dugang nga espiritwal nga gahum alang sa mga miyembro sa Iyang Simbahan.

Karon atong hisgutan ang mahitungod sa mga templo. Nahibalo kita nga ang atong panahon diha sa templo importante kaayo sa atong kaluwasan ug kahimayaan ug ngadto sa atong mga pamilya.

Human kita makadawat sa atong kaugalingon nga mga ordinansa sa templo ug mihimo og sagrado nga mga pakigsaad sa Dios, ang matag usa kanato nanginahanglan sa padayon nga espirituhanong paglig-on ug pagtudlo nga mahimo *lamang* diha sa balay sa Ginoo. Ug ang atong mga kaliwatan nanginahanglan kanato aron mahimong proxy alang kanila.

Hunahunaa ang dakong kalooy ug kamakiangayon sa Dios, kinsa, sa wala pa ang katukuran sa kalibutan, mihatag og paagi sa paghatag og mga panalangin sa templo niadtong mga namatay nga wala mahibalo sa ebanghelyo. Kini nga sagrado nga mga seremonya sa templo mga karaan. Alang kanako kadatong pagkakaraan makatandog ug laing

pagpamatuod sa ilang pagkatinuod.²

Akong minahal nga mga kaigsoonan, ang mga pagpangatake sa kaaway paspas kaayo, sa gikusgon ug sa matang.³ Ang atong panginahanglan nga maanaa sa templo kanunay wala sukad pa nga mas labaw nga gikinahanglan. Mohangyo ko kaninyo nga mainampuon motan-aw kon giunsa ninyo paggamit ang inyong oras. Pagpahinungod og oras alang sa inyong kaugmaon ug diha sa inyong pamilya. Kon adunay templo nga dili kaayo layo kaninyo, giawhag ko kamo sa pagpangita og paagi sa paghimo og regular nga pakigkita sa Ginoo—moadto sa Iyang balaan nga balay—dayon tumanon kanang pakigkita nga hingpit ug malipayon. Ako mosaad kaninyo nga ang Ginoo mohatag og mga milagro nga Siya nasayud nga inyong gikinahanglan samtang kamo naghimo og mga sakripisyo sa pagserbisyo ug pagsimba diha sa Iyang mga templo.

Sa pagkakaron kita adunay 159 ka gipahinungdan nga mga templo. Ang husto nga pag-atiman ug pagmintinar niadtong mga templo importante kanamo. Sa paglabay sa panahon, ang mga templo nanginahanglan gayud og pagpalig-on ug pagpabag-o. Niana nga katuyoan, ang mga plano gihimo na karon aron sa pag-ayo ug pag-update sa Templo sa Salt Lake ug ubang mga templo nga natukod sa pioneer nga henerasyon. Ang mga detalye niini nga mga proyekto ipakigbahin sa higayon nga mahuman na kini.

Karon ikalipay namong ipahibalo ang mga plano sa pagtukod og dugang 12 ka mga templo. Kini nga mga templo itukod sa mosunod nga mga dapit: Mendoza, Argentina; Salvador, Brazil; Yuba City, California; Phnom Penh, Cambodia; Praia, Cape Verde; Yigo, Guam; Puebla, Mexico; Auckland, New Zealand; Lagos, Nigeria; Davao, Philippines; San Juan, Puerto Rico; and Washington County, Utah.

Ang pagtukod ug pagmintinar og mga templo dili tingali makausab sa inyong kinabuhi, apan ang inyong panahon sulod sa templo segurado makahimo niini. Alang niadtong dugay nang wala makabalik sa templo,

giawhag ko kamo sa pag-andam ug balik sa labing daling panahon. Dayon dapiton ko kamo sa pagsimba ug pagampo nga mabati pag-ayo ang wala kinutuban nga gugma sa Manluluwas alang kaninyo, nga ang matag usa kaninyo makabaton sa inyong kaugalingon nga pagpamatuod nga Siya ang nagdumala niining sagrado ug mahangturong buhat.⁴

Mga kaigsoonan, nagpasalamat ko sa inyong hugot nga pagtuo ug pagpaluyo nga mga paningkamot. Akong ibilin ang akong gugma ug panalangin nganha kaninyo, nga kamo unta magbusog sa pulong sa Ginoo ug gamiton ang Iyang mga panudlo diha sa inyong personal nga kinabuhi. Ako mopasalig kaninyo nga ang pagpadayag magpadayon sa Simbahan ug magpadayon hangtud “ang mga katuyuan sa Dios matuman, ug ang Halangdong Jehova moingon nga ang buhat nahuman na.”⁵

Ako mopanalangin kaninyo uban sa dugang pagtuo Kaniya ug sa Iyang balaan nga buhat, uban sa hugot nga pagtuo ug pailub sa paglahutay sa inyong personal nga mga hagit sa kinabuhi. Ako mopanalangin kaninyo nga mahimong labing dalaygon nga mga Santos sa Ulahing mga Adlaw. Sa ingon ako mopanalangin kaninyo ug mopamatuod nga ang Dios buhi! Si Jesus mao ang Kristo! Kini ang Iyang Simbahan. Kita Iyang katawhan, sa pangalan ni Jesukristo, amen. ■

MUBO NGA MGA SULAT

1. Tan-awa online ang mga mensahe sa kinatibuk-ang komperensya diha sa LDS.org ug sa Gospel Library app. Sila i-imprinta sa *Ensign* ug *Liahona*. Ang mga magasin sa Simbahan, lakip na ang *New Era* ug ang *Higala*, ihatod pinaagi sa koreo o ma-download online, mga importante nga bahin sa inyong nakasentro sa panimalay nga kurikulum sa ebanghelyo.
2. Tan-awa, sama pananglit sa, Exodo 28; 29; Levitico 8.
3. Tan-awa sa Mosiah 4:29.
4. Tan-awa sa Wilford Woodruff, “The Law of Adoption,” diskurso nga gihatag sa kinatibuk-ang komperensya sa Simbahan, Abr. 8, 1894. Si Presidente Woodruff miingon: “Wala pa kita mahuman sa pagpadayag. Wala pa kita mahuman sa buhat sa Dios. . . . Walay katapusan niini nga buhat hangtud kini mahingpit.” (*Deseret Evening News*, Abr. 14, 1894, 9).
5. *Mga Pagtulun-an sa mga Presidente sa Simbahan*: Joseph Smith (2007), 167.

Indeks sa mga Istorya sa Komperensya

Ang mosunod nga lista sa pinili nga mga kasinatian nga gisaysay panahon sa kinatibuk-ang komperensya mahimong magamit sa personal nga pagtuon, family home evening, ug ubang pagtulun-an. Ang numero nagpasabut sa unang pahina sa pakigpulong.

Mamumulong	Istorya
Neil L. Andersen	(83) Nakasabut nga ang Manluluwas nasayud sa iyang pag-antus, usa ka matinud-anong misyonaryo nakabuntog sa kasagmuyo samtang nagpaalim sa mga samad nga naangkon sa pagpangbomba sa terorista. Human sa kamatayon sa iyang anak nga babaye, mibutyag si Russell M. Nelson nga gamiton ni Jesukristo ang mga yawe sa pagkabanhaw alang sa tanan nga mamatay. Mipamatuod si Russell M. Nelson sa mga miyembro nga taga-Puerto Rico nga “makakaplag kita’g kalipay bisan sa kinangil-arang mga kahimtang.”
Brian K. Ashton	(93) Ang asawa ni Brian K. Ashton mas nakasabut sa kinaiyahan sa Dios ug sa iyang gugma ug pasalamat alang sa iyang mga anak.
M. Russell Ballard	(71) Human nakasinati og grabe nga kasubo tungod sa mga kamatayon sa mga sakop sa pamilya ug sa minilyon nga namatay tungod sa gubat ug mga sakit, si Joseph F. Smith nakadawat “sa panan-awon sa katubanan sa mga patay.”
Steven R. Bangerter	(15) Ang mga apo ni Steven R. Bangerter milubong og mga bato nga nagrepresentar ni Jesukristo isip pundasyon sa malipayon nga kinabuhi. Si Presidente Russell M. Nelson mipahinumdom sa mga ginikanan sa ilang responsibilidad sa pagtudlo sa ilang mga anak. Ang anak nga lalaki ni Steven R. Bangerter mitanyag nga motabang sa iyang mga ginikanan nga mangandam sa pagserbisyo og misyon. Ang Espiritu Santo migiya sa usa ka edaran nga lalaki pabalik sa Simbahan ug sa espirituhanon nga kasiguroan sa iyang pagkabata.
Shayne M. Bowen	(80) Ang pagkakabig sa usa ka lalaki ngadto sa Simbahan pinaagi sa gahum sa Basahon ni Mormon nakahimo og dakong impresyon kang Shayne M. Bowen.
M. Joseph Brough	(12) Sa usa ka pagpanuroy sa Alaska, USA, nakat-unan ni M. Joseph Brough nga sa Dios, walay butang nga dili mahimo. Usa ka presidente sa stake nakakat-on nga ang kalinaw moabut tungod sa pagpasaylo pinaagi sa Pag-ula ni Jesukristo. Pinaagi sa iyang tinguha nga moserbisyo og misyon, ang anak nga babaye ni M. Joseph Brough mitudlo kaniya sa pagbuhat og lisud nga mga butang.
Matthew L. Carpenter	(101) Ang anak nga lalaki ni Mateo L. Carpenter mikompleto sa iyang full-time nga misyon human maayo gikan sa stroke.
D. Todd Christofferson	(30) Bisn sa kalisdanan, upat ka miyembro sa Simbahan nagpabilin nga lig-on sa ilang pagtuo kang Kristo ug nakadawat sa iyang makapatunhay nga suporta.
Quentin L. Cook	(8) Ang <i>Dali, Sunod Kanako—Alang sa Indibidwal ug Pamilya</i> nakalig-on sa pagtuo, pagpamatuod, ug pagsabut sa ebanghelyo sa usa ka pamilya sa Brazil.
Bonnie H. Cordon	(74) Usa ka batan-ong babaye ug ang mas magulang nga sister nakamugna og panaghigalaay nga mipanalangin sa ilang kinabuhi. Si Bonnie H. Cordon ug ang iyang kompanyon sa pagpangalagad nakapalambo og diha-diha nga higot sa gugma ngadto sa usa ka sister nga ilang gibisitahan. Usa ka tigpangalagad nga brother nakaugmad og kasuod ug pagsalig ngadto sa usa ka brother kansang asawa misulay sa paghikog.
Michelle D. Craig	(52) Si Camilla Kimball mitudlo og usa ka miyembro sa ward nga “ayaw gayud ibaliwala ang maayong hunahuna.”
Dean M. Davies	(34) Si Presidente Gordon B. Hinckley nakakitang daan kon asa pagatukuron ang Templo sa Vancouver British Columbia.
Henry B. Eyring	(58) Nahinganga si Henry B. Eyring kon giunsa sa iyang inahan sa pagkakita og oras ug kusog sa paghimo og mapa sa mga panaw ni Apostol Pablo. (90) Si Henry B. Eyring nakakat-on sa pagtagad sa mga tawo nga sama nga sila adunay “dagkong problema.” Ang Manluluwas midala sa asawa ni Henry B. Eyring latas sa iyang mga problema.
Cristina B. Franco	(55) Nakat-unan ni Cristina B. Franco nga ang gugma ug sakripisyo mao ang sekreto nga mga sagol sa chocolate cake sa iyang magtutudlo sa Primary.
Robert C. Gay	(97) Ang Espiritu Santo mitabang ni Robert C. Gay nga motan-aw sa iyang magulang nga babaye sama sa pagtan-aw sa Dios kaniya. Si James E. Talmage nangalagad sa usa ka pamilya nga nasakit sa diphtheria.
Jack N. Gerard	(107) Human si Jack N. Gerard nahiling nga adunay seryusong medikal nga kondisyon, iyang nakita ang kinabuhi gamit ang mahangturong panglantaw.
Gerrit W. Gong	(40) Si Elder Richard G. Scott ug Gerrit W. Gong naghigot mahitungod sa hugot nga pagtuo samtang nagpinta sila og watercolor sa campfire. Usa ka naghupot sa priesthood mitabang sa dili kaayo aktibo nga magtiayon nga mobalik sa Simbahan.
Jeffrey R. Holland	(77) Usa ka pagpangalagad nga hangyo gikan sa iyang mga anak mitabang sa usa ka amahan sa pagpasaylo ug pagbalik sa Simbahan, nga nakadala og mga panalangin sa iyang pamilya.
Joy D. Jones	(50) Si Joy D. Jones ug ang iyang bana nakaugmad og malungtarong panaghigalaay ngadto sa dili kaayo aktibo nga pamilya human makat-on sa pagserbisyo tungod sa gugma sa Ginoo.
Russell M. Nelson	(6) Ang usa ka inahan ganahan nga mosimba diha sa iyang panimalay tungod kay ang pagpanalangin sa sakrament diha sa panimalay matag Dominggo naka-ghat sa iyang bana sa paggamit og mas maayo nga pinulongan. (68) Nasaypan ni Russell M. Nelson sa pagtawag ang iyang kaugalingon isip usa ka inahan. Usa ka anak nga lalaki mipasalamat sa iyang inahan human nga ang Espiritu Santo migiya sa iyang inahan nga ilisan ang iyang smartphone og usa ka flip phone. (87) Si Benjamin De Hoyos mipasabut ngadto sa direktor sa programa sa radyo nga ang taas nga ngalan sa Simbahan gipili sa Manluluwas.
Dallin H. Oaks	(61) Usa ka batan-ong refugee nga lalaki nabilanggo human mibalos batok sa mga batan-on kinsa nagbinuang kaniya.
Paul B. Pieper	(43) Usa ka batan-ong babaye nga nangandam sa pagpabunyag miingon nga ang pagdala sa ngalan ni Jesukristo nagpasabut nga, “ako makabaton sa Espiritu Santo.”
Ronald A. Rasband	(18) Ang anak nga babaye ug umagad nga lalaki ni Ronald A. Rasband nakabuntog sa ilang kahadlok nga makabaton og anak niini nga kalibutan.
Gary E. Stevenson	(110) Usa ka miyembro sa ward mipadangat og mapangalagaron kamot sa nahisalaag nga si Carlos A. Godoy. Usa ka rantsero [rancher] nawad-an og 200 ka mga karnero tungod sa mga manunukob. Usa ka iro nga tigbantay sa mga karnero migiya sa nawala nga mga karnero ngadto sa luwas nga kahimtang.



Mga Balita sa Templo

Ang Simbahan nagplano nga Amotukod og 12 ka bag-ong templo, gipahibalo ni Presidente Russell M. Nelson sa iyang panapos nga pakigpulong sa kinatibuk-ang komperensya (tan-awa sa pahina 113). Gipahibalo usab niya ang mga plano sa pag-ayo sa Templo sa Salt Lake ug sa uban pa nga “pioneer nga henerasyon” nga mga templo, midugang nga ang mga detalye ihatag sa dili madugay.

Ang mga templo pagatukuron sa Mendoza, Argentina; Salvador, Brazil; Yuba City, California, USA; Phnom Penh, Cambodia; Praia, Cape Verde; Yigo, Guam; Puebla, Mexico; Auckland, New Zealand; Lagos, Nigeria; Davao, Philippines; San Juan, Puerto Rico; ug Washington County, Utah, USA.

Upat ka mga templo ang hapit na ipahinungod: ang Concepción Chile Temple sa Oktubre 28; ang Barranquilla Colombia Temple sa Disyembre 9; ang Rome Italy Temple sa semana sa Marso 10 ngadto sa Marso 17, 2019; ug ang Kinshasha Democratic Republic of the Congo Temple sa Abril 14, 2019.

Ug duha ka mga templo ang bag-o lang nga gipahinungod pag-usab: ang Houston Texas Temple gipahinungod pag-usab niadtong Abril 22, 2018, ug ang Jordan River Utah Temple gipahinungod pag-usab niadtong Mayo 20, 2018. ■

Pagkat-on pa diha sa temples.lds.org.

Nangulo si Presidente Nelson

Si Presidente Russell M. Nelson mitam-bag sa matag usa kanato nga mahimong mas mabination, sama kang Kristo, ug espirituhanon samtang mangalagad kita sa uban, ug mipakita siya og ehemplo kon unsay gipasabut niana sa paagi sa iyang pagpangalagad sukad sa miaging kinatibuk-ang komperensya.

Wala madugay human sa kinatibuk-ang komperensya sa Abril 2018, mibiyahe si Presidente Nelson nga midala kaniya ug sa iyang asawa, si Wendy, ug ni Elder Jeffrey R. Holland sa Korum sa Napulog Duha ka mga Apostoles ug sa iyang asawa, si Patricia, ngadto sa England, Israel, Kenya, Zimbabwe, India, Thailand, China, ug Hawaii, USA.

Sa misunod nga pagbiyahe, si Presidente Nelson nakighimamat sa mga miyembro, mga misyonaryo, mga lider, ug mga higala sa Simbahan sa kasadpan, tunga-tunga, ug silangang bahin sa Canada; sa Seattle, Washington, USA; ug sa Dominican Republic—diin dugay siyang namulong sa Kinatsila, ang unang higayon nga ang usa ka Presidente sa Simbahan mihatag og taas nga pakigpulong sa pinulongan nga dili Iningles.

Sa mga miting ug sa mga fireside, si Presidente Nelson mitudlo mahitungod sa saktong ngalan sa Simbahan; sa pagpa-ambit sa ebanghelyo ngadto sa uban; sa pagmanggad sa Basahon ni Mormon; sa unsang paagi ang pagsunod sa ebanghelyo

makahimo sa kinabuhi nga mas maayo; sa unsang paagi nga ang dalan ni Kristo mao ang dalan sa kalipay, karon ug sa kahangturan; sa pag-ampo; sa paghimo sa panimalay nga usa ka santuwaryo alang sa mga bata; sa paggamit sa kabubut-on sa pagbuntog sa tintasyon ug pagsunod sa Manluluwas; sa pag-amuma sa uban; ug sa pagpangandam ug pagdawat sa mga panalangin nga magagikan sa templo.

Si Presidente ug Sister Nelson namulong usab sa tibuok kalibutan nga debosyonal sa kabatan-onan niadtong Hunyo 3, 2018, diin miingon si Presidente Nelson nga ang mga batan-on kinsa moapil sa “batalyon sa Ginoo” ug motabang sa pagpundok sa Israel adunay oportunidad nga mahimong “parte sa usa ka dakong butang, mahinungdanong butang, halangdong butang!” Giawhag niya ang kabatan-onan ngapaminosan ang kanunay nga pagsalig sa social media, mosakripisyo og panahon alang sa Ginoo, mohimo og hingpit nga pagtimbang-timbang sa kinabuhi uban sa Ginoo, mag-ampo matag adlaw nga ang tanang anak sa Dios unta modawat sa ebanghelyo, ug mahimong kahayag sa kalibutan. ■

Alang sa dugang nga impormasyon mahitungod sa pagpangalagad ni Presidente Russell M. Nelson, adto sa prophets.lds.org. Tan-awa ang tibuok sibya alang sa kabatan-onan sa [HopeofIsrael.lds.org](https://hopeofisrael.lds.org).

Ang mga Kausaban Makatabang sa Pagbalanse sa Instruksyon sa Ebanghelyo diha sa Panimalay ug sa Simbahan

Isip kabahin sa nagpadayon nga mga paningkamot sa pagtabang sa mga Santos sa Ulahing mga Adlaw nga “makakat-on sa doktrina, molig-on sa pagtuo, ug mopasiugda og mas mahinungdanong personal nga pagsimba”, si Presidente Russell M. Nelson mipahibalo og mga kausaban aron sa pagtabang sa pagbalanse ug pagkonektar sa talagsaon ug mahinungdanong mga paagi nga ang mga miyembro mosimba ug magkat-on ug mosunod sa ebanghelyo sa Manluluwas diha sa simbahan ug sa panimalay.

Ang mga lider sa Simbahan mipahibalo og mga kausaban sa iskedyul sa miting sa Dominggo, sugod sa Enero 2019, kalabut sa pagpagawas og bag-ong kurikulum nga nakasentro sa panimalay, gisuportahan sa Simbahan. Kini nga mga kausaban ug uban pa gibase sa pipila ka nag-una nga mga inisyatibo nga gipasiugdahan sa Simbahan sa

bag-o lang nga mga katuigan, gituyo sa pagtabang sa mga miyembro nga mas hingpit nga itutok ang ilang kinabuhi sa Langitnong Amahan ug ni Jesukristo ug mapalawuman ang pagtuo diha Kanila. Kini nga mga inisyatibo naglakip sa pagtutok diha sa mas makahuluganong pagtuon sa ebanghelyo sa panimalay, sa pagtahud sa Ginoo pinaagi sa pagbalaan sa adlaw nga Igpapahulay, ug sa pag-amuma sa usag usa sama sa buhaton sa Manluluwas ug sumala sa paggiya sa Espiritu.

Gituyo sa pag-andam sa katawhan sa Ginoo alang sa Iyang pagbalik, kini nga mga kausaban gitumong sa pagpalig-on sa indibidwal nga pagkakabig, mipasabut si Elder Quentin L. Cook sa Korum sa Napulog Duha ka mga Apostoles, samtang iyang gilatid ang mga kausaban atol sa sesyon sa Sabado sa buntag sa kinatibuk-ang komperensya.

“Nasayud kita sa espiritwal nga

epekto ug sa lig-on ug malungtarong pagkakabig nga makab-ot diha sa kahimtang sa panimalay . . .,” miingon siya. “Ang atong katuyoan mao ang pagbalanse sa mga kasinatian diha sa Simbahan ug sa panimalay sa paagi nga makapalambo gayud sa pagtuo ug espiritwalidad ug makapalig-on sa pagkakabig ngadto sa Langitnong Amahan ug kang Ginoong Jesukristo.”

Mga Kausaban diha sa Panimalay

Ang mga lider sa Simbahan nagdapit og mas dakong pagtutok diha sa dugang nga pag-apil sa personal ug tibuok pamilya nga rehiliyusong buluhaton sa panimalay, apil ang pagtuon sa ebanghelyo diha sa panimalay sa Dominggo ug sa tibuok semana ug mga kausaban sa home evening.

Isip dapit sa pagtudlo ug pagbansay, ang panimalay maoy usa ka mahinungdanong sentro sa pagkat-on ug pagsunod sa ebanghelyo. Ang indibidwal ug tibuok pamilya nga pagtuon sa ebanghelyo diha sa panimalay sa Dominggo ug sa tibuok semana makahatag og mga oportunidad sa pagkakaplag og espirituhanong kalig-on sa matag adlaw ug nagtugot og mas dakong kapailin-ilian alang sa personal nga pagtuon ug pagpadayag. Ang pagsalig lamang sa limitado nga panahon sa simbahan alang sa pagtudlo sa ebanghelyo makamugna og pagkadili balanse nga dili makab-ot og lig-on ug malungtarong pagkakabig nga gikinahanglan.

“Matag usa kanato responsable alang sa atong indibidwal nga espiritwal nga paglambo,” miingon si Presidente Nelson. “Ug ang mga kasulatan mipasabut nga ang mga ginikanan ang adunay nag-unang responsibilidad sa pagtudlo sa doktrina ngadto sa ilang mga anak.”

Ang mga kausaban naglakip sa pagpaila og bag-ong kapanguhaan sa pagtuon sa ebanghelyo alang sa mga indibidwal ug mga pamilya diha sa panimalay. Ang mga indibidwal ug mga pamilya mahimong mogamit sa bag-ong *Dali, Sunod Kanako—Alang sa*



mga Indibidwal ug mga Pamilya, kon gusto nila, aron mogiya sa ilang kasinatian sa pagtuon sa ebanghelyo gawas sa simbahan. Ang bag-ong kapanguhaan motabang sa kauban nga mga kapanguhaan alang sa mga magtutudlo sa Sunday School ug Primary nga mapahiangay ang mga leksyon sa Dominggo ngadto sa pagtuon sa kasulatan sa panimalay ug sa mga sugyot alang sa home evening.

Agig dugang sa pag-awhag sa pagtuon sa ebanghelyo, ang mga lider sa Simbahan mibag-o sa ilang pagdapit sa tanan nga moapil sa adlaw nga Igpapahulay—ug sa tibuok semana—sa mga konseho sa pamilya, home evening, buhat sa templo ug family history, pagpangalagad, personal nga pagsimba, ug malipayong panahon sa pamilya.

Ang mga materyal nga gipadala ngadto sa mga miyembro ug mga lider nagpasabut nga ang mga lider sa Simbahan nag-awhag sa mga miyembro sa pagpahigayon og home evening ug pagtuon sa ebanghelyo sa adlaw nga Igpapahulay—o sa ubang mga panahon sumala sa pagpili sa mga indibidwal ug sa mga pamilya. Ang gabii sa kalihokan sa pamilya mahimong mapahigayon sa Lunes o sa laing higayon. Alang niini nga rason, ang mga lider kinahanglang magpadayon sa pagpabilin sa mga gabii sa Lunes nga walay mga miting ug mga kalihokan sa Simbahan. Hinoon, ang panahon nga igahin sa pagtuon sa ebanghelyo sa panimalay ug mga kalihokan alang sa mga pamilya ug mga indibidwal mahimong maiskedyul sumala sa tagsa-tagsa ka mga kahintang.

Ang pagsimba sa Dios diha sa simbahan, pag-apil sa sagradong mga ordinansa didto, ug ang pagpundok aron sa pagtudlo sa usag usa ug sa paglig-on ug pagserbisyo sa usag usa mahinungdanon nga mga elemento sa pagpalig-on sa pagtuo ug personal nga pagkaka-big. Ang pagpaminos sa panahon nga igahin diha sa simbahan mahimong dili maayo gawas kon ang mga indibidwal

ug mga pamilya tuyo nga mopalig-on sa ilang mga panimalay.

Si Presidente Nelson mitudlo: “Isip mga Santos sa Ulahing mga Adlaw, naandan na nato nga maghunahuna sa “simba” isip usa ka butang nga mahitabo sa atong mga meetinghouse, nga gisuportahan sa unsa ang gipangbuhat sa panimalay. Kinahanglan kita og kausaban niini nga sundanan. Panahon na alang sa *nakasentro sa panimalay nga Simbahan*, gisuportahan sa unsa ang gipangbuhat sulod sa atong branch, ward, ug stake nga mga gambalay [building].”

Mga Kausaban diha sa Simbahan

Ang mga kausaban sa kasinatian diha sa Simbahan gituyo aron sa pag-suporta sa dugang nga pagkat-on ug pagsunod sa ebanghelyo diha sa panimalay. Kini nga mga kausaban naglakip sa pag-usab sa sinemana nga iskedyul sa Dominggo nga maglakip sa:

- 60 minutos nga miting sa sakrament,
- 10 minutos nga panahon sa pagbalhin [transition],
- Ug 50 minutos nga panahon sa klase, sumala sa gilatiid sa sampol nga iskedyul sa ubos:

ISKEDYUL SA DOMINGGO SUGOD SA ENERO 2019	
60 minutos	Sakrament miting
10 minutos	Pagbalhin ngadto sa mga klase
50 minutos	Mga klase sa mga hamtong; mga klase alang sa kabatan-onan; Primary

Ang 50 minutos nga panahon sa klase maglakip sa sinemana nga Primary alang sa mga bata ug magpuli-puli matag semana alang sa kabatan-onan ug mga hamtong sama sa mosunod:

- Una ug ikatulong Dominggo: Sunday School.
- Ikaduha ug ikaupat nga Dominggo:

mga korum sa priesthood, Relief Society, ug Young Women.

- Ikalimang Dominggo: mga miting sa kabatan-onan ug mga hamtong ubos sa direksyon sa bishop.

Kon igo ang gidak-on sa Primary aron mabulag ngadto sa junior ug senior Primary, ang mga lider kinahanglang mobali sa mosunod nga iskedyul alang sa katunga sa mga bata ug ipahiangay ang oras kon gikinahanglan.

ISKEDYUL SA PRIMARY SUGOD SA ENERO 2019	
25 minutos	Pag-ampo, kasulatan o artikulo sa hugot nga pagtuo, pakig-pulong (5 minutos). Panahon sa pagpanganta: Musika nga nagsuporta sa mga kasulatan nga gitun-an sa klase (20 minutos)
5 ka minutos	Pagbalhin ngadto sa mga klase
20 minutos	Mga klase: leksyon gikan sa <i>Dali, Sunod Kanako—Alang sa Primary</i>

Mga Kausaban sa Kurikulum

Kini nga kausaban sa iskedyul sa mga miting motabang sa labing bag-o nga nadugang sa *Dali, Sunod Kanako* nga kurikulum. Sugod sa Enero, kining nakasentro sa panimalay, gisuportahan sa Simbahan nga kurikulum mohiusa sa unsay nakat-unan sa mga hamtong, kabatan-onan, ug mga bata diha sa mga klase sa Sunday School ug Primary, nga makapasayon sa mga pamilya nga magdungan sa pagtuon diha sa panimalay panahon sa semana.

Ang mga instruksyon, mga outline sa leksyon, ug mga kapanguhaan makita diha sa:

- *Dali, Sunod Kanako—Alang sa Elders Quorum ug Relief Society*

(makita diha sa Nobyembre 2018 nga *Ensign* ug *Liahona*)

- *Dali, Sunod Kanako—Alang sa mga Korum sa Aaronic Priesthood*
- *Dali, Sunod Kanako—Alang sa Young Women*
- *Dali, Sunod Kanako—Alang sa Sunday School*
- *Dali, Sunod Kanako—Alang sa Primary*

Bisitaha ang **comefollowme.lds.org**

alng sa dugang nga impormasyon.

Ang ubang importanting mga kausaban naglakip sa mosunod:

- Ang mga miting sa teacher council ipahigayon matag tulo ka bulan [quarterly] imbes nga binulan.
- Ang mga iskedyul sa leksyon sa elders quorum ug Relief Society dili na maglakip og usa ka miting sa konseho sa unang Dominggo o usa ka espesyal nga hilisgutan sa ikaupat nga Dominggo. Ang mga leksyon motutok sa bag-o nga mga mensahe sa kinatibuk-ang komperensya.
- Ang panahon sa pagpanganta mopuli sa panahon sa pagpakigbahin. Ang *Outline alang sa Panahon sa Pagpakigbahin* hunungon.
- Ang kurso nga Mga Baruganan sa Ebanghelyo hunungon. Ang tanang mga miyembro ug interesado nga mga higala dapiton sa pagtambong sa ilang tagsa-tagsa ka klase sa Sunday School sa hamtong o kabatan-onan.
- Ang opsyonal nga mga kurso—sama niadtong alang sa paglig-on sa kaminyoon ug pamilya, pagpangandam alang sa templo, pagpangandam sa misyonaryo, ug family history—dili ipahigayon sa panahon sa klase sa Dominggo. Kini nga mga kurso mahimong itudlo sa ubang panahon alang sa mga indibidwal, mga pamilya, o mga grupo base sa lokal nga mga panginahanglan ug sumala sa pagbuot sa bishop.

Mga Katuyoan Niini nga mga Kausaban

Ang mga lider sa Simbahan nagtinguha nga makamugna og bag-ong balanse ug mas dakong koneksyon tali sa talagsaong mga kalig-on sa mga kasinatian sa panimalay ug sa Simbahan nga adunay gihunahuna nga piho nga mga katuyoan.

“Dunay mas labaw pa niining kausaban kay sa pagpamubo lang sa iskedyul sa meetinghouse sa Dominggo . . .,” miingon si Elder Cook. “Ang mga katuyoan ug mga panalangin nga may kalabutan niining kausaban ug ubang pang bag-ong mga kausaban naglakip sa mosunod:

- “Paglig-on sa pagkakabig ngadto sa Langitnong Amahan ug kang Ginoong Jesukristo ug paglig-on sa pagtuo diha Kanila.
- “Paglig-on sa mga indibidwal ug mga pamilya pinaagi sa nakasentro sa panimalay, gisuportahan sa Simbahan nga kurikulum nga makatampo sa malipayong pagsunod sa ebanghelyo.

- “Pagtahud sa adlaw nga Igpapahulay, uban ang pagpunting sa ordinansa sa sakrament.
- “Pagtabang sa tanang anak sa Langitnong Amahan sa duha ka bahin sa tabil pinaagi sa misyonaryo nga buhat ug pagdawat sa mga ordinansa ug mga pakigsaad ug mga panalangin sa templo.”

Alang sa pagpahibalo niini nga mga kausaban, tan-awa ang Russell M. Nelson, “Pasiuna nga Pakigpulong,” sa pahina 6 niini nga magasin; Quentin L. Cook, “Lig-on ug Malungtarong Pagkakabig ngadto sa Langitnong Amahan ug kang Ginoong Jesukristo,” sa pahina 8. Alang sa dugang nga impormasyon kabahin niini nga mga kausaban, bisitaha ang **sabbath.lds.org** aron makita ang sulat gikan sa Unang Kapangulohan, mga tubag sa mga kanunayng ipangutana, ug dugang nga mga kapanguhaan nga makatabang sa mga indibidwal ug mga pamilya sa pagtahud sa adlawng Igpapahulay. ■





Apil sa Bag-ong Hymnbook, Songbook

Ang Simbahan nag-andam og bag-ong mga edisyon sa *Mga Himno* ug sa *Songbook sa mga Bata* ug nagtinguha og mga sugyot ug mga pagsumiter sa mga miyembro sa Simbahan bisan asa.

Sa **Bag-ongMusika.lds.org**, mahimo ka nga:

Mohatag og mga sugyot—imong paborito nga kasamtangang mga himno o mga kanta sa mga bata, ilakip nga mga himno o mga kanta sa mga bata sa Santos sa Ulahing mga Adlaw o dili Santos sa Ulahing mga Adlaw, kasamtangan nga mga himno o mga kanta nga dili ilakip, kalisdanan sa kasamtangan nga mga basahon sa musika, ug ubang feedback.

Mosumiter og orihinal nga materyal—mga himno, mga teksto sa himno, mga kanta sa mga bata, o mga pulong sa kanta sa mga bata. Ang mga musika kinahanglang haum sa mga tulumanon sa pagsimba. Ang tanang pinulongan ug mga estilo sa kultura ikonsiderar. Kadtong ubos sa edad nga 18 mahimong mosumiter kon makahatag sila og pagtugot sa ginikanan o guardian. Ang mga pagsumiter kinahanglang madawat kutob Hulyo 1, 2019. ■



Elder Brook P. Hales

General Authority Seventy

Sa dihang si Elder Brook P. Hales otso o nuybe anyos pa lang, anaa siya sa usa ka miting sa puasa ug pagpamatuod diin ang iyang amahan mao ang nagdumala nga bishop. Ang iyang amahan midapit sa kongregasyon sa pagpaambit og mga pagpamatuod, ug hapit tanan nga anaa ang mihatag og pagpamatuod. “Mao siguro kadto ang unang higayon nga gibati nako ang Espiritu nga nagsaksi kanako sa kama-tuoran sa ebanghelyo,” mihinumdom si Elder Hales.

Kadaghan na niya gibati kana nga pagsaksi human niadtong, ilabi na samtang nagserbisyo isip sekretarya sa Unang Kapangulohan sukad niadtong 2008. Dihang si Presidente Thomas S. Monson gipaluyohan isip propeta ug Presidente sa Simbahan, ug usab sa dihang gipaluyohan si Presidente Russell M. Nelson, nakasaksi siya “sa awtoridad sa propeta nga miabut sa matag usa niining mga tawhana, ug nasayud ko sa walay pagduha-duha nga sila gipili ug gitawag nga mahimong Presidente sa Simbahan alang sa ilang piho nga panahon.”

Si Elder Hales gitawag isip General Authority Seventy niadtong Mayo 17, 2018, ug gipaluyohan niadtong Oktubre 6, 2018. Mopadayon siya isip sekretarya sa Unang Kapangulohan.

Natawo sa Ogden, Utah, USA, niadtong Abril 7, 1956, ngadto kang Klea ug Glenn Phillip Hales, si Elder Hales nakadawat og degree sa banking ug finance gikan sa Weber State College (karon Weber State University) niadtong 1980. Human makagradwar, mitrabaho siya sa pagpadagan og komersyal nga banko ug diha sa Finance and Records Division sa Simbahan. Naminyo siya kang Denise Imlay Hales niadtong 1981, ug mga ginikanan sila sa upat ka anak. Si Elder Hales nakaserbisyo isip full-time nga misyonaryo sa France Paris mission, magtatambag sa bishopric, high priest group leader, bishop, presidente sa stake, organist sa priesthood, magtutudlo sa Sunday School, ug sealer sa templo.

Nianang adlaw sa bata pa siya, wala mohatag sa iyang pagpamatuod si Elder Hales. Apan nahimo kining mas lig-on sukad niadto. “Ang ebanghelyo ni Jesukristo gipahiuli pinaagi ni Propeta Joseph Smith, ang Basahon ni Mormon tinuod, ang Dios hingpit nga nahigugma kanato ug naghinam-hinam sa pagpanalangin kanato, si Jesus mao ang atong Manluluwas, ug bulahan kita nga makabaton sa padayong pakig-uban sa Espiritu Santo kon kita takus niini,” miingon siya. ■



DALI, SUNOD KANAKO

Alang sa Elders
Quorum ug
Relief Society

Oktubre 2018

*Pangitaa kini nga mga kapanguhaan
diha sa Gospel Library app ug sa
comefollowme.lds.org.*

Nganong Aduna Man Kitay mga Miting sa Korum ug Relief Society?

Niining ulahing mga adlaw, ang Dios mipahiuli sa priesthood ug miorganisar sa mga korum sa priesthood ug sa Relief Society aron makatabang sa pagtuman sa Iyang buhat sa kaluwasan. Tungod niini, sa matag Dominggo nga magpundok kita diha sa mga miting sa elders quorum ug sa Relief Society, maghisgot ug magplano kita unsa ang atong buhaton aron makatabang nga matuman ang buhat sa Dios. Aron mahimong epektibo, kini nga mga miting kinahanglang sobra pa kay sa mga klase lang. Mga oportunidad kini sa pagtinambagay bahin sa buhat sa kaluwasan, magkat-on og dungan mahitungod niana nga buhat gikan sa mga pagtulun-an sa mga lider sa Simbahan, ug magplano ug moorganisar sa atong kaugalingon sa pagtuman niini.



Iskedyul alang sa Oktubre–Disyembre 2018

Sa 2018, ang mga miting sa Dominggo sa elders quorum ug Relief Society magsunod niining binulan nga iskedyul:

Unang Dominggo: Magtinambagay kalabut sa lokal nga mga responsibilidad, mga oportunidad, ug mga hagit, ug maghimo og mga plano sa paglihok.

Ikaduha ug Ikatulong Dominggo: Magtuon sa bag-ong mga mensahe sa kinatibuk-ang komperensya nga gipili sa mga sakop sa kapangulohan o, usahay, sa bishop o sa presidente sa stake.

Ikaupat nga Dominggo: Maghisgot og espesyal nga hilisgutan nga gipili sa Unang Kapangulohan ug sa Korum sa Napulog Duha ka mga Apostoles. Gikan sa Oktubre hangtud sa Disyembre 2018, ang hilisgutan mao ang personal ug tibuok pamilya nga pagtuon sa kasulatan.

Ikalimang Dominggo: Ubos sa direksyon sa bishopric.



"Mosalog kami kaninyo nga mag-tinambagay ug magtinguha og pagpadayag alang sa pag-implementar niining mga kausaban. . . . [Ang bag-ong iskedyul sa Dominggo] more-sulta sa talagsaong mga panalangin alang niadtong madasigung muhangup sa mga kausaban [niini] ug magtinguha sa giya sa Espiritu Santo. Mas mahiduol kita sa atong Langitnong Amahan ug sa atong Ginoo ug Manluluwas si Jesukristo."

Elder Quentin L. Cook
Sa Kurom sa Napulog Duha ka mga Apostoles

Bag-ong Iskedyul alang sa 2019

Sugod sa Enero 2019, ang mga miting sa elders quorum ug Relief Society ipahigayon lamang sa ikaduha ug ikaupat nga mga Dominggo sa matag bulan. Kini nga mga miting motutok sa mga mensahe gikan sa labing bag-o nga kinatibuk-ang komperensya. Ang mga sugyot sa pagtudlo alang niini nga mga miting makita diha sa Mayo ug Nobyembre nga kinatibuk-ang komperensya nga mga isyu sa *Ensign* ug *Liahona* ug sa Gospel Library app.

Ang ubang mga kausaban nga magsugod sa 2019 naglakip sa mosunod:

- Ang mga miting sa konseho sa Unang Dominggo hunongon. Hino-on, kon gikinahanglan, ang mga elders quorum ug mga Relief Society mahimong mogamit og usa ka bahin sa miting sa ikaduha o ikaupat nga Dominggo aron makigtambag mahitungod sa usa ka importanting hilisgutan.
- Ang mga pangbukas nga kalihokan [opening exercises], diin magtapok ang mga korum sa Aaronic ug Melchizedek Priesthood o magtapok ang mga babaye sa Relief Society ug young women, dili na himoon.
- Ang mga miting sa elders quorum ug Relief Society dili sugdan og pangbukas nga himno o pag-ampo apan tapuson og panapos nga pag-ampo.



Pagkat-on gikan sa mga Mensahe sa Kinatibuk-ang Komperensya (2018 ug 2019)

Ang mga pagtulun-an sa buhing mga propeta, mga manalagna, ug mga tigpadayag makahatag og dinasig nga giya alang sa buhat sa mga elders quorum ug mga Relief Society. Sa mga semana nga tun-an ang mga mensahe sa komperensya, ang kapangulohan sa elders quorum o Relief Society mopili og usa ka mensahe sa komperensya nga maoy gamiton, base sa panginahanglan sa mga miyembro. Usahay, ang bishop o presidente sa stake mahimong mosugyot usab og mensahe. Ang mga lider kinahanglang mohatag og gibug-aton sa mga mensahe nga gikan sa mga sakop sa Unang Kapangulohan ug sa Korum sa Napulog Duha ka mga Apostoles. Hinoon, ang mga sakop sa kapangulohan mahimong mopili og bisan unsang mensahe gikan sa labing bag-o nga komperensya, base sa mga panginahanglan sa lokal nga mga Santos ug sa inspirasyon gikan sa Espiritu.

Ang mga lider ug mga magtutudlo kinahanglan nga mangita og mga paagi sa pag-awhag sa mga miyembro nga mobasa daan sa pinili nga mensahe. Kinahanglan nga awragon nila ang mga miyembro nga moabut sa mga miting nga andam mopaambit sa ilang nakat-unan nga mga kamatuoran sa ebanghelyo ug sa ilang mga ideya kon unsay buhaton kalabut niadto nga mga kamatuoran. Ang gisugyot nga mga kalihokan sa pagkat-on nga anaa sa ubos, nga gibase sa mga baruganan nga gitudlo diha sa *Pagtudlo sumala sa Pamaagi sa Manhuluwas*, makatabang sa mga miyembro nga makat-on gikan sa mga mensahe sa kinatibuk-ang komperensya.

Quentin L. Cook, *“Lig-on ug Malungtarong Pagkakabig ngadto sa Langitnong Amahan ug kang Ginoong Jesukristo”*

Ang mga miyembro mahimong interesado nga maminaw sa usag usa kon unsa ang ilang unang mga reaksyon sa dihang nadungog nila ang mga kausaban nga gihulagway diha sa mensahe ni Elder Cook. Kon ang usa ka higala sa laing tinuohan mangutana nila nganong ang Simbahan naghimo niini nga mga kausaban, unsa man ang ilang isulti? Awhaga sila sa pagpangita og posibling mga tubag diha sa mensahe ni Elder Cook. Unsa ang atong mahimo isip mga indibidwal ug mga pamilya, ug isip usa ka korum o Relief Society, sa pagsiguro nga ang mga kausaban makakab-ut sa unsay tuyo sa Ginoong?

Isip kabahin niini nga diskusyon, mahimo usab nimong ipaambit ang mga ideya gikan sa pasiuna nga pakigpulong ni Presidente Nelson nga nagdasig sa mga miyembro nga “madasigong mohangup” niini nga mga kausaban.

Ronald A. Rasband, *“Ayaw Kabalaka”*

Ang mensahe ni Elder Rasband nagpatataw og pipila ka mga kasulatan nga makatabang kanato sa pagwagtang sa bisan unsang kahadlok nga tingali aduna kita mahitungod sa malisud nga mga panahon nga atong gipuy-an. Hangyog ang mga miyembro sa pagsiksik niini nga mga kasulatan alang sa tambag nga mahimo nilang mapaambit sa usa ka tawo nga nahadlok sa umaabut. Unsa pa ang mahimo nilang mapaambit gikan sa



mensahe ni Elder Rasband? Sa unsang paagi ang kahadlok “[mopakunhod] sa panglantaw sa mga anak sa Dios”? Dapita ang mga miyembro sa pagpaambit kon sa unsang paagi nakakat-on sila sa pagbuntog sa ilang mga kahadlok ug magpuyo uban ang pagtuo.

David A. Bednar, *“Paghiusa diha kang Kristo sa Tanang mga Butang”*

Ikonsiderar ang pagdala og pisi ug usa ka checklist aron ipakita. Dapita ang mga miyembro sa paghisgot sa kalainan tali sa paghunahuna sa mga kamatuoran sa ebanghelyo ug mga programa sa Simbahan nga sama sa usa ka pisi ug sa paghunahuna niini nga sama sa usa ka checklist sa indibidwal nga mga hilisgutan ug mga buluhaton. Awhaga ang mga miyembro sa pagpangita og mga ideya diha sa mga ehemplo sa mensahe ni Elder Bednar. Unsa ang gipasabut sa “paghiusa diha kang Kristo sa tanang mga butang”? (tan-awa sa Mga Taga-Efeso 1:10). Unsay atong mabuhay aron madawat ang saad sa katapusan sa mensahe ni Elder Bednar?

Dallin H. Oaks, *“Kamatuoran ug ang Plano”*

Sa unsang paagi ang pagsabut sa “gipahuli nga mga kamatuoran sa ebanghelyo” makatabang kanato kon mag-atubang kita og oposisyon sa atong mga gituohan ug mga binuhatan? Aron sa pagtubag niini nga

pangutana, ang mga miyembro mahimong moribyu sa mga ehemplo sa sukaranang mga kamatuoran diha sa seksyon II sa mensahe ni Presidente Oaks. Mahimo usab nilang ribyuhon ang mga ehemplo kon sa unsang paagi magamit kini nga mga kamatuoran (tan-awa sa seksyon III). Mahimong makatabang sa mga miyembro ang pag-role-play kon unsaon nila sa paggamit ang pipila niining sukaranan nga mga kamatuoran aron sa pagtubag sa mga pagpanaway sa usa ka pagtulun-an o binuhatan sa Simbahan.

D. Todd Christofferson, “Lig-on ug Makanunayon diha sa Hugot nga Pagtuo kang Kristo”

Mahimo nimong sugdan ang usa ka diskusyon niini nga mensahe pinaagi sa pagdrowing og linya diha sa pisara nga adunay *Sosyal nga Konsiderasyon* sa usa ka tumoy ug *Kristohanon nga Pasalig* sa pikas tumoy. Dapita ang mga miyembro sa pagbasa sa parapo [paragraph] nga nagsugod sa “Kadaghanan nato makakita sa atong kaugalingon niining duha ka nagkalahi nga sitwasyon . . .” ug sa pagpamalandong kon asa nila gibati nga anaa sila niining duha ka nagkalahi nga sitwasyon. Unsa ang atong makat-unan gikan sa mga ehemplo sa mensahe ni Elder Christofferson nga nagdasig kanato nga mahimong lig-on ug makanunayon diha sa kasakit? (tan-awa usab sa Alma 36:27–28). Awhaga ang mga miyembro sa pagpaambit og mga ehemplo sa mga tawo nga ilang kaila kinsa mipakita og Kristohanong pasalig sa ebanghelyo, bisan kon nag-atubang og kasakit.

Ulisses Soares, “Usa ra Diha kang Kristo”

Sumala ni Elder Soares, sa unsang paagi ang Suba sa Amazon nagrepresentar sa mga miyembro sa gipahiuli nga Simbahan ni Jesukristo? Unsa ang gitudlo kanato niini nga pagkumpara mahitungod sa impluwensya sa

bag-ong mga miyembro diha sa Simbahan? Unsaon nato isip usa ka korum o Relief Society sa pagsunod sa tambag ni Elder Soares sa pag-awhag, pagsuporta, ug paghigugma sa bag-ong mga kinabig? (tan-awa sa Moroni 6:4–5). Tingali ang pipila ka mga miyembro mahimong mopaambit og pipila ka hagit nga ilang giatubang isip bag-ong mga miyembro sa Simbahan ug sa unsang paagi ang ubang mga miyembro mitabang kanila. Mahimo usab kamong maghigot og mga paagi nga ang bag-ong mga miyembro nakalig-on sa inyong ward o branch.

Gerrit W. Gong, “Ang Atong Campfire sa Hugot nga Pagtuo”

Ikonsiderar ang pagpakita og litrato sa usa ka campfire ug pagdapit og usa ka tawo nga mopaambit og kasinatian sa diha nga siya mapasalamaton nga adunay campfire. Hangyog ang mga miyembro sa paghigot kon unsa ang gipasabut ni Elder Gong sa dihang naghigot siya og “campfire sa hugot nga pagtuo.” Dayon mahimo nimong igrupog ang mga miyembro ug dapita ang matag grupo sa pagribyu ug sa pagpaambit og usa sa lima ka paagi nga gisugyot ni Elder Gong nga ang usa ka “campfire sa hugot nga pagtuo,” makaawhag kanato. Hatagi ang mga miyembro og panahon sa pagpamalandong kon unsaon nila sa pagpalig-on sa ilang kaugalingong pagtuo o ang pagtuo sa tawo nga ilang kaila.

Dieter F. Uchtdorf, “Motuo, Mohigugma, Mobuhat”

Mahimo nimong sugdan ang usa ka diskusyon niini nga mensahe pinaagi sa pagsulat diha sa pisara og *Kawalay Paglaum ug Kalipay*. Dapita ang mga miyembro sa pagsiksik sa mensahe alang sa mga kinaiya ug mga tinuohan nga mosangput ngadto sa kawalay paglaum ug kalipay ug ilita kini diha sa pisara. Dapita ang mga miyembro sa pagpaambit

og mga paagi nga ilang nasinati ang kalipay nga moabut gikan sa pagtuo, paghigugma, ug pagbuhat, sama sa gitudlo ni Elder Uchtdorf. Awhaga ang mga miyembro sa pagpangita og makadasig nga kinutlo gikan sa mensahe nga ma-display sa ilang panimalay o mapaambit ngadto sa usa ka higala.

Joy D. Jones, “Alang Kaniya”

Ikonsiderar ang pagpaambit sa istorya sa sinugdanan sa mensahe ni Sister Jones ug sa paghangyo sa mga miyembro sa paghunahuna sa mga panahon dihang ang ilang pagserbisyo ug mga paningkamot sa pagpangalagad mora og “wala tagda o . . . wala hangupa o gani wala kinahanglana.” Human mahisgutan ang istorya, ikonsiderar ang pagsulat diha sa pisara sa *Nganong kinahanglan kitang moserbisyo?* Dapita ang mga miyembro sa pagtubag niini nga pangutana pinaagi sa pagribyu sa tibuok mensahe ni Sister Jones, nga mangita og mga ideya (tan-awa usab sa Doktrina ug mga Pakigsaad 59:5). Sa unsang paagi ang tambag ni Sister Jones makausab sa paagi sa atong pag-amuma ug pagpangalagad sa usag usa?

Michelle D. Craig, “Balaan nga Pagkawala Matagbaw”

Si Sister Craig namulong mahitungod sa “gintang tali sa asa ug kinsa kita, ug asa ug kinsa ang gusto nato nga mamahimo.” Unsay gusto sa Dios nga atong bation mahitungod niini nga gintang? Unsay gusto ni Satanas nga atong bation mahitungod niini? Ang matag miyembro mahimong mosiksik sa usa sa tulo ka mga seksyon sa mensahe ni Sister Craig aron makakita og mga tubag niini nga mga pangutana. Unsay atong mabuhat aron sa pagsiguro nga ang atong “balaan nga pagkawala matagbaw” dili mahimong “makaparalisar nga pagkawala sa paglaum”?

Cristina B. Franco, “Ang Kalipay sa Dili Hinakog nga Pagserbisyo”

Aron matudlo nga “gihimong sagrado ang gugma pinaagi sa sakripisyo”, si Sister Franco mipaambit og duha ka istorya—ang usa mahitungod ni Victoria ug ang usa mahitungod sa usa ka biyuda. Mahimo ka nga modapit og duha ka miyembro nga motabong nga andam mopaambit sa unsay ilang nakat-unan mahitungod sa gugma ug sakripisyo gikan niini nga mga istorya. Unsa pa nga mga kasinatian ang atong mapaambit



nga nagtudlo sa samang mga baruganan? Ang pagpasalida og video nga nagpakita sa Manluluwas nga nagserbisyo sa uban (sama sa “Light the World—Follow the Example of Jesus Christ [Pahayaga ang Kalibutan—Pagsunod sa Ehemplo ni Jesukristo]” sa LDS.org) mahimong moresulta sa usa ka diskusyon kon sa unsang paagi kita makasunod sa iyang ehemplo sa “pagserbisyo inubanan sa gugma ug sakripisyo.”

Henry B. Eyring, *“Kababayan-an ug Pagkat-on sa Ebanghelyo diha sa Panimalay”*

Ang mga tudling sa kasulatan ug mga kinutlo gikan sa “Ang Pamilya: Usa ka Pamahayag ngadto sa Kalibutan” nga gigamit ni Presidente Eyring sa iyang mensahe naghatag og panabut mahitungod sa kaimportante sa impluwensya sa mga babaye diha sa panimalay. Ang mga miyembro mahimong magtinabangay sa pagpangita niini nga mga tudling ug mga kinutlo ug maghisgot unsay ilang nakat-unan. Unsa nga mga pagdapit ang gihatag ni Presidente Eyring? Unsa nga mga saad ang iyang gihimo? Ikonsiderar kon sa unsang paagi ang pagkanta o pagbasa og usa ka himno mahitungod sa panimalay makapalambo sa diskusyon.

Dallin H. Oaks, *“Mga Ginikanan ug mga Bata”*

Samtang mangandam ka sa pagtudlo, ikonsiderar kon hain nga seksyon diha sa mensahe ni Presidente Oaks ang labing mahinungdanon sa mga tawo sa inyong korum o Relief Society. Ania ang posible nga mga pangutana nga mahimo nimong ipangutana aron sa pag-awhag og diskusyon mahitungod sa iyang mensahe: Sa unsang paagi ang moderno nga mga uso nga gihisgutan diha sa mensahe ni Presidente Oaks sa seksyon I molihok batok sa plano sa Langitnong Amahan? Unsa nga mga ehemplo sa matinud-anong mga babaye ang mahimo natong mapaambit nga nagrepresentar sa mga pamahayag mahitungod sa mga babaye diha sa seksyon II? Unsaon nato pag-awhag ang mga batan-on nga babaye nga atong kaila sa pagsunod sa piho nga tambag ni Presidente Oaks ngadto kanila diha sa seksyon III?

Russell M. Nelson, *“Ang Partisipasyon sa mga Sister sa Pagpundok sa Israel”*
Kon nagtudlo ka sa Relief Society, ikonsiderar

ang pagbahin sa mga sister ngadto sa upat ka grupo ug sa paghangyo sa matag grupo sa pagbasa mahitungod sa usa sa upat ka mga pagdapit diha sa mensahe ni Presidente Nelson. Ang mga grupo mahimong maghisgot kon unsay ilang ganahan mahitungod sa pagdapit, ilang mga kasinatian sa pagbuhat niini, ug mga ideya kon unsaon nila sa pagbuhat niini sa umaabut. Dayon ang matag grupo mahimong mopaambit ngadto sa tanan sa unsay ilang nahisgutan. Kon nagtudlo ka sa mga tighupot sa priesthood, mahimo nimo silang hangyoon sa pagpangita og mga pamahayag diha sa mensahe ni Presidente Nelson nga nagpakita kon unsa ang pagbati sa Langitnong Amahan mahitungod sa iyang mga anak nga babaye. Unsay atong mabuhat aron sa pagsuporta ug pag-awhag sa pag-apil sa mga sister diha sa pagpundok sa Israel?

M. Russell Ballard, *“Ang Panan-awon sa Katubsan sa mga Patay”*

Mahimo nimong dapiton ang mga miyembro nga modawat sa pagdapit ni Presidente Ballard ug mobasa sa Doktrina ug mga Pakig-saad 138 sa dili pa ang inyong diskusyon. Hangyoo ang mga miyembro sa pagpaambit sa ilang mga kasinatian ug mga panabut gikan niini nga seksyon panahon sa miting. Ang mga pangutana sama niini makatabang sa mga miyembro nga makasabut sa kaimportante niini nga pinadayag: Sa unsang paagi kini nga pinadayag makahatag kanato og kahupayan? ug Unsa nga mga kama-tuoran nga anaa niini nga pinadayag ang makaapekto ‘sa paagi sa atong pagpakabuhi matag adlaw?

Bonnie H. Cordon, *“Pagkahimong usa ka Magbalantay”*

Aron matabangan ang mga miyembro sa paghunahuna og mga paagi nga mahimo silang molambo sa ilang mga paningkamot sa pagpangalagad, mahimo nimo silang bahinon sa tulo ka grupo ug hangyoo ang matag grupo sa pagbasa sa usa sa tulo ka gingalanan nga mga seksyon sa mensahe ni Sister Cordon. Dapita sila sa pagpaambit sa mga baruganan sa pagpangalagad nga ilang nakat-unan. Sa unsang paagi ang pagpaningkamot nga mosunod niini nga mga baruganan makatabang kanato nga “mahimong mga magbalantay nga gikinahanglan sa Ginoo nga kita mahisama”? Dapita ang mga miyembro sa pagpaambit og mga kasinatian sa diha nga

ang pagpangalagad sa laing tawo nakatabang kanila nga mobati nga nailhan ug gihigugma sa Manluluwas.

Jeffrey R. Holland, *“Ang Pangalagad sa Pagpasig-uli”*

Makasugod ka og usa ka diskusyon mahitungod sa mensahe ni Elder Holland pinaagi sa pagdapit sa mga miyembro sa paghunahuna og usa ka relasyon sa ilang mga kinabuhi nga nagkinahanglan og pagkaayo o pakig-uli. Dayon mahimo silang mosiksik sa mensahe ni Elder Holland, nga mangita kon sa unsang paagi si Brad ug Pam Bowen nakatabang sa ilang amahan nga mamaayo. Unsa nga mga panalangin ang miabut gikan niini nga paningkamot? Unsa nga mga panabut ang maangkon sa mga miyembro nga makatabang nila sa pag-ayo sa ilang kaugalingon nga mga relasyon?

Neil L. Andersen, *“Nasamdan”*

Aron masugdan ang mensahe ni Elder Andersen, mahimo ninyong basahon og dungan ang Lucas 10:30–35. Sa unsang paagi nga kitang tanan susama sa tawo nga nabiktima sa mga tulisan? Sumala ni Elder Andersen, sa unsang paagi si Jesukristo mao ang “atong Maayo nga Samarianhon”? Unsaon nato pagdawat ang iyang pagpang-ayo? Tingali mahimo nimong dapiton ang mga miyembro sa pagpaambit og mga paagi diin ang Manluluwas miayo sa ilang mga samad o mga samad sa mga minahal. Mahimo usab nilang siksik ang mga pulong ni Elder Andersen sa pagpangita og makadasig nga mensahe nga mahimo nilang mapaambit sa usa ka tawo nga samaran.

Russell M. Nelson, *“Ang Sakto nga Ngalan sa Simbahan”*

Mimando si Jesukristo nga ang Simbahan pagatawgon sa iyang ngalan. Makatabang ka sa mga miyembro nga mapalambo ang ilang tinguha sa pagsunod niini nga direksyon pinaagi sa pagdapit kanila sa pagsiksik sa mensahe ni Presidente Nelson, nga mangita sa mga rason nganong “ang ngalan sa Simbahan dili mausab.” Dayon, dapita sila sa pagsiksik sa katapusan sa mensahe ni Presidente Nelson alang sa mga saad nga iyang giingon nga moabut samtang maningkamot kita sa “pagpahiuli sa saktong ngalan sa Simbahan sa Ginoo.” Unsa ang atong mahimo sa pagtabang niini nga paningkamot?

Henry B. Eyring, *“Sulayi, Sulayi, Sulayi”*
 Si Presidente Eyring mihatag og “duha ka labing importanting mga pangutana”:
 “Unsay angay nakong buhaton aron madala ang ngalan [sa Manluluwas] ngari kanako?” ug “Unsaon nako sa pagkahibalo nga ako naglambo?” Tingali mahimo nimong isulat kini nga mga pangutana diha sa pisara ug dapiton ang mga miyembro sa pagpaambit og mga panabut nga ilang naangkon mahitungod niini nga mga pangutana gikan sa mensahe ni Presidente Eyring ug sa ehemplo ni Sister Eyring. Si Presidente Eyring naghisgot usab sa kanta nga “Maninguha Kong Mahimong Mahisama Kang Jesus” (*Songbook sa mga Bata*, 40–41). Unsa ang madugang sa mga pulong niini nga kanta ngadto sa diskusyon?

Dale G. Renlund, *“Magpili Kamo Niining Adlaw”*
 Ang mga miyembro mahimong maghuna-huna og tawo nga gusto nilang awtagon sa pagsunod sa plano sa Langitnong Amahan, sama sa usa ka sakop sa pamilya o usa ka tawo nga ilang gipangalagaran. Dayon mahimo nilang ribyuhon ang mensahe ni Elder Renlund aron madiskubrihan kon unsa ang gibati sa Langitnong Amahan ug ni Jesukristo ngari kanato. Giunsa Nila kita sa pagtabang nga mopili sa pagkamasulundon? Unsa ang gisugyot sa ilang ehemplo kon sa unsang paagi kita makapalambo sa atong mga paningkamot diha sa atong mga pamilya ug sa atong pagpangalagad?

Gary E. Stevenson, *“Pagbantay sa mga Kalag”*
 Kadtong imong gitudloan tingali nakapangutana og sama niini nga pangutana gikan sa mensahe ni Elder Stevenson: “Unsaon nato pagkahibalo nga nangalagad kita sa paagi sa Ginoo?” Tingali makabenipisyo sila sa paghisgot sa posibling mga tubag niini nga pangutana nga ilang nakit-an diha niini nga mensahe. Sa laing paagi, mahimo ka nga modala og hulagway sa Manluluwas isip usa ka magbala-lantay (tan-awa sa *Libro sa mga Hulagway sa Ebanghelyo* [2009], nu. 64) ug dapita ang mga miyembro sa pagpaambit og usa ka kamatuoran gikan sa mensahe ni Elder Stevenson nga girepresentaran sa hulagway. Ang mga miyembro makahimo dayon sa pagpaambit sa mga butang nga nadasig sila sa pagbuhat isip resulta sa diskusyon.



Mga Miting sa Ikaupat nga Dominggo (Oktubre–Disyembre 2018)

PERSONAL UG TIBUOK PAMILYA NGA PAGTUON SA KASULATAN

Sa ikaupat nga mga Dominggo sa 2018, ang mga elders quorum ug mga Relief Society maghisgot sa personal ug tibuok pamilya nga pagtuon sa kasulatan. Ang mga lider ug mga magtutudlo mahimong mopili sa paggiya sa mga diskusyon mahitungod sa bisan asa sa mosunod nga mga baruganan.

Personal nga Pagtuon sa Kasulatan

Aron makatabang sa pagdasig sa mga miyembro nga kanunay nga magtuon sa kasulatan, ikonsiderar ang pagdapit sa matag miyembro nga mopili og usa sa mosunod nga mga tudling aron basahon: Josue 1:8; 2 Timoteo 3:15–17; 1 Nephi 15:23–25; 2 Nephi 32: 3; Doktrina ug mga Pakigsaad 11:22–23; 33:16–18. Human sila makagahin og panahon sa pagbasa ug pagpamalandong, mahimo nilang ipaambit ngadto sa laing tawo sa kwarto kon unsay gitudlo sa ilang tudling kanila mahitungod sa pagtuon sa kasulatan.

Mahimo usab nimong dapiton ang mga miyembro sa pagpaambit sa ilang mga pagpamatuod sa mga panalangin nga ilang nadawat samtang nagtuon sila sa mga kasulatan. Ang mga miyembro mahimo usab nga makabenipisyo sa pagpaminaw sa usag usa nga mopaambit sa unsay ilang gibuhat aron mahimong makahuluganon ang personal nga pagtuon sa kasulatan

(tan-awa ang pipila ka mga ehemplo sa “Mga Ideya sa Pagpalambo sa Imong Personal nga Pagtuon sa Kasulatan” diha sa *Dali, Sunod Kanako—Alang sa mga Indibidwal ug mga Pamilya*). Mahimo usab nimong ipaambit sa mga miyembro ang gitudlo ni Elder Quentin L. Cook mahitungod sa “mga katuyoan ug mga panalangin nga may kalabutan sa [kausaban sa iskedyul sa Dominggo] ug sa ubang bag-ong mga kausaban” (tan-awa sa “Lig-on ug Malungtarong Pagkakabig ngadto sa Langitnong Amahan ug ni Ginoong Jesukristo,” *Liahona*, Nob. 2018). Ang mga miyembro mahimong maghisgot kon sa unsang paagi ang atong mga paningkamot sa pagpalambo sa atong pagtuon sa kasulatan makatabang sa pagkab-ut niini nga mga katuyoan.

Pagkamakanunayon sa Pagtuon sa Ebanghelyo

Gitandi ni Elder David A. Bednar ang makanunayon nga pagtuon sa kasulatan

sa tibuok pamilya ug ang ubang matarung nga mga binuhatan ngadto sa gagmay nga mga agi sa brutsa nga nagporma sa matahum nga painting. Aron matabangan ang mga miyembro nga makasabut sa gitudlo ni Elder Bednar, tingali mahimo ka nga mopakita og usa ka painting diin tataw ang mga agi sa brutsa sa pintor. Ang mga miyembro mahimo dayong mobasa sa analohiya ni Elder Bednar, nga makita sa “Labaw nga Makugihon ug Mabuhaton diha sa Panimalay” (*Liahona*, Nob. 2009, 19–20), ug maghisgot kon sa unsang paagi ang mga agi sa brutsa niini nga painting susama sa pagtuon sa kasulatan. Unsay nakatabang kanato sa pagbuntog sa mga babag sa makanunayon nga pagtuon sa ebanghelyo, kon nagtuon man kita nga tinagsa o uban sa atong mga pamilya? Unsa ang gisaad ni Presidente Russell M. Nelson ngadto niadtong “makugihon nga molihok aron sa pagbag-o sa [ilang mga panimalay] ngadto sa usa ka sentro sa pagkat-on sa ebanghelyo”? (tan-awa sa “Ang Mahimong Labing Dalaygon nga mga Santos sa Ulahing mga Adlaw,” *Liahona*, Nob. 2018). Hatagi og panahon ang mga miyembro nga mamalandong ug mopaambit sa unsay nadasig sila nga buhaton tungod sa ilang nakat-unan karon.

Mga Diskusyon sa Ebanghelyo diha sa Panimalay ug sa Simbahan

Usa ka paagi sa pagtabang sa mga miyembro nga makasabut sa kaimportante sa mga diskusyon sa ebanghelyo diha sa panimalay ug sa simbahan mao ang pagdapit sa usa ka bata ug usa ka ginikanan sa pagkanta sa “Tudloi ko Paglakaw sa Kahayag” (*Songbook sa mga Bata*, nu. 70). Unsa ang gitudlo kanato sa inter-aksyon tali sa bata ug sa ginikanan diha sa mga pulong niini nga awit mahitungod sa pagkat-on sa ebanghelyo? Tingali adunay pipila ka mga miyembro nga andam nga mopaambit sa ilang mga hunahuna kon unsaon sa paghimo sa mga diskusyon sa ebanghelyo nga natural ug kanunay nga parte sa kinabuhi sa pamilya. Ang mosunod nga mga kasulatan makahatag og mga ideya: Deuteronomio 11:18–20; 1 Pedro 3:15; Mosiah 18:9; Moroni 6:4–5, 9; Doktrina ug mga Pakigsaad 88:122. Sa unsang paagi ang atong mga diskusyon diha sa panimalay ug sa simbahan makapaduol nato ngadto sa Langitnong Amahan ug ni Jesukristo?

MGA IDEYA SA PAGSUPORTA SA PAGTUON SA KASULATAN DIHA SA PANIMALAY SA 2019

Sa 2019, ang tanang mga miyembro sa ward magtuon sa Bag-ong Tugon—sa panimalay ug sa Sunday School ug Primary. Sa mga miting sa korum ug Relief Society, ang mga lider ug mga magtutudlo kinahanglang mopa-hinumdom sa mga miyembro mahitungod sa mga kasulatan nga naka-iskedyul alang sa umaabut nga semana diha sa Dali, Sunod Kanako—Alang sa mga Indibidwal ug mga Pamilya nga ilang matun-an sa panimalay. Kining yano nga pahinumdom mahimong ipaambit pinaagi sa pagsulat, sa pagsulati, o gamit ang duha.

Ang mga lider ug mga magtutudlo sa elders quorum ug Relief Society makaawhag niini nga pagtuon sa kasulatan pinaagi sa pagpangita og mga oportunidad sa pagdala og mga panabut sa Bag-ong Tugon diha sa mga miting sa elders quorum ug Relief Society. Sama pananglit, ang mga lider ug mga magtutudlo sa elders quorum ug Relief Society mahimong:

- Motimaan kon sa unsang paagi ang mga istorya o doktrina gikan sa ilang pagtuon sa kasulatan magamit diha sa leksyon sa elders quorum o Relief Society. Ang mga lider ug mga magtutudlo mahimong mopaambit niini nga panabut sa usa ka miting sa Dominggo.
- Mopaambit sa mga miyembro kon sa unsang paagi ang mga istorya o doktrina gikan sa Bag-ong Tugon magamit diha sa ilang mga responsibilidad sa elders quorum o Relief Society.
- Mopaambit sa mga miyembro og positibo nga mga kasinatian nga aduna sila kalabut sa pagtuon sa Bag-ong Tugon diha sa panimalay ug moawhag sa mga miyembro sa pagpaambit usab niini nga mga kasinatian.





“Ang atong Ginoo ug Manluluwas, si Jesukristo, pinaagi sa dili masukod nga gasa sa Iyang Pag-ula, wala lamang moluwas kanato gikan sa kamatayon ug mitanyag kanato, pinaagi sa paghinulsol, og kapasayloan sa atong mga sala, apan Siya mibarug usab nga andam sa pagluwas kanato gikan sa mga kasubo ug mga kasakit sa nasamdan natong mga kalag.

“Ang Manluluwas mao ang atong Maayo nga Samarianhon, nga gisugo ‘sa pag-ayo sa mga masulob-ong kasingkasing.’ [Luke 4:18]. Moduol Siya kanato samtang moagi ra ang uban. Uban sa kalooy, ibutang Niya ang Iyang makaayo nga tambal sa atong mga samad ug bugkusan kini. Siya moagak kanato. Siya nagpakabana kanato. Siya nagdapit kanato, ‘Ngari kanako . . . ug Ako moayo [kaninyo]’ [3 Nephi 18:32].”

Elder Neil L. Andersen sa Korum sa Napulog Duha ka mga Apostoles, “Nasamdan,” 84–85.

Maayong Samarianhon,
ni Annie Henrie Nader



“Ang bag-o nga nakasentro sa panimalay, gisuportahan sa Simbahan nga integrated nga kurikulum adunay potensyal sa pagpakita sa kalig-on sa mga pamilya, samtang ang matag pamilya mosunod sa pagbuhat nga mahunahunaon ug mainampingon nga mousab sa ilang panimalay ngadto sa usa ka santuwaryo sa hugot nga pagtuo,” miingon si Presidente Russell M. Nelson atol sa panapos nga sesyon sa ika-188 nga Semiannual nga Kinatibuk-ang Komperensya sa Simbahan. “Ako mosaad nga samtang makugihon kamo nga molihok aron sa pagbag-o sa inyong panimalay ngadto sa usa ka sentro sa pagkat-on sa ebanghelyo, sa hinayhinay ang *inyong* mga adlaw nga Igpapahulay mahimong ikahimuot. Ang *inyong* mga anak maghinam-hinam sa pagkat-on ug pagsunod sa mga panudlo sa Manluluwas, ug ang impluwensya sa kaaway sa *inyong* kinabuhi ug sa *inyong* panimalay makuhaan. Ang mga kausaban sa inyong pamilya dako ug magpadayon.”

ANG SIMBAHAN NI
JESUKRISTO
SA MGA SANTOS
SA ULAHING MGA ADLAW